





# এই ভারতের পুণ্যতীর্থে

শ্রীদেবন



---

এ. মুখার্জী অ্যান্ড কোং প্রাঃ লিঃ  
২ বঙ্কিম চ্যাটার্জী স্ট্রীট, কলিকাতা-১২

**EI BHARATER PUNYATIRTHE**

*Travelogue*

By Sri Deval

Price : Rs. 6'00

প্রকাশক :

শ্রীঅমিয়রঞ্জন মুখোপাধ্যায়

ম্যানেজিং ডিরেক্টর :

এ. মুখার্জী অ্যান্ড কোং প্রাঃ লিঃ

২ বঙ্কিম চ্যাটার্জী স্ট্রীট, কলিকাতা-১২

প্রথম সংস্করণ : ফাল্গুন, ১৩৬৬

মূল্য : ৬'০০ ( ছয় টাকা ) মাত্র

প্রচ্ছদপট শিল্পী :

শ্রীসুভাষ সিংহরায়

মুদ্রাকর :

শ্রীরামচন্দ্র দে

ইউনাইটেড আর্ট প্রেস,

২৫বি হিদারাম ব্যানার্জী লেন

কলিকাতা-১২



## উৎসর্গ

অঙ্গিরা বশিষ্ঠাদি পথিকৃৎ ঋষিদের  
বাদরায়ণ বুদ্ধ শঙ্করাদি মহাতপা ঋত্বিকদের  
এবং  
ভারত-তীর্থের অগণিত মহাপ্রস্থানকামী  
যাত্রীদের  
শ্রীচরণাবিন্দে



## ভূমিকা

এই পুস্তকের ঘটনা ও চরিত্র মনোরাজ্যের বিজ্ঞপ্তি মাত্র। তবে বস্তু-ভিত্তি নেই একথা বলতে পারি না। পাঁচ ছয়ারে যে মাগন পেয়েছি তাকে পুটপাকে প্রস্তুত করেছি নিজের মহানসে—নাম, রূপ, গন্ধ, আশ্বাদ বাস্তব থেকে এসেছে ঠিকই...কিন্তু বাস্তবে তারা নেই।...পাতা উলটতে উলটতে হয় তো মনে হবে “আমাদের ইয়ে যে!”...আরও একটু এগলে মনে হবে “না, ইয়ে নয় ; হয়তো—আচ্ছা, দেখাই যাক”...

আর একটি কথা। এই পুস্তকে কোন মতবাদ নেই। চিন্তনদী নিজের মনে পথ কেটে এগিয়েছে..রাস্তায় পেয়েছে ঝোপঝাড়, পাথর, বালি, ফুল, পাতা, সবুজ তৃণ, শুকনো ঘাস...আবর্ত..তরঙ্গ...তরতর গতি...ঘুমিয়ে ঘুমিয়ে চলা...প্রপাতের জ্রুঙ্ক শাদূলবিক্রীড়িত গমন...সমতলে শালিনী ছন্দ..সাগরে অসুংগমিতা...

—ঐচ্ছিক—



## নিবেদন

শ্রদ্ধেয় শ্রীযুক্ত ‘এম. কে. বি’-কে নতশিরে প্রণাম জানাচ্ছি। বইখানা হয় তো অসম্পূর্ণই থেকে যেত যদি না গুঁর উৎসাহ ও আশ্বাস পেতুম—“বই তুমি শেষ কর, প্রকাশনের জ্ঞতা ভাবতে হবে না।”

ভাবতে হয়ও নি। এ. মুখার্জী অ্যাণ্ড কোম্পানীর শ্রদ্ধেয় শ্রীযুক্ত অমিয়রঞ্জন মুখোপাধ্যায় যে এক কথায় বইখানা ছাপাতে রাজী হবেন তা ভাবিনি। কাগজের বাজারে তখন “গুরুত্বপূর্ণ পরিস্থিতি”। এখনও। মিল থেকে যা কাগজ বেরোয় তার মোটা অংশ নিয়ে নেন সরকার বাহাদুর। তাঁদের

অনেক বাঁশি, অনেক কাঁসি, অনেক আয়োজন।

ঘরেও তাঁদের রাখতে হয় বহু লোকের মন ॥

সুতরাং নিরুপায়। আর এক অসুবিধা এই যে সাধারণের জ্ঞতা যে কাগজ বরাদ্দ আছে গতি তার দুর্লভ্য। ফলে, স্কুল-কলেজের পাঠ্য পুস্তকই সব ছাপান সম্ভব হয় না। আমরা অনেক ভাবে মার খেয়েছি; কাগজের মার হবে মোক্ষম। তা, দুবছর হবে—এতদিন বসে ছিলুম পথ চেয়ে আর কাল গুণে, আর শ্রীভগবানের নিকট প্রার্থনা জানিয়ে যে সাদা কাগজ যেন সাদা থাকে। কিন্তু—যাকগে। শেষ পর্যন্ত যে বইখানা ছাপান সম্ভব হল তার একমাত্র কারণ অমিয়বাবুর হিতৈষণা এবং স্বকর্মে পরম নিষ্ঠা। সর্বান্তঃকরণে গুঁকে কৃতজ্ঞতা জানাচ্ছি।

শ্রদ্ধেয় শ্রীযুক্ত শোভাকর চট্টোপাধ্যায় এবং শ্রদ্ধেয় শ্রীযুক্ত অনিল বসু খুবই যত্নসহকারে বইয়ের প্রুফ দেখে দিয়েছেন। একাজে গুঁদের দক্ষতা অসাধারণ এবং সত্যিই প্রশংসনীয়। গুঁদের আমি অশেষ ধন্যবাদ জানাচ্ছি। বইয়ের মুদ্রণাদি ব্যাপারে যা-কিছু ত্রুটি থেকে গেল তার জ্ঞতা দোষী আমি। আশা করি, সহৃদয় পাঠক নিজগুণে আমার অপরাধ মার্জনা করবেন। ইতি—

কলিকাতা

— গ্রন্থকার

দোল পূর্ণিমা, ১৩৬৬



প্রথম অধ্যায়

নব নব রূপে এসে প্রাণে

( ক )

হরিন্দ্রান





প্রথম অধ্যায় : নব নব রূপে এস প্রাণে

হরিদ্বার	...	...	১—৩৮
গয়াধাম	...	...	৪১—৮০

দ্বিতীয় অধ্যায় : সকল গরল ভেল

কালীঘাট	...	...	৮৩—১১৪
কাশীধাম	...	...	১১৭—১৫২
জন্মভূমিশ্চ	...	...	১৫৫—১৭৪

তৃতীয় অধ্যায় : ওঁ মধু ওঁ মধু ওঁ মধু

মাষ্টার মশায়	...	..	১৭৭—২০৪
পুরীধাম	...	...	২০৭—২৩৫



## হরিদার

### অথ কথারম্ভঃ

কো অন্ধা বেদ ?

কবে শুরু হয়েছিল এই যাত্রা কে জানে ! হয় তো কেউ জানেনা ! বৈদিক ঋষি  
প্রশ্ন করেছিলেন,

কো অন্ধা বেদ ক ইহ প্র বোচৎ

কুত আজাতা কুত ইয়ং বিসৃষ্টিঃ ।

অর্বাণ্ দেবা অস্ম বিসর্জনেনা-

তথা কো বেদ যত অবভূব ॥<sup>১</sup>

কে জানে, বলতেই বা কে পারে, কখন কোথা হতে আরম্ভ হলো এই  
বিসৃষ্টি ? জ্যোতির্ময় দেবগণ এক সঙ্গেই কি আবির্ভূত হলেন ? তবে তো তার  
আগেকার বার্তা তাঁরাও জানেন না ! কে জানে ? যুগ যুগান্ত ধরে এই প্রশ্নের  
জবাব খুঁজে চলেছে মানব, সীমাহীন পথ ধরে চলেছে পথিক, পায়ের ছাপ  
খুঁজে চলি আমি। হয় তো পথের শেষে এই ধাঁধার উত্তর মিলবে, কিন্তু তখন  
কে-ই বা কার সঙ্গে হৃদগুঁদা দিয়ে কুশল প্রশ্ন করে ? আকাশের ওপারে কি  
আমি গাছের অঙ্ককার আছে, না আছে আমাদের মাঠের শেষের বটতলার সেই  
ম্লিষ্ট ছায়া যেখানে ঘনায়মান সঙ্ক্যার প্রতীক্ষায় ‘এক যে ছিল রাজা’র দেশের  
গল্প শুনেছি ? ডে-লা-মেয়ার ( de la Mare )-এর মার্থা (Martha) কি পথ-  
ক্রান্ত যাত্রীদের নিয়ে রামধনুর গায়ে হেলান দিয়ে নিশ্চিন্তে বসে শ্রোতাদের প্রাণে  
আনন্দ-হিল্লোল জাগায় ? নিরবচ্ছিন্ন এই গতির যে একদিন বিরাম হবে, জোর  
ক’রে কে তা বলতে পারে ? পথের শেষ প্রান্তে যদি সত্যিই এক দিন এসে  
দাঁড়াই তখন হয় তো দেখবো সবটাই ছিল দুঃস্বপ্ন। রাধাচক্রে বসে ঘুর-  
পাক খাচ্ছি, খাবি খাওয়ার অবস্থা এলে হয় তো শ্রীকৃষ্ণ যন্ত্র থেকে নাবিয়ে  
রেহাই দেবেন। কিন্তু তা ই বা কে জানে ? রাধাচক্র চলে, শুধু এটুকুই জানি  
.....ভ্রাময়ন্ সর্বভূতানি যন্তারুণানি মায়য়া<sup>২</sup>...মনে পড়ে বেদেদের কথা ;  
কোথাও দাঁড়ায় না, কোথাও নীড় রচনা করে না ; আজ আমাদের গায়ের

বটতলায়, কাল পদ্মানদীর কাশবনের আড়ালে, তারপর দিন ঘনচ্ছায় মসীমাথা ওপারের ঐ গ্রামের ধারে ; কোথা থেকে এলো, কোথায় যাবে, কী এদের পাথেয়, কেন ঘুরে মরছে—নাশ্তো ন চাদিন্চ সংপ্রতিষ্ঠা<sup>১</sup>.....যেমন আমরা ‘চরৈবেতি’, ‘চরৈবেতি’ ক’রে কবে যে বেরিয়ে প’ড়েছি, কোথা যে যাচ্ছি, কেনইবা যাচ্ছি—কো অন্ধা বেদ ? স্বপ্নের ভিতর যেমন স্বপ্ন দেখার কথা ভাবি তেমনি জীবনের ছেদহীন গতিপথে নূতন যাত্রার ছক আঁকি, পাথেয় সংগ্রহ করি, এবং যাত্রা করি শ্রীহরি স্মরিয়া.....

## ॥ ১ ॥

১৯২৬ সাল, তখন আমি দিল্লিতে ; প্রায় এক বছর ঘরছাড়া । ছোট্ট একটি পাহাড়ের উপর ছিল কোয়ার্টারস্, পাশে ‘বি-বি সি-আই’র রেল লাইন ; স্টেশন দশ মিনিটের রাস্তা ; সকাল দুপুর সন্ধ্যা সব সময়ই গাড়ীগুলো ডাক দিয়ে যায় ; মন উদাস হয়, ভাবি কবে যে দেশের মাটি আবার দেখবো । রেল লাইনের ওপারে বাবলাগাছ, তারপর একটা খাল, তার উত্তর-পূর্ব কোণে একটা বন ; গাছের মাথাগুলোর দিকে তাকাই—এক নিবিড় ঘন সবুজ আন্তরণ কতদূর চলে গেছে...সারা রাত এর উপর দিয়ে চলে গেলে কানপুর... তারপর এলাহাবাদ...মোগলসরাই...গয়া...আসানসোল...হাওড়া.....একটা ট্রেন যায় ; কে জানে কোথাকার গাড়ী ! আমার এক দাদা থাকেন বিহারে ; স্টেশনের ধারে বাসা ; ট্রেনের টাইমগুলো তাঁর মুখস্থ...মেইল আসছে, ছটা পনের, চা দে রে !...প্যাসেঞ্জার এলো, পৌনে নয় ; যাই, স্নানটা সেরে ফেলি .....পারসেল গাড়ীটা আজ লেইট্ ! সেরেছে ! আফিসে দেরি না হয়ে যায় ! .....পিসীমা, মিক্‌ষ্ট্ চলে গেল, দেড়টা ; এখনও পূজো শেষ হলো না ? ...৭নং ‘ডাউন’ টা যাচ্ছে ; চা-এর জলটা চাপিয়ে দে রে ! আফিস থেকে সব ফিরবে...‘এক্সপ্রেস্’টা চলে গেল, পৌনে এগার ; আজ আর রাস্তিরে ঘুম হবে না দেখছি, বায়ুটা চ’ড়েছে.....

রেলগাড়ী সম্বন্ধে আমার এখনও ছোটবেলাকার বিস্ময় ও স্নেহনা, ভাবি কোথা থেকে আসে কোথা চলে যায় ! কতো দিন স্টেশনে গিয়ে যাত্রীদের ওঠা-নাবা দেখেছি...কোন দূর দেশ থেকে আসে, কোন জনসমূহে মিলিয়ে যায় ; চিনি না এদের কাউকে, কিন্তু সকলেই যাত্রী, এক ডোরে বাঁধা, এগোচ্ছে শ্রীভগবানের

সন্ধানে। ট্রেনের বাঁশি শুনলে প্রাণের তাগিদ আসে রাস্তায় বেরিয়ে পড়ার জন্ত—বিশেষ করে ছুটির দিনে।...রববার দিন গিয়েছিলুম সহরে; অচেনা রাস্তাঘাট, অচেনা বাড়ীঘর, অচেনা মুখ; ট্রামের ঘরঘর, টাঙ্কার খটখট, লোকজনের ছুটোছুটি, কেনাবেচার কোলাহল; অদূরে দিল্লি স্টেশন থেকে বাঁশি বাজে...কোথায় এসেছি! মেলা বসেছে যেন; পথ ভুল করে অসহায় ভাবে তাকাই... আলাদীনের সহর—দোকানপাট, গাড়ীঘোড়া, লোকজন সব হয় তো এক নিমেষে উবে যাবে!...এ আমার ঘর নয়...ঐ বাঁশি বাজে; মন, চলো নিজ নিকেতনে...বিদেশ এটা, বিদেশীর বেশে মিছে আমি হয়রান হচ্ছি...একটা টিবি উপর বসে গাঁয়ের কথা ভাবি...কবে যে যাবো দেশে...হুগলী নদীতে বোধ হয় জেলেরা এখন মাছ ধরছে; একটু পরই হাওড়া স্টেশন...বাংলা দেশে ঢুকতেই মনটা নরম হয়ে যায়...বাংলার মাটি, বাংলার জল, বাংলার আকাশ-বাতাস, ভাষা-সঙ্গীত-সাহিত্য—বড্ড নরম; লোকে বলে সর্বত্রই কাঁদুনে সুর.....মানুষ-গুলো মৃদুনি কুসুমাদপি; কিন্তু বজ্রকঠোর হতে পারি না কেন? আমার বোল আসে রাশি রাশি—ফল হয় ক’টা? ঝরে পড়া মুকুলের মতো নিষ্ফলতাই কি আমাদের জীবন?

..ভদ্র মোরা শাস্ত বড়ো, পোষ-মানা এ প্রাণ,

অলসদেহ ক্লিষ্টগতি, গৃহের প্রতি টান।.....

আজ হঠাৎ মেঘ করেছে; অদূরে কোথাও বৃষ্টি হয়ে থাকবে, হাওয়াটা ভিজ়ে, বিরঝিরে; নীচে একটা কাঁচা রাস্তা...ঠুনঠুন আওয়াজ ভেসে আসে...ঘণ্টা বাজিয়ে ধুলো উড়িয়ে একপাল গরু ঘরে ফিরে যায়; আকাশে মেঘ ও রং-এর খেলা—এক ফালি বাংলাদেশ...তুলসীমঞ্চ সীমের প্রদীপ দিচ্ছেন দিদিমা...ঠাকুর ঘরের আলো জলে; শাঁখ বাজিয়ে ঠাকুরকে ভোগ দেওয়া হলো—এলাচদানা ও জল; আবার শাঁখ বাজে; মশারি ফেলে ঠাকুরকে শোয়ানো হলো...ঠাকুরঘরের দাওয়ায় বসে দিদিমা জপ করছেন...সন্ধ্যাতারা সজল নয়নে চেয়ে আছে...চোখ মুছে ঘরে ফিরলুম।

॥ ২ ॥

এসে দেখি ক্ষেপু মুখ গুঁজে কাঁদছে। বাবড়ে গেলুম। কিছুদিন হলো চাকরির খোঁজে এসেছে; ক্যা ক্যা করে ঘুরে বেড়াচ্ছে, আশার আলো অনেকেই দেখায়—কিন্তু কার্যতঃ আলেয়া। স্বর্গ, মর্ত্য, পাতাল, সর্বত্রই

আলোড়ন সৃষ্টি করেছে, কন্দি ফিকির কম খাটায় নি...হরি সংকীর্তনে কঁদেছে, বেলুড়-দক্ষিণেশ্বর ক'রে হেদিয়ে গেছে, কালীঘাটের রাস্তায় সব বড় বড় জ্যোতিষীকে হাত দেখিয়েছে ; প্রত্যহ গঙ্গাস্নান, মা কালীর চরণামৃত পান, মাস্তুলিক বিষ্ণুপত্রধারণ, শান্তিসন্তায়ন, নারায়ণকে তুলসী দান—এসব প্রচলিত রাস্তায় অনেক হেঁটেছে ; ফকির সাহেবের ‘আজব’ তাবিজ ই’স্তেমালা করেছে ; ৫১/৫ দক্ষিণা দিয়ে উগ্রভৈরব তান্ত্রিকের মন্ত্রসিদ্ধ জবাফুল নিয়ে ম্যাকিনন্ট ম্যাকেক্সির বড়বাবুকে স্পর্শ করে দিয়েছে ; এই প্রক্রিয়াতে নাকি চাকরি হাতের মুঠোয় এসে যায়, ব্রহ্মা-বিষ্ণু-শিবও ঠেকাতে পারেন না । বড়বাবু ফুলের আঘাতে ভাবাচাকা খেয়ে গেছেন, কিন্তু চাকরি দেন নি । ক্ষেপু মা কালীকে নালিশ জানিয়েছে, ‘মা ! তুই যখন মুখ তুলে চাইলি না, তখন উগ্রভৈরবকে দোষ দিয়ে আর কী করবো’ । সেদিনই কালীঘাটে এক সাধুবার সঙ্কে দেখা ; একটা মন্ত্র দিয়ে তিনি আদেশ করলেন, ‘রোজ জপ করবি, দিল্লি চলে যা, চাকরি তোর জগু অপেক্ষা করেছে সেখানে ।’ মন্ত্রের জগু গচ্ছা কতো লেগেছিলো জানতে চেয়েছিলুম ; আমতা আমতা ক’রে ক্ষেপু বললে, ‘গচ্ছা মানে ? এক পয়সাও নিতে চান নি ।’ ‘অনিচ্ছা সঙ্কে কিছু ?’ ‘তা, মানে আমার পীড়াপীড়িতে বাবাজী বলেছিলেন, “আচ্ছা, কিছু না নিলে যখন তুই মনে ব্যথা পাবি তখন পূজোর জগু দে পাঁচটা টাকা” ’ বলে ক্ষেপু । ...পাঁচটাকা মূল্যের অরিনিসুন্দন, চাকরিপ্রদানকুশল মন্ত্রটি চতুর্দিকে ক্ষেপণ ক’রে প্রতীক্ষমাণ পদটির জগু আজ চার মাস কী নাজেহাল-ই না হ’চ্ছে ; সব আশ্বিসের কর্তারাই এক বাণী শুনিতে আসছেন, ‘হেথা নহে, হেথা নহে, অগু কোথা আর’ । ভাবলুম চার মাস ধ’রে সাধা মন্ত্রটি বোধ হয় আজ যমুনার জলে বিসর্জন দিয়ে এসেছে । জিজ্ঞেস করি, ‘কিরে ক্ষেপু ? চাকরি হলো না বলে ছোট ছেলের মতো কাঁদছিস ?’ ক্ষেপু উত্তর করে, ‘তা নয় ; চিঠি এসেছে, দুঃসংবাদ আছে ।’ শঙ্কিত হ’য়ে ফ্যালফ্যাল করে তাকাই । ‘দয়ালদার চিঠি এসেছে, কালকে এসে পৌঁছবেন ; আগে আসতে পারেন নি কারণ—’, আবার কাঁদে । ক্যাসাদে পড়লুম ; এর জগু কাঁদে কেন ? তরু-কি—কিন্তু তাই-ই বা কি করে হবে ? একটু সামলে নিয়ে ক্ষেপু বলে, ‘দয়ালদা পূর্বে আসতে পারেন নি— ।’

: থানা লাগাউ ?

: ই্যা, ই্যা, থানা লাগাও । চোপর দিন আজ খাওয়া হয় নি ; অনেকগুলো

ভেট-মুলাকাতের ঝামেলা ছিল ; যে হোটেলটায় মাঝে মাঝে খাই সেখানে যেতে যেতে দেড়টা, সব সাক্ষ হ'য়ে গেছে ; এক গ্লাস ঘোলের সরবৎ খেয়ে আজ দিন কাটিয়েছি ।

পাঁড়েজী রুটি তরকারী নিয়ে এলো ; 'গোস্ত' আছে শুনে সক্রিয় হয়ে ক্ষেপু জানায় মাংস আজ আর থাকে না । আমার কটোরা থেকে মাংসের দিবি গন্ধ বেরুচ্ছে । ক্ষেপু মন্তব্য করে, 'পাঁড়েজী বেশ রাঁধতে শিখেছে দেখছি, তোফা গন্ধ—'

: একটু দিক না ?

: আজকে আর থাকো না ভাবছিলুম ।

: চেখে দেখ ; তাতে আর দোষ কি ?

পাঁড়েজী এক হাত দিয়ে গেল । গুরুয়াটুকু বেশ চেটে খাচ্ছে দেখে পাঁড়েজীকে ইশারা করি ; পাঁড়েজী এক কটোরা 'গোস্ত' পাতে ঢেলে দিল । খান্না হ'য়ে ক্ষেপু ধমকায়, 'কেয়া কিয়া জী ? এতনা কাহে দিয়া ? সব বরবাদ না আব হউগা ?'

যতোটা খাবি খা না ?

: জারা সা তো হয়, বাবু ।

: বুদ্ধিগুদ্বি তোমার কুছ নেহি হয় !—এই বলে ক্ষেপু খানিকটা খায় ; তারপর উপরোধে ঢেঁকি গিলতে হয়, সামান্য বরবাদ করা অন্তায় ইত্যাদি মন্তব্য ক'রে বিশখানা রুটি দিয়ে সব চেটেচুটে খেয়ে ফেললো ।

শুয়ে শুয়ে একটা বই দেখছিলুম ; ক্ষেপু বিছানায় উসখুস করছে ; জিজ্ঞেস করলুম, 'কাদছিলি কেন ?'

: মণিদা আসতে পারবেন না—

: সে তো পুরনো কথা, অসুখ করেছে, শয্যাশায়ী...তবে কি মারা গেছেন নাকি রে ?

: না ; তবে বলা যায় না কি হয় ।

: চাকরির কিছু হলো ?

: এক জায়গায় লেগে যেতে পারে । বড্ড হাঁটাইটি করেছি আজ, ঘুম পাচ্ছে, বাতিটা নিবিয়ে দে ।

বাতি নিবিয়ে মণিদার কথা ভাবছিলুম...তবে কি মারা গেলেন ? মণিদা সত্যিই মণিদা...সরল, স্নিগ্ধ, নিরীক্সাট জীবন...দয়ালদা যেমন আধ্যাত্মিক জীবনে

একটি সরল রেখা টেনে তার উপর দিয়ে যাতায়াত করেন, মণিদাও তেমনি গার্হস্থ্য জীবনের ছায়াশীতল কুঞ্জবীথিকায় বিহার করেন; কুন্ডমেলায় আমাদের সঙ্গে হরিষার যাবেন ঠিক ছিল—মণিদা, দয়ালদা দুজন-ই প্রতীক্ষায় ছিলুম; কিন্তু মণিদা পড়লেন অস্থখে...‘ক্ষেপু! দয়ালদা আর কিছু লিখেছেন—মণিদার সম্বন্ধে?’

: মণিদা মারা গেছেন।

### ॥ ৩ ॥

দয়ালদা আমাদের চাইতে প্রায় বিশ বছরের বড়, কিন্তু আবাল্য বন্ধু—  
friend, philosopher, and guide। পরিব্রাজক হয়ে কিছুদিন ভিক্ষাটনের পর সদগুরু লাভ হয়—বৈদান্তিক সাধু, ব্রহ্মজ্ঞ পুরুষ, নাম রামতীর্থ; গুরুর আদেশে দয়ালদা ঘরে ফিরে আসেন এবং সংসারে থেকে সাধন ভজন করেন : রামতীর্থজী বলতেন, ‘সংস্কারমুক্ত হতে হবে, খোলস বদলে লাভ কি? গুরুয়া নিয়ে কি শেষে স্বথাত সলিলে ডুবে মরবি? আজকাল আবার ভেকেও ভিক মেলে না; ঘরে যা, সামান্য কিছু কাজ কর, বাকী সময় ধ্যান-ধারণায় কাটা।’ দয়ালদা জ্ঞানমার্গের সাধন নিয়েছিলেন; পঞ্চদশী ও সোহংস্বামীর বই ছিল নিত্য সহচর; হোমিওপ্যাথিক ডাক্তারী ক’রে কোনো প্রকারে দিন গুজরান করতেন। আমাদের চা খাওয়া ইত্যাদি তিনি পছন্দ করতেন না; বলতেন, ‘জীবনরক্ষার প্রয়োজন মেটাতেই যখন মানুষ হিমশিম খেয়ে যাচ্ছে তখন অনর্থকের বোঝা আবার পিঠে চাপানো কেন?’ একথা বলবার অধিকার গুর ছিল—অনাড়ম্বর, নির্বিবাদ জীবন, কোনো বাজে জিনিসের বালাই নেই; সহজ, পরিচ্ছিন্ন, সরল; যেন জ্যামিতির নিখুঁত একটি চিত্র। নিজের জীবনের দিকে তাকালে দেখি—রাজপথ; কতো লোক আনাগোনা করে, কতো খড় কুটো, কাগজের টুকরো, গুলকনো পাতা ওড়ে, কতো আবর্জনা জমে; কতো ফাঁতুল ওড়ে; অথচ বলি জীবনটা আমার! দয়ালদা বলতে পারেন, ‘আপনাতে আপনি থাক মন, যেয়ো নাকো কারু ঘরে।’ আমার মনে দেখি রাজ্যের লোক ভিড় করে আছে—দেশের কী হবে; স্বরাজ দেখে যেতে পারবো কি না; হিটলার—মুসলিন-চার্টাল; বলশেভিজ্‌ম্—স্ট্যালীন; ভারতে গণতন্ত্র হবে না সমাজতন্ত্র হবে, কমুনিজ্‌ম্ না অ্যানার্কিজ্‌ম্; এর পর গান্ধিজী কী করবেন; পাকিস্থান আবার কী চীজ; চরখাতে কেউ বিশ্বাস করে কি না; হিন্দু-মুসলমান দাঙ্গা;...



মাসীমাকে আরও কিছু পাঠালে হতো ; বীককে মাস মাস কিছু না দিলে পড়াটাই বন্ধ হয়ে যাবে ; সেদিন অপমানিত হলুম, কিছুই বলতে পারলুম না, একথাটা শুনিয়ে দিলে হতো, তার উত্তরে যদি...তবে পালটা জবাব এই দিতুম, তারপর এই...এই...এই...খড় এবং কুটো, কুটো এবং খড়। হাবুল আমার ভাইপো, কলেজে পড়ে ; একটা চাকাই নিয়ে খেলছিল—একবার স্কুতো ছাড়ে আবার হ্যাঁচকা টানে চাকাইটা হাতে নেয়, আবার স্কুতো ছাড়ে আবার টানে...খানিকক্ষণ এই প্রক্রিয়ার পুনরাবৃত্তি দেখে বললুম, “আমরা যখন জ্যামিতির কোনও প্রতিজ্ঞা এবং প্রমাণ মুখস্থ করি তখন উদ্দেশ্য থাকে এই যে সত্যটি নূতন সমস্তার সমাধানে প্রয়োগ করতে পারবো ; কিন্তু যদি কেউ রাত দিন ‘স্কুতরাং ত্রিকোণ দুটি পরস্পর সর্বতোভাবে সমান’ এই ছড়া আবৃত্তি ক’রতে থাকে তবে বলি, লোকটা পাগল ; অর্থাৎ অপ্রকৃতিস্থ ব্যক্তি চলে বৃত্তাকারে, প্রকৃতিস্থ ব্যক্তি চলে ঘোরানো সিঁড়ি দিয়ে।” হাবুলকে তো এক হাত নিলুম, কিন্তু আমি কী ? একই নিষ্ফল চিন্তার পুনরাবৃত্তি দিনের পর দিন চলেছে ; আমার চিন্তা দ্বারা যদি সমস্তার এতটুকুও সমাধান হতো তবে বৃত্তত্ব অগ্রগতি হচ্ছে, কিন্তু সর্বত্রই যথাপূর্বম্ তথা পরম্—হাত পা যেন কে বেঁধে রেখেছে ; অসহায় ভাবে, বাধ্য হয়ে একই দৃশ্য বার বার দেখে যাচ্ছি...পূজোর ঘরে বসে সেদিন ভাবছিলুম, চিঠিতে এই কথাগুলো লিখে দেবো ; এই কথাগুলো লিখতে হ’বে চিঠিতে, দেবো লিখে এই কথাগুলো চিঠিতে...আয়করের পরোয়ানা এসেছে, টাকাগুলো মাস মাস দিলেই হতো, পরোয়ানা এসেছে যখন দিতেই হবে টাকাগুলো, অনেকটা টাকা জোগাড় করতে হবে, দিতে হবেই, আয়করের পরোয়ানা, অনেকগুলো টাকা...মাথা খারাপ নয় ? শ্রীভগবান বলেন, অহংকার-বিমূঢ়াত্মা কর্তাহম্ ইতি মন্যতে—কোথায় কর্তা ? হাজার রকমের ব্যর্থ চিন্তার কর্মকারক হ’য়ে বৃত্তাকারে ঘুরে বেড়াচ্ছি। দয়ালদা প্রায়ই বলেন, নিষ্ফল চিন্তা ছাড়ো। ‘ছাড়ো’ বললেই ছাড়া যায় নাকি ? একটি প্রাচীন সাধুকে জিজ্ঞেস করেছিলুম, ভারতের স্বাধীনতা কবে হবে ? উত্তর করেন, ভগবানের যখন ইচ্ছা হবে। স্কুতরাং সাধুজীর এ নিয়ে ভাবনা নেই ; আমারও থাকা উচিত নয়, কারণ এক বিষয় স্কুতো কেটেও স্বরাজের রাস্তা পরিষ্কার করি নি। কিন্তু তবুও দিনের পর দিন কল্পলোকে বিচরণ করে স্বরাজের কতো বিঘ্ন সরিয়েছি, কতো সারগর্ভ বক্তৃতা দিয়েছি, কতো লোকের বেকুবি ধরিয়ে দিয়েছি, কতো

লোককে ঠিক পথে চালিত করেছি, কতো নেতাকে প্রাণবাণে জর্জরিত করেছি !  
পাগলামি নয় ? এক... দুই...তিন ; এক...দুই...তিন ; এক...দুই...তিন...  
লাটিমের মতো এমনি ঘুরপাক খেতে খেতে একদিন হয়তো অথও নিফলতায় গা  
এলিয়ে গুয়ে পড়বো ; দয়ালদা জপ করতে করতে ততদিনে কোন্ সুদূরে চলে  
যাবেন কে জানে...মণি-দা তো আগেই সরে পড়লেন...মায়ের একমাত্র ছেলে...  
দয়ালদা আসতেই কাকীমার কথা জিজ্ঞেস করলুম ; দয়ালদা বললেন,

: মণির মার কান্না শুনলে পাষণ্ড গলে যায় ।

: ভগবান্ কি এই কান্না শুনতে পান না ?

: তিনি অন্ত্যামী, তাঁর অগোচর সংসারে কিছুই নেই ; গাছের পাতাটিও  
তাঁর ইচ্ছায় পড়ে ।

: এমন সর্বনাশা ইচ্ছা তাঁর হয় কেন ? কাকীমা ছিলেন যেন মা যশোদা ;  
নৌকো ক'রে আমরা বিকেলবেলা বেড়াতে যেতুম, সন্ধ্যা হতেই কাকীমা ঘাটে  
এসে ব'সে থাকতেন, লোক-দেখানো জপ করতেন, আসলে মণি-দা কখন ফেরেন  
সেই আশায় পথের দিকে চেয়ে থাকতেন । এমনি মা-যশোদার উপর বিধি  
হলেন বাম ?

দয়ালদা দীর্ঘনিঃশ্বাস ফেলে বলেন, শ্রীকৃষ্ণকে ভালবাসলে তিনি সব ছিনিয়ে  
নেন ; “যে করে আমার আশ, তার করি সর্বনাশ” ।

: কিন্তু লাভ ?

: রোয়-রোয় অখিয়াঁ রাতী ।

: তার আর পর নেই ?

: আছে । ‘নিরথ নিরথ স্মৃথ পাতী’ ।

## ॥ ৪ ॥

দয়ালদা, ক্ষেপু, আমি ; কুস্তমেলার যাত্রী ; হরিদ্বার চলছি...গাড়ীতে বসে  
মণিদার কথাই ভাবছি...স্নেহের স্নিগ্ধ স্নুকোমল নীড় ছেড়ে কোন্ হৃদয়হীনের  
করাল ডাক শুনে পাড়ি দিলেন এক অজানা দেশে...নন্দনগন্ধমোদিত জীবনকুঞ্জে  
যে সব রাগিণী বেঞ্জে উঠেছিল এক মুহূর্তে গেল সব থেমে । রবিবাবুর গান  
অনেকের মুখে শুনেছি, বেশীর ভাগ নেকা ঢং ও নাকী সুর । মণিদার গলা ছিল  
যেমন মিষ্টি তেমন গম্ভীর, কৈয়াজ খাঁর ওস্তাদি বাদ দিলে যে সহজ উদাত্ত  
গাম্ভীর্থ বাকী থাকে তা ছিল গুর গানে । মাঝে মাঝে রজনী সেনের গান শুনেছি—

তুমি নির্মল কর মঙ্গল করে মলিন মর্ম মুছায়ে,  
 তব পুণ্য কিরণ দিয়ে যাক মোর মোহ কালিমা ঘুচায়ে ।  
 লক্ষ্য-শৃঙ্খল লক্ষ্য বাসনা ছুটেছে গভীর আঁধারে,  
 জানিনা কখন ডুবে যাবে কোন্ অকূল গরল পাথারে ।

আর একটি প্রিয় গান ছিল—

কবে, ভূষিত এ মরু ছাড়িয়া যাইব তোমারি রসাল নন্দনে ;  
 কবে, তাপিত এ চিত, করিব শীতল তোমারি করুণা চন্দনে !  
 কবে, ভবের স্মৃৎসুখ চরণে দলিয়া

যাত্রা করিব গো শ্রীহরি বলিয়া ;

চরণ টলিবে না, হৃদয় গলিবে না.

কাহারো আকুল ক্রন্দনে ।

ট্রাজিক আয়রণি?...রবিবাবুর গানই গাইতেন বেশী ; আমাদের নৌকা-  
 বিহারের গান ছিল—অন্তর মম বিকশিত কর, অন্তরতর হে ; অল্প লইয়া  
 থাকি তাই মোর যাহা যায় তাহা যায় ; ঐ রে তরী দিল খুলে ; কোন আলোতে  
 প্রাণের প্রদীপ জ্বালিয়ে তুমি ধরায় আস ; তোমারি রাগিণী জীবনকুঞ্জে বাজে  
 যেন সদা বাজে গো ; যতবার আলো জ্বালাতে চাই নিবে যায় বারে বারে ; যদি  
 এ আমার হৃদয় ছয়ার বন্ধ রহে গো কভু ; যদি তোর ডাক শুনে কেউ না আসে  
 তবে একলা চলো রে ; রূপসাগরে ডুব দিয়েছি অরূপ রতন আশা করি ; যদি প্রেম  
 দিলে না প্রাণে, কেন ভোরের আকাশ ভরে দিলে এমন গানে গানে ; সীমার  
 মাঝে, অসীম, তুমি বাজাও আপন সুর.....রামকৃষ্ণ মিশনের একটি উৎসবে  
 গেয়েছিলেন—

তুমি নব নব রূপে এসো প্রাণে ।

এসো গন্ধে বরণে, এসো গানে ॥

এসো অঙ্গে পুলকময় পরশে,

এসো চিন্তে অমৃতময় হরষে,

এসো মুগ্ধ মুদিত হৃদয়ানে ।

নব নব রূপে এসো প্রাণে ॥

সুদূর হয়ে সকলে গুনছিল...অমৃতময় হরষে মন চলে উর্ধ্ব হতে উর্ধ্বলোকে  
 আলোকের সন্ধানে—আলো যেথায় শুভ্র, রূপ অরূপবিক, প্রাণ আনন্দ সাগরে  
 হিল্লোলিত.....আর একদিন । বিকেল বেলা নৌকো করে বেড়াতে

বেরিয়েছি ; দয়ালদা, মণিদা, ক্ষেপু, আমি ; সঙ্গে মণিদার হারমোনিয়াম ।  
গ্রাম থেকে অনেকটা দূর চলে এসেছি ; চার দিকে জল আর জল ; পশ্চিমাকাশ  
অন্তরাগে রঞ্জিত..... পাখীরা আপন আপন কুলায়ে ফিরে যাচ্ছে ; জলে আলো-  
ছায়ায় ঢেউ...মণিদা ভীমপলশ্রীতে গান ধরলেন—

আব তো বড়ী বের ভঙ্গ, টেরত হৌ তুমকো মোরে রব সাইয়া ।

ভঁবর জাল মেঁ আন ফঁসে, ভবসাগরতে পার করো মেরে সাইয়া ॥

কথার মানে ঠিক বুঝি নি ; সুরের আবেশে নিজেকে হারিয়ে ফেলেছিলুম, মনে  
হচ্ছিল আমারই চোখের জলে রচিত এক অসীম সমুদ্র, দু'হাতে ঢেউ কেটে  
এগিয়ে চলছি অন্তরবির ওপারে—এই আশায় যে হয় তো বা প্রিয়তমের সঙ্গে  
মিলন হবে.....মিলন আজও হয় নি ; দুঃখের আরও কতো ঢেউ আসবে,  
কতো প্রিয়জন খসে পড়বে, কতো বাধা বিপত্তির আঘাত পেয়ে দু'হাতে চোখ  
মুছতে হবে.....হে ভগবান্ ! হে মধুসূদন ! হে দীনবন্ধু দীনদয়াল ! হে  
জগৎপতি জগন্নাথ !.....তোমাকে পেলে তো সব ক্ষতিই পূরণ হয়...সব ক্ষত  
আরাম হয়ে যায়...আমার সকল অশ্রু কবে মুক্তাকল হবে তোমার পরশে ?  
কোথায় তোমাকে খুঁজি ?

সুদূরে কোন্ নদীর পারে ;

গহন কোন্ বনের ধারে,

গভীর কোন্ অন্ধকারে,

পরায়ণ সখা বন্ধু হে আমার ।

॥ ৫ ॥

সকাল বেলা ; জোয়ালাপুর স্টেশন ; এর পর হরিদ্বার । শ্রীহরিদর্শনের দুয়ার  
যেমন হরিদ্বার, হরিদ্বার প্রবেশের দুয়ার তেমনি জোয়ালাপুর । সব স্টেশনেই  
কুস্তমেলার যাত্রীদের ভিড় । গাড়ী থামতেই প্ল্যাটফর্ম থেকে তুর্ধ্বনি ওঠে  
'জয় শ্রীরামচন্দ্রকী জয়', গাড়ীর কামরা থেকে প্রতিধ্বনি ওঠে 'জয় সীয়ারামকী  
জয়' । দয়ালদা, ক্ষেপু, আমাদের কামরার লোক, সকলেই আনন্দে সজীব ও  
সজাগ । প্ল্যাটফর্ম থেকে এক পণ্ডিতজী গেয়ে উঠলেন,

রঘুপতি রাঘব রাজা রাম

আমাদের কামরায় এক পণ্ডিতজী ছিলেন, জবাব দেন—

পতিত পাবন সীতারাম

এর পর উত্তর প্রত্যন্তরের রীতিতে দুজন গিয়ে চলেন তুলসীদাসজীর ভজন—

ঃ শ্রীরামচন্দ্র রূপালু ভজু মন, হরণ-ভব-ভয় দারুণং ।  
 নবকঙ্ক-লোচন, কঙ্কমুখ, করকঙ্ক পদ কঙ্কারুণং ॥  
 : কন্দর্প অগণিত অমিতছবি, নবনীল-নীরদ স্নন্দরং ।  
 পটপীত মানহঁ তড়িত রুচিগুটি নৌমি জনক স্নতাবরং ॥  
 : ভজু দীনবন্ধু দিনেশ দানব-দৈত্য-বংশ-নিকন্দনং ।  
 রঘুনন্দ আনন্দ-কন্দ কোমলচন্দ দশরথনন্দনং ॥  
 : শির মুকুট কুণ্ডল তিলক চারু, উদার অঙ্গ বিভূষণং ।  
 আজ্ঞাভু-ভুজ শর-চাপ-ধর সংগ্রাম-জিত খরদূষণং ॥  
 : ইতি বদতি তুলসীদাস, শঙ্কর-শেষ-মুনি-মনোরঞ্জনং ।  
 : মম হৃদয়-কঙ্ক নিবাস কুরু, কামাদি-খল-দল-গঞ্জনং ॥

হিমালয়ের পূত আকাশ ভগবানের কল্যাণবর্ষী নামে মুখরিত হয়ে উঠলো ;  
 গাড়ী ছাড়ার সঙ্গে সঙ্গে পুনরায় নিনাদিত হয় ‘জয় শ্রীরামচন্দ্রজীকী জয়’...  
 পণ্ডিতজী ভজন ধরেন—

ভজ মন রাম চরণ স্নুখদাঈ ॥  
 জিহি চরণসে নিকসী সুরসরি সংকর জটা সমাঈ ।  
 জটা সংকরী নাম পরোয়া হৈ, ত্রিভুবন তারণ আঈ ॥  
 সোই চরণ সন্তনজন সেবত সদা রহত স্নুখদাঈ ।  
 সোই চরণ গোতমঝাঘিনারী পরসি পরমপদ পাঈ ॥  
 সিবসনকাদিক অরু ব্রহ্মাদিক সেয সহস মুখ গাঈ ।  
 তুলসিদাস মারুত স্নুতকী প্রভু নিজ মুখ করত বড়াঈ ॥

জয় শ্রীরামচন্দ্রজী কী জয় ।

রাম জপু, রাম জপু, রাম জপু, বাবরে ।  
 ষোর-ভব-নীর-নিধি নাম নিজ নাব রে ॥

সমবেত কণ্ঠে ‘নাম নিজ নাব রে, নাম নিজ নাব রে’ ।

ভলো জো হৈ, পোচ জো হৈ, দাহিনো জো বাঁমরে ।  
 রাম-নাম হী সোঁ অস্ত সঁবহীকো কাম রে ॥

পুনরায় ‘নাম নিজ নাব রে, নাম নিজ নাব রে’.....

একজন সহযাত্রী টোড়ীরাগে ধরেন—

তু দয়ালু, দীন হৌ, তু দানি, হৌ ভিথারী ।

হৌ প্রসিদ্ধ পাতকী, তু পাপ পুঞ্জ হারী ॥

নাথ তু অনাথকো, অনাথ কোন মোসো ?

মো সমান আরত নহিঁ, আরতিহর তো সো ॥

সমবেতকণ্ঠে ‘মো সমান আরত নহিঁ, আরতিহর তো সো’.....

ব্রহ্ম তু, হৌ জীব হৌ, তু ঠাকুর, হৌ চেরো ।

তাত, মাত, গুরু, সখা তু সব বিধি হি তু মেয়ো ॥

পুনরায় ‘মো সমান আরত নহিঁ, আরতিহর তো সো’.....

পণ্ডিতজী জবাব দেন সুরদাসজীর ভজনামুতে—

সুনেরী মৈনে নিরবলকে বল রাম ।

সমবেত কণ্ঠে ‘বল রাম, বল রাম, বল রাম বল রাম.....

দ্রুপদ সূতা নিরবল ভই তা দিন, তজি আয়ে নিজধাম ।

দুসাসনকী ভুজা থকিত ভঙ্গ, বসনরূপ ভয়ে শ্রাম ॥

পুনরায়, ‘বল রাম, বল রাম, বল রাম, বল রাম’.....

অপ-বল, তপ-বল, গুর বাহবল, চৌখো হৈ বল দাম ।

সুর কিসোর কুপার্তে সব বল, হারেকো হরিনাম ॥

পুনরায়, ‘বল রাম, বল রাম, বল রাম, বল রাম’.....

জয় শ্রীরামচন্দ্রজীকী জয়... ..

অপূর্ব পরিবেশ...নির্বল কে বল রাম...রাম চরণ স্মৃতি...হিমালয় দেবভূমি,

হরিদ্বার পুণ্যতীর্থ ; বাইরের দৃশ্য অভিনব, নয়নাভিরাম . অমৃতবর্ষী ভজন... ..

রাম নাম স্মৃতি...দিবাধামের সংবেদনে যাত্রীরা অশ্রুতাতর...মন আকৃতি-

পূর্ণ...দেবতাদের বিহারভূমি হিমালয় ; আকাশ বাতাস পবিত্র ; বনভূমি তপঃ-

গুরু ; সংসারের কেনা-বেচা, রাগ-দ্বेष, মৃত্যু-শোক সব কোথায় তলিয়ে যায় ;

ধূলোর জগৎ ছেড়ে মেঘলোকের স্বপন নিয়ে চলি উর্ধ্ব নগাধিরাজের পরম

খামে, স্তব্ধ ভূমানন্দ যেথা ‘রোমাঞ্চিত নিবিড় নিগূঢ়ভাবে পৃথগুণ তোমার

নির্জনে’...দেবাদিদেবের অন্ধজ্যোতিতে উদ্ভাসিত দেবভূমিকে প্রণাম ! স্পষ্ট

মনে হরির দুয়ারে এসে যদি দাঁড়াই, হয় তো বন্ধই থেকে যেতো দুয়ার,

কিরে আসতুম পথের ক্রন্দ ও মনের গ্লানি নিয়ে...হে ভক্তবৃন্দ ! তোমরা নামামৃত

বর্ষণ করে আমাদের হৃদয় অভিষিক্ত করেছ, তোমাদের চরণে প্রণাম !...হে কৃষ্ণ-

স্নানার্থী হরিদর্শনকামী যাত্রীসমাগম! তোমাদের চরণধুলোয় ধূসর হ'চ্ছে হরিদ্বারের স্নমুখে আমরা দণ্ডায়মান, তোমাদিগকে অসংখ্য প্রণাম জানাচ্ছি! হে মৌন শান্ত গিরিরাজ! আশৈশব তোমার স্বপ্ন দেখেছি, হৃদয়ের নিভৃত কোণে তোমার ডাক শুনেছি, অন্তরের গৃঢ় বেদন দিয়ে তোমার শৃঙ্গ ও বনানী মগ্নিত করেছি; মৃত্তিকা, পর্বত, গিরিমালা, আর বৃক্ষলতা দেখে যদি তোমার সঙ্গে প্রথম পরিচয় হ'তো তবে নিরাশ হয়ে থির চিত্তে বাড়ী ফিরতুম...তোমার দেবতাত্মার সঙ্গে ক্ষণিকের পরিচয় করিয়ে যাত্রা মোদের সার্থক করেছ; তোমাকে নত মস্তকে সশ্রদ্ধ প্রণাম জানাচ্ছি! পথ চলতে চলতে আমাদের মিলন যেন আরও গভীর, আরও নিবিড় হ'য়ে ওঠে! হে দেবতাত্মা হিমালয়! অশ্রুবিধৌত চিত্তে তোমাকে সাষ্টাঙ্গ প্রণাম জানাচ্ছি!.....

## ॥ ৬ ॥

হরিদ্বারের কুস্ত—ন স্থানং তিলধারণম্। নাথ সম্প্রদায়ের মোহন্তজীর নামে একথানা সুপারিশ চিঠি এনেছিলুম; মোহন্তজী বাগানের খালি জায়গা দেখিয়ে দিলেন, অগ্রত্ব স্থান নেই। গাছতলায় জিনিসপত্র রেখে কঞ্চল-বিছিয়ে শুয়ে পড়লুম। ক্ষেপু বেরিয়ে গেল কোনো সুরাহা হয় কিনা দেখতে; ওর এক বন্ধুর আসবার কথা আছে, ভোলাগিরি মহারাজের আশ্রমের ধারে তাঁদের বাড়ীতে আশ্রয় ঠিক হয়ে যাবে যদি ভদ্রলোক এসে থাকেন। দয়ালদাকে জিজ্ঞেস করি, কি হবে? উত্তর করেন, তাঁর যা ইচ্ছা।.....আমার কিন্তু ক্ষেপুর উপরই ভরসা বেশী; ও কারতকর্য্য লোক, অসাধ্য সাধন করতে পারে, দূরকে নিকট বন্ধু এবং পরকে ভাই করে নেওয়া পাঁচ-দশ মিনিটের কাজ—সম্বন্ধম্ আভাষণপূর্ব্বম্। এক বছর আলাপের পরও আমি যেখানে 'আপনি' থেকে 'তুমি' বা 'বাবু' থেকে 'দাদা'তে উঠতে (নাবতে?) পারি না, ক্ষেপু সেখানে সাতদিন যেতে না যেতেই বাবুর স্ত্রীর সঙ্গে 'বউদি' সম্পর্ক পাতিয়ে চা-এর আসরে জমিয়ে বসে। ঠোঁকর যে কোথাও খায় না তা নয়, তবে সাধুদের মতো মান-অপমানকে তুচ্ছ ক'রে এগিয়ে চলবার সামর্থ্য রাখে। আমি ঠিক উল্টো—লাজুক, ক্লিষ্টসংবেদী, hypersensitive; আলাপ করবার আগেই মনে হয়—যদি ভদ্র লোক বিরক্ত হন; আমার উদ্দেশ্য সম্বন্ধে যদি সন্দেহান হন, বা কটাক্ষ করেন, বিদ্রূপের হাসি হাসেন.....তবে যে লজ্জায় মাথা কাটা যাবে!.....এই ভয়েই নিজেকে নিজের ভিতর গুটিয়ে চুপ

ক'রে থাকি ; আর যদি আবেদন নিয়ে যেতে হয় কার কাছে তবে 'সীদান্তি মম গাত্রাণি মুখঞ্চ পরিশ্রুয্যতি' ; বেপথু হয় নি চাকরির জ্ঞান দরখাস্ত করতে ; ব্যাপারটা নৈব্যক্তিক বলে হয়তো । জানি, চাকরিদান এবং প্রাপ্তির রহস্তটা শোণিত সম্পর্ক বা ফেলো-কড়ি-মাখো-তেল জাতীয় সম্বন্ধ বিশেষের সঙ্গে জড়িত ; তা না হলে ক্ষেপুর ব্যর্থ হয়রানির কোনো সম্ভব কারণ খুঁজে পাওয়া যায় না.... গাড়ীতে আজ বেশ ভাবাবিষ্ট ছিল ক্ষেপু, দয়ালদার সঙ্গে কেঁদেছে, শ্রীরামচন্দ্রজীর জয় গেয়েছে ; এঁদের পুণ্যবলে হয়তো বা মাথা গোজবার একটু জায়গা হয়ে-ও যেতে পারে.....কিন্তু যদি না হয় ? দিনের বেলা গাছতলা মন্দ লাগে না, কিন্তু রাত্তিরে বেশ ঠাণ্ডা.....যদি অশুখ করে ? বিদেশে বিভূঁই ; যদি নিমুনিয়া হয় ?.....নাঃ, আমার দেখছি ঈশ্বরে বিশ্বাস নেই ! ভগবানের নাম নিই বরং.....আমার পাপে আবার পাওয়া জায়গা ফসকে না যায় !...ক্ষুধাও পেয়েছে ; স্টেশনে এক পেয়ালা চা খেয়ে-ছিলুম, সংকল্প ছিল গঙ্গান্নান না ক'রে খাবো না কিছু.. তবে গতিক যা দেখছি... বিস্কুট আছে সঙ্গে, গেলে হ'তো...কিন্তু দয়ালদা...খেং, সব বাজে চিন্তা.....জপ করি বরং...রামচরণ সুখদাঈ, রামচরণ সুখদাঈ...ন্নান যে আজ কখন করবো...দুর্বলকে বল রাম...দয়ালদা চোখ বুজে বোধ হয় জপ করছেন... মণিদা এলে খুব কষ্ট হতো.....মণিদা নেই !... বিশ্বাস হয় না যেন..... মণিদার সঙ্গে Prometheus Unbound পড়েছিলুম...স্পিরিটদের গানগুলো কী অপূর্ব.....হিমালয়ের নিভৃততম দেশে গন্ধর্বনগরীর পুষ্পোত্তানে মণিদা বোধ হয় সুরের মোহে আবিষ্ট হয়ে আছেন... dreaming like a love-adept...feeds on...aerial kisses...of shapes that haunt thought's wildernesses...রামচরণ সুখদাঈ...রাম, রাম, রাম, রাম, রাম, রাম, রাম ; রাম, রাম, রাম, রাম, রাম, রাম, রাম...আঁকে উঠলুম ; আড়ামোড়া ভেঙে, চোখ রগড়ে দেখি ক্ষেপু পান চিবুচ্ছে, চেহারায় জৌলুস ফিরেছে, নিশ্চিন্ত মনে বলছে, 'ওঠ, ওঠ ; শিগ'গির করে চল ; জায়গা ঠিক ; আগে এলে ভাল একটা ঘর পেতুম ; একটা চোরাকুঠরী ছাড়া সব ফিল্ড আপ্ (filled up) ; সেটাই ঠিক করে এসেছি...হ্যাঁ খাওয়াদাওয়া সেরেই এলুম ; কিছুতেই ছাড়বে না বন্ধু ; চটানো ঠিক নয় তো'...

তিনজনের পক্ষে ঘরটি ভালই বলতে হবে—আলো বাতাস থাক আর না থাক । কুস্তমেলার সময় এরূপ আশ্রয় ভাগ্যে মেলে ।...ক্ষেপুর ঘাড়ে গোছগাছের ভার



চাপিয়ে আমরা দুজনে চললুম গঙ্গান্নানে; নিকটেই গঙ্গা; ব্রহ্মকুণ্ডের আশা  
 আজকের মতো ছেড়ে দিলুম। স্নান করতে নেমে দয়ালদা অণু মাহুষ;  
 ছোট ছেলের মতো নিজের গায়ে জল ছিটিয়ে বার বার ডুব দিচ্ছেন, আর  
 মা গঙ্গাকে ডাকছেন—মাতর্গঙ্গে; মাতর্গঙ্গে; ত্রিভুবনতারিণী, কলুষহারিণী,  
 পতিতোধারিণী জাহ্নবী গঙ্গে...কী ঠাণ্ডা জল; ডুব দিলে দেহমন শীতল হয়,  
 অন্তঃকরণ পবিত্র হয়...দয়ালদার ছোঁয়াচ লাগে...হঠাৎ কান্না পায়...দয়ালদা  
 আশীর্বাদ করেন, শুভলগ্নে স্নান হলো তোমার, প্রেমগঙ্গায় অবগাহন করে  
 ধন্য হলে, এমনি কুলুকুলুনাদিনী প্রেমধারা তোমার হৃদয়ে প্রবাহিত হক...  
 দয়ালদার কথায় কান্না আরও উদ্বেলিত হয়ে ওঠে...তখন স্কুলে পড়ি, বয়স  
 ১৪।১৫; গরমের ছুটিতে বাড়ী যাচ্ছি...প্রায় আট মাইল রাস্তা...কাঠকাটা  
 রোদ...শরীর গলদঘর্ম, জিভ শুকিয়ে গেছে, পা আর চলে না...বিকেল নাগাদ  
 ক্লান্তদেহে বাড়ী পৌঁছই...শীতলপাটী বিছিয়ে দিয়ে মা বলেন, ‘শো, আমি  
 পাখা করি’; মার পায়ের ধুলো নিয়ে এলিয়ে পড়লুম...পরম বিশ্রান্তি, কান্নায়  
 বুক ভরে যায়, মায়ের চরণতলে সব গ্লানি মুছে যায়, শাস্তিতে জগৎসংসার  
 ভুলে যাই, ঘুম পায়...চোখ খুলে দেখি রান্নাঘরের পেছনে কুলগাছটার মাথায়  
 অস্ত্রাচলের আলো—এমন আলো তো কোনো দিন দেখি নি...গঙ্গাস্নান করে  
 ছোটবেলাকার সেই দৃশ্যটি মনে পড়ে...মায়ের স্নেহাশিসের মতো শাস্তি ও  
 স্নিগ্ধতায় চিত্ত ভরে যায়...ঘুম পায়, যেমন ছোট ছেলে মায়ের কোলে নিশ্চিন্ত  
 মনে ঘুমোয়...দয়ালদার আলিঙ্গনে গায়ে কাঁটা দেয়...ফিরে চলি কুঠরীর দিকে  
 ...দোকানপাট, বাড়ীঘর, লোকজন—সবাই যেন গঙ্গাস্নান করে এক অপার্থিব  
 আলোতে ঝলমলিয়ে ওঠে...মাতর্গঙ্গে! মাতর্গঙ্গে!...অলকানন্দে! পরমানন্দে!  
 হরিপাদপদ্মবিহারিণি গঙ্গে! জয়, জয়, জাহ্নবি! পুণ্যতরঙ্গে!...মাতর্গঙ্গে!  
 মাতর্গঙ্গে!

॥ ৭ ॥

বিকেলবেলা সাধুদর্শনে বেরিয়েছিলুম। কুম্ভমেলার সাধু—দেখে শেষ করা যায়  
 না; হৃদগু দাঁড়িয়ে দেখলেও চেনা মুশ্বিল। দয়ালদা বলেন, ‘শুধু প্রণাম  
 করে মনে মনে আশীর্বাদ প্রার্থনা ক’রবে, তাতেই কল্যাণ হয়’। দয়ালদার  
 মতো ভক্তিমান পুরুষের সঙ্গ লাভ না হলে হরিদ্বার-জীবীকেশ-লছমনঝোলা  
 টানা-প’ড়েন করা হতো, প্রাকৃতিক দৃশ্য দেখে ‘অপূর্ব’ বলে আসর জমাতো

যেতো, কুণ্ডলানের গল্প ফেঁদে কুণ্ডলানুগদের তাক লাগানো যেতো—কিন্তু তীর্থদর্শন হতো না। অঘং বিপশ্চিতো স্তম্ভি মুহূর্তসেবয়া, ক্ষণিক সাধু সঙ্গে অশেষ পাপ নষ্ট হয়; ক্ষণমিহ সজ্জনসঙ্গতিরেকা ভবতি ভবাব্ধবতরণে নৌকা, সজ্জন সঙ্গই ভবসিন্ধুপারের একমাত্র নৌকা...সাধুদের পদধূলি নিতে নিতে ভাবি, আমার পরম সৌভাগ্য যে আকৈশোর দয়ালদার সাহচর্য পেয়েছি, ওঁর ভজ্ঞন ও নামকীর্তন শুনেছি, প্রার্থনাকালে ওঁর অশ্রু-পুলক-কম্প দেখেছি, আর সব চাইতে বড় জিনিষ ওঁর ভালবাসা পেয়েছি...ছুটির দিনে সকাল-দুপুর-সন্ধ্যা একসঙ্গে কেটেছে...গল্পচ্ছলে একদিন বলছিলেন জ্ঞানমার্গ ছেড়ে কি করে ভক্তিমার্গে এলেন—“বেদান্তের সাধনা অনেকদিন ক’রে মনে হ’লো ভিতরটা যেন শুকিয়ে গেছে; সাধনার পথে গুরুতা আছে, অভিজ্ঞতাও আছে; কিন্তু এটা ছিল একটু অগ্র ধরণের; তবুও বিচার-ধ্যান ক’রে যাই; গুরুদেব বৈচে থাকলে তাঁর শরণাপন্ন হতুম, কিন্তু তিনি দেহরক্ষা করেছেন; কাজেই তাঁর দেখানো রাস্তা ধরে নিষ্ঠার সঙ্গে চলি, কিন্তু গুরুতা যায় না—মনের উচাটন অবস্থা যাকে বলে...আধ্যাত্মিক জীবনটা সুখের নয়; অনেককাল ধ’রে অনেক কষ্ট ক’রতে হয়, জন্মজন্মান্তরের বিরোধী সংস্কারের সঙ্গে যুদ্ধ ক’রে যেতে হয়...এমনি যখন অন্ধকারে হোঁচট খাচ্ছি তখন যা ঘটলো তাকে অলৌকিকই বলতে হয়। নিমুকে তো তোমার মনে আছে? পূর্বের দালানে তাদের ঘর ছিল; পাঁচ মাস যাবৎ পেটের অসুখ, বাঁচবার আশা নেই, শয্যাশায়ী; একবার করে রোজ দেখে আসি। খুব ভালবাসতো আমাকে, না গেলে কান্নাকাটি করতো...একদিন ভোর বেলা, ধ্যানে বসেছি; কে কড়া নাড়ে। বিরক্ত হই। আবার কড়া নেড়ে বলে, ‘দাদা, দরজা খোলো’। ভাবলুম কেউ ওষুধ নিতে এসে থাকবে। দরজা খুলে দেখি—নিমাই; অপরূপ চেহারা, রোগে ভুগে যে মুখ ফ্যাকাশে হ’য়ে গিয়েছিল তাতে যেন দুখে-আলতা রঙ, দেহ ও মুখকাস্তিতে দিবা আভা, আনন্দ উপছে পড়ছে...নিমু বললে, ‘শ্রীরাধার আবেশ হয়েছে আমাতে, এক্ষুনি চান করে এসো, তোমাকে দীক্ষা দেবো প্রেমমন্ত্রের’। দীক্ষার পর আমাকে সাবধান করে দিলো, ‘এই বাইরের ঘরেই থাকবো আমি তোমার সঙ্গে, ভিতরে নিয়ে গেলে কিন্তু আমি আর বাঁচবো না’। যে ছেলে সর্বক্ষণ বিছানায় পড়ে থাকতো, কিছুই হজম করতে পারতো না, সে রোজ প্রাতঃস্নান করে, নিরামিষ খায়; আর সব সময় চোখ দিয়ে প্রেমশ্রু...কদিন কী যে দেখলুম, কোন্ দিব্যধামে থাকতুম

...কিন্তু ওর মা শুনলেন না ; যে দিন ভিতরে নিয়ে গেলেন সেদিনই চেহারা বদলে গেলো ; পাণ্ডুর, বিবর্ণ ; পরের দিন মাঝা গেলো ...

## ॥ ৮ ॥

সন্ধ্যারতির পর ভোলাগিরি মহারাজের আশ্রমে একজন বান্ধালী সাধু সন্ধ্যা আলাপ হয় ; প্রভুপাদ বিজয়কৃষ্ণ গোস্বামীর শিষ্য ; গোঁফ-দাড়ি, চেহারা-পত্র অনেকটা গোসাঁইজীর মতো ; বেশ ভক্তিমান পুরুষ ; সাধুসঙ্ঘের মহাত্ম্য ব্যাখ্যা করছিলেন একটি শ্লোক উদ্ধৃত করে—

ভবাপবর্গো ভ্রমতো যদা ভবেজ্জনস্ত তর্হ্যচ্যুত সংসমাগমঃ ।

সংসংগমো যর্হি তর্দৈব সদগতো পরাবরেশে ত্বয়ি জায়তে রতিঃ ॥১

সংসারপথে বিচরণশীল মানবের যখন সংসার শেষপ্রায়, তখনই সাধুসঙ্ঘ লাভ হয়, এবং সাধুদের পরমগতি ও কার্যকারণের নিয়ন্তা শ্রীভগবানে অতুরাগ জন্মে । দু-চার কথার পর জানা গেলো ক্ষেপুর এক কাকীমা বাবাজীর শিষ্য ; অতঃপর ভাব জমতে আর দেরি হলো না । ক্ষেপু জিজ্ঞেস করে : কুন্ডমেলায় ভারতের সব সাধু মহাত্মা-ই কি স্নান করতে আসেন ? বাবাজী উত্তর করেন—

: সব আর কি ক'রে আসবেন ? তবে অনেকেই আসেন ; আর খুব বড় মহাত্মা ঠাঁরা আকাশমার্গে এসে শেষরাত্রিতে স্নান করেন, আবার আকাশমার্গেই চলে যান ।

: তাঁদের দর্শন পাওয়া যায় না ?

: অনেক পুণ্যের ফলে ; কিন্তু তার আগে প্রয়োজন তাঁদের রূপাদৃষ্টি ।

: কি করে তা সম্ভব হয় ?

: রাত্রি তিনটার সময় রোজ গঙ্গাস্নান করে আবক্ষ নিমজ্জমান হয়ে ভগবানের নাম জপ করতে হয় ।

: যদি নিম্ননিয়ম ধরে ?

: ধরবেই তো । শনৈঃ পন্থাঃ । প্রথমে তিতিক্ষা অভ্যাস করতে হয় ।

: আচ্ছা, আকাশগামী এই মহাত্মাদের তো বস্ত্রলাভ হয়েই গেছে, তাঁরা স্নান করতে আসেন কেন ?

: তাঁরা আসেন ভারতের কল্যাণের জন্ত, স্নানার্থী যাত্রীদের অমৃতলাভের রাস্তা

সুগম করবার জন্ত ; স্নান করে যখন তাঁরা ফেরেন তখন তাঁদের দিব্যভাবে দশদিক বিদ্যুৎ-ছটায় জলে ওঠে ।

: তা হলে তো কুস্তম্নানে যে সব যাত্রী এসেছেন সকলেরই অমৃতলাভ হবে ?

: নিশ্চয় হবে ।

: অপরাধ নেবেন না, গঙ্গাতে যে সব মাছ আছে তাদেরও কি—?

: আরে তা কি আর হয়? ভক্তিবিশ্বাস থাকা চাই, ভগবৎ-কৃপার জন্ত ব্যাকুলতা চাই, শ্রীহরির পায়ে নিজেকে সমর্পণ করা চাই ; আর চাই গুরুকৃপা । কি জানেন ? অমৃতলাভ দেবতাদের হয়, দৈত্য-দানবের হয় না ।

: কিন্তু যাদের এখনও গুরুলাভ হয় নি ?

: তাদেরও হবে । প্রথমে সদগুরু লাভ, তারপর গুরুদত্ত মন্ত্রের সাধন, শেষে গুরুকৃপায় অমৃতলাভ । কুস্তম্নানের ফল অব্যর্থ । ভারতের অশেষ সৌভাগ্য যে পতিতপাবনী গঙ্গা আমাদের সকল পাপ বিধৌত করে মোক্ষের পথে নিয়ে যাচ্ছে ; জন্মজন্মান্তরের সুকৃতির ফলে আপনারা কুস্তম্নানে মুক্তিদায়িনী গঙ্গায় স্নান করতে এসেছেন, ভক্তিভরে স্নান করুন, নিশ্চয় অমৃতলাভ হবে ।

বাবাজী বিদায় নেন ; ধনি ওঠে, গঙ্গা মার্গে কী জয়.....আশ্রমের আর এক প্রান্ত ; কিসের জটলা চলছে । গৌড়-দাড়ি-সুশোভিত এক ভদ্রলোকের চারদিকে গৃহী এবং সন্ন্যাসী ; কিসের আলোচনায় সকলে মশগুল । সন্ধান নিয়ে জানলুম ইনিই শ্রামশূন্দের বাবু,—ভারতের স্বাধীনতা সংগ্রামের একজন অক্লান্ত একনিষ্ঠ সাধক । জনৈক গৃহী প্রশ্ন করেন—

: ভারতের স্বাধীনতা কবে হবে ?

শ্রামশূন্দেরবাবু উত্তর করেন—

: কতো সাধু সন্ন্যাসীকে জিজ্ঞেস করেছি, কোনো উত্তরেই আশ্বস্ত হতে পারি না ।

: কেন ?

: অনেকেই বলেন, জানি না ; ভাল সাধুর কথাই বলছি ; ভগবচ্চিন্তায় তাঁরা মগ্ন, দেশের কি হচ্ছে না হচ্ছে সে সম্বন্ধে উদাসীন । কেউ কেউ বলেন, রামজীর যখন কৃপা হবে ।

: কখন হবে কৃপা ?

: ক্যাসাদ তো ওখানেই । এই মৌলিক প্রশ্নটার জবাব কেউ দেন না ; বলেন, ভগবানকে ডাকুন, ডাকার মতো ডাকতে পারলে তিনি নিশ্চয় শুনবেন, জবাবও

দেবেন। আমি চাই সাধুজীর কাছ থেকে জবাব, সাধুজী বলেন ভগবানের কাছে যেতে। কিন্তু ভগবানের সান্নিধ্যলাভ করে সাধুরা উত্তর দেন না কেন বুঝি না।

: সাধুদের হয় তো ওটা প্রশ্ন নয়, বলেন একজন সন্ন্যাসী।

: হয়তো, উত্তর করেন শ্রামসুন্দরবাবু। একটু ভেবে আবার বলেন,

: বুঝি না; প্রাচীনপন্থী মহাত্মারা সকলেই এক কথা বলেন, মানে কিছুই বলেন না। শুধু সন্তদাস বাবাজীর উত্তরে একটু আশার আলো দেখতে পাই।

উদগ্রীব হয়ে সকলে প্রশ্ন করেন, ‘কী বললেন তিনি?’

শ্রামসুন্দরবাবু সাগ্রহে সন্তদাস বাবাজীর আশ্বাসবাণী শোনান—

: গ্রীষ্মের প্রচণ্ড উত্তাপে যখন পৃথিবী দগ্ধ হয়ে যায় তখন হঠাৎ একদিন আকাশে একটু মেঘ দেখা দেয় : পরদিনই আগুনের লেলিহান জিহ্বা তাকে গ্রাস করে ফেলে ; কিন্তু আবার আসে ; ঐ ছিন্নাভ্রটুকুই একদিন ঘনঘটা করে আকাশ ছেয়ে ফেলে, এবং দগ্ধ, তপ্ত ভারতভূমিকে জলসিক্ত করে...অথবা বসন্তসমাগমের কথা ভাবুন ; সূচনা আগে থেকেই পাওয়া যায় একটি কি দুটি পাখীর গানে, দু-চারটি ফুলের গন্ধে, তৃণ ও পত্রের শ্রামলতায়...ভগবানের নাম নিয়ে এগিয়ে যান...ঐ দেখুন বসন্ত আসছে...ঐ শুনুন তার চরণধ্বনি...এগিয়ে যান...এগিয়ে যান...

এই বলে শ্রামসুন্দরবাবু কাদতে লাগলেন ; উপস্থিত সকলেই বোধ হয় সেই কান্নায় যোগ দিয়েছিলেন।

## ॥ ৯ ॥

রাত্রি প্রায় এগারোটো ; ঘুম আসছে না। অন্ধ কুঠরীতে দম আটকে আসে... মুক্তিপথের যাত্রী ভারত, বন্ধন হয় কেন তার ? আবহমানকাল থেকে আমরা মোক্ষকামী ; কিন্তু রাষ্ট্রীয় ও সামাজিক জীবনে দৈনন্দিন ব্যবহারের ঘটনাচক্রে মুক্তি আমরা খুঁজি না কেন ? পরগাছা, মশামাছি, ছারপোকা, আরসোলা মাকড়সা, বিছে-শুঁয়োপোকা, সাপ-বাঘ ঘরে ও বাইরে সর্বত্র কায়েমী স্বভেদ বাসা ফেঁদে বসেছে ; ব্যবহারিক জীবনে আমরা মুমুক্ষু হই না কেন ? কোনো কালেই হই নি ; ঘরের খেয়ে বনের মোষ ভাড়ানো আমাদের কোপ্তিতে লেশম নেই। অথচ মুমুক্ষু আমাদের মজ্জাগত ধর্ম ; স্ত্রী-পুত্র, ঘর-সংসার সব ছেড়ে

দিয়ে 'ইহাসনে শুয্যতু'র<sup>১</sup> প্রতিজ্ঞা নিয়ে হিমালয়ের নিভৃত গুহাতে পরব্রহ্মের ধ্যানে বসি, বল্লীকে সর্বশরীর আবৃত হলেও রাম নাম জপ করে চলি। অদ্ভুত তপস্রা, অপূর্ব নিষ্ঠা ও ইহামুক্তফলভোগবিরাগ—সাধবঃ অসাধ্যসাধনশীলাঃ। কিন্তু আধ্যাত্মিক জগতের সম্রাট হয়েও আধিদৈবিক ও আধিভৌতিকের গোচর-ভূমিতে ভেড়ার পাল, গুধু ঘাস খাচ্ছি! 'অমৃতশ পুত্রাঃ' বলেই কি কপালে ছিল যুগের পর যুগ যবনের দাসত্ব করা? এই ভারতের মহামানবের (?) অঙ্কগারদের আর্তনাদ কি ভগবান্ শোনে ন না?...নির্বলকে বল রাম...হয়তো একদিন বুঝিয়ে তিনি দেবেন, আর মুক্তি দেবেন বৃষ্টিকদংশন থেকে...

নাথ তু অনাথকো, অনাথ কোন মোসো ?

মো সমান আরত নহিঁ, আরতিহর তোসো ॥

নির্বলকে বল রাম—বল রাম, বল রাম, বল রাম, বল রাম—নির্বলকে বল রাম...

## ॥ ১০ ॥

অরুণালোকে হরিদ্বার আজ অপরূপ! গঙ্গার নীল খরশ্রোত, তার গায়ে ছোট্ট সহরটি, পিছনে পাহাড়, পাহাড়ের শীর্ষদেশে মন্দির; দূরের আকাশে হিমালয়ের মসীরেখা, আরও দূরে হিমকান্তির ছটা; নিপুণ শিল্পীর নিখুঁত চিত্র! তাই কি নাম মায়াপুরী? মহাপ্রস্থানের স্মৃতিজড়িত হরিদ্বার 'মায়াপুরী' নয়; মায়া এখানে কাটে, বাঁধে না; আমাদের নিত্যিকার মায়াপুরী এখানে অদৃশ্য, বলকে ওঠে তার জায়গায় অবোধপূর্ব দিব্যধাম...পাহাড়ের উপর উঠছি; তাল রেখে চলা সম্ভব নয়...ক্ষেপু এগিয়ে গেছে, দয়ালদা পিছনে; মাঝে মাঝে দাঁড়াই...অবাক্ বিশ্বয়ে চেয়ে থাকি...নয়নাভিরাম রূপ...অমৃত আজি পড়িছে ঝরিয়া,

নীরব আলোকে জাগিল হৃদয়প্রান্ত ;

অলস আঁখির আবরণ গেল সরিয়া,

জীবন উঠিল নিবিড় সুধায় ভরিয়া।

.....দার্জিলিং-ও হিমালয়, কিন্তু হরিদ্বারের সঙ্গে আকাশ-পাতাল্য প্রভেদ। দার্জিলিং-এর সহর যেন রূপসী, নৃত্যশীলা নটী, গিরিমালার যে পরিবেশে এই নৃত্যচাতুর্ঘ্যের প্রদর্শনী হচ্ছে তার সঙ্গে আমাদের আদিম যুগের সম্বন্ধ...উত্তম দ-

(১) গঙ্গাধর এই প্রতিজ্ঞা নিয়ে বোধিতরুন্মূলে সমাসীন হয়েছিলেন বুদ্ধদেব—

ইহাসনে শুয্যতু মে শরীরং বৃগহিমাংসং প্রলয়কং বাতু।

অপ্রাপ্য বোধিং বহুকালং ব্রহ্মাণ্ডে কায়ম্ অন্তর্লিখতি।

শীর্ষ পর্বতমালা...একটার কাঁধে আর পাঁচটা দাঁড়িয়ে আছে অসহ্য চাপ দিয়ে  
 ...দম বন্ধ হওয়ার মতো পরিস্থিতি...পাহাড়ের গুরুভারে জীবন যেন ফুক,  
 দলিত, পিষ্ট...মেঘের কোলে মেঘ অবিরাম আসে, যায়...মেঘসমুদ্র কখনও  
 উপরে, কখনও নীচে...যাদুকরের অঙ্গুলিহেলনে রোদ ও রষ্টির আবির্ভাব,  
 তিরোভাব...ধরিত্রীর জন্মদিনের উৎসব ; মাটি, জল, গিরি, বন, নদী, সাগর—  
 কখন কোন্টা উৎক্ষিপ্ত হবে বলা যায় না.....চঞ্চলা পটভূমি ; পরিপ্রেক্ষিত  
 সদা পরিবর্তনশীল । আদিম দিনের এই জগতের জীবন অস্থির, প্রাণ অশান্ত,  
 মন প্রমত্ত, মানুষ্য যুগ্মান সৈনিকের মতো মোহাক্ষ, মদমত্ত...মুনিকুলসেবিত  
 হরিদ্বার সম্পূর্ণ আলাদা...পরিবেশ শান্ত, স্নিগ্ধ, আনন্দোজ্জ্বল, হরিধামের দ্বার-  
 পাল, যাত্রীর তীর্থাবাস, যোগীদের তপোভূমি ; শুভ্র, শুদ্ধ, দীপ্ত...হরিধামের  
 প্রবেশদ্বার এমনি মহিমান্বিত না হলে মায়াপুরীর মায়া হয় তো কাটানো  
 সম্ভব হতো না...ধুলোমাটির জগৎ বহুদূরে ফেলে এসেছি...রবিকরে উদ্ভাসিত  
 হয় অর্চিমার্গের সেতু...আকাশ বাতাস গুচিতায় ভাস্বর...মন্দিরের চূড়া !.....  
 স্তব্ধ হয়ে বসি...ঢং, ঢং, ঢং বাজে মন্দিরের ঘণ্টা...ধ্বনির পর ধ্বনি...  
 অবিরাম ঢং ঢং ঢং...ওঁকারের মহামন্ত্রে অর্চিলোক বাংকৃত...বিশ্বলোকের আজ  
 প্রণবমন্ত্রে দীক্ষা...হরি ওঁ, হরি ওঁ, হরি ওঁ...মর্মর ধ্বনি জাগে, 'পল্লবে পল্লবে,  
 হিল্লোলে হিল্লোলে'...বাজে হিয়া নামমহামন্ত্রে হরি ওঁ, হরি ওঁ, হরি ওঁ...  
 হরি ওঁ, হরি ওঁ, হরি ওঁ.....

## ॥ ১১ ॥

এক ঘুমের পর জেগে দেখি, ক্ষেপু বিছানায় নেই ; রাত্রি চারটা ; দয়ালদা  
 বসে জপ করছেন বোধ হয়...হরিদ্বার নিস্তব্ধ ; কানে আসে শুধু গঙ্গার কুলু  
 কুলু নাদ...যাত্রী আমি, কিন্তু আছি ঘুমিয়ে। চলে গঙ্গা ; বিষ্ণুর পাদ  
 প্রক্ষালন করে অহরহঃ চলে প্রেমধারার চিরন্তন ছন্দে...দিন নেই, রাত্রি নেই,  
 অবিরাম ডাক দিয়ে যায়—হে যাত্রী, চলো ; আমি যে নিশিদিন চলাছি  
 বৈকুণ্ঠের বার্তা নিয়ে...চন্দ্র চলে, তারা চলে, চলে ভূত্বঃ স্বঃ...হে যাত্রী জাগো,  
 প্রেম সমুদ্রে অবগাহন করবে, চলো...কান পেতে শোনো আমার গতিছন্দে  
 অহর্নিশ ধ্বনিত হচ্ছে হরি ওঁ, হরি ওঁ, হরি ওঁ, আমার কুলুকুলুনাদে মঞ্জিত  
 হচ্ছে বিশ্বহিয়ার প্রেমম্পন্দন ! আমি যে অবিরাম তোমায় ডাকছি, হে যাত্রী,  
 চলো !...ব্যোমসমুদ্রে দেবযানে চলে ইন্দ্র, অর্ধমা, মরীচি, অষ্টাবস্তু, মিত্রাবরুণো

—ঋতশ্চ রশ্মিচ্ছমানাঃ ; আকাশে চলে পিতৃগণ ; বসুধার বৃকে চলে প্রেমার্থী বিশ্বজন ; যুগের পিছনে চলে যুগ, আর চলে বক্ষে মোর প্রেম-মহামন্ত্র হরি ওঁ, হরি ওঁ, হরি ওঁ...হে যাত্রী, চলো ! দেবা ন স্বপ্নায় স্পৃহয়ন্তি ; ঐ দেখো কালপুরুষ চলছে তদ্রাহীন জ্যোতিষ্মতায়...বর্তিকা হস্তে চলছে বুদ্ধ—শঙ্কর—নানক—চৈতন্য...চলে দিন, চলে রাত্রি...চলে মাস, চলে ঋতু-সংবৎসর...চলে নদী, চলে পর্বত, চলে তুণ, কীট, পতঙ্গ, বিহঙ্গ...ঐ দেখো দিগন্তপ্রসারিত মহাজনসেবিত তমসস্ পরি জ্যোতিরুক্তমম্ ; হে যাত্রী, জাগো, বলো ‘অগ্নে নয় স্পৃপথা রায়ে অস্মান্’, প্রার্থনা করো, ‘হে অগ্নি ! নিয়ে চলো জ্যোতিরুক্তমের পথে কল্যাণের নিত্যবরণে...হে যাত্রী ! প্রেমমন্ত্রের অঙ্কপা গেয়ে তোমায় ডেকে চলেছি আমি ; বলো, হরি ওঁ, হরি ওঁ, হরি ওঁ...হরি ওঁ, হরি ওঁ, হরি ওঁ.....

দয়ালদা গান ধরেন,

প্রেমে জল হয়ে যাও গলে ॥

কঠিনে মিশে না সে, মেশে রে সে তরল হলে ॥

অবিরাম হয়ে নত, চলে যাও নদীর মত,

কলনাদে অবিরত, জয় জগদীশ বলে ॥

প্রেমের ঠাকুর ডাকে তোরে, পেছন পানে তাকাস না রে,

ভেসে যা, ভাসিয়ে নে যা ( সেই ) পারাবার সিঁদু জলে ॥

রাস্তা দিয়ে কে গেয়ে যায়—

সোই রসনা জো হরিগুণ গাঠে ।

নৈননকী ছবি যাই চতুরতা, জেঁয়া মকরন্দ মুকুন্দহি ধ্যাইবে ॥

নির্মল চিত তৌ সোঈ সাঁচো, কৃষ্ণ বিনা জিয় ঔর ন ভাইবে ॥

স্ববননকী জু যাই অধিকারি, সুনি হরিকথা সুধারস প্যাঠে ॥

সুদাস জৈয়ে বলি তাকে, জো হরিজু সোঁ প্রীতি বঢ়াইবে ॥

.....কাঁপতে কাঁপতে ক্ষেপু মহারাজ ঘরে ঢুকলো ; গঙ্গান্নান সেবে এসেছে । শেষরাত্রে ব্রহ্মকুণ্ডে আবক্ষ নিমজ্জমান হয়ে আকাশচর মহাত্মাদের দর্শনে গিয়েছিল । কঞ্চল মুড়ি দিয়ে বলে, ‘পারলুম না আর থাকতে, একটা ডুব দিয়েই—’ তখনও দাঁতে দাঁত ঠক্ঠক্ করছে ; তাড়াতাড়ি স্টোড্-এ চা করে দিলুম ; দু পেয়ালা খেয়ে বলে, ‘পরে খাবো আর এক পেয়ালা । অনেকেই গঙ্গামাঙ্গর নাম নিয়ে ডুব দিচ্ছে দেখে ভাবলুম, আমিই বা পারবো না



কেন! কিন্তু নেবেছি কি—ওরে বাবা! কী ভয়ঙ্কর ঠাণ্ডা! প্রথমটায় দেখি কোমর পর্যন্ত কেটে গেছে; ডুব দিয়ে মনে হলো আমি আর নেই; দৌড়ে না এলে মরেই যেতুম।’ দয়ালদা ধমক দেন, ‘হিতাহিত জ্ঞান তোমার কোনো কালেই হবে না, স্ক্যাপা-ই থেকে গেলে চিরটা কাল।’ আমি শুধাই—

: খেচর কোনও মহাত্মার দর্শন হলো?

: একটা উদ্ধার মতো কী যেন—

: সে তো রেলগাড়ীর টর্চ লাইট।

: তুক্তাকে তোমার এতো শ্রদ্ধা কেন?—জিজ্ঞেস করেন দয়ালদা।

: তুক্তাক কোথায় দেখলে?

: আকাশগামী মহাত্মা তোমার কী করবেন? ঈশ্বর পাইয়ে দেবেন? লাগ—  
লাগ বলে—

: না, তা নয়; তবে তাঁদের কৃপাদৃষ্টিতে—

: কৃপা ভিক্ষা করতে হয় ঈশ্বরের নিকট; তিনি অন্তর্ধামী,—

পূজা তো পুরুত দিয়েই করতে হয়?

: ভক্তি যেখানে কাম্য, পুরুত সেখানে অন্তরায়; তুক্ত-তাক্ মুখ্য হয়ে পড়ে, আর ঈশ্বর হন গৌণ। আসল কথা কি জ্ঞান? ও আমার ভাল লাগে না।

ভগবান্ আমাদের পরমাত্মীয়, চাপরাশী দিয়ে তাঁর কাছে দরখাস্ত পাঠাবো কেন? পরমাত্মাকে দেখতে চাই মুখোমুখি; আমাদের ছুজনার মাঝখানে আবার বাজে লোক কেন? বাজে লোক আড়াল করে থাকলে ভাব-ই বা জন্মে কেন?

: মহাত্মারা কি বাজে লোক?

: প্রেমাস্পদ ও প্রেমিকের মাঝে এতোটুকুও ব্যবধান যে সৃষ্টি করে সে অবাস্তিত; স্মৃতির বাজে। একটি গান আছে—

মা-ছেলেতে কথা হয়,

পড়শী কেন তাতে রয়?

আমার গুরুদেব বলতেন, ভক্তের তিন অবস্থা। প্রথমে তিনি আমার; তারপর আমি তাঁর; শেষে আমিই তিনি। বুঝলে ক্ষেপু? তৃতীয় ব্যক্তির স্থান নেই। ভগবানে আমরা যখন বিশ্বাস হারাই তখনই মাদুলীজাতীয় অবস্থাতে শ্রদ্ধা বাড়ে। দুর্বলতা আছে মানুষের, কিন্তু তার ওষুধ মাদুলী নয়।

: কী তার ওষুধ?—জিজ্ঞেস করি আমি।

দয়ালদা উত্তর দেন—

মত কর মোহ তু, হরিভজ্ঞনকো মান রে ।

নয়ন দিয়ে দরশন করনে কো, শবন দিয়ে শুন জ্ঞান রে ॥

: রবিবাবুর একটা গান হক না, বাংলা গান,—বলে ক্ষেপু। দয়ালদা উত্তর দেন, জমবে না এখন। আমি প্রশ্ন করি, কেন? দয়ালদা জবাব দেন, কথা বেশী; বিষয়বস্তু ভগবানের ঐশ্বর্য, ভগবান্ নন; আর আসল জিনিসেরই অভাব—না আছে ভক্তের দীনতা, না আছে ভগবানের নাম। নামই অমৃত। বরং এসো, তিনজনে কীর্তন করি—

কেশব! কুরু করুণা দীনে কুঞ্জকাননচারী ।

মাধব মনমোহন, মোহন মুরলীধারী ॥

ব্রজকিশোর কালীযহর কাতরভয়ভঞ্জন,

গোবর্ধনধারণ বনকুশুমভূষণ,

দামোদর কংসদর্পহারী ।

শ্যাম রাস রসবিহারী

হরি বোল, হরি বোল, হরি বোল, মন আমার ।

বাড়ীর মালিক, ক্ষেপূর বন্ধু, ঘরে এসে বসলেন; আমাদের কুশল প্রশ্ন করেন। আমরা ধন্যবাদ জানাই...তিনি বিনয় প্রকাশ করেন; অতঃপর দয়ালদাকে অনুরোধ করেন, নাম হক একটু...

হরি বল, হরি বল, হরি বল, ভাইরে ।

হরি নাম তরী বিনে অন্তগতি নাইরে ॥

অপবিত্র, পবিত্র বা, যে ভাবে যে থাক,

হৃদয় খুলে বাহু মেলে হরি বলে ডাক ।

আছে যতো পাপরাশি নামতরঙ্গে যাবে ভাসি ।

( ও তোর ) মায়া ফাঁসি যাবে রে খসি ॥

উদয় হবে জ্ঞানরাশি, অন্ধকার যাবে দূরে ।

হরেকৃষ্ণ নারায়ণ মধুকৈটভারে,

মাধবমধুসূদন মুকুন্দ মুরারে ।

গোপাল গোবিন্দ নাম, কেশবকরুণাধাম,

ঐ নাম জপ, জপ, জপ অবিরাম রে ॥

॥ ১২ ॥

আজকে ঘুরেছি অনেক—সপ্তধারা, ভীমঘোড়া, কালভৈরব, বিষ্ণুেশ্বর, দক্ষঘাট, সতীঘাট, কনখল, রামকৃষ্ণ সেবাশ্রম, এবং পথে আরও যতো পুণ্যস্থান। সপ্তধারায় রাজা পরীক্ষিৎকে শুকদেব ভাগবত শুনিয়েছিলেন, এবং পরীক্ষিৎ এখানেই নাকি দেহরক্ষা করেছিলেন। ভীমঘোড়া মহাপ্রস্থানের পথে— ভীমের স্মৃতিজড়িত ; বিষ্ণুেশ্বরের একটি গুহায় তপস্শ্রাবত ভোলাগিরি মহারাজ সিদ্ধিলাভ করেন। দক্ষঘাট, সতীঘাট, দক্ষযজ্ঞের লীলাভূমি। গঙ্গার ত্রিধারার সঙ্গমস্থল কনখল, এখানে স্নান করলে অশেষ পাতক নাশ হয়...চরকির মতো ঘুরি, একটা নেশা ঘেন...অসংখ্য যাত্রী...সকলেই চলছে...wanderlust ? এককালে মানুষ ভবঘুরে ছিল, সেই পুরনো সংস্কারের বশে নাকি আমরা ঘুরে বেড়াই। ছায়ে ফাঁকি আছে। ভবঘুরে নোমাদ (nomad) যখন আমরা ছিলাম তখন দৈনন্দিন খোরাকের জ্ঞান বাধ্য হয়ে ঘুরতে হতো ; কাজেই সংস্কারটা ক্লেশাত্মক হওয়া উচিত ; স্মৃতিধর্মী হয় কেন ? আর যদি আনন্দের জ্ঞানই পর্যটন করতুম তবে বৃত্তিটা মানব চিত্তের সহজ সংস্কারে এসে দাঁড়ায়— যে সংস্কারের বশে ‘নোমাদ’ তার আদিম মন নিয়ে যাবাবরত উপভোগ করতো, যেমন আমরা করে থাকি আমাদের আধুনিক মন নিয়ে। দার্শনিকরা যাকে জগৎ-নিত্যত্ব বলেন তাতে আছে গতির অবিরাম ছন্দ, জানাকে ছেড়ে অজানাকে খোঁজার নন্দনযাত্রা। সহস্র বন্ধনমাঝে লভিব মুক্তির স্বাদ ? সে আমার নয়। জানি, ছোটখাট হাসিকান্নার রঙিন ডোরগুলো আমরা ভালবাসি, জীপুত্র নিয়ে স্মৃতিনীড় রচনা করি ; দুঃখ আসে, দৈন্ত্য আসে, রোগ-শোক-তাপ আসে ; তখন বন্ধনস্মৃতির প্রলেপ লাগিয়ে ভুলে থাকতে চেষ্টা করি। কিন্তু মুক্তির আশ্বাদ কোথায় এখানে ? বৈরাগ্যসাধনে মুক্তি সে নয় আমার ! বুঝি না। কবিতার দিক থেকেও নয়, দর্শনের দিক থেকেও নয়। কবিতার দিক থেকে নয়, কারণ মানুষের সহজ সংস্কারের নির্দেশ কবি নিজেই দিয়েছেন—

আগে চল, আগে চল, ভাই।

পড়ে থাকা পিছে, মরে থাকা মিছে,

বঁচে মরে, কিবা ফল, ভাই ॥

দর্শনের দিক থেকেও নয়, কারণ জীবের স্বভাবে মুক্তির ইচ্ছা না থাকলে সে আসে কোথা থেকে ? জগৎ যদি নিত্য চল, আমার সাধ্য কি চুপ করে বসে থাকি ? ...চল মুসাক্ষির বাঁধকে গঠরী, বহুত দূর জানা হোগা...চলাই ভাল ; আবর্জনা

বাড়িয়ে লাভ কি? যতো বোঝা, চলার পথে ততো কষ্ট...কোঁপীনবস্ত্রঃ থলু ভাগ্যবস্ত্রঃ। ইচ্ছা হয়, দিই সব বোঝা ফেলে...সামনে যখন যাবি ওরে যাক না পিছন পিছে পড়ে...অনর্থক হয়রানি...ক্ষুন্নিবৃত্তি তো দু-মুঠো ভিক্ষেতেই হয়... লেঠা সব চুকে যায় পথকে যদি ঘর করা যায়...তরোমূলং কেবলমাশ্রয়ন্তঃ। গাছ-তলার এক অদ্ভুত আকর্ষণ আছে...আমাদের গাঁয়ে শ্মশানের ধারে একটি বটগাছ আছে, কতো দুপুর কাটিয়েছি ওর ঘন শীতল ছায়ায়, চুপ করে ঘুঘুর ডাক শুনেছি ...ঘুঘুর ডাকে বেশ নিঃসঙ্গ উদাস ভাব; স্মরণে বৈরাগ্য-গম্ভীর, যেন ভৈরবোঁ। রাগিণীর মর্মকথাটি বারবার স্মরণ করিয়ে দেয়...নির্জন মাঠ, চার দিক রোদে খাঁ খাঁ করে, এক পাশে একটি খাল, মাঝখানে বটগাছের ঝাঁকড়া মাথা, তার ওপর ভৈরবঠাকুর স্মরণ ভাঁজেন ঘর-ছাডানো উদাস তানে...

কনথলের চকবাজারে তিনজনে তিন গ্লাস ফেনায়িত দুধ খেতে বসেছি; দোকানী দুটো গেলাস নিয়ে দুখটা ঢালা-উপুড় করছে...কোঁপীনধারী একজন সাধু এসে ভজন ধরলেন—

বীত গয়ে দিন ভজন বিনা রে !

বাল অবস্থা খেল গঁবায়ো, জব জবানি তব মান ঘনা রে ॥

লাহে কারণ মূল গঁবায়ো অজল্লন গই মনকী তুসনা রে ।

কহত কবীর সুনো ভাঙ্গি সাধো, পার উত্তর গয়ে সন্ত জনা রে ॥

পার উত্তর গয়ে সন্ত জনা রে, পার উত্তর গয়ে সন্ত জনা রে ॥

উৎসাহ পেয়ে মীরা বাঙ্গির পদ ধরেন—

চালো মন গঙ্গা-জমুনা-তীর ॥

গঙ্গা-জমুনা নিরমল পাণী সীতল হোত সরীর ।

বংসী বজাবত গাবত কান্হো সঙ্গ লিয়ঁ। বল বীর ॥

মোর মুগট পীতাম্বর সোহৈ কুণ্ডল ঝলকত হীর ।

মীরাকে প্রভু গিরিধর নাগর চরণকঁবলপর সীর ॥

সাধুজীর উপার্জন মন্দ হলো না ; সাধু হয় তো নন ; ভিগ্নী ; কিন্তু বেশ জীবন ...শঙ্করাচার্যের কোঁপীনপঞ্চকের কথা মনকে উদাস করে...বেদান্তবাক্যোন্মু সদা রমন্তঃ, ভিক্ষান্নমাত্রেণ চ তৃপ্তিমন্তঃ, অশোকমন্তঃকরণে চরন্তঃ, মূলং তরোঃ কেবল-মাশ্রয়ন্তঃ, পাণিধ্বং ভোক্তুমামন্ত্রয়ন্তঃ, অহর্নিশং ব্রহ্মস্থখে রমন্তঃ...কোঁপীনবস্ত্রঃ থলু ভাগ্যবস্ত্রঃ...বেদান্তবাক্যে রতি, ভিক্ষানে তৃপ্তি, শোকহীন চিন্তে ভ্রমণ, পাণিধ্বং

আহারপাত্র, তরুমূল স্তম্ভশয্যা, দিবানিশি ব্রহ্মানন্দে মগন...কৌপীনসম্বল এঁরাই  
ধন্য...বৈরাগ্যরসের অমৃতনিবারিণী, যা পান করে

পার উত্তর গয়ে সন্ত জনা রে ।

## ॥ ১৩ ॥

: ওহে দেবলচন্দ্র ! দেবু ! দেবু ! কত ঘুমুচ্ছি ? চারটে বাজে ; চল, সাধুদর্শন  
করে আসি ; বলে ক্ষেপু ।

: দয়ালদা কোথায় ?—জিজ্ঞেস করি আমি ।

: ভোলাগিরি মহারাজের আশ্রমে গিয়েছেন, ভাগবত হবে ।

: তুই যা ; ঘুমের ঘোর আমার কাটে নি, আরও একটু চোপ বুজে থাকি ।

: ঘুমবি তো হরিদ্বার এলি কেন ?

: শ্রীহরি টেনে এনেছেন ।

: যাবি না ?

: না । শ্রীহরির ইচ্ছা নয় । তুই যা ।

...সন্ধ্যা নাগাদ ব্রহ্মকুণ্ডে এসে পৌঁছই । দিনে একবার অন্ততঃ ব্রহ্মকুণ্ডে না এলে  
মনটা খুঁত খুঁত করে ; সবারই । একবার সকলেই আসেন ; অনেকেই দুবার—  
তুপুরে স্নান করতে, বিকেলে বেড়াতে । চানটা সেরেছি আজ কনথলে, কাজেই  
এবেলা বেড়াতে আসতেই হয় । এখানকার দৃশ্যে বৈচিত্র্য নেই, আছে চিরনবীনতা  
...রোজ আটার ঢেলা নিয়ে বসে সব, আবালবৃদ্ধবনিতা ; রোজ ঢেলা থেকে বড়ি  
বানিয়ে জলে ফেলে, মাছগুলো কিলবিল করে এসে খায়...সবাই যেন শিশু হয়ে  
যাই, মাছের ছল্লোড় দেখে উল্লাসে আত্মহারা হই ; চোখেমুখে হাসি, চিত্ত  
উচ্ছল...গঙ্গা মাটির ছেলেমেয়েদের নিতালীলা—চিরপুরাতন, চিরনবীন...  
গলসওয়ার্দির ( Galsworthy ) একটি গল্প আছে—আল্টিমা থুলে ( Ultima  
Thule ) ; দুটি চরিত্র, টমসন্ ও জ্যাকসন্ । ছুনিয়াদারির লড়াইতে টমসন্  
সম্পূর্ণ পরাজিত, জ্যাকসন্ পুরোপুরি সফলকাম ; টমসনের কাপড় চোপড় ধুলি-  
ধূসর ও শতচ্ছিন্ন, জ্যাকসন্ ফুটফুটে ফুলবারু ; টমসনের দীপ্তি শুধু তার চোখে,  
জ্যাকসনের দীপ্তি চোখ ছাড়া আর সব জায়গায় ; টমসন্ আকাশের দিকে তাকিয়ে  
থাকে, পাখীর গান শোনে, ছোটদের নিয়ে ঝোপে ঝোপে ফুল দেখে বেড়ায়,  
পুকুরধারে উপুড় হয়ে শোয়, মাছের খেলা দেখে চোঁচিয়ে ওঠে ; আকাশ, বাতাস,  
ঘাসফুল, সূর্যের আলো, ছন্নছাড়া বিড়ালছানা, বাতাহত রবিন পাখী—সব কিছুই

টমসনের চোখে অপার্থিব আলোতে উজ্জ্বল, বিস্ময়কর, নয়নভোলানো। জ্যাক্সনের দৃষ্টিতে এসব বাজে, অর্থহীন, তুচ্ছ ; সার্থক শুধু পাউণ্ড-শিলিং-পেনস্, যা দিয়ে সব কিছু কেনা যায়, ...ব্রহ্মকুণ্ডের চত্বরে চিরন্তন শিশুদের গোষ্ঠীলীলা দেখে আমাদের মনের জ্যাক্সনগুলো যেন টমসনে রূপান্তরিত হয়, মর্ত্যধাম থেকে হঠাৎ দিব্যধামে এসে পৌঁছই, বৈকুণ্ঠবাসী টমসনের হাত ধরে নিত্যলীলায় যোগ দিই, অজ্ঞাতসারে সুর মিলিয়ে বলি everything is wonderful...বাসায় এসে দেখি ক্ষেপু ফিরেছে ; দয়ালদা ফেরেন নি ; রাত সাড়ে আটটা ; ভাগবতকথা হয় তো এখনও চলছে, ক্ষেপুব চোখ উজ্জ্বল, ব্রহ্মকুণ্ডে গিয়েছিল নিশ্চয়। বলি,

: সাধুদর্শন কিরূপ হলো ?

: ঠকে গিয়েছি।

: কেন ?

: খুব বড় এক মহাত্মা দেখে এলুম, ভাবছি ওঁর কাছে মন্ত্র নিই ; কিন্তু কৃপা করবেন কিনা সন্দেহ।

: সন্দেহের কারণ ?

: অতো বড় মহাত্মা ! আমাদের দিকে কি আর দৃষ্টি দেবেন ?

: খুব বড় মহাত্মা বুঝি ?

: অনেক পুণ্যের ফলে এরূপ মহাত্মার দর্শনলাভ হয়। গায়ের কী রং, যেন ভস্মাচ্ছাদিত বহি ; আজামুলব্রিত বাহ ; সূঠাম, সুন্দর দেহ—

: এই জন্ম মহাত্মা ?

: অস্থির হচ্ছি কেন ? দেখলুম কাত হয়ে গঙ্গাতটে বালুশয্যায় শুয়ে আছেন ; এক হাতে মালা চলছে ; নির্বাক, ধ্যানস্থ ; আনন্দে সর্বশরীর রোমাঞ্চিত।

: বড় মহাত্মা বলেই তো মনে হচ্ছে। কালকে দয়ালদাকে নিয়ে দেখে এলে হয়।

: আমিও তা ভেবেছি ; কিন্তু কালকেই কুশ্মান, দেখা পেলে হয় ! ভোরের দিকে একবার খোঁজ নিয়ে আসবো'খন।

: আর কোনও মহাত্মার দর্শন পেলি ?

: দর্শন না, হদীস পেয়েছি। ইনি আরও উঁচু থাকের ; লোকালয়ে আসেন না, লছমনঝোলা থেকে ১০।১২ দিন পাহাড় ভেঙ্গে গেলে তাঁর গুহ্মা দেখা যায় ; রাস্তা নেই, যাওয়া খুবই কঠিন। আজ বিশ বছর ঐ গুহ্মার ভেতর আছেন, সদা ধ্যানমগ্ন, চোখ খোলেন না।

: থাওয়া দাওয়ার ব্যবস্থা ?

: তুই একটি আহান্নক ! এসব মহাপুরুষের কি আর ভাল-ক্কাটির ভাবনা ভাবতে হয় ?

: বুঝেছি ; শিগুরা ব্যবস্থা করেন ।

: ছাই বুঝেছিস্ । ধর্মের গুট্ তত্ত্ব তোর মাথায় ঢুকবে না । এতো বড় মহাত্মা, চোখ পর্যন্ত খোলেন না, তাঁর আবার শিগু কি রে ? তিনি কি আর আমাদের জগতে থাকেন ?

: কোথায় থাকেন তা হলে ?

: ব্রহ্মরন্ধ্র ভেদ করে আকাশ মার্গে বিচরণ করেন, দেহটা গুপ্ত পড়ে থাকে গুম্ফার ভেতর ।

: তা হলে তো গিয়ে কোনো লাভই নেই ?

: তুই ঘরে ফিরে যা ।

: তা না হয় যাচ্ছি ; কিন্তু দেহপিণ্ডটা কি মন্ত্র দেবে তোকে ?

: তুই ভাবছিস্, দেহটাকেই দেখা যায় ? তোর বুদ্ধির বলিহার যাই ! গুম্ফার মুখে বিরাট এক পাথর ; তোর মতো বিশ-পঁচিশটা লোক তাকে এক চুলও হটাতে পারবে না ।

: তবে তো যাওয়া একেবারেই নিষ্ফল ?

: এতো সহজেই দমে যাস্ তুই ?

: তুই তো দমিস্ নি ? শুনি, কি করবি তুই ? মন্ত্র দিয়ে—

: ঠিক ধরেছিস্ । গুম্ফার স্তম্ভে দাঁড়িয়ে লক্ষ বার জপ করতে হবে—

: Open Sesame ?

: বিপদ ডেকে আনবি । যাবনিক ভাষা প্রয়োগ করেছ কি মরেছ ।

: মন্ত্রটি তা হলে দেবভাষায় ?

: নিশ্চয় । ওঁ শম্ভো হংকট্ । মহাত্মাজী তুষ্ট হলে পাথর নিজেকে থেকেই সরে যায়, আর ভিতর থেকে বজ্রনিম্নাদে প্রস্ফুট হয়—কস্ৎ কুত আগতঃ ?

: উত্তর তো সংস্কৃততেই দিতে হবে ?

দয়ালদা এসে ঢুকলেন । ক্ষেপু একদম চুপ । বুঝলুম, কস্ৎ-বাবা সম্বন্ধে আর তথ্য আদায় করা যাবে না ।...শয়নে পদ্মনাভকে পেতে ক্ষেপুর কোনো কালেই দেরি হয় না ; যখন খুশি, যেখানে খুশি, যে ভাবে খুশি, স্তম্ভিয়ে পড়া তিন তুড়ির ব্যাপার মাত্র ; তারপর অঘোরে নিদ্রা । আজকে হয়তো স্বপ্ন দেখছে

গুহাশায়ী মহাত্মাজীর আকাশবিহার...পরমহংসদেব বলেন, শিশুর মতো সরল বিশ্বাস থাকলে ঈশ্বরলাভ হয়; ক্ষেপুর সেই বিশ্বাস আছে, আমার নেই। অনেকেই বলেন, শুনে এলুম উত্তরকাশীর উত্তরে, মানসগঙ্গার পশ্চিমে, অলকানন্দ্রার উৎসের ঈশানকোণে, হিমালয়ের এক অতি দুর্গম গিরিগুহার অভ্যন্তরে চিরসমাহিত এক মহাপুরুষ অবস্থান করেন; সকলেই বলেন, অমূকের নিকট শুনলুম, স্বচক্ষে দেখেন নি কেউ। সন্দ্বিষ্টচিত্ত যারা তাঁদেরও যে এ-জাতীয় গল্পে পুরোপুরি অবিশ্বাস তা বলা যায় না। হাজার বছর ধ্যানস্থ হয়ে আছেন এরকম মুনিঋষিদের কথা পুরাণ-ইতিহাসে পাওয়া যায়; ছোটবেলা থেকে এঁদের সঙ্গ কল্পলোকে পেয়ে এসেছি; কাজেই মনের গহনে একজন আছেন যিনি হাজার বছর ধ্যানমগ্ন হয়ে থাকতে চান; তাঁরই সূক্ষ্ম প্রেরণায় কস্মৎ-বাবার অস্তিত্বে আমরা বিশ্বাস করি। অর্থাৎ, যেহেতু থাকা উচিত অতএব আছেন নিশ্চয়। ভাগ্যান্বান্ যারা তাঁদেরই দর্শন দেন, এবং চিত্তে মৌলিক প্রশ্নটি জাগিয়ে তোলেন, ‘কস্মৎ কুত আগতঃ?’...কস্মৎ কোহং কুত আয়াতঃ? কা মে জননী কো মে তাতঃ?...কে আমি? কোথা থেকে আসি? কোথা চলে যাই? কে জানে? গুহাহিতঃ গহ্বরেষ্ঠং পুরাণম্? ১...আদিম রহস্যময় প্রশ্ন।

যো অশ্রাদ্যক্ষঃ পরমে ব্যোমন্

তসো অঙ্গ বেদ যদি বা ন বেদ।<sup>১</sup>

পরম ব্যোমে যিনি অধিষ্ঠিত হয় তো তিনি জানেন!...অথবা তিনিও হয় তো জানেন না;...কী আছে এই গুহার অভ্যন্তরে? গহনং গভীরম্?<sup>২</sup>

## ॥ ১৪ ॥

ক্রান্ত হয়ে যখন বাসায় ফিরি তখন মন্দিরে মন্দিরে সঙ্ঘারতির কাঁসর ঘণ্টা বাজছে। সারাদিনটা গেছে এক অভূতপূর্ব উন্মাদনায়। সকালে গিয়েছিলুম চণ্ডী পাহাড়ে; পাহাড়ের শীর্ষদেশ থেকে তাকাই হরিদ্বারের দিকে...গঙ্গার নীল রেখা...পর্বতের পাদদেশে সহরের দীপ্ত রূপ। মানসনেত্রে যখন ভারতমাতাকে দেখি, ভেসে ওঠে “যেদিন সুনীল জলধি হইতে উঠিল জননী ভারতবর্ষ”; হরিদ্বার তেমনি আজ গঙ্গানান করে মুক্তামালায় বিভূষিত হয়ে স্বর্ধকিরণে ঝকঝক করছে...যাত্রীরা মুগ্ধনয়নে তাকিয়ে আছে...ফিরতি পথে পাহাড়ভাঙ্গা ক্লাস্তি দূর করি গঙ্গায় ডুব দিয়ে। কুস্তনান শেষ রাত্রি থেকেই আরম্ভ হয়েছে; মোক্ষযোগ



বিকেল বেলা। আজ উপোস করে আছি সবাই। সাধুদের ভিড় ঠেলে ব্রহ্মকুণ্ডে ডুব দেওয়া দয়ালদার পক্ষে অসম্ভব, তাই অগ্ন্যত্র স্নান সেরে নিয়েছেন। ক্ষেপু ও আমি অগ্ন্যাত্র গৃহীদের পদাঙ্ক অনুসরণ করে বাবাজীদের দলে ভিড়ে গিয়েছি, তা নইলে মোক্ষস্নান সম্ভব হতো না, তিথি-নক্ষত্রের যোগ পেরিয়ে যেতো। ভয় আছে, সাধুরা তাড়া করতে পারেন। গঙ্গার পূর্বতট হতে শোভা-যাত্রা শুরু হয়েছে কূর্মগতিতে...রোদে ও ঠেলাঠেলিতে সকলেই শ্রান্ত, গলদঘর্ম, কিন্তু সর্বত্র আনন্দের উদ্বেলতা...হর-হর, ব্যোম-ব্যোম; জয় শিব শঙ্কর; হরি ওঁ, হরি ওঁ; জয় শ্রীরামচন্দ্রজীকী জয় ইত্যাদি পাতকনাশন পূতধ্বনিতে আকাশ কম্পিত, দেহমন পুলকিত...এবারে ব্রহ্মকুণ্ডের দিকে এগোচ্ছি। একজন গৈরিক-ধারী গৃহীদের ভিড় দেখে রুখে দাঁড়ান, একজন বৃদ্ধ সাধু সহাস্ত বদনে বলেন, জানে দ্বীজিয়ে, জানে দ্বীজিয়ে...বলো শ্রীরামচন্দ্রজী কী জয় !...রামায়েত বৈষ্ণব এঁরা। নাগা সন্ন্যাসী হলে মেরেই বসতেন; তাঁরা যান সকলের আগে, গৃহীরা তাঁদের পিছু নিতে সাহস করেন না...পা আর চলে না, গলা পর্যন্ত শুকিয়ে গেছে; ইচ্ছা হয় বসে পড়ি, কিন্তু অসম্ভব; পিষে মেবে ফেলবে; মরেও অনেকে। একটা ডুব দিতে পারলে এখন বাঁচি...যা রোদ ও ভিড়ের চাপ, সর্দি-গর্মি না হয়...এখনও ক্ষেপুর সঙ্গছাড়া হই নি, ফাঁকে ফাঁকে ছুঁ-চারটে কথা হয়, আবার পেছনের ধাক্কায় এগিয়ে যাই...এসে গেছি...ডুব দিয়ে বেঁচে গেলুম...ডুবে থাকতে ইচ্ছা হয়...দেহ মন প্রাণে পরম তৃপ্তি...

দেবি সুরেশ্বরী ভগবতি গঙ্গে, ত্রিভুবনতারিণি তরলতরঙ্গে।

শঙ্করমৌলিনিবাসিনি বিমলে, মম মতিরাস্তাং তবপদকমলে ॥

রোগং শোকং পাপং তাপং হর মে ভগবতি কুমতিকলাপম্।

ত্রিভুবনসারে বসুধাহারে, স্বমসি গতির্মম খলু সংসারে ॥

অলকানন্দে পরমানন্দে কুরু ময়ি করুণাং কাতরবন্দ্যে।

তব তটনিকটে যশ্চ হি বাসঃ খলু বৈকুণ্ঠে তশ্চ নিবাসঃ ॥

মাতর্গঙ্গে ! মাতর্গঙ্গে ! পতিতোদ্ধারিণি জাহ্নবি গঙ্গে !...মাতর্গঙ্গে ! মাতর্গঙ্গে !... কুস্তম্নান তো হলো—ব্রহ্মকুণ্ডে, মোক্ষযোগে, সাধুজ্ঞান সঙ্গে। কিন্তু মোক্ষ হবে কি ? বাবাজী সেদিন আশ্বাস দিয়েছিলেন, হতেই হবে। কিন্তু সেই বিশ্বাস কোথায় ? দয়ালদার আছে, তিনি তো সাধুই; ক্ষেপুরও আছে—ছোট ছেলের সরল বিশ্বাস। কিন্তু আমার দেখছি সংশয়ই চিত্ত অধিকার করে আছে। যাক্ গে। আজকের দিনে ও-সব কথা আর ভাববো না। ভারতের কতো জায়গা

থেকে কতো যাত্রী এসেছেন, লক্ষ লক্ষ ভগবদ্ভক্তের আকুল প্রার্থনায় যোগ দিয়েছি, তাঁদের সঙ্গে স্নান করে শ্রীহরির কৃপা চেয়েছি, তাঁদের পবিত্র পরশে ধন্য হয়েছি; তবে সংশয় কেন? সংশয়াত্মা বিনশ্চিতি...আমার কিছু হবে না; মনটাও দুর্বল; নায়মাত্মা বলহীনেন লভ্যঃ; ক্ষেপুর শরীর ও মন উভয়ই বলিষ্ঠ; আমি—নাঃ, আবার ঐ কথাই ভাবছি! ‘দুর্বলকে বল রাম’...তাঁর নামেই দুর্বলতা কেটে যায়...স্বরদাসজী তাই বলেন...নির্বলকে বল রাম...বল রাম, বল রাম, বল রাম, বল রাম...ক্ষেপুর ডাকে উঠে বসি; চা জলখাবার নিয়ে এসেছে। মুমুক্শুরও নাকি মোক্ষ-বিভীষিকা থাকে। আমি মুমুক্শু কি না জানা নেই, কিন্তু মুক্ত হলে যে রসিয়ে চা আর খাওয়া যাবে না এই বিভীষিকাটা বেশ আছে...চা খেতে খেতে সে কথাটাই মনে ওঠে...মুক্তি আসে বহুনাং জন্মনামস্তে...ততো দিন তো চা খেয়ে নিই, তারপর দেখা যাবে...দয়ালদা এখনও ফেরেন নি। একটা পান মুখে দিয়ে, আরামের নিঃশ্বাস ফেলে আবার শুয়ে পড়ি। ক্ষেপু ধমক দেয়, গুলি যে বড়? ওঠ, সাধুদর্শন করে আসি। আমি বলি—

: অসম্ভব।

: অসম্ভব কেন?

: বেজায় থকে গেছি।

: এতটুকুতেই হেদিয়ে গেলি? বদরিকাশ্রম যাবি কি করে?

: যাবো না। এখান থেকেই প্রণাম জানাচ্ছি; সাধুদেরও, তুই যাঁদের দর্শনে যাচ্ছি। আমার জন্ম তাঁদের পদধূলি নিয়ে আসিস।

সারাদিনের উত্তেজনার পর ভাবলুম একটু ঘুমুই...নিদ নাহি আঁখিপাতে...স্নানার্থীদের বিরাট শোভাযাত্রা চোখের সামনে যাতায়াত করে, ভারতের সকল যাত্রী মাথায় ভিড় করে আছে...যাচ্ছে আর আসছে, অফুরন্ত জনশ্রোত, অবিরাম জয়ধ্বনি, আসমুদ্র হিমাচল থেকে আর্ত রোল, পরমকারুণিক শ্রীহরির নিকট ভারতের মুক্তি-কামনা...কুণ্ডযোগ...গঙ্গাস্নান...অমৃতলাভ...

হরিদ্বারে না এলে, কুস্তমেলার স্নানযজ্ঞ না দেখলে, ভারতের অন্তরীয়ার সঙ্গে পরিচয় হয় না। শুনি, প্রত্যেক জীবেরই আত্মা আছে; আছে কিনা জানিনা, তবে আছে বলে বিশ্বাস করি, এবং ব্যক্তিগত ভাবনা ও দৃষ্টি-কোণের বৈশিষ্ট্যে তার আভাস পাই। প্রত্যেক দেশেরও কি এমনি একটি আত্মা আছে? Presiding Deity? কি জানি! Landor (ল্যান্ডর) একটি প্রবন্ধে

গর্ব করেছেন, দেশে এবং বিদেশে সর্বত্র ইংরেজ জাতি স্বাধীনতার পতাকা উড়িয়ে ধ্বনি তুলেছে **Be Free**, স্বাধীন হও ; এজন্যই ইংলণ্ডের অন্তরাত্মাকে পাওয়া যায় ইংরেজদের জাতীয় জীবনের মূলমন্ত্র **Liberty** বা স্বাধীনতায়। ধূঁয়ার জগৎ আগুনটা অনেক সময়ই চোখে পড়ে না, কিন্তু আগুনের সত্তা সম্বন্ধে সন্দেহের অবকাশ নেই...আফ্রিকা **dark continent**, ইতিহাসের হাতুড়ি-পেটা মাত্র স্মৃক হয়েছে, অন্তরাত্মা এখনও তমসচ্ছন্ন ...আমেরিকা প্রাণবন্ত, **dark continent** নয়, কিন্তু ওর আত্মাকে খুঁজে পাই না ; বিস্তৃত আছে, চিত্ত নেই...রাশিয়া জড়বাদী হলেও বিশ্বসাম্যের স্বপ্ন দেখে, এই স্বপ্নই একদিন দেবতাআর কল্যাণরূপে দেখা দিতে পারে। আমেরিকায় জড়বাদ যেন নিরেট...জার্মানীতে আবার উঠেছে রক্তের ডাক—পরাজয়ের ক্ষুর প্রতিক্রিয়া। প্রাণ-হীন সংস্কৃতির বিরুদ্ধে সংগ্রাম করার সার্থকতা আছে, কারণ কাব্যাহত ক্ষীণজীবীর পরমায়ু অল্প। কিন্তু সাংস্কৃতিক রক্তহীনতার ঔষধ দেবতাদের অমৃতকুণ্ডে সুরক্ষিত, জার্মান বৈদ্য যদিও বিধান দিচ্ছেন আত্মরিকতার উগ্র হলাহল। ফরাসী দেশের সংস্কৃতি-ব্যাধি হয় তো সাময়িক, মারাত্মক না-ও হতে পারে। কিন্তু ফরাসী বিপ্লবের যজ্ঞবেদীতে সাম্যবাদের যে দেবতা প্রকট হয়েছিলেন তাঁকে যদি বলি দেওয়া হয় তবে জাতির মরণ অবশ্যস্তাবী। অন্তরাত্মাকে রূপ দিতে না পারলে জাতি হয়তো ধ্বংসের পথে এগিয়ে যায়...কতো দেশ ইতিহাসের পাতায় ধ্বংসস্তূপ হয়ে আছে...আমেরিকার ব্যাধি হচ্ছে ‘জড়’ রোগ ; ময়দানবের এই পুরীতে এখনও দেবমন্দিরের প্রতিষ্ঠা হয় নি, শব্দের মঙ্গলধ্বনি বাজে নি, ভবানীর আগমনীগান গাওয়া হয় নি...একদিন সকালে উঠে হয় তো দেখবো ময়দানবের পুরী ভস্মীভূত হয়ে গেছে...ঠিক উলটো হচ্ছে ভারতবর্ষ...দেইটা শতচ্ছিন্ন বস্ত্রের মতো হাওয়ায় উড়ছে, মাথাটি চিরস্থির, চির-গম্ভীর, অচল, অটল, অক্ষুণ্ণ ! ভারতের আত্মা কুণ্ডের হরিষার ; হরিষারের আত্মা ধ্যানমগ্ন কৈলাস ; কৈলাসের আত্মা কৈলাসপতি সদাশিব—নিত্যঃ সর্বগতঃ স্বাগুরচলোহয়ং সনাতনঃ। সূর্যদুঃখের ঢেউ এখানে পৌঁছয় না, ইতিহাসের আলো-জাঁধারি অবলুপ্ত, কাল ঘুমিয়ে পড়েছে মহাকালের স্রুষ্টি-সমুদ্রে...ভারতের এই ধ্যানস্তিমিত আত্মাকে প্রণাম ! হে পুণ্যতরঙ্গে মাতর্গঙ্গে ! আমাদের সকল পাপ বিধৌত করে কল্যাণের পথে নিয়ে চল.....অসতো মা সদ্গময়...তমসো মা জ্যোতির্গময়.....’

মৃত্যোর্শাস্বতং গময়...

## ॥ ১৫ ॥

লছমনঝোলায় এসেছি কাল, মহাত্মা কালীকম্বলীওয়ালার ঋষিকুল বিঠালয়ের একটি ঘরে ইঁট মাথায় দিয়ে রাত কাটিয়েছি। মন্দ লাগে নি। সকালে স্বর্গাশ্রমের দিকে যাই সাধুদর্শনে। তীর্থ সাধুসেবিত বলেই তীর্থ—

ভবদ্বিধা ভাগবতাস্তীর্থীভূতাঃ স্বয়ং বিভো।

তীর্থীকুবন্তি তীর্থানি স্বাস্তঃস্বেন গদাভূতা ॥

ভগবৎ-ভক্তগণ স্বয়ং তীর্থস্বরূপ, কারণ শ্রীহরিকে হৃদয়ে ধারণ করে তীর্থস্থানকেও তাঁরা পবিত্র করেন। স্বর্গাশ্রম তপোভূমি; অনেক সাধু আছেন। এক নজরে সব কিছু দেখে নেওয়ার তাগিদে কিছুই হয়তো দেখা হচ্ছে না। ভাগ্য ভাল যে এই ছোটোছুটির হিড়িকেও দুজন মহাত্মার পদরেণু লাভ করেছি, যদিও দর্শন হয়েছিল ক্ষণিকের জ্ঞাত, এবং আলাপ বলতে কিছুই হয় নি। সপ্তধারা দেখবার সময় একটি খড়ের ছাউনী চোখে পড়ে। কোনও সাধু আছেন হয় তো, কোঁতুল হয়, এগিয়ে যাই। ঢুকতেই মনে হলো নিঝুম পুরী...আমাদের দেশের বাড়ীর দক্ষিণে একটি পুকুর, তার দক্ষিণে খেলার মাঠ। ছুটির দিনে, বা ইস্কুলে যে দিন যেতুম না, স্নানের প্রথম পর্ব ছিল খেলা—হাড়ুডুডু, কানামাছি, ছোঁয়াছুঁয়ি, এমনি সব দিশি খেলা; চৈঁচিয়ে, দৌড়ে, ছোটোছুট করে, শ্রাস্ত হয়ে ঝুপ্ করে পুকুরে ডুব...মনে হতো এক রাজার রাজ্য ছেড়ে আর এক রাজার রাজ্যতে হঠাৎ এসে পৌঁছলুম; সোরগোল, সঙ্গী-সাথী, খেলাধুলোর জগৎ পেরিয়ে ঢুকে পড়েছি অচেনা এক নিখর প্রদেশে যেখানে শুদ্ধতার স্বস্পন্দন শুধু কানে ভেসে আসে...মহাত্মাজীর ছাউনীতে প্রবেশ করে তেমনি মনে হয়, হঠাৎ ডুব দিয়েছি...ভক্তরা সব নীচে বসে; সাধুজী একটু উঁচুতে, যোগাসনে; বলিষ্ঠ শরীর; মুণ্ডিত মস্তক; বয়স যাটের কাছাকাছি। সকলেই নির্বাক, নিঃশব্দ। প্রণাম করে, আশীর্বাদীয় ছোট এলাচ নিয়ে, চলে আসি। দয়ালদা বলেন, এখা ব্রাহ্মী স্থিতি: পার্থ; স্থিতপ্রজ্ঞ মহাপুরুষ।...হ্রবীকেশ থেকে লছমনঝোলার পথে আর একজন মহাত্মার দর্শন লাভ হয়। ইনি থাকেন রাস্তার পশ্চিমধারে একটি কুটিয়াতে। আমরা যখন ওখান দিয়ে এগছি তখন কুটিয়া থেকে বেরিয়ে আমাদের সামনে এসে দাঁড়ালেন। বয়স সত্তরের কোঠায়, রং ময়লা; দীর্ঘ, সবল, রিক্ত দেহ; সহাস্ত বদন; আনন্দময় পুরুষ...একবার গরমের ছুটিতে রাঁচী গিয়েছিলুম;

বিকেল বেলা বেড়াতে বেড়াতে মুরাবাদির মাঠে গিয়েছি; রোদে সব জলে গিয়েছে, ঘাসের চিহ্ন নেই, শুধু কাঁকর ও বালি। মাঠের শেষ প্রান্তে দেখি একটি গাছ; পাতা একটিও নেই, কিন্তু গাময় ফুল ফুটে আছে...ঠিক এই মহাত্মাজীর মতো, রিক্ত হয়ে পূর্ণ, সর্বাঙ্গে আনন্দ ফুল হয়ে বেরিয়েছে; সৌরভে মন আচ্ছন্ন হয়। সবাই প্রণাম করি। জিজ্ঞেস করেন, কোথা থেকে এসেছি আমরা। বাঙলা দেশ শুনে প্রসন্ন-গম্ভীর মুখে আশীর্বাদ করেন, “আনন্দ মেঁ রহো”.....

রাস্তায় যেতে যেতে দয়ালদা বলেন : ভাগবতে আছে, তীর্থসলিলে স্নান করে ঋদের শরীর পবিত্র এবং হরিকথা শ্রবণে ঋদের অন্তর বিগুহ্ব, ঋরা শীলভদ্র এবং নিরাসক্ত, ঋদের সর্বজীবে প্রেমময় দৃষ্টি এমনি মহাত্মাদের সঙ্গলাভ শ্রীভগবানের বিশেষ অমুগ্রহ না থাকলে হয় না। আমাদের ভাগ্য সুপ্রসন্ন... স্বর্গাশ্রমের দ্রষ্টব্য সব দেখে চলি বদরিকাশ্রমের পথ ধরে। এক নম্বর চটতে এসে বসি। দয়ালদা আমাদের সঙ্গে আসেন নি। ক্ষেপু একটু জিরিয়ে দুই নম্বর চটির দিকে এগয়। আমি শাসাই, দেরি হলে দয়ালদাকে গিয়ে বলবো, তুই কল্লং-বাবাকে দেখতে গিয়েছিস, আর কিরবি না। সাবধান করে দেওয়া দরকার, কারণ এগিয়ে যাওয়ার নেশা এখানে পেয়ে বসে। নেহাৎ শ্রান্ত বলেই বসে পড়েছি আমি। চটটি বেশ; চারিদিকে বুনো গোলাপ; শাক-সবজিও আছে; জলের অভাব নেই; পাহাড়ের গা বয়ে একটি জলরেখা নেবে এসেছে, তরতর গতি; চটটিকে আবেষ্টন করে নেবেছে গঙ্গায় বেশ খানিকটা নীচে; মন্দাকিনীর গতি স্বচ্ছন্দ, নিরলস। ওপারের পর্বতমালা ও বনানী—কতদূর চলেছে কে জানে! সামনে বদরিনাথের রাস্তা, রহস্যময় এর আকর্ষণ; মৃত্যুকে তুচ্ছ করে কতো যাত্রী চলে, মৃত্যুকে বরণ করে কতো লোক পাশ দেবতার দরশন! দার্জিলিং থেকে শিকিমের দিকে তাকালে মনে বিস্ময় জাগে; বলি কী অদ্ভুত! কী রহস্য! কী ভয়ঙ্কর! আর আমি কতো তুচ্ছ! অকিঞ্চিৎকর। কীটাণুকীট! মন প্লাবিত ভরে যায়...এখানকার হিমালয় পরমাত্মীয়। ‘শকুন্তলা’য় পড়েছি—

রম্যানি বীক্ষ্য মধুরাংশ নিশম্য শব্দান্

পযুংসুকো ভবতি যং সুখিতোহপি জন্তঃ।

তচ্চেতসা স্মরতি নুনমবোধপূর্বং

ভাবস্থিরাণি জননাস্তরসৌহৃদানি ॥

রমণীয় দৃশ্য দেখে এবং মধুর শব্দ শুনে সুখী লোকের চিত্তও যে ব্যাকুল হয়ে ওঠে তার কারণ নিশ্চয় এই যে জন্মান্তরে এদের সঙ্গে অন্তরঙ্গ পরিচয় ছিল। এ জায়গার আকাশ, বাতাস, আশ্রম, কুটার, তপোবন-সদৃশ চটি, গঙ্গার নীল রেখা ও গতির সংবেদন, চারিদিকের পাহাড় ও অরণ্য—সব কিছুর সঙ্গেই জন্মান্তরের সৌহার্দ্য আছে, আছে গুঢ় এক আত্মিক সম্বন্ধ। তুলসীমঞ্চের প্রদীপটিকে দেখে কখনও বলি না, ‘আহা! কী সুন্দর!’ সুন্দর তো বটেই, কিন্তু তার রূপ কল্যাণবর্ষী, সম্পদ অচিপথভাগিনী; প্রদীপের স্নমুখে মাথা হুইয়ে প্রণাম করি, তার স্নিগ্ধতায় প্রাণমন পবিত্র করি। হিমারণ্যের সঙ্গে অবশ্য পার্থক্য আছে...প্রদীপের পরিবেশ অল্পকে নিয়ে, এখানকার পরিবেশ ভূমাকে নিয়ে। হিমারণ্যের সুর চিরন্তনীর সুর; হৃন্দ প্রশান্তবাহিতার। ওপারের দেব-ভূমির দিকে তাকাই, মনে হয় চিরদিন ওখান দিয়ে চলা যায়। দার্জিলিং থেকে দূরের পাহাড় দেখলে মন অশান্ত হয়, ইচ্ছে হয় উড়ে গিয়ে ঐ পাহাড়টার মাথায় বসি। এই অশান্তপনা, ব্যর্থতার এই গ্লানি, হিমারণ্যের ত্রিসীমানায় নেই; কারণ, চলার সঙ্গে পাওয়ার যে নিত্যিকার বিরোধ তা মিটিয়ে দিয়ে আসা হয় এখানে...সব খোঁজাই তাঁকে খোঁজা, সব জানাই তাঁকে জানা, সব পাওয়াই তাঁকে পাওয়া। পাই নি তাঁকে কোনো দিনই, তবুও না-পাওয়ার দুঃখ, বেদনা, অশ্রু, তো তাঁকে নিয়েই। হিমাচল শাস্ত্রসের আলয়। সংসারের কলরবে ভুলে থাকি তাঁকে...কচিং কখনও নৃপুংস্বনি শুনলেই তুটু হই, আবার ভুলি। এটা যেন হৃদহীন জগৎ...ঐ দূর বনানীর ঘন অন্ধকারে চিরদিনই তাঁর সঙ্গে লুকোচুরি খেলা যায়...গাছতলার ঐ তৃণাসন ছেড়ে দূরের ঐ ছায়াকুহেলিকায় গিয়ে বসি...এক ঝোপ ছেড়ে আর এক ঝোপ...ছোট্ট একটি পাহাড়ের মাথায় এক ফালি আলো, সেখানে দাঁড়িয়ে মনে হয় ঘনশ্রাম নিশ্চয় নীচের গাছগুলোর ঘনশ্রামে লুকিয়ে আছেন...দিশাহারা হই না, সব দিকই তো তাঁর দিক...নৃপুংস্বনি থেমে যায়, বসি গিয়ে সুরধ্বনীর কূলে স্নিগ্ধচ্ছায় শিলাসনে...বিষ্ণুপাদ-প্রফালিনী পুণ্যতোয়াকে স্পর্শ করি, শরীর রোমাঞ্চিত হয়...কতো যুগ ধরে শাস্ত্রসপ্রশ্রবণীর এই নীলধারার দিকে চেয়ে আছি কে জানে!...না-পেয়ে-পাওয়ার চিরন্তনী বাজে হৃদয় মাঝে, এগিয়ে চলি অন্তাচলের দিকে তাঁর চিরন্তন সন্ধানে যিনি ‘মহারে জনম-মরণ সাধী’.....

‘একদল যাত্রী। উল্লাস ও হুল্লোড়। চৈঁচিয়ে প্রতিধ্বনি শোনে, ওপারে ঢিল ছোঁড়ে, গোলাপ ফুল কামিজে লাগায়। নানা রকম মন্তব্য করে—Beautiful !

অপূর্ব! How grand! বাজে! Sublime! চা পাওয়া যায় না, তার আবার এতো! চল, কুটিয়াতে যোগাসনে বসে যাই! বদরিনাথের রাস্তা, যা চড়াই! অসম্ভব যাওয়া! বাস্-সার্ভিস্ হলে দেখা যাবে!...চলে যায় সব...কলরব থেমে যায়...আবার স্রুষ্টি...ক্ষেপূর দেখা নেই...বদরিনাথের পথ ধরে এগিয়ে যায় নি তো? বলা যায় না; এ রাস্তায় থামাই মুশ্কিল... চলারই বা কী প্রয়োজন!...এই চটি, গঙ্গার কুলুকুলু নাদ, দূরের পাহাড়, তরুরাজির ঘনশ্রাম, যাত্রীদের পদসেবিত এই পথ...নিত্যকালের সম্বন্ধ এদের সঙ্গে...রাস্তায় শুয়ে থাকি যাত্রীদের পদধূলি হয়ে; পাহাড়ের সঙ্গে এক হয়ে আছি সম্ভ্রমের ধ্যানমগ্নতায়; বনানীর সঙ্গে মিশে আছি আরণ্যকের সবুজতায়... সব কিছুর সঙ্গে একাত্ম হয়ে আছি হিমারণ্যের প্রশান্তবাহিতায়...

তন্দ্রা এসেছিল। ক্ষেপূর ডাকে সজাগ হই; শুধাই, কস্তুংবার সঙ্গে সাক্ষাৎ হলো কিনা। উত্তর দেয়—দেখা যখন হবে, তখন বোকার মতো আমার দিকে চেয়ে থাকবি, আর আমি চলে যাবো উদ্ধার মতো তোর চোখ ঝলসে...; বসি। হেঁটেহেঁটে থকে গিয়েছি। তুই তো দিব্যি আরামসে ঘুমুচ্ছিলি! ঐ যে! দয়ালদা আসছেন।

দয়ালদার চুল-দাড়ি বাতাসে হিল্লোলিত, প্রাণটাও বেশ উৎফুল্ল। বসে বললেন, ‘ভাল একজন সাধুর সঙ্গে আলাপ হলো।’ ক্ষেপু জিজ্ঞেস করে, ‘চেহারা কি রকম?’ দয়ালদা জবাব দেন, ‘চেহারায় কিছু বোঝবার জো নেই; বঁটে, দোহারা গড়ন, মুখে খোঁচা খোঁচা দাড়ি, ময়লা রং, মোটেই সুপুরুষ নন।’ আমি মন্তব্য করি, ‘ক্ষেপূর মাপকাঠিতে তেমন ভাল সাধু বলে মনে হচ্ছে না।’ ক্ষেপু উত্তর দেয়, ‘চেহারাটা ফেলনা নয়, ঈশ্বরের একটা বিভূতি।’

: তা হলে অশ্বথ বৃক্ষও তোর মতে বড় সাধু?

: বটেই তো। আমাদের বাজারে যে অশ্বথ গাছটি আছে তার পূজা হয় দেখিস নি?

: দেখেছি। কিন্তু তার গায়ে সিঁদুর না চড়িয়ে এতো কষ্ট করে লছমনঝোলায় এসেছিস কেন?

: ভক্তিতে মিলয়ে কৃষ্ণ, তর্কে বহু দূর। তর্করোগেই তুই মরবি।

দয়ালদা বলেন, “তর্কাতর্কিতে আসল কথাটাই কিন্তু চাপা পড়ে যাচ্ছে...যে সাধুজীর কথা বলছিলুম,—দশ বছর আছেন একটি কুটিয়াতে। কালীকমলীওয়ালার আশ্রম থেকে খানিকটা এগলে, হাতের ডান দিকে একটি রাস্তা উঠে গেছে

পাহাড়ের উপর ; তার মাথায় ছোট্ট কুটিয়া ; নির্জন স্থান, মনোরম দৃশ্য ; বৈরাগ্যের আবাসভূমি । ভাল প্রেমিক সাধু ; অনেকক্ষণ ভগবৎ কথা হলো...খুব আনন্দ পেলুম...শেষে প্রশ্ন করেছিলুম, তত্ত্ব কী ? উত্তর করলেন, প্রেমই তত্ত্ব ।” দয়ালদা চুপ...ছাঁচোখ দিয়ে আনন্দাশ্রুর বিগলিত ধারা...ক্ষেপু মুখ গুঁজে কাঁদছে...রাস্তার দিকে তাকিয়ে আছি ; ভাবি, যাবো কি করে ? গঙ্গাবতরণের শিবলগ্ন থেকে অগণিত যাত্রীর পদধূলিতে পবিত্র এই পথ, এ পথে পা দিতে নেই... the ground is holy...এগবো কি করে ? অপরাধ হবে না ? ...পতিতো-দ্ধারিণী গঙ্গায় স্নান করি । গোঁরীশঙ্করের নিকট অপরাধমার্জনা ভিক্ষা করি—

গঙ্গাঙ্কনসিতা জটা পশুপতেশ্চন্দ্রঃ সিতো মূধনি ।

সোহয়ং সর্বসিতো দদাতু বিভবং পাপক্ষয়ং শঙ্কর ॥

বদরিনারায়ণের পথকে সাষ্টাঙ্গে প্রণাম করি ; প্রার্থনা জানাই—

মধুমন্ মে পরায়ণম্ ।

মধুমং পুনরায়নম্ ॥২।



ପ୍ରଥମ ଅଧ୍ୟାୟ  
ନବ ନବ ରୂପେ ଏସୋ ପ୍ରାଣେ  
( ଥ )  
ମହାମହାମ



( খ )

## গয়াধাম

॥ ১ ॥

গয়া গঙ্গা প্রভাসাদি কালী কালী কে বা চায় ।

কালী কালী বলে আমার অজপা যদি ফুরায় ॥

জীবনের সব অলিগলিতেই ‘যদি’র দুর্লভ্য বাধা, অতিক্রম করতে গিয়ে দেখি পথের কাঁটার অস্ত নেই। ‘কালী, কালী, কালী’ বলে যদি আসন নিয়ে বসতে পারি তখন ‘সন্ধ্যা’ হয়তো আমার ‘সন্ধান’ে ফিরবে, কিন্তু পারি কৈ ? পারি না বলেই ক্ষ্যাপার মতো খুঁজে বেড়াই পরশ পাথর। কুস্ত মেলার পর এক যুগ পেরিয়ে গেছে ; খতিয়ে দেখি, পাজির অঙ্কের মতো ‘জমা ৫, খরচ ৫, লাভ শূন্য’। জমার খাতে সঞ্চয়ের তাগিদ আসে। তিন বন্ধু ঠিক করি, কাছেপিঠে গয়াধাম, বিষ্ণুপাদ দর্শন করে আসা যাক। কিন্তু পরশপাথর সেখানে পাবো কি ?...কী যে খুঁজছি তা-ও ছাই জানি না ; বুঝি-ও না... বাঙলার এক বিল্লিমুখর গ্রামে ধান ক্ষেতের নিভৃতকোণে নৌকোতে বসে মানচিত্রের পাতা খুলে কতো দেশ-বিদেশ দেখেছি, কল্লনার আবেশে কতো কল্ললোক সৃষ্টি করেছি, মনোরথে কতো নদ-নদী, বন-উপবন, গিরিগুহা, মরুপ্রান্তর পরিক্রমা করেছি...বাস্তবজগতে কিন্তু তাদের সন্ধান পাই নি। গ্রামের ইস্কুলে তখন পড়ি ; মাষ্টার মশায় অনেক তীর্থ করে এসেছেন...লছমনঝোলায় গল্প বলে এক ঘণ্টা কাটিয়ে দিলেন। কী স্বপ্নাতুর মন নিয়ে সোদিন বাড়ী ফিরি... মেঠো রাস্তা, দুপাশে সরসে ক্ষেত হলদে ফুলে মোড়ানো ; পশ্চিম আকাশে অন্তাচলের আবীর ; পাখীরা দলে দলে উড়ে যায়—লছমনঝোলায় রঙিন দেশে ? অন্তত সেই ঝোলা, গভীর সেই নদী, আঁধারের ওপারের সেই দেশ !...কতো সন্ধ্যায় খেয়া পার হয়ে গিয়েছি সেই দেশে, শুনেছি গঙ্গার কুলুকুলু নাদ, রাত্রির অন্ধকারে খুঁজেছি লছমনজীর প্রদ্বানত চোখ...তারপর একদিন সত্যিই গিয়ে হাজির। ক্ষেপু বলে, তাই তো, এতো কষ্টে এলুম, ঝোলাটিই নেই ! দয়ালদা উপদেশ দেন, যে ঝোলা পার হতে হবে সেটি হচ্ছে মনে ; ব্রহ্মবিজ্ঞাই অমৃতস্ত সেতুঃ। আমি বলি; তা না হয় হলো ; কিন্তু সংসার ত্যাগ করে, মরণের সেতু পার হওয়ার সংকল্প নিয়ে যে সাধুজন এখানে বসবাস করছিলেন তাঁদের

সলিল-সমাধি কেন হলো ? বন্যতে অনেক সাধু সেবার মারা যান। ভবিষ্যতের এতটুকু ইঙ্গিতও পান নি ? দয়ালদা উত্তর দেন, প্রয়োজন মনে করেন নি ; কাম্য তাঁদের ব্রহ্মবিদ্যা, আবহবিদ্যা নয়। ক্ষেপু ইতিমধ্যে খেয়া নৌকোর ব্যবস্থা করে এসেছে...ওপারে যেতে যেতে সূর্যদেব পাধাড়ের আড়ালে লুকিয়ে পড়েন ; সন্ধ্যা না হলেও আঁধার নেবে আসে ; দুর্ভাবনা হয়, এখন থাকি কোথায়, খাই কি ; ফেরাও সম্ভব নয়। ভারতবর্ষ সাধুর দেশ। দয়ালদার সাধু-স্নানভ দাড়ি-চুল দেখে কালীকঙ্কলীওয়ালার গদির লোকদের বোধ হয় শ্রদ্ধা হয়ে থাকবে...আহার ও বাসস্থান জুটে গেল। তখন নিশ্চিন্ত মনে ক্ষেপু ও আমি রামকীর্তন করি।

শুদ্ধব্রহ্মপরাংপর রাম। কালাত্মকপরমেশ্বর রাম ॥

শেষতল্লস্বধনিদ্রিত রাম। ব্রহ্মাণ্ডমরপ্রাণিত রাম ॥

চন্দ্রকিরণকুলমণ্ডন রাম। শ্রীমদ্দশরথনন্দন রাম ॥

কৌশল্যাসুখবর্ধন রাম। বিশ্বামিত্রপ্রিয়ধন রাম ॥

\* \* \* \*

সর্বচরাচরপালক রাম। সর্বভবাময়বারক রাম ॥

বৈকুণ্ঠালয়সংস্থিত রাম। নিত্যানন্দপদস্থিত রাম ॥

রঘুপতি রাঘব রাজা রাম। পতিতপাবন সীতারাম ॥

রাম রাম জয় রাজা রাম। রাম জয় রাজা সীতারাম ॥

প্রণাম করি—

আপদামপহর্তারং দাতারং সর্বদ্বন্দ্বম্পদাম্।

লোকাভিরামং শ্রীরামং ভূয়ো ভূয়ো নমাম্যহম্ ॥

রামায় রামচন্দ্রায় রামভদ্রায় বেধসে।

রঘুনাথায় ন'থায় সীতায়ঃ পতয়ে নমঃ ॥

ভক্তশিরোমণি মহাবীরজীকে প্রণতি জানাই—

যত্র যত্র রঘুনাথকীর্তনং তত্র তত্র কৃতমস্তকাজ্জলিম্।

বাস্পবারিপরিশূর্যলোচনং মারুতিং নমত রাক্ষসাস্তকম্ ॥

পোয়াল বিছিয়ে শুয়ে পড়ি তিন বন্ধু...ছোট বেলায় কাল্লনিক লছমনু-ঝোলায় দোল খাওয়ার কথা ভাবি...সেতুর এপারে লছমনজী দাঁড়িয়ে ; ভক্ত যাত্রীদের নির্বিঘ্নে ওপারে নিয়ে যান হনুমান্জী ; তারপর লুটিয়ে পড়ি রাজা রামের আসন-তলে !...দুর্ভাগ্য আমাদের ! সেতু নিশ্চিহ্ন, লছমনজী ও হনুমান্জী ভক্তের ডাক শুনে চলে গেছেন পুণ্যতর স্থানে ; স্মরণে রামজীর দর্শন স্মরণ-

পরাহত...সাক্ষনয়নে রাম নাম জপ করি...হে জগৎপতি রাম! হে কল্যাণ-বিধাতা, আশ্রিত-বৎসল রাম। হে সর্বচরাচরপালক সংস্খতিবন্ধবিমোচক রাম! তোমার শ্রীচরণে স্থান দাও। রাম, রাম, রাম, রাম, রাম, রাম, রাম; রাম, রাম, রাম, রাম, রাম, রাম।...মাষ্টার মশায়ের নিকট গল্প শুনে যে অস্তাচলরাগ-রঞ্জিত লছমনঝোলের স্বপ্ন দেখেছিলুম তাঁর খোঁজে নিজেকে হারিয়ে ফেলি স্বপ্তিকৃৎ বিস্মরণে.....

গয়াধামের টিকিট কিনতে সেই যে বেরিয়েছে ফেপু, কখন ফিরবে ঠিক নেই। অনেক কাজ নাকি হাতে, সেগুলোর হিলে না করে যাওয়া অসম্ভব। চাকরি করে এখন, সদাই ব্যস্তবাগীশ, কাজ না থাকলেও চরকির মতো ঘোরে। কাজের লোকও বটে; আমি চিরকালের অকেজো। চিন্তার জালে জড়িয়ে থাকা যেন অভ্যাসে দাঁড়িয়ে গেছে...ছাইভস্ম কতো কি ভাবি...আমাদের গাঁয়ের মন। পাগলাকে দেখেছি এখানে-সেখানে এটা-সেটা কতো কি কুড়য়... ‘কি কুড়চ্ছিন্?’ ‘দলিল-দস্তাবেজ’।...আমারই মতো; অবচেতনে কতো কিছুই না জমিয়ে চলছি! চোপ বুজলে ভেসে ওঠে পান্না, শেওলা, বিবর্ণ পাতা, হিজিবিজি রেগা...পিদম জালিয়ে ঢুলুঢুলু নয়নে পড়ি—ইয়াংসিকিয়াং, হোয়াং হো, পেই হো, ক্যান্টন...মগুপ ঘর থেকে পূজারী ঠাকুর মশায় গান ধরেছেন—

হরি, দিন তো গেলো, সন্ধ্যা হলো, পার করো আমারে।

তুমি পারের কর্তা জেনে বার্তা, ডাকি হে তোমারে ॥

(শুনি) কড়ি নাইকো যার, (তুমি) তারে করো পার।

(আমি) দীন, ভিগাবী, নাইকো কড়ি; দেখো মোর ঝোলনা বেড়ে ॥

(আমি) আগে এসে, (ঘাটে) রইলেম বসে।

যারা পাছে এলো আগে গেলো, আমি অধম রইলেম পড়ে ॥

ইয়াংসিকিয়াং! কালো মিশমিশে জল, অনেকটা নীচু দিয়ে বয়ে যাচ্ছে; যাত্রীরা এপারে জড় হয়েছে। এই থরস্রোতে যদি পড়ে যায়! কুমীর যদি পা ধরে কালো জলের গভীরে টেনে নেয়! দয়ার ঠাকুর শ্রীহরি খাঁদের হাত ধরে নিয়ে যান তাঁরাই শুধু ওপারে যেতে পারেন...আমি অধম রইলেম পড়ে...‘দিছ’ আমাদের বেশ পেরিয়ে গেলো। ‘বেশ’ হয়তো নয়; সে এক অশ্রমতী কাহিনী। নাম ছিল দিনেশ রঞ্জন, ডাকতুম ‘ডি-আর্’, পরিচয় তৃতীয় বার্ষিক শ্রেণী থেকে। তখন বি. এ. পড়ি; সরকারী কলেজ, মস্ত বড় কম্পাউণ্ড, চারদিকে ছড় দেওয়াল, দেওয়ালের ধারে ধারে গাছ, মাঝখানে একটি পুকুর। শীতের দিনের দুপুর বেলা,

কলেজ কিসের জন্ত ছুটি হয়ে গেছে ; গাছতলায় দিহু ও আমি। ‘ডি. আর’ যে ভাল গাইতে পারে তা নয়, তবে গলায় দরদ ছিল। গান ধরলো—রাজপুরীতে বাজায় বাঁশি বেলা শেষের তান। ছুটির দিনের নিঃসঙ্গ কলেজ ; দুপুরের শুষ্ক আলো পুকুরের কাল জলে ঘুমিয়ে পড়েছে ; ‘কা—কা’ রবে একটা কাক নির্জন-তার স্বর টেনে উড়ে যায়...রাজপুরীতে বাজায় বাঁশি বেলা শেষের তান... কোথায় সেই রাজপুরী ? কোন্ সে গুণী ‘মস্ত’ হয়ে যিনি বাঁশি বাজাচ্ছেন ? বেলা শেষের কোন্ সে মোহন তান বুকের ভিতর যে আজও সাঁঝের বেলায় শুমরে ওঠে ? পাই নি খুঁজে...অনেক কাল পরে আলি আকবর সাহেবের কিরিয়াদী রাগের আলাপ শুনে মনে হয়েছিল, চিনি গো, চিনি উহারে...চিনলেও খরে রাখা যায় না ; পুকুরের বুকে ঘুমিয়ে-পড়া আলোর মতো কোন্ সুদূরে রাজপুরীর কোন্ অলগ পুরে অদৃশ্য হয়ে যায়...যাত্রা করেছিলুম এক সঙ্গে কিন্তু দিহু আজ অনেক দূরে। অসহযোগ আন্দোলনের হিড়িক তখন ; মহাত্মাজীর ডাকে জেলে গেলো। জেল থেকে বেরিয়ে দিল সমুদ্র পাড়ি। অক্সফোর্ডের ডিগ্রি নিয়ে যখন ফিরে এলো—একদম অন্ধ মানুষ। সিগারেটের কোঁটো সারাক্ষণ হাতেই থাকে। একটা সিগারেট মুখে দিয়ে বলে, আরে না, বদলাই নি ; বাইরের পোলসটার একটু ভদ্রোচিত সংস্কার হয়েছে, ভিতরটা ঠিক আছে। অর্থাৎ আগে খন্দর পরতো, খন্দরের চাদর ছিল একমাত্র জামা, খড়ম-পায়ে কলেজ করতো, বিডি-সিগারেটের কোনো বালাই ছিল না ; এগন স্যুট ছাড়া চলে না, সিগারেট মুখে লেগেই আছে, আর আমাদের চিরাচরিত সংস্কার সম্বন্ধে উন্নাসিকতা। আত্মবিশ্লেষণের শক্তি যখন হারিয়েছে তখন তর্ক তোলা বৃথা। তনুও বললুম, চিত্রকর প্রাণ দিয়ে যখন ছবি আঁকেন তখন আলুবাঙ্গিক রেখাগুলো মূলবস্তুর ব্যঞ্জক করে তোলেন ; আত্মিক এই ব্যঙ্গনার অভাব হলে Dr. Jekyll ও Mr. Hyde-এর পরিস্থিতি দেখা দেয়।...হলোও তাই। বি-এ তে আমাদের ব্রাউনিং ( R. Browning ) ছিল। ‘ডি-আর’ প্রায়ই আওড়াতো—The sin I impute to each frustrate ghost is, the unlit lamp and the ungirt loin ; আমি সান্তায়ন ( G. Santayana )-এর মত উদ্ধৃত করে জবাব দিতুম—barbarian, বর্বর। শেষ পর্যন্ত ব্রাউনিং-এর barbarian lover ( বর্বর প্রেমিক )-এর মতো একটা কেলেকারি করে বসলো।...ওর ভিতরকার দেবতার সঙ্গে আমার পরিচয় হয়েছিল ; দানব সকলেরই চিত্তে আছে। বন্ধুবর দানবের উৎপাতে অকালে ভবসাগর পাড়ি দিলো।

তখন আমি দার্জিলিং-এ ; বেলা শেষ হয়ে এসেছে ; দূরের পাহাড়ের ওপারে স্থায়ীঠাকুর ডুব দিয়েছেন ; পাহাড়টা রক্তরাগে ঝলমলিয়ে ওঠে ; বেলা শেষের তানের মুছনায় রূপ নেয় স্বপ্নময় রাজপুরী...গানিময় আমাদের জগতে দিখু শুনে গেলো songs that the sirens sing ; পরপারে হয়তো অলখপুরের সন্ধান পেয়ে অন্তর দিয়ে গুনছে বেলা শেষের তান.....

জীবনের মণিকোঠায় এমনি কতো গন্ধর্বনগর, eldoradoর সঙ্গে পরিচয় হয়েছে, কতো সুর শুনি বনমাঝে কি মনোগহনে...যাত্রা পথের অলিগলিতে নিজেকে হারিয়ে ফেলি আলেয়ার সন্ধানে...ভাবি হারিয়ে যাওয়া কোনো গলিঘূঁজিতে পাঁজা করা ইটের ফাঁকে ফাঁকে যে ঘাস ও ঘাসফুল ফুটে বেরিয়েছে তাদের অন্তর আলো করে আছে হারানো আলেয়া...যদি কোনো দিন দেখা হয় তবে হয়তো প্রাণের পরশ দিয়ে শুধাবে—ভাল তো ? ...হয়তো কোনদিনই আর দেখা হবে না...জীবনটা যেন একটা পাহাড়ে নদী...সে বার রামগড় থেকে গিয়েছিলুম ছিন্নমস্তার মন্দির দেখতে ; দামোদর নদ এঁকে বেঁকে চলেছে, যেন শেষ নেই ; কোথাও পাথরের ঝড়ি, কোথাও পাথরের চাঙড ; দুধারে গাছ, ঝোপ, জঙ্গল ; যেতে যেতে বারবার মনে হয়, আর একটা বাঁক পর্যন্ত যাই, তারপর ফিরবো ; কিন্তু পাহাড়ে নদীর অফুরন্ত রহস্য থামতে দেয় না, প্রলুদ্ধ করে এগিয়ে নিয়ে যায় । বৈচিত্র্য হয়তো আছে, কিন্তু এর মানে কি ? আমার এক বন্ধু বেশ রসিক লোক ; গাইয়ে, বাজিয়ে, আমুদে । পুত্রশোক পেয়ে জিঞ্জেস করেন, হ্যাঁ মশায়, এর মানে কি ? ছেলে মলো ; আবার ছেলের পৈতে, নাতির মুখে-ভাত, মেয়ের বিয়ে...এর মানেটা বলতে পারেন ?.. নদীর ধার দিয়ে চলছি, হাতছানি দিয়ে কে যেন কোন্ অজানা দেশে নিয়ে চলে...হয়তো মরণের কাল গভীরে...না থামলে হয়তো মানেটা ধরা যায় না । কিন্তু আমার মামাবাবু যেমন বলেন, “সে বড় শক্ত কথা হলো না ?” সবাই অন্ধের মতো এগিয়ে চলেছে—মরবে বলে । এই মরণ-বেগ থামায় কার সাধ্য ?

কশিদ্ ধীরঃ প্রত্যগাত্মানমৈক্ষদ্

আবৃত্তচকুরমৃতত্বম্ ইচ্ছন্ ।

কচিং কোনও ধীর ব্যক্তি ইন্দ্রিয়ের দ্বার রুদ্ধ করি' অমৃত হন পরমাত্মদর্শনে... শক্ত কথা...

## ॥ ২ ॥

সব ঠিক করে এসেছে ক্ষেপু—টিকিট, ভারত সেবাশ্রমে থাকবার জায়গা, যাত্রার জিনিসপত্র, টুকিটাকি, সবকিছু ; একটু ‘কিন্তু’-ও আছে ; যখন যেটির দরকার তখন সেটি প্রায়ই নিরুদ্দেশ থাকে। তবুও কাজের লোক ; ওর কাছে অনেক কিছু বেশ সহজ ভাবেই স্বচ্ছ যা আমি মাথা ঘামিয়েও ঘোলাটে দেখি। গাড়ীতে জায়গা ছিল না, কিন্তু জায়গা করে নিতে ওর দেরি হয় নি ; যাত্রীদের বাক্স-ডেস্ক এরটা ওর উপর রেখে, মালপত্র সাজিয়ে গুছিয়ে, বাক্সের উপর দিব্যি নিজের বিছানাটি করে নিয়েছে ; অধিকন্তু জানালার ধারে বসে ‘সিনারি’ দেখার ব্যবস্থাও করেছে। আমাদের বাক্স-বিছানা গুছিয়ে দয়ালদাকে গা এলিয়ে নাম জপ করবার মতো আরাম কেদারা বানিয়ে দিয়েছে। পদ্মনাভকে শ্রবণ করে যখন বাক্সের উপর গুয়ে পড়লো তখন জানালার ধারটা আমাকে ছেড়ে দিয়ে আশ্রিত করে, এক ঘুমের পর জায়গা বদল করে নেওয়া যাবে। হঠাৎ মুখ বাড়িয়ে বলে, ‘তোমাদের দ্বারা এই কর্ম হতো ? বোকার মতো হাঁ করে তাকিয়ে থাকলে রাস্তায় চলা যায় না।’ দয়ালদা জবাব দেন, ‘এই জগতই তো তোমাকে সঙ্গে আনা’। আমি মন্তব্য করি, ‘এমনিই তো অহম্-এর লেজটি ফুলে আছে তার উপর উসকানি পেলে—’। ক্ষেপু মুখের কথা কেড়ে নিয়ে উত্তর দেয়, ‘অহম্ আবার তুই কোথায় দেখলি ? খাঁটি সত্য কথা—bare statement of fact ; তুই পারতিস্ এই ব্যবস্থা করতে ?’...সুধীর আমার সতীর্থ, মাষ্টারি করে, থাকে কলকাতার বাইরে, রোজ ট্রেন-বাস-এ টানা-প’ড়েন করতে হয়। প্রত্যহ ঘণ্টা দুইর মতো সময় নষ্ট হয় ভেবে জিজ্ঞেস করেছিলুম, কাছে-পিঠে ঘর নেয় না কেন। সুধীর উত্তর দেয়, ‘সময় নষ্ট মোটেই হয় না ; এই দু-ঘণ্টা আমার অমূল্য সময় ; মাষ্টারি ও টুইশনি করে আর সংসারের ফাই-ফরমাশ খেটে বই পড়ার টাইম পাই না ; কাজেই যাতায়াতের সময়টা রেখেছি পড়ার জগত। আগে সহযাত্রীদের সঙ্গে গল্পগুজব হতো—মানে অফুরন্ত কেচ্ছা ; ভাল লাগে না। তাই বইর ভিতর ডুবে থাকতে চেষ্টা করি ; নিজের উপকার হয়, ছাত্রদের উপকার হয়, সময়টা কাটেও ভাল।’ দেশ স্বাধীন হলে সুধীর ‘বীরোত্তম’ উপাধি পেতো। ট্রেনে-বাসে পড়া যায় জানি ছিল না। আমি পারি না ; চোখ খারাপ, টাইম-টেবিলের লাইনগুলোও গুলিয়ে যায়। জানালার ধারটি পেয়ে বর্তে গিয়েছি। যাত্রীদের ঘুমবার প্রক্রিয়া-বৈচিত্র্য দেখবার মতো—কেউ মাথা গুঁজে ; কেউ মাথা কাত করে ;



কেউ উবু হয়ে ; কেউ গা এলিয়ে বা সহযাত্রীর কাঁধে মাথা রেখে । ঘুম আসলে ভাবতা থাকে না, সকলেই কাবু হয়ে পড়ে । তৃতীয় শ্রেণীতে স্রুষ্টিই শাস্তি, যদি আসে । বিনিত্র আমি ; গাড়ীর কামরায় ছোট্ট একটি দ্বীপ, সেখানে আমি একেলা । গাড়ী চলছে অন্ধকারের বুক চিরে...নব নব রূপে এসো প্রাণে... সব রূপই ডুবে যায় অতীতের অন্ধকারে...স্টীমারে একবার পদ্মানদী পাড়ি দিয়েছিলুম দিনের বেলা ; বায়ুকোণে কালবৈশাখীর রক্তচক্ষু...ঝড় ও বৃষ্টিতে চারদিক ঝাপসা ; স্টীমারটি যেন দিগ্‌ভ্রান্ত, ভূতগ্রস্ত । নদীর জল অগভীর ; খালাসী জল মেপে মেপে চৌচিরে বলে যাচ্ছে—চার (?) বাম মিলে, পাঁচ (?) বাম মিলে না...মাঝে মাঝে বেজে ওঠে সারেক সাহেবের বাঁশি...এক অসীম সমুদ্র, পার নেই, কূল নেই ; স্রুতবাং পাড়ি দেওয়া চলে না, দিগ্‌ভ্রমের প্রশ্ন ওঠে না ; গতি আছে, গন্তব্য নেই ; চলার নেশা আছে, পৌঁছবার বালাই নেই... বাঁশির নাদ-মস্ত্রে অকূল পাথার এগিয়ে আসে মিলনের আকাজক্ষায়, অমৃত জাগায় প্রকাশের বেদনা...চার বাম মিলে, পাঁচ বাম মিলে না...অতল সমুদ্রকে মেপে মেপে চলি ; ডুব দিতে চাই, ভেসে উঠি...বুক কঁপে ওঠে অনাহতের আহ্বানে...কার বাজে ঐ মল্লিত ধ্বনি ? যন্ত্র ছায়ামৃতং যন্ত্র মৃত্যুঃ ? মৃত্যু এবং অমৃত যে পরমপুরুষের ছায়া তাঁর ?...

রাত্রির অন্ধকারে গতির আনন্দ পাই না, পাই যাত্রার বিবাদ । আকাশ জুড়ে দাঁড়িয়ে আছেন বিশাল-দেহ কালপুরুষ, স্থির দৃষ্টিতে চেয়ে আছেন নীচেকার কাল সমুদ্রের দিকে ; সমুদ্র পাড়ি দিচ্ছে মর জগৎ , তার বুক হামাগুড়ি দিয়ে চলে আমাদের গাড়ী...আকাশে অগণিত তারা ; রাত হলেই আসে, চেয়ে থাকে আমাদের দিকে অতন্দ্ৰিত চোখে । ছোট মেয়েরা ‘তারা ব্রত’ পালন করতো আগে...এক তারা পূজি, দুই তারা পূজি...যোল তারা পূজি...কেন পূজা করতো ? ভালবেসে ? জানিনা । আমার কিন্তু তারা দেখে ভয় হতো...বিকেল বেলা ঘুড়ি উড়নো দেখছিলুম ; অনেক দূর থেকে, বেশ উঁচু দিয়ে একটা ঘুড়ি যাচ্ছে, কেটে গিয়েছে । মাথার উপর যখন এলো তখন ধরবার জন্ত সবাই পিছন নিই ; অনেকদূর এসে দেখি মাঠের শেষে যে গ্রামখানা তার ভিতর ঘুড়িটি অদৃশ্য হয়ে গেল । সাঁঝের আঁধার নেবে এসেছে ; পশ্চিম আকাশে একটি তারা ধক্ ধক্ করে জ্বলছে, তার পিছনে অন্তহীন একটা দেশ...ভয় পেয়ে ছুটতে ছুটতে বাড়ী আসি, হাত-পা ধুয়ে তাড়াতাড়ি বই নিয়ে পড়ি—নদী, নতুন, নতুন ; নদীম্ নতুন, নদীঃ...পিছনে ভেসে ওঠে তারার ওপারের দেশটা । দিদিমা জপ করছিলেন,

তাঁর কোলে মাথা দিয়ে বলি, ‘দিদিমা, আজ একতারা দেখে ফেলেছি।’ দিদিমা গায়ে-মাথায় হাত বুলিয়ে ভয়টা তাড়িয়ে দেন। ভয়টা ঠিক কাটে নি—when only one is shining in the sky নিঃসঙ্গতার পীড়া দিয়েছে। মাষ্টার মশায় ব্যাখ্যা করেন—নিষুতি রাত, চারদিক মিশমিশে কালো, নিখর, নিস্তব্ধ; শুধু আকাশের তারা তন্দ্রাহীন চোখে চেয়ে আছে লুসীর পানে, আর লুসী (Lucy) অন্তর দিয়ে শুনছে তাদের ভাষাহীন বাণী। গায়ে কাঁটা দিয়েছিল ভয়ে। স্থূল ভয়টা হয়তো আর নেই, কিন্তু বুকের ভিতরটা এখনও কেমন করে ওঠে, একটা uncanny ভাবের সাড়া পাই...কালপুরুষকে দেখে পুর্বনো সেই স্মরণটা বেজে ওঠে। কে এই বিরাট কালপুরুষ? মহাকাল? অন্ধকারে তলিয়ে যাওয়া জগতের মহাশ্মশানে শ্মশানবাসী শিবের দীপ্তধ্বজা? য এষঃ স্তপ্তেয়ু জাগতি? সব বুঝলেও যিনি জেগে থাকেন—কে তিনি?.....গাড়ীর বাঁকুনিতে জেগে উঠি—দেখি অজানা এক প্রাণের প্রদীপ জ্বলে নয়ন-ভুলানো এসেছে; আকাশের ছিন্ন মেঘ, দুপাশের বোপ-ঝাড়, গাছগুলোর বাঁকড়া মাথা সব জেগে উঠেছে কৃষ্ণপক্ষের চন্দ্রালোকে। গুরুপক্ষের চাঁদ আমাদের আপনার লোক, পরিচিত, আশৈশব অন্তরঙ্গ, মামা। কৃষ্ণা তিথিতে জগৎ অন্ধকারে ডুবে থাকে, দুপুর রাতে দোর খুলে দেখি সব সোনা হয়ে আছে; এই চাঁদের-ই এক ফালি আছে শিবঠাকুরের মাথায়। চন্দ্রমৌলির আলোতে বিকশিত জগৎ অপরূপ, অপার্থিব।...কতো অচেনা দেশ পেরিয়ে চলছি; নাম-না-জানা কতো নদী, বন, প্রান্তর ক্ষণিকের জন্ম দেখা দিয়ে লুকিয়ে যায়...হঠাৎ গাড়ীটা থামে। ঘরঘর আওয়াজ বন্ধ হয়ে যায়; নেবে আসে বিশ্বের নিব্বৃত্ততা, simmering stillness; অদূরে গাছগুলো ভূতের মতো দাঁড়িয়ে; আরও দূরে একটা শাদা ধবধবে বাড়ী কান পেতে রাত্রির হৃদস্পন্দন শুনছে; অনাহতের অবিরাম নিঃশ্বন...ঘরঘর আবার শুরু হয়; গাড়ী চলে স্তব্ধতার ধ্যানভঙ্গ করি’.....

অদ্ভুত এক উপাদানে তৈরী মাত্রবের মন। পরিচিত জায়গা ভাল লাগে না, চলি তীর্থপর্যটনে, দূর হতে দূরান্তরের আস্থানে। অপরিচিতের সঙ্গে জাগে অস্বস্তি, মন উচাটন হয় পরিচিত বেটনীর মাঝে ঘুমিয়ে পড়ার তাগিদে। দূরকূ করতে চাই নিকট বন্ধু, যদিও দূরত্বের ব্যবধান তুল্লেখ্য; যখন লজ্জিত হয়, দূর যখন নিকটে আসে, তখন দেখি সে একঘেয়ে, চেনা প্রতিবেশী; বন্ধু নয়। তাগ খেলি তার সঙ্গে, কথা বলা যায় না; পছন্দ করি তাকে, ভালবাসা যায় না। দূরত্বের ব্যবধান টানে; নিকটের ব্যবধান সরিয়ে দেয়। এমনই জীবন; ব্যস্ত হয়ে

চলি ; শ্রান্ত হয়ে যদি জিরই, শান্তির বদলে আসে একঘেয়েমি। আবার ছুটি অশান্ত হয়ে জীবনের শেষ দিনটির প্রতীক্ষায়। পরিচয়ের ফলে জীবনের সব কিছুই হয়ে যায় মৃত, তুচ্ছ, বর্জনীয়। মৃত্যুই চির অজ্ঞেয়, অতএব চিরবাস্তিত্ব... যৎ মরণং স এব বিশ্বামঃ। কিন্তু মরণ যে শ্রাম সমান তা-ই বা কে বলতে পারে ? নচিকেতা-সংবাদ থেকে মনে হয়, যমরাজ ভদ্রলোক, আলাপী-সালাপী, অতিথি-পরায়ণ ; তিন দিন অনাহারে আছে শুনে নচিকেতাকে তিনটি বর দিয়ে ফেললেন, আর ফাউ দিলেন একটি গুড্ কন্ডাক্ট প্রাইজ ( good conduct prize )। সুতরাং যমের বাড়ী যেতে ভয় পাওয়ার কোনো সঙ্গত কারণ নেই। কঠোপনিষৎকার বলেন, ঈশ্বরের মাধ্যম্ভিন আহার ব্রাহ্মণ-ক্ষত্রিয়রূপ অন্ন, এবং মৃত্যুরূপ ব্যঞ্জন। ব্যঞ্জনটা হয়তো হজম করা যায় মরণের সঙ্গে মিতালি করলে। অর্থাৎ মৃত্যুকে জানলে মৃত্যুবেচারী নিজেই মরে যাবে, আর দুয়ার খুলে যাবে অমৃতসাগরের। কিন্তু একি সত্যি ? যমরাজ অবশ্য নচিকেতাকে দৃষ্টকণ্ঠে আশ্বাস দিয়েছেন, কশ্চং মদামদং দেবং মদগো জাতুম্ অর্হতি ? হর্ষবিষাদহীন পরমাত্মাকে আমি ভিন্ন আর কে জানতে পারে ? সুতরাং মৃত্যুর সঙ্গে মিতালি দরকার। যদি নচিকেতার মতো ভাগ্যবান্ না হই ?

অনুথা ভাগ্য পরীক্ষা সম্ভব কি ?

অসম্ভব কেন ?

কশ্চং মদামদং দেবং মদগো জাতুম্ অর্হতি ?

মৃত্যু যে বিভীষিকা ?

না মরণে শাস্তি কৈ ?

শান্তির নিশ্চয়তা কী ?

He that loseth his life for my sake shall find it.

Amen.

॥ ৩ ॥

যাত্রীদের নাবা-ওঠার ভিড় লেগে গেছে, মানে যাতায়াতের রাস্তা প্রায় বন্ধ। জাতীয় প্রকৃতি আমাদের মন্থর, স্লথ ; কিন্তু গাড়ীতে ওঠবার বা গাড়ী থেকে নাববার সময় যে ক্ষিপ্ত উদ্ব্যস্ততা আমাদের আসে তা সত্যিই বিশ্বয়কর, অভাবনীয়। ফলে ছাতাটা, লাঠিটা, এক পাটি জুতো, বা স্ন্যাকসেটাও অদৃশ্য হয়ে যাওয়া বিচিত্র নয়। আমাকে জুতো খুঁজতে দেখে ক্ষেপু বলে, আছে,

আছে ; একবার নেবেছিলুম ; ভাবলুম, কি জানির কন্ম, বলা তো যায় না, তাই বাঙ্কের উপর রেখে দিয়েছি ।

: আমাকে যে বাঙ্কটা ছেড়ে দেওয়ার কথা ছিল ?

: যা ঘুমুচ্ছিলি ! ঘুম ভাঙানো কি ঠিক হতো ?

দয়ালদার নির্দেশ মতো গয়াজীকে প্রণাম করে নেবে পড়ি । ভারত সেবাশ্রমের দ্বিতলে একথানা ঘর পেয়েছি । বেশ নিরিবিলি । প্রাতঃকৃত্যাদি সেরে চা নিয়ে বসি । দয়ালদা ও-রসে বঞ্চিত । এসেই স্থান করে নিয়েছেন । তারপর তারকব্রহ্ম নামকীর্তন ।

হরে রাম হরে রাম রাম রাম হরে হরে ।

হরে কৃষ্ণ হরে কৃষ্ণ কৃষ্ণ কৃষ্ণ হরে হরে ॥

আমরাও যোগ দিই । অতঃপর মহাপ্রভুকে প্রণাম করে গাই—

হরিহরায় নমঃ কৃষ্ণগোবিন্দায় নমঃ ।

যাদবায় মাধবায় কেশবায় নমঃ ॥

প্রণাম মন্ত্র পাঠ করি—

ত্বমেব মাতা চ পিতা ত্বমেব, ত্বমেব বন্ধুশ্চ সখা ত্বমেব ।

ত্বমেব বিজ্ঞা ত্রবিণং ত্বমেব ত্বমেব সর্বং মম দেব দেব ॥

শক্তিং শরীরে হৃদয়ে চ ভক্তিং তব প্রিয়ং সাধয়িতুং প্রযচ্ছ ।

জ্ঞানং চ মহ্যং দেহি দেবদেব কৃত্যে যথা মে ন ভবেৎ প্রমাদঃ ॥

জানামি ধর্মং ন চ মে প্রবৃত্তিজ্ঞানামাধর্মং ন চ মে নিবৃত্তিঃ ।

ত্বয়া হৃদীকেশ হৃদিস্থিতেন যথা নিযুক্তোহস্মি তথা করোমি ॥

হরে মুরারে মধুকৈটভারে গোপালগোবিন্দমুকুন্দশৌরে ।

যজ্ঞেশ নারায়ণ কৃষ্ণ বিবেণে নিরাশ্রয়ং মাং জগদীশ রক্ষ ॥

ওঁ নমো ব্রহ্মণ্যদেবায় গোত্রাঙ্গগহিতায় চ ।

জগদ্ধিতায় কৃষ্ণায় গোবিন্দায় নমো নমঃ ॥

দয়ালদা গুরু স্তোত্র পাঠ করে জপে বসলেন । ক্ষেপু এক কেতলি চা ও ঝাল শিঁজাড়া দিয়ে বলে, ‘তুই খা ; আমি ও-পাট দোকানে সেরে এসেছি । যাই, পুরুতের ব্যবস্থা করে আসি ।’

...জাপানে চা-এর পর্বটা শুনেছি হোমের গ্রায় পবিত্র ; নিঃশব্দে চা-পান সেরে মনকে শূন্যাবগাহী করা হয়, এবং পরিশেষে ধ্যানাভ্যাস ; মঠাদিতে হয়তো এ জাতীয় সেবাও সেবনের রেওয়াজ আছে । আমাদের দেশে এর জুড়িদার

হচ্ছে সাধুদের গজিকাসেবন ও তান্ত্রিকদের কারণ-পান। দয়ালদা ঠাঁর এক গুরু-ভাইর কথা বলছিলেন একদিন। আমাদের বাড়ীর সামনে একটি পুকুর ; পুকুরের দক্ষিণে খেলার মাঠ, তারপর অনেক দূর পর্যন্ত চলে গেছে চাষের জমিতে যবের শীষ ; ছেলেদের খেলা সাঙ্গ হয়েছে ; সাঁঝের প্রদীপ দু-একটা দেখা যায় ; আকাশে দু-চারটি তারা। তারার দিকে চেয়ে দয়ালদা বলেন, ‘পাতঞ্জলে আছে, ধ্রুবে তদগতিজ্ঞানম্, ধ্রুবতারার ধ্যান করলে তারকাদের গতিবিধি জানা যায়। আমার এক গুরুভাইর এ সব দিকে ঝোঁক ছিল, নাম তারানাথ। একজন নাগা সাধুর কাছে প্রক্রিয়া শিখে নেয়। প্রক্রিয়ার ফলে একদিন কেবল তারা দেখতে আরম্ভ করলো। অনেক কষ্টে হুঁশ ফেরে।’

: মানে গাঁজা খেয়েছিলেন ?

: হুঁ। এ রাস্তায় চোরাগলির অভাব নেই।

: তারার কিন্তু একটা আকর্ষণ আছে, ভয়ও হয়। এর মানে কি ?

: তারার আকর্ষণ জ্ঞানমার্গের সংস্কারের সঙ্গে জড়িত। সময়ে ওটা পরিস্ফুট হবে। ভয় এলে ভগবানের নাম করবে, তাঁর রূপা প্রার্থনা করবে ; তিনিই রাস্তা দেখিয়ে অভয়পদ পাইয়ে দেবেন।

: প্রথমে ভক্তি, তারপর জ্ঞান,—এটাই কি ভগবৎসংস্কারের সহজ পরিণতি ?

: সাধারণতঃ। কিন্তু মাহুঘের এমনই সংস্কার-বৈচিত্র্য যে রাজপথ ধরে কেউ চলতে পারে না। কানামাছি খেলার মতো ; চোখ বেঁধে তুল করে করে চলছি। অথবা ভুলও নয়, কারণ এটা খেলা। সব ভুলচুকের পিছনে সত্য রয়েছে প্রেমময়ের প্রেমদৃষ্টি। গান ধরেন,—

আমি তো তোমারে চাহিনি জীবনে, তুমি অভাগারে চেয়েছ;

আমি না ডাকিতে, হৃদয়-মাঝারে নিজে এসে দেখা দিয়েছ।

চির-আদরের বিনিময়ে, সখা, চির অবহেলা পেয়েছ ;

(আমি)—দূরে ছুটে যেতে, হুহাত পসারি ধরে টেনে কোলে নিয়েছ।

: এই বিশ্বাস আসে না কেন ? তাঁর উপর সব কিছু ছেড়ে দিতে পারি না কেন ? মনটা কেবলই সন্দেহদোলায় দোল খাচ্ছে।

: ওটাও তাঁরই দান, তা নইলে লীলা জমবে কেন ?

তোমারি দেওয়া প্রাণে, তোমারি দেওয়া দুখ।

তোমারি দেওয়া বৃকে, তোমারি অল্পভব ॥

তোমারি দেওয়া নিধি, তোমারি কেড়ে নেওয়া ।

তোমারি শক্তি আকুল পথ চাওয়া ॥

তোমারি নিরঞ্জে ভাবনা আনমনে ।

তোমারি সাক্ষনা শীতল সৌরভ ॥

## ॥ ৪ ॥

ঘুমিয়ে পড়েছিলুম । ক্ষেপু ধাক্কা দিয়ে বলে, ‘দেবলচক্রে ঘুমের আর শেষ নেই ; গাড়ীতে ঘুম কিছু কম হয়েছে ? ওঠ, সব ঠিক হৈ ; স্বামীজী সব ব্যবস্থা করে দিলেন । পুরুত দুজনা নিচ্ছি ; একজন দয়ালদার জন্তু, একজন আমাদের জন্তু ।’ তথাস্ত্ব বলে বেরিয়ে পড়ি...প্রথম ফল্গুতে স্নান । ফল্গুর বৈশিষ্ট্য আছে ; বাস্তব পরিবেশের চাপে মনে নির্বেদ আসে, ভাবি তাঁদের কথা চিরদিনের জন্তু যারা আমাদের মায়া কাটিয়ে ইহলোক ত্যাগ করেছেন—যমদুয়ারে দাঁড়িয়ে নচিকেতা । অসীম দেশ ও অনন্ত কালকে ডিঙিয়ে প্রেতাআদের সঙ্গে সম্বন্ধ স্থাপন করতে চাই শ্রদ্ধাঞ্জলির মাধ্যমে । পুরোহিত মন্ত্র পড়ান—

ওঁ দেবা যক্ষাস্তথা নাগা গন্ধর্বা পুসরসোহসুরাঃ

ক্রুরাঃ সর্পাঃ সুপর্ণাশ্চ তরবো জিক্ষগাঃ খগাঃ ॥

নিরাহারাশ্চ যে জীবাঃ পাপে ধর্মে রতাশ্চ যে ।

তেষামাপ্যায়নায়ৈতদ্ দীয়তে সলিলং ময়া ॥

ওঁ অগ্নিদহ্মাশ্চ যে জীবা যেহপ্যদহ্মা কূলে মম ।

ভূমৌ দন্তেন তৃপ্যন্ত তৃপ্তা যান্ত পরাং গতিম্ ॥

ওঁ আত্রক্ষভুবনাল্লৌকা দেবর্ষিপিতৃমানবাঃ ।

ময়া দন্তেন তোয়েন তৃপ্যন্ত ভুবনত্রয়ম্ ॥

মনে পড়ে বুদ্ধদেবের মৈত্রীমন্ত্র—

পূরথিমায় দিসায়, দক্ষিণায় দিসায়, পচ্ছিমায় দিসায়,

উত্তরায় দিসায়...সর্ব্বে সত্তা, সর্ব্বে পাণা, সর্ব্বে ভূতা

...সর্ব্বে অরিয়া, সর্ব্বে অনরিয়া, সর্ব্বে দেবা, সর্ব্বে মহুস্মা,

সর্ব্বে অমহুস্মা...অবেরা হোন্ত...সুখী অন্তানং

পরিহরন্ত, দুক্খা মুঞ্চন্ত—

পূর্ব-দক্ষিণ-পশ্চিম-উত্তর যেখানে যে জীব, প্রাণা, ভূত, আর্ষ, অনাৰ্ষ, দেবতা,

মনুষ্য, অমনুষ্য আছে, সকলে শত্রুহীন হোক, সুখে বাস  
করুক, দুঃখ হতে মুক্ত হোক ।

বিশ্বের বেদনায় ঝাঁর চিত্ত মথিত হয়, ভুবনত্রয়ের তৃপ্তির জগ্ন যিনি তর্পণ করেন,  
তিনিই প্রবেশাধিকার লাভ করেন মৃত্যুর ‘অন্ধঃ তমঃ’ পেরিয়ে বিম্বুপাদপরশের  
অমৃতধামে...যেখানে ‘মধু বাতা ঋতায়তে মধু ক্ষরন্তি সিদ্ধবঃ’ ।

টাদের নাকি আমরা একটি মুখই দেখি ; বোলকলায় পূর্ণিমা, বোলকলায়  
অমাবস্যা ; জীবন ও মরণ ; ওপারে কী ? অমৃত ?...কে জানে ? আমাদের  
খেলা শুধু তিথি নিয়ে...তারপর তিথিশ্রাদ্ধ...কিস্ত কী মহিমময় দৃষ্টি ! কল্যাণময়  
মহান্ আদর্শ ! তৃপ্ত্যন্ত ভুবনত্রয়ম্ ! ..প্রাচীনদের সম্বন্ধে আমাদের আর তেমন  
শ্রদ্ধা নেই...যবনদের কাছে অপরাবিচার ছিটেফোটা শিখে গর্ব অনুভব করি ;  
লাভ কী হচ্ছে ? শুধুই বিভেদ সৃষ্টি ! কৃষ্টি, অবদান ; প্রাদেশিক সীমা,  
প্রাদেশিক ভাষা, প্রাদেশিক সাহিত্য...বৈশিষ্ট্য ? কেবলই ভেদবুদ্ধি, কূপমণ্ডকত্ব  
nothing like leather ! যে বৈশিষ্ট্য দ্বারা আমরা সকলকে এড়িয়ে চলি,  
ভালবাসতে পারি না, তার দাম কতটুকু ? ক’দিন সে টিকে থাকবে ? মৃত্যুত ।  
প্রাচীনদের দূরদৃষ্টি ছিল । শাস্ত্র আর কজন পড়ে ? বহুধা বিভক্ত এই ভারতীয়দের  
কি করে এক করা যায় ? তীর্থই একীকরণের পুণ্যবেদী । পতিতপাবনী গঙ্গা,  
মোক্ষদায়িনী কাশী, ভক্তজনসেবিত বৃন্দাবন,...আর ত্রিভুবনতৃপ্তির তর্পণক্ষেত্র  
গয়া...সকলেই আসেন । ভারতের স্বদূর প্রান্ত থেকে ভাষা-বর্ণ-নির্বিশেষে  
আবালবৃদ্ধবনিতা সকলেই আসেন গয়া তীর্থে সর্বজীবের কল্যাণকামনা নিয়ে ।  
আত্মস্তুত্ব পর্যন্ত সর্বজীবের জগ্ন প্রার্থনা করেন, ‘অবেরা হোন্ত, দুঃখা মুক্তন্ত’ ।  
মৈত্রীভাবনা করেন,

দিটুঠা বা য়েব অদিটুঠা য়ে চ দূরে বসন্তি অবিদূরে ।

ভূতা বা সন্তবেসী বা সৰ্বে সন্তা ভবন্তু সুখিতন্তা ॥

দৃষ্ট, অদৃষ্ট, দূরবাসী, অদূরবাসী, জন্ম যারা নিয়েছে বা নেবে সকল সন্তাই  
সুখী হোক । শান্তিবারি সিঞ্চন করে সর্বজীবের জগ্ন মন্ত্র পড়েন—

ওঁ শান্তিঃ । ওঁ শান্তিঃ ॥ ওঁ শান্তিঃ ॥

॥ ৫ ॥

বিকেল বেলা বিশ্রাম করাই ঠিক হলো, থকে গিয়েছি সবাই । দয়ালদার আজ  
বেশ প্রসন্ন ভাব । ক্ষেপু তো সদানন্দ ; প্রাণের প্রাচুর্যে সদাই চঞ্চল ; পুরাণ-

ইতিহাসে অগাধ বিশ্বাস ; সুখী । সন্দিগ্ধচিত্ত আমি, সোয়াস্তি নেই কিছুতেই, অনর্থক বাজে প্রশ্ন উঠিয়ে অশাস্তি ডেকে আনি । ক্ষেপুর ও বালাই নেই ; উপুরির টাকা সম্বন্ধেও নিশ্চয় । রাজা উজ্জির থেকে আরম্ভ করে চাপরাশী আদালী পর্যন্ত সর্বস্তরে যে জিনিস চালু তার যে বিষদাত থাকতে পারে তা ওর জানা নেই । কিন্তু ভগবানে বিশ্বাস আছে, নামে রুচি আছে, কীর্তনে অশ্রুপুলক হয় । আমি ঠিক উলটো । সেদিনের কথা ; সকাল বেলা চা খেতে খেতে দেয়ালে টাঙানো ক্যালেণ্ডারের ধ্যানস্তিমিত শ্রীরামকৃষ্ণের মূর্তির দিকে চেয়ে তৃপ্তি বোধ হচ্ছিল । পাঁচুদা সতৃষ্ণনয়নে ঠাকুরকে দেখছেন—ভক্তির ভরে নয়, ওরকম একটি ক্যালেণ্ডার কি করে হাত করা যায় এই চিন্তায় । বৃথা চিন্তা, কারণ আমি পেয়েছি পোষ্টমাষ্টার বাবুর অল্পগ্রহে...খ্যাচ করে একটা শঙ্কা ওঠে ; তাই তো, ক্যালেণ্ডারটি সত্যিই লোভনীয়, কিন্তু পোষ্টমাষ্টার বাবু পেলেন কোথায় ? নিশ্চয় চোরাই মাল । আমার রাখবার অধিকার আছে কি ? আমি তো আর চুরি করি নি, দান হিসাবে গ্রহণ করেছি । চোরাই মাল দান করা যায় কি ? গুড্ সিটিজেনের কর্তব্য চোরকে ধরিয়ে দেওয়া । ‘অত্যায যে করে আর অত্যায যে সহে’—উভয়েই পাপের ভাগী । ক্যালেণ্ডারটির সদগতি করতে হয়...ভেবে দেখি, সদগতি অসম্ভব । পাঁচুদাকে দিয়ে দেবো ? আমার অধিকার নেই । ফেলে দেবো ? অত্কে চোরাই মাল ব্যবহারে সাহায্য করা হবে । ছিঁড়ে ফেলবো ? দ্রব্যটি আমার নয় । পোষ্টমাষ্টার বাবুকে ফিরিয়ে দেবো ? তিনি রুষ্ট হবেন ; অধিকন্তু সত্য কথাটা বলতে পারবো না । বললেও মূল প্রশ্নের সমাধান হবে না, কারণ যিনি ক্যালেণ্ডারটি পাঠিয়েছেন এবং যাকে পাঠিয়েছেন তাঁদের নামটিকানা জানা নেই ; আর পোষ্টমাষ্টার বাবু যে ফেরত পেয়ে ওটি যথাস্থানে পাঠিয়ে দেবেন এ-আশা দুর্ভাগ্য মাত্র । নামটিকানা তিনিও টুকে রাখেন নি । আমার কর্তব্য অপরাধীকে পুলিশের হাতে দেওয়া । কিন্তু অপরাধ প্রমাণসাপেক্ষ, প্রমাণাভাবে দণ্ডনীয় হবো আমি । অধিকন্তু ধরিয়ে দেওয়ার সংসাহসও নেই আমার...না, দানগ্রহণের পাপ থেকে আমার নিস্তার নেই ; অশেষ সঙ্কিত পাপের এক কোণে ওটিও চিরদিনের জঞ্জাল হয়ে থাকলো । ...এই জন্মের ও জন্মান্তরের অঙ্কশরুপী ক্যালেণ্ডারটি এখনও দেয়ালে ঝুলছে, মাঝে মাঝে ‘ক্ষমাব্যো মেহপরাধঃ’ বলে পরমহংসদেবকে প্রণাম করি ।... কতো ভাবেই যে মনে জট পাকিয়ে থাকে ! ক্ষেপু আছে ভাল । নির্দ্বন্দ্ব সবল মন, দৃষ্টমান রাজপথ ছাড়া পথ জানে না ; পিণ্ডদান, উর্ধ্বদেহ, প্রেতদর্শন,



সব কিছুই সহজভাবে গ্রহণ করতে পারে...আমি শঙ্কা তুলেছিলুম, প্রেতলোক আছে কিনা ; উত্তর দেয়—

: গোসাঁইজীর ( প্রভুপাদ বিজয়কৃষ্ণ গোস্বামীর ) জীবনীতে আছে, বিলেতফেরত সাহেবী মেজাজের এক বাঙ্গালী বাবু পুত্র দিগে পিণ্ড দেওয়ার সময় মৃত পিতার প্রেতাত্মা দেখেছিলেন ।

: তাঁর মনের কল্পনা ।

: তোর রক্ত গরম আছে কিনা, তাই নাস্তিক হয়েছিস ; বয়সে যখন ভাটা পড়বে তখন হরিসভার মেঘের হয়ে তিলক কাটবি ।

: আমার পক্ষেরই সমর্থন করছিস । বিলেত যাক আর না যাক, মানুষ সংস্কারের দাস ; শেষ পর্যন্ত চিরাগত সংস্কারই প্রবল হয়, যার ফলে প্রেতদর্শন সম্ভব ও সহজ হয় কিন্তু প্রেতের অস্তিত্ব প্রমাণিত হয় না ।

: তোর মাথা খারাপ না কি ? চোখ চেয়ে জলজীয়ন্ত মূর্তিটি দেখলো, আর প্রমাণ হলো না ?

: দেখেছেন বিলেত-ফেরত ক্লিষ্ট-বিবেক বাঙ্গালী বাবু ; সবাই তো আর দেখে নি ?

: ইংরেজী বিচার ঐ দোষ—হস্তিমূর্খ করে ছেড়ে দেয় । তোর—

দয়ালদা তর্কের মোড় ফিরিয়ে বলেন—

: জীবের তিনটি দেহ ; জাগ্রৎ দেহ—স্থূল ; স্বাপ্নিক দেহ—সূক্ষ্ম ; সুপ্ত দেহ— কারণ । মৃত্যুতে স্থূলদেহ পরিত্যক্ত হয়, থাকে সূক্ষ্মদেহ বা প্রেতাত্মা । মনকে যেমন চোখ দিয়ে দেখা যায় না, তেমনি মনোময় প্রেতাত্মাকেও স্থূলদেহের ইন্দ্রিয় ( চোখ ) দেখতে পায় না । দ্বিতীয়তঃ, ‘প্রেত’ মানে প্রকৃষ্টরূপে গত ; সুতরাং পৌর্বেদেহিক স্মৃতি তার থাকে না, যেমন স্বপ্নাবস্থায় আমরা জাগ্রৎ অবস্থার ( এই স্থূল জগতের ) সঙ্গে সম্বন্ধ স্থাপন করতে পারি না । এর নাম স্থানিধর্ম ; অর্থাৎ দেহ তিনটি প্রত্যেকেই বিশেষ বিশেষ ধর্মদ্বারা আবদ্ধ, নিজের নিজের রাজ্যে বিচরণ করে, এবং তৎতৎ স্থানের ভোগ গ্রহণ করে । জাগ্রৎজীব স্থূলভুক্, স্বাপ্নিক জীব সূক্ষ্মভুক্, সুপ্তজীব কারণ বা আনন্দভুক্ । কিন্তু প্রত্যেক রাজ্যের রাজ্যপাল আলাদা, এক রাজা বা রাজার প্রজা অন্য রাজ্যের ত্রিসীমানায় ঢুকতে পারে না । ঢুকলেই সেই রাজ্যের অধীন হয়ে যায় ।

ক্ষেপু : তা হলে শ্রীদ্ধ করে লাভ কী ? প্রেতাত্মার সঙ্গে যদি যোগাযোগই না হলো—

দয়ালদা : আছে লাভ । প্রথমতঃ জন্মান্তরবাদেয় প্রতিষ্ঠা ।

আমি : কী প্রয়োজন ? পাশ্চাত্যরা তো জন্মান্তর না মেনেও বেশ সুখেই আছে ।

জন্মান্তর ধারণ করে আমরা যে খেলা খেলে চলছি, তারা এক জন্মেই তাকে শেষ করে দেয় । তারা বলতে পারে, “মুট তোমরা, বা মুঞ্চ ; যে কাজ এক ঘণ্টায় আমরা সারি তার জের টেনে তোমরা শতজন্ম চল । এজন্মই তোমরা চিরকাল অকেজো থেকে যাচ্ছ ।”

দয়ালদা : পাশ্চাত্যদের এই যুক্তি সার্থক হতো যদি জন্মান্তরবাদ আদ্যাত্মানেই শেষ হতো । ভারতে ধর্মমত আছে অনেক, কিন্তু সকলেই মোক্ষবাদী । এক জন্মে মোক্ষলাভ হয় না ।

আমি : হয় না কেন ?

দয়ালদা : টিকিট করে সার্কাস দেখতে এসেছি, ভেঁপু শুনেই চলে যাবো ? বাঘের খেলা, কতো কি আছে । গীতার ভাষায়—অনেকজন্মসংগৃহ-স্তুতো যাতি পরাং গতিম্ । জন্মান্তরবাদ মোক্ষবাদের ভিত্তিস্বরূপ, আর মোক্ষবাদ ভারতীয় সভ্যতার প্রাণস্বরূপ ।

আমি : প্রশ্ন তবুও থেকে যায় ।

দয়ালদা : জানি । যেমন মোক্ষ সত্যিই আছে কি না । বৈদিক ঋষির সাক্ষ্যই এখানে প্রমাণ ; তিনি বলেছেন—

বেদাহম্ এতং পুরুষং মহাত্মম্ ।

ক্ষেপু : প্রেত সম্বন্ধে শাস্ত্রকাররা যা লিখে গিয়েছেন তা কি—

দয়ালদা : শাস্ত্র সম্বন্ধে আমরা কতকগুলো মনগড়া কল্পনা নিয়ে চলি । শাস্ত্র চোখ খুলে দেয়, আবার অন্ধও করে । বিদ্যা চিরদিনই গুরুগম্যা । সংস্কৃতের নিকট শাস্ত্র পাঠ না করলে তাৎপর্য ধরা যায় না ; আবার বিচার-ধ্যান না করলে তাৎপর্য উপলব্ধি করা সম্ভব হয় না ।

আমি : শাস্ত্রের তাৎপর্য বুঝবার জন্তু সদগুরু প্রয়োজন, কিন্তু সদগুরু চিনবো কি করে ?

দয়ালদা : শাস্ত্রে লক্ষণ দেওয়া আছে, মিলিয়ে নিতে হয় ।

আমি : শাস্ত্র বুঝবার জন্তু সদগুরু, আর সদগুরু চিনবার জন্তু শাস্ত্র—একে অত্যাশ্রয় দোষ বলে ।

দয়ালদা : তা বটে । তবে অপরা বিদ্যা সম্বন্ধে যে নিয়ম, পরা বিদ্যা সম্বন্ধে তা খাটে না । ব্যাকরণতীর্থে নিকট যেমন ব্যাকরণ শিক্ষণীয়,

শ্রোত্রিয় ও ব্রহ্মনিষ্ঠ গুরুর নিকট তেমনি ব্রহ্মবিদ্যা শিক্ষণীয়। মুশকিল হচ্ছে এই যে এমন কোনো সংস্থা নেই, হতেও পারে না, যেখান থেকে শ্রোত্রিয়-ব্রহ্মনিষ্ঠের উপাধি লাভ করা যায়।

আমি : তবে আমাদের গতি কী হবে ?

দয়ালদা : ভগবানের শরণাপন্ন হও। ব্যাকুলভাবে ডাকলে তিনিই গতি করে দেন। যদি তোমার শুদ্ধ সংস্কার থাকে, যদি সত্যিকার ‘জিজ্ঞাসা’ জীবনে দেখা দেয়, তবে তিনিই সদগুরু জুটিয়ে দেবেন। আধ্যাত্মিক জগতের এটা অমোঘ নিয়ম।

আমি : নিয়ম যে আছে তার প্রমাণ কী ?

দয়ালদা : আছে প্রমাণ, বিবেকচূড়ামণিতে ভগবান্ শঙ্কর আশ্বাস দিয়েছেন, যাঁরা মুমুক্শু দেশ-কাল-পাত্র তাঁদের সহায় হয়। শ্রীরামকৃষ্ণপ্রমুখ মহাপুরুষদের জীবন দেখো ; প্রয়োজন ও জিজ্ঞাসার আকর্ষণে গুরু নিজেই এসে উপস্থিত হয়েছেন। নিয়ম হচ্ছে নৈর্ব্যক্তিক ; সম কারণ বর্তমান থাকলে সম কার্য উৎপন্ন হবেই। আসল কথা কি জ্ঞান ? কামনা দ্বারাই আমরা জগৎ সৃষ্টি করি ও জাগতিক বিষয় ভোগ করি। যদি অকামতা এসে যায়, কে জগৎকে ধরে রাখবে ! ভোগাপবর্ণের অলম্ব্য এই নিয়মের শাসনে জগৎ-সংসার চলেছে, এর অগুণাভাব অসম্ভব। সন্ধ্যার মঞ্চে পড়েছ, মনে আছে তো ? ঋতং চ সত্যং চাভীদ্ব্যং তপসোহধাজ্জায়ত, সত্যও যেমন আছে তাকে লাভ করবার ঋত বা নিয়মও তেমনি আছে। অবিনাশী সত্য, অমোঘ নিয়ম।

ক্ষেপু : অনেক কিছুই বললে, কিন্তু আমার প্রশ্নের জবাব পেলুম না। পিণ্ডদানে পিতৃলোকের উপকার হয় কি না, আমাদের শ্রদ্ধাঞ্জলি তাঁদের নিকট পৌঁছয় কি না—

দয়ালদা : প্রমাণ করা শক্ত। কিন্তু যা দৃষ্টফল তা হচ্ছে তোমার নিজের তুষ্টি ও পারমার্থিক কল্যাণ, আত্মসন্তুষ্ট পর্যন্ত সকলের সম্বন্ধে মৈত্রীভাবনা দ্বারা তোমার চিন্তের প্রসার এবং শ্রেয়োলাভ। প্রেতের জগৎ যে প্রেততত্ত্ব আলোচনা করে সে বড় জোর ভূতের ওঝা হতে পারে, ঈশ্বরের দিকে এগতে পারে না।

ক্ষেপু : অনেক বড় বড় পণ্ডিত ও সাধু-মহাত্মা প্রেতলোক সম্বন্ধে বই লিখেছেন ; প্রমাণ দ্বারা—

দয়ালদা : ভূত প্রেতের প্রসঙ্গ ছাড়। শাস্ত্রাদিতে প্রেতযোনির যে বিবরণ আছে তার উদ্দেশ্য হচ্ছে বৈরাগ্যভাবনা। জন্ম-মৃত্যুর প্রবাহে যখন এতো কষ্ট তখন সর্বথা মুক্তির জগু চেষ্টা করা উচিত—এই হলো তাৎপর্য। ভগবানের নাম নেও, তাঁর শরণাপন্ন হও ; পরম শান্তি পাবে। এসো নাম করি—

হরিহরায় নমঃ কৃষ্ণগোবিন্দায় নমঃ।

যাদবায় মাধবায় কেশবায় নমঃ ॥

॥ ৬ ॥

ভোররাত্রে দয়ালদা প্রভাতী গাইছেন—

যামিনী বিগত, জাগিল জগত, মনোরবি কত ঘুমে  
পাখীকুল মিলি গায় হরিবুলি মধুর মধুর তানে ॥  
প্রভাত সমীর মন্দমন্দ বয়ে, প্রেমে অন্ধ হয়ে ফুল গন্ধ নিয়ে,  
ঘারে ঘারে যায় হরিগুণ গেয়ে, (কতো) অমিয় ঢালিল প্রাণে ॥  
নিশির শিশির বিন্দু বিন্দু পড়ে, তরুণল যেন অশ্রুবিন্দু ঝরে।  
তরুণ অরুণ হাসে কুতূহলে, চাহিয়া শ্রীমুখ পানে ॥

প্রভাতী সুরে উষাকীর্তন ; পাখীদের আলোকলগনে জেগে ওঠার তান,  
প্রভাতী পুষ্পের গায় শুভ্র, শ্বেতচন্দনের গায় পবিত্র। ভৈরব রাগে পাই প্রাতঃ-  
সমীরণের স্নিগ্ধ পরশ আর অরুণালোকে শিশিরের ঝলমলিয়ে ওঠা। প্রভাতী  
সুরে অধিকন্তু আছে অতীত ও অনাগতের মূর্ছনা, পিছনে-ফেলে-আসা পথের  
সুখদুঃখময় স্মৃতি আর আনন্দোজ্জ্বল আগমনীর পূত পাদক্ষেপে শ্বেতকমলের  
বিকাশ। দয়ালদা আবেগপূর্ণ কণ্ঠে গেয়ে চলছেন পরমপুরুষের সন্ধানে পথ  
চলার কথা—

সারানিশি জাগি ব্যাকুল অন্তরে গ্রহশশী আসি খুঁজি গেল যারে।  
(তুমি) বিষয়রসে ভুলি রহিলে কি বিধে, ভুলেছ পরম ধনে ॥  
সাগর উছলে য়ার প্রেম রসে, ত্রিলোক পাগল য়াহার উদ্দেশে।  
গঙ্গাধমনা আর সরস্বতী ধাইছে তাঁহারি পানে ॥

সারারাত চলেছে গ্রহনক্ষত্র, উদ্বেল সমুদ্র, ত্রিবেণীর কলস্বন। যোগিয়াতে গান  
ধরে বিশ্ব পাড়ি দেয় রাত্রির মহাসিদ্ধি ; শুকতারার বিদায় নেয় রামকেলির স্তব্ধ  
ব্যথায় ; আনন্দ ভৈরবের আনন্দে পূবের আকাশে রক্তিমাভা ; জাগরণের মঙ্গল  
সুরে বাজে তারক ব্রহ্ম নাম—

ভাঙ্গ মায়া ঘুম, জাগরে জাগরে, তারক ব্রহ্মনাম জপরে জপরে ।

লহরে লহরে বল হরে কৃষ্ণ হরে, আরাম পাইবি মনে ॥

...জন্ম মৃত্যুর অগণিত চেউ ঠেলে যুগের পর যুগ চলেছে অসীমের সন্ধান ; অসংখ্য রাত্রির ওপারে হয়তো আমাদেরই প্রতীক্ষায় তিনি দাঁড়িয়ে, সকল গানের পরপারে...ভ্রান্ত হয়ে খুঁজি তাঁকে এপারের গন্ধবিধুর সমীরণে। এরই বা কতটুকু ধরে রাখতে পারি ! জন্মজন্মান্তরের অধুনা-বিশ্মৃত পান্থশালায় কতো লোককে ভালবেসেছি বা ভালবাসতে চেয়েছি কিন্তু পারি নি...ক্ষণিকের প্রাণ-দেওয়া-নেওয়া, বার্থ আকৃতি, ঘাসফুল, ঘাসের বৃকে চোখের জল... খড়কুটো...flotsam and jetsam...কোথায় লুকিয়ে গেল...স্মৃতিটুকুও আজ নেই...ভৈরবীরাগিনীর বেদনাপ্লুত ‘ও সে কেন আসে না’। মহাকাল সব কিছুই গ্রাস করেন...সৈকতে বসে যাদের সঙ্গে বালির ঘর বানালুম তারাও সরে পড়েছে ; যারা আছে তারা ‘ধুলো খেলা খেলবে না’ আর বিষয় রসে মন মজেছে’। কেউ গেছে গ্রহাস্তরে, কেউ বা এখানে থেকেও গ্রহাস্তরে...সে দিন মাণিকের সঙ্গে দেখা দক্ষিণেশ্বরে ; কোথায় মাণিক ? অফুরন্ত হাসি, অজস্র প্রাণ, অনাবিল আনন্দ ; মাণিক সত্যিই মাণিক ছিল। ছিল, আর নেই। আলো নিবে গিয়েছে ; মাণিক আজ পাথর !..কমিশনার সাহেবের মেমকে পাগলা ঘোড়ার কবল থেকে বাঁচিয়েছিল ; চাকরি দেওয়ার জ্ঞান কতো সাধাসাধি, নেয় নি। দেশের কাজ করবে। করতোও প্রাণ দিয়ে। এক সাহেব অধ্যাপক বাঙ্গালীদের’ সম্বন্ধে কি-একটা মন্তব্য করেছিল, জবাবে দিল প্রচণ্ড এক ঘুবি...কী সেবাই না করতে পারতো ; ও ঘরে এলেই রোগী ভুলে যেতো সব জালা-যন্ত্রণা ..মাণিক এখন পাথর...টাকা-টাকা করে ঘুরে বেড়াচ্ছে ; টাকা স্বর্গ, টাকা ধর্ম, টাকা হি পরমং তপঃ। সব কিছুই এমনি পাথর হয়ে যায়, শুধু চলে গঙ্গার অবিশ্রাম প্রবাহ। ভাল যাদের বাসলুম তাদের আজ চেনাই যায় না, বন্ধীকের ভিতর গা ঢাকা দিয়েছে...ভোলাদা এখন অত্যন্ত হুঁশিয়ার। ফুটবল, ক্রিকেট, গুলিখেলা, কাবাডি, বাইচ খেলা—সব কিছুর প্রাণ, আর সব কিছুতেই ‘ফার্স্ট’। ছোটবেলার গান অধিকাংশ ভোলাদার কাছে শোনা। পুকুর ধারের গাছটা এখনও আছে, একটা ডাল জলের দিকে নোয়ানো ; সেখানে বসে ভোলাদা গেয়েছিল—পাখি ঐ যে গাহিল গাছে। কাল-বৈশাখীর এক সন্ধ্যায় লাল মেঘের ছটা দেখে গেয়েছিল—সন্মুখে রাঙা মেঘ করে খেলা। ‘ঐ দেখা যায় ‘ঘরখানি’ অনেকবার শুনেছি, কিন্তু আজ পর্যন্ত

ঘরখানির দেখা পাই নি। আজি এসেছি, আজি এসেছি, ঝুঁ হে, নিয়ে এই হাসিরূপ গান; যদি পরানে না জাগে আকুল পিয়াসা চোখের দেখা দিতে এস না; আমি তোমারই আশে বসে আছি বলে তাই কি দেখা দিলে না দিলে না; আমার যত দিন যায় তত কাজ বাড়ে অবসর কৈ হলো না; গত নিশি শ্রাম গেছে ফিরে (সখিরে); ফাঁকি দিয়ে প্রাণের পাখী উড়ে গেল, আর এল না; ধুলো খেলা খেলব না আর, হরিনামে মনে মজেছে; বাঁশরী বাজিল যমুনায়, তোরা কে কে যাবি আয়; ঘন তমসাবৃত অম্বর ধরণী; (বলি) ও কুজার বন্ধু, হরি! আজ হতে রাখানাথ আর বলবো না হে; আর কবে দেখা দিবি মা, হররমা; দীনতারিণী তারা...পুরনো দিনের এই গানগুলো এখন আর কেউ গায় না...এরা এখন music when soft voices die; রেশগুলো শুনি oft in the stilly night, অশরীরী এই বন্ধুদের দেখা পাই যখন

Sad Memory brings the light

Of other days around me.

ভাবতুম, ভোলাদা বড়ালের মতো গাইয়ে এবং রণজিৎসিংজীর মতো খেলোয়াড় হবে, আর পরীক্ষার কাঁটাবেড়াগুলো তো এক লাফে ভিড়িয়ে যাবে..... ম্যাট্রিকুলেশন পরীক্ষায় এক খাচ্কা খেয়ে পাঠশালার পণ্ডিত, পাটের দালালি, জমিদারের সেরস্তায় তহসিলদারি, জীবনবীমার এজেন্টগিরি, কোম্পানীর শেয়ার বিক্রি, ইত্যাদি অসংখ্য বেড়া পার হয়ে বর্তমানে মাড়োয়ারীদের ২নং খাতা লেখে; এই কাজে নাকি বেশ হাত পাকিয়েছে...দেখা হলো সেদিন ট্রামে—চুর্কেণ্ড প্রাচীর! এই সেই ভোলাদা?...খেলার সর্দার জগাদা!..... ত্রাকড়া দিয়ে বল বানানো, ক্রিকেটের ক্রীজ্ তৈয়ার করা, ফুটবলের গায়ে চর্বি মাখানো, কাঁঠালের তক্তা দিয়ে ব্যাট বানানো—এসব কিছুতে ছিল সিদ্ধ-হস্ত। খেলার জিনিসপত্র রাখতো নিজের হেপাজতে; মাঠে ছইসল্ দেওয়ার অধিকার আর কার ছিল না, কেউ সাহসও করতো না এই একচেটে অধিকারে হস্তক্ষেপ করতে। একদিন সকালবেলা আমাদের সবাইকে ডেকে প্রত্যেকের হাতে একটি একটি শেওড়ার দাঁতন দিয়ে বললে: আমাদের পুকুরপাড়ে যে মহাবীর সর্দার ও তার সঙ্গী বেহারা থাকে ওদের বাড়ী কোথায় জানিস? ছাপরা। ওরা রোজ দাঁতন করে; ঐদেশে আশি বছরের বুড়োও দিবি কটরমটর ডালমুট-বুটভাজা খায়। আর আমরা? চন্নিশের কোঠায় পা

দিতে না দিতেই চালশে আর ফোকলা দাঁত। নে, দাঁতন কর। ফোকলা দাঁতে স্বরাজ হয় না।...চাকরি পেয়ে মস্তদাতা নিজেই মস্ত ত্যাগ করলো বিলিতি দাঁতের বুরুশ ও পেইস্ট-এর মোহে। রাস্তায় একদিন দেখা; দাঁত-গুলো ঝকঝক করছে; বললে, ডের্টিস্ট দিয়ে দাঁত টাচিয়েছি, রোজ চারবার করে বুরুশ করি। হিংসা হলো; জগাদার পদাঙ্কানুসরণ করবার প্রচণ্ড লোভের কথা আজও মনে পড়ে। আমি তখনও কলেজে পড়ি; পয়সার অত্যন্ত অভাব, বৈকালিক টিকিনের বরাদ্দ দু-পয়সার মুড়ি-মুড়কি থেকে কিছু বাঁচানো অসম্ভব; আর অভিভাবকের নিকট এজাতীয় বিলাসিতার আবদার করলে প্রাপ্তি হতো চপেটাঘাত। কচিং কখনও ব্রাহ্মণভোজনের নিমন্ত্রণ পেলে পরের দিন চার পয়সার পুরি-হালুয়া; কী মিষ্টিই লাগতো হালুয়া! ভাবতুম, চাকরি পেলে কেবল হালুয়াই খাবো!...একদিন শুনি জগাদা দাঁতগুলো সব ফেলে দিয়েছে! আপদের শাস্তি এতেও হলো না, ফোকলা হওয়ার পর পেটের অস্থখটা বরং বেড়েই গেলো। অদৃষ্টের পরিহাস! ডাক্তার ডেথ্-সার্টিফিকেট দিয়ে বললেন, দাঁতের উপর অযথা অত্যাচারের ফলে গ্রহণী হয়েছিল।...লোকান্তর থেকে জগাদা হয়তো দেখছে, দস্তুরদের জ্ঞাই স্বরাজ!...কেষ্টা; কী জ্বালাতনই না করতো! ‘আউট’ হলে ব্যাট নিয়ে পালাবে; গোল্-এ রাখলে ব্লাডার ফুটো; পরীক্ষার হলে খাতা না দেখালে টেনে নেবে; ল্যাং মেয়ে পটকে দেওয়া অভ্যাসে দাঁড়িয়ে গিয়েছিল। বিয়ে করে প্রথমে দোকান দিলো; ঘিয়ের বাতি জালিয়ে হলো K. C. Addy, M. D. (Homoeo), Philadelphia। কিছুদিন পরে দেখি পেশা ও নাম দুটোই বদলে গেছে! শ্রীকৃষ্ণকবিরাজের বিখ্যাত শূলান্তক বটিকা এবং অগ্নিপ্রজ্বালক চূর্ণের কথা কে শোনে নি? শিবদত্ত বৃহৎ ব্যাঘ্রনাদ গুগ্গুলুবটিকা স্ত্রীর উপর পরীক্ষা করে বিপত্তীক হয়, ও অগ্ন রাস্তা ধরে। এবারে কেষ্টা ফকীর; কৈলাসাস্রমের সন্ন্যাসী প্রদত্ত নিস্তারিণী মাদুলী, মুস্ত্ আফা জয়ন্-উল্ ফকীরের স্বপ্নলব্ধ ইলেকট্রিক তাবিজ, শ্মশান-সাধক পোণ্ডু কাপালিকের নরকপালভষ্ম, কামাখ্যা হতে আহুত নাগরাজমণি ইত্যাদি দুস্ত্রাপ্যের বেসাত নিয়ে বেশ দু-পয়সা কামিয়েছিল...বদখেয়ালে উড়িয়ে দিল সব। কেষ্টদার ‘মটো’ (motto) ছিল “ভেকে ভিক্”। ভেক্ বদলে বৈষ্ণবী নিয়ে আখড়া খুলে নাম নিলো প্রভুপাদ কৃষ্ণদাস বাবাজী। অনেক নাকি মন্ত্র-শিষ্টা; কীর্তন গায় ভাল; করে খাচ্ছে এখন।...ভুখ্, ভেক্, ভিক্; কেন যে ভগবান্ স্মৃদ্যার জালা দিয়েছিলেন! স্মৃদ্যাই অশেষ পাপ; স্মৃদ্যবৃত্তির জ্ঞাত আমরা কী যে না করি...

গোষ্ঠে যাদের সঙ্গ পেয়েছিলুম তারা থেকেও নেই, এই জন্মেই জন্মান্তর নিয়েছে। পুকুর ধার, খেলার মাঠ, আম গাছের ছায়া, বাগানের কালো ঝোপ, ক্ষেতের আল, মাঠের বকে পায়ে-হাঁটা রাস্তা, রোদ-বৃষ্টি, মেঘের কোলে মেঘ, নৌকাবিহার, আকাশ-প্রদীপ, সাঁঝের তারা—সব কিছুর সঙ্গেই পরানসম্পাদকের স্মৃতি জড়িয়ে আছে। জ্যান্ত মানুষগুলো মরে গেছে, মৃত যারা তারাই বেঁচে আছে হৃদয়ের নিভৃত কোণে...কতো জোনাকি জলে সেখানে...আমার ভাইপো হাবুল সেদিন বলছিল তার বন্ধু রতনের কথা, পদ্মা নদীর আবর্তে রতনের এক সতীর্থ ডুবে যাচ্ছিল, তাকে বাঁচাতে গিয়ে রতন-ও ডুবে গেলো, তলিয়ে যাওয়ার আগে হাতজোড় করে বলে, “বিদায় দেহ ভাই”...রতনের সঙ্গে কোনো দিনই দেখা হয় নি, কিন্তু আমি যেদিন এ সংসার থেকে বিদায় নেবো সেদিন রতনকে বলে যাবো—

বিদায় দেহ ভাই,

তোমাকে আমি প্রণাম করে যাই।

রতন, স্কুদিরাম...ফাদার ডেমিয়ন্...মণিদা, মাণিক...আর যাদের সঙ্গে পরিচয় হলো না...সকলেই বুক জুড়ে থাকে হৃদয়ের বহুমুখী আকর্ষণে। কিন্তু ক-জনাকেই বা জানলুম, ক-জনাই বা ভালবাসা পেলুম, ক-জনাকেই বা ভালবাসতে পারলুম! শত্রুকেই কি মন থেকে উপড়ে ফেলা যায়? মিলন-বিরহের জট খুলছি দিনের পর দিন—ট্রাজিকমেডি (tragi-comedy) ; আর ট্রাজিডি (tragedy) হচ্ছে এই যে বৃকে শেল হানে তারাই ভাল যাদের বাসা যায়! সোক্রেডিস (Socrates)-কে তারাই বিষ খাওয়ালো যাদের কল্যাণ তিনি চেয়েছিলেন আজীবন; বিশ্বজনকে ভালবেসে যিশু হলেন ক্রুশ-বিদ্ধ...প্রেমের ক্রুর বন্ধি গতি!...কিন্তু মাণিক পাথর হয়ে যায় কেন? চলার পথে আর কি সে ঝলকে উঠবে? পথিকজন পাষণ্ড ভেবে হয়তো তাকাবেও না! পাষণ্ডী অহল্যা রামচন্দ্রের পাদম্পর্শে জীবন্ত হয়েছিলেন...“আমার প্রেমের লাগি তুমি আসছ কবে থেকে”; প্রেমের পরশে মাণিক আবার জলে উঠবে? আলো বিকিরণ করবে শ্রীরামচন্দ্রের প্রেমম্পর্শে?...পিছনের টানে এগনো, যায় না। কতো সঙ্গীকেই তো হারিয়েছি, এজীবনে, জন্মজন্মান্তরে...সঙ্গী হমরে চলে গএ হমহুকো চলনা...সাথী শুধু আকাশের তারা...রাত হলেই ভিড় জমে; যেন একদল শিশু, পাশে দাঁড়িয়ে প্রেমবিদ্ধ যিশু...অমিতাভের সাক্ষর আঁখি ফোটে নীলসাগরের বৃকে...অস্তুহীন প্রশ্ন হয়ে মিটমিট করেন সোক্রেডিস, পদতলে



নতশির প্লাতো...ঐ নক্ষত্রত্বকে দেখি নানকের শ্রুতপূর্ণ প্রশান্ত আনন আর  
মধ্যযুগের খ্রীষ্টীয় সাধুজন...সন্ত বার্গার্ড...সন্ত ফ্রান্সিস...সন্ত ইগনেসিয়স  
লায়লা...অগণিত তারা, অনন্তের যাত্রী, অনন্তকালের সঙ্গী...কৃত্তিকা...চিত্রা...  
মৃগশীর্ষ...পুনর্বসু...Pleiades...পুষ্যা...Andromeda...অনুরাধা ... যমজভাই  
ক্যাষ্টর-পোলক্স...অরুন্ধতী, বশিষ্ঠ, ক্রতু, পুলহ, পুলস্ত্য, অঙ্গিরা, অত্রি,  
মরীচি.....

করিতে এ ধুলোখেলা অবসান হলো বেলা,  
যারা এসেছিল সাথে ফেলে গেল অসময় ।  
হারাইয়া লাভে মূলে মরণের সিদ্ধ কূলে,  
পথশ্রান্ত দেহখানি টানিয়া এনেছি হায়,  
(এ) অদিনে এ-অধীনে ত্যজিবে কি অসময় ।  
তবে কেন পাপী তাপী এত আশা করে রয় ॥

দয়ালদার গানে প্রাণ আকুল হয়ে ওঠে । জিজ্ঞেস করি, 'যুক্ত করো হে সবার  
সঙ্গে মুক্ত করো হে বন্ধ' সম্ভব হয় কি করে । উত্তর দেন, "তাকে পেলেই  
সবাইকে পাওয়া হয়, তিনি যে সবাইকার অন্তরতম । তাঁকে ছেড়ে সবাইকে  
খুঁজলে দাঁড়াবে গিয়ে মরণের সিদ্ধকূলে হারাইয়া লাভে-মূলে । চলো সেখানে—  
মন চল নিজ নিকেতনে ।

সংসার বিদেশে বিদেশীর বেশে ভ্রম কেন অকারণে ॥  
লোভ মোহ আদি পথে দম্ভাগণ পথিকের করে সর্বস্ব হরণ ।  
সঙ্কেতে সম্বল রাখ পুণ্যধন গোপনে, অতি যতনে ॥  
সাধুসঙ্গ নামে আছে পান্থধাম, শ্রান্ত হলে তথা করিও বিশ্রাম ।  
পথভ্রান্ত হলে সুধাইও পথ সে পান্থ-নিবাসী জনে ॥  
যদি দেখ পথে ভয়ের আঁধার, প্রাণপণে দিও দোহাই রাজার ।  
(তিনি) রাজাধিরাজ প্রবল-প্রতাপ, শমন ডরে তার শাসনে ।

॥ ৭ ॥

চায়ের আসরে ক্ষেপূর আজ উদাস ভাব, অর্থাৎ পূর্বদিনের গুঁড়া, কচুরি,  
ডালমুট, কাঠিভাজা ও ঝাল চাটনীর জের এখনও চলছে । পৈটিক অস্বাচ্ছন্দ্য  
• এবং বৈরাগ্য ওর অবিভাভাবী । বলে, গয়াতে কী আর আছে এমন দেখবার—

নর্দমার গন্ধ, ধুলো, বালি, মশা, মাছি; আর দোকানের জিনিস তো মুখে দেওয়া যায় না।

: তুই তো কসুর করিস নি কাল!

: কলকাতার মতো তো আর নয়। আমার পিসে মশায় ঠিক বলেন, কলকাতা মহাতীর্থ, সর্বজীবের কামধেনু; যা চাইবে তা-ই পাবে।

: কলকাতার স্বর্গ ছেড়ে তোর পিসেমশায় তবে রাঁচী গিয়েছিলেন কেন? তুই সঙ্গে ছিলি তো?

: সে এক করুণ ইতিহাস। ডাক্তারের পরামর্শে তিন মাসের ছুটি নিয়ে রাঁচী এলেন, সাতদিন পর রাইট-এবাউট-টার্ন।

: সাত দিন? রাঁচীতে দেখবার তো অনেক কিছু আছে।

: বাজে বকিস না। পাগলা গারদ, নেতেরহাট, হুঁদ্রু, জোনাহ, ছিন্নমস্তা—এর নাম অনেক? পিসে মশায় বলেন, ‘কোনও ভদ্রলোকের কাঁকে যাওয়া উচিত নয়, কারণ ওটা চিড়িয়াখানা নয়; মানসিক ব্যাধির প্রতিষ্ঠানে শিক্ষক, ছাত্র, ডাক্তার ও রোগী ছাড়া অণু যে কেউ যায় সে হচ্ছে মূঢ়, পাগলের অধম। হুঁদ্রুর নীচে গিয়ে পিসে মশায়ের হার্ট ফেইল করে আর কি! কাজেই জোনাহ খতম করলুম উপর থেকে উঁকি মেরে; হুঁদ্রুর পর নতনয় কিছু ছিলও না। নেতেরহাট? দার্জিলিং যারা গেছে তাদের কাছে নেহাতই তুচ্ছ—a tame affair; বাকী রইলো ছিন্নমস্তা—থার্ড ক্লাস একটা মন্দির; দুটো নদী মিশেছে এই যা; একদিন পিকনিক করা যায়, কিন্তু ঐ ম্যালেরিয়ার ডিপোতে দু-এক ঘণ্টার বেশী থাকা নিরাপদ নয়।’ এই হচ্ছে পিসে মশায়ের বাস্তব অভিজ্ঞতার ভিত্তিতে প্রতিষ্ঠিত স্মৃতিস্তম্ভ অভিমত; স্মৃতরাং রিটার্ন টিকিট না কাটাই বেকুবী হয়েছিল।

: মুরাবাদির মাঠ?

: গড়ের মাঠ বোধ হয় তুই এখনও দেখিস নি? অর্থাৎ কলকাতা হচ্ছে ভূষর্গ। ফুটবল, ক্রিকেট, মোহনবাগান, ভারহামস, ইস্টবেঙ্গল, মহাস্বন্দান স্পোর্টিং—জীবন ঐ এক নেশাতেই কাটিয়ে দেওয়া যায়। ঘোড় দৌড়ের বাতিক থাকলে তো সোনায় সোহাগা। টাকা চাই? বড়বাজারে ছোটবাজারে উড়ে বেড়ায় রাত দিন, হাত বাড়ালেই উড়ন্ত টাকা ধরতে পার। ট্রাম্-বাস্-ট্যাক্সি, যেখানে খুশি যুরে বেড়াও। থিয়েটার বায়স্কোপ? রোজ তিন-চারটে শো দেখে নেও। লেকচার শুনবে? ময়দানে, পার্কে, হলে, যুনিভার্সিটি ইন্সটিটিউটে,

হরিসভায়, ব্রাহ্মসমাজে ছেদহীন অক্লান্ত বক্তৃতা চলছে। ধর্ম করবে? নিত্য গঙ্গাস্নান, কালীঘাটে পাঠা বলি ও কীর্তনে মালপুষা দুটোই চালাতে পার : তারপর রামকৃষ্ণ, ভারতধর্ম, আর্থ মিশন, ভোলাগিরি, যে কোনো একটায় ভিড়ে যাও ; গীতা, উপনিষৎ, ভাগবত, চণ্ডী, ভজন, কীর্তন, জয়ন্তী, মচ্ছব, অর্থাৎ ধর্মের তুফান বয়ে যাচ্ছে। পলিটিক্‌স্ করবে? এমন শ্রীক্ষেত্র ভূভারতে নেই—এ্যানাকিস্ট, যুগান্তর, অহুশীলন, প্রো-চেঞ্জার, নো-চেঞ্জার ; wheels and wheels ; wheels within wheels ; মত বদলাতে বদলাতেই জীবন শেষ করে দিতে পার। আর যদি নরকে যেতে চাও জন্ম-জন্মান্তর সাঁতার কেটে চলা—broad is the way of sin here, very broad indeed, গড়ের মাঠের মতো প্রশস্ত।...মোট কথা, কলকাতায় হাঁপ ছাড়বার সময় নেই ; জীবনের প্রবল ঝড়, সাইক্লোনের মতো দিশাহীন ; মরবার পর্যন্ত ফুরসত নেই। স্মৃতরাং মৃত্যু যখন আসবে টেরও পাবে না—হঠাৎ একদিন চোখ খুলে দেখবে কলকাতা আর নেই, অত্র একটা সহর, দিল্লী...বোম্বাই...নিউইয়র্ক...শিকাগো...প্যারিস...লণ্ডন...আবার ঝড়ো হাওয়া, উদ্যম গতি, ঘরঘর...ঘরঘর...ঘরঘর...। তা নয়, রাঁচী! চূপ করে বসে থাক, হাই তোলো, সিগারেট ফোকো...stuff and nonsense ! কলকাতার বাইরে মারুখ আসে? কী আছে? মাটি, পাপর, গাছ আর মোরোন (moron)।

: তুই যে বিবাট এক বক্তৃতা দিয়ে ফেললি !

: একটা প্রবন্ধ লিখেছিলুম। তার থেকে—

ঝড়ের বেগে ক্ষেপু বেরিয়ে গেলো। ডালমুট-কাঠিভাজা এবং লঙ্কার জের নিশ্চয়। পালসেটিলা-৩০ শক্তি।

কলকাতা ঝড়ই বটে, সদাপ্রমত্ত ; প্রাসাদ, রাজপথ, ট্রাম-বাস, আলো-আঁধার, কলরব। রাঁচীতে পাহাড়, জঙ্গল, নীরবতা, আঁধারের স্নিগ্ধ-পরশ, যেন একটি তপোবন। আকাশে নীল গভীরতা, দিক্‌চক্রবালের চিরন্তন ইশারা, আকাশের গায়ে পাহাড়ের শ্রামল রেখা, মুরাবাদি পাহাড়ের প্রশান্ত শিখর ; মাঠের মাঝখানে একটি গাছ...বৃক্ষ ইব স্তম্ভো দিবি তিষ্ঠত্যেকঃ! দৃষ্টি এখানে ব্যাহত হয় না, চিত্তের প্রসার কোথাও স্তব্ধ হয় না ; ধ্যায়তীব পৃথিবী, ধ্যায়ন্তীব পর্বতাঃ, ধ্যায়তীবাস্তরীক্ষঃ, ধ্যায়তীব জ্যোঃ ; পৃথিবী, পর্বত, অন্তরীক্ষ, দ্বালোক, সকলেই

যেন ধ্যানস্থ—ছানোগ্য উপনিষদের তাৎপর্থে মগ্নিত শাস্ত্র এই পরিবেশ।  
দূর হ'তে ঘটাবধি ভেসে আসে... Alice Meynell ( এলিস্ মেয়নেল )-  
এর Flock of Bells :

Sudden the cold airs swing,  
Alone, aloud.  
A verse of bells takes wing  
And flies with the cloud.

চুটিয়ার বাবাজী মশায়ের মহাপ্রয়াণ ! ঠুঁর পদধূলিতে রাঁচী পবিত্র। ঠুঁর কথা  
শুনেছিলুম রাঁচীর এক ভদ্রলোকের কাছে, নাম 'মাষ্টারমশায়'। এককালে  
মাষ্টারি করতেন ; দু-দিনের আলাপেই মনে হয়েছিল অতি আপন জন,  
পরমাত্মীয়, বন্ধু ; সজ্জন, বিনয়ী, নম্র, মিষ্টভাষী ; পরমভক্ত ; সাধনভঞ্জন নিয়েই  
থাকেন। চুটিয়ার বাবাজী মশায়ের কাছে প্রায়ই যেতেন। বাবাজীর বাড়ী ছিল  
টিহাড়ি গাটোয়াল ; কৈশোরাবস্থায় রামায়ত বৈষ্ণব মহাত্মা বিদিত গিরির শিষ্য  
হয়ে সংসার ত্যাগ করেছেন। আগেকার শীলচর্চা ছিল অত্যন্ত কঠোর। তিনবার  
পদব্রজে ভারত প্রদক্ষিণ করেন ; শাস্ত্রাধ্যয়ন করেন যেখানে যে বিষয়ের বিশেষজ্ঞ  
আছেন তাঁর নিকট—তন্ত্রশাস্ত্র ঢাকাতে ; ব্যাকরণ, সাংখ্য, বেদান্ত কাশীতে ;  
Hindu Law ( হিন্দু ল ) কলকাতায়। নব্যতায় পড়েন নবদ্বীপের '—রী'  
পণ্ডিতের কাছে, আগেকার গুরুকুলের ছাত্রদের মতো ; সকালে পাঠ নিয়ে গুরু  
চরিতে যেতেন ; দুপুরে 'পাঠ'কে ভিত্তি করে চুল-চেরা বিচার ; আহার ও  
বিশ্রামের পর পুনরায় গোচারণ ; রাত্রিতে পূজা, পাঠ, ভজন। '—রী' পণ্ডিতের  
ছিল পানদোষ ; মাত্রাধিক্যবশতঃ একদিন বলে ফেলেন, 'তোমার রামজী-ও কারণ  
পান করতেন'। উপাস্ত্রের নিন্দা যে মুখ থেকে বেরিয়েছে সে মুখ থেকে আর  
পাঠ নেওয়া চলে না। পরদিন পণ্ডিতজীকে প্রণাম করে, আশীর্বাদ চেয়ে, বিদায়  
লেন।...চুটিয়াতে শ্রীরামচন্দ্রের মন্দিরসংলগ্ন একটা চালাঘরে ( lean-to shed )  
থাকতেন। নিজের হাতে বাগান করতেন, ফলমূল বিলোতেন। পরিধানে  
কোপীন ও বহির্বাস, গায়ে একটি চাদর, শয্যা মেজ্জেতে কবল বিছিয়ে ; আহার  
একবেলা, বটুয়াতে ডাল-ভাত একটু করে নিতেন। বাইরেতে কঠোর বৈরাগী ;  
অন্তরে প্রেমকণ্ঠ। বিহারের এক রাজা এসেছিলেন রাঁচীতে, বাবাজীর খ্যাতি

শুনে ম্যানেজারের মারফত গাড়ী পাঠিয়ে দিলেন ; বাবাজী উত্তর পাঠালেন, ‘সাধু রাজদর্শনে যায় না, ইচ্ছা হলে রাজা সাধুদর্শনে আসতে পারেন’। হিন্দুধর্মের একজন বিখ্যাত সন্ন্যাসী প্রচারক এসেছিলেন বাবাজীকে দর্শন করতে, অভ্যর্থনা পেলেন দু-টাকা প্রণামী সহ। প্রচারক মহাশয় কুণ্ঠিত হয়ে বলেন, মাপ করবেন ; আমি এসেছি আপনার পদধূলি নিতে—; বাবাজী উত্তর করেন, ‘সাধুসন্ত এই আশ্রমে এলে আমার কর্তব্য প্রাচীন রীতির সম্মান করা, প্রণামী দিয়ে অভ্যর্থনা করা।’...আধুনিক গৈরিকধারীদের তিনি বরদাস্ত করতে পারতেন না। মাষ্টারমশায় একদিন একটি ‘মডার্ন’ ব্রহ্মচারীকে নিয়ে আশ্রমে গিয়েছিলেন ; আড়ালে ডেকে মাষ্টারমশায়কে বলেন, ‘কাকে সঙ্গে এনেছ, মাষ্টার বাবু ? বলে দাও আজকে দেখা হবে না।’...একদিন আক্ষেপ করছিলেন, ‘সন্ন্যাসের প্রাচীন আদর্শ নষ্ট হয়ে যাচ্ছে ; স্বাধ্যায়, তপস্য়া, নিষ্ঠা, বৈরাগ্য, সব জলাঞ্জলি দিয়ে নিয়ে আছে শুধু প্রচার ও মিথ্যাচার ; সবই রামজীর ইচ্ছা মাষ্টার বাবু, সবই রামজীর ইচ্ছা’। দেহ রাখবার তিন-চার দিন আগে মাষ্টারমশায় দেখা করতে গিয়েছিলেন। দেখে বললেন, ‘কে ? ঠিক চিনতে পারছি না। ক-দিন যাবৎ চোখ যেন ঝাপসা হয়ে আসছে...ও, মাষ্টারবাবু !...আশীর্বাদ করছি, পরমার্থ লাভ হ’ক ; চললুম এবারে’।

: কী যে বলেন !

: ঠিকই বলছি মাষ্টারবাবু।

: এই অন্তরে একা পড়ে আছেন !

: একা তো নয়। এতোদিন রামজীর ছুয়ারে...এবারে ডেকে নিচ্ছেন...

মাষ্টারমশায়ের সঙ্গে এই শেষ দেখা। তিনদিন পরেই বাবাজী দেহত্যাগ করেন। আমি জিজ্ঞেস করেছিলুম বাবাজীর কোনও অলৌকিক শক্তি দেখেছেন কি না। মাষ্টারমশায় জবাব দেন, কৈ—নাতো। একটু ভেবে আবার বলেন, শক্তি ছিল না ঠিক বলা যায় না। শক্তি ছিল শুনে আমি একটু দমে গেলুম ; প্রশ্ন করি, কিরকম শক্তি ?

: An abiding influence, চিরন্তন প্রভাব।

: কি জাতীয় প্রভাব ?

: স্নিগ্ধ, পুত, শাস্ত ; তাঁর স্মরণে গঙ্গানানের ফল হয়।

॥ ৮ ॥

ব্রহ্মযোনি পাহাড়ের ৩৫০ + ৩৫০টি ধাপ ওঠা-নাকা করে বেশ পরিশ্রান্ত হয়েছি। পুনরায় চলি বিষ্ণুপাদ-দর্শনে। রামশীলা, সীতাতীর্থ, প্রেতশীলা, বুদ্ধগয়া...অনেক কিছু বাকী; দেখা যাবে ধীরে-আস্তে। অক্ষয়বটকে প্রণাম করি; মহর্ষি গোতম ষাট হাজার বছর এই বটতলায় বসে শিবের আরাধনা করেছিলেন। গয়াস্বরের তপস্শার ফল ‘বিষ্ণুপাদ’; দর্শন ক’রে ফল্লুর ধারে বসি। হাঁটা-হাঁটিতে ক্ষেপুর শরীর ঠিক হয়ে গেছে, পেঁড়া-প্রসাদ ও জল খেয়ে স্বস্তির নিঃশ্বাস ফেলে প্রশ্ন করে, ‘আচ্ছা দয়ালদা, তুমি তো বিষ্ণুপাদ দর্শন করে খুব কঁাদলে, কিন্তু গয়াস্বরের গল্লটা পাণ্ডাদের বানানো নয় তো? সবটাই কি সত্য?’ দয়ালদা রামশীলা পাহাড়ের দিকে তাকিয়ে আছেন; দৃষ্টি স্থির, মুখ ভাবগম্ভীর। খানিকক্ষণ পর বলেন, ‘সত্য কি মিথ্যা সেটা অবাস্তব প্রশ্ন ভক্তের কাছে। ভাবময় জগৎ, ভাব দিয়ে আমরা নিজের নিজের জগৎ রচনা করি। কি জাতীয় মন নিয়ে তীর্থ দর্শন করতে হয় তার চিরন্তন দৃষ্টান্ত রেখে গিয়েছেন মহাপ্রভু—যেখানে যেখানে গিয়েছেন, যে সব তীর্থ দর্শন করেছেন, সেই সেই স্থানের মাহাত্ম্য ও দিব্যভাব প্রকট হয়েছে তাঁর চিন্তে। গয়া সহরে মশা-মাছি, ধূলা-বালি যদি চিত্ত অধিকার করে থাকে, তবে তার বেশী আর কিছু লাভ হয় না; আর যদি মহাপ্রভুর পথে চল তবে হৃদয় হবে ভাববৃন্দাবন। রাস্তায় ধূলা আছে, কিন্তু কার পায়ের ধূলা? যুগের পর যুগ কোটি কোটি মানব এই রাস্তা দিয়ে চলেছে বিষ্ণুপাদে তাঁদের হৃদয়ের অর্ঘ্য নিবেদন করতে; কতো দুঃখ, কতো বেদনার প্রবাহ গেছে এই পথ দিয়ে—মা-হারা ছেলে, পতিহীনা স্ত্রী, সন্তান-হারা জননী, সর্ব-হারা কাঙাল, সকলেই বিষ্ণুপাদে প্রার্থনা জানাচ্ছে, ‘হে বিষ্ণু, হে গদাধর হরি! হে জগন্নাথ! হে বিশ্বস্তর! হে ত্রিতাপহারি! অসংখ্য বৃশ্চিকদংশনের জ্বালা আর সইতে পারি না; শান্তি দাও, তোমার চরণে স্থান দাও।’ মিশে যাও এই জনসমুদ্রে; দেখবে—জগন্নাথের রথযাত্রা, অনাদি, অবিরাম, অনন্ত; দেখবে জনগণের বেদনা-অর্ঘ্যে বিষ্ণুপাদ সঞ্জীবিত, বিষ্ণুর কল্পাফল উচ্ছলিত। মহামানবের পদধূলিতে স্নান করে যে পবিত্র হয় তার চিন্তেই বেজে ওঠে প্রেমগঙ্গার কুলুকুলুনা। প্রণাম করো এই পথকে; এগিয়ে চলো বিষ্ণুপাদের দিকে...ঐ দেখো নেবে আসছে সন্ধ্যার পূতলগ্ন; মন্দিরে মন্দিরে বাজে মঙ্গল আরতি; আকাশ-বাতাস ধূপধূনের সৌরভে সুরভিত...জপ করো, ওঁ বিষ্ণু: ওঁ বিষ্ণু: ওঁ বিষ্ণু:, ওঁ তদ্বিষ্ণো: পরমং পদং সদা পশ্যন্তি সুরয়ঃ, দিবীং চক্ষুরাততম্...

জগন্নাথের রথযাত্রা ! বিশ্বমানবের, গ্রহনক্ষত্রের, মহাকালে পরিচংক্রমণ !...  
রথচক্রের নির্মম ঘর্ষের ধ্বনি শুনে, মানবহৃদয়ের অগণিত ক্ষতক্ষত শোণিতপ্রবাহ  
দেখে, আত্ননাদ করেছিলেন শেলী (Shelley)—

‘Then what is life ?’ I cried.

হয় তো সহস্রশীর্ষ এক বিরাট পুরুষ এই রথে সমাসীন, তাঁরই ক্রুশ-বিন্ধ আত্মা  
প্রতিজীব্যে চিরন্তন তপস্যায় রত । কিন্তু ক্রন্দসীর দুঃখবরষা কি কোনদিনই  
থামবে না ? সর্বং দুঃখং দুঃখম্—কেন ? এই প্রশ্নের জবাব পেয়েছিলেন  
বুদ্ধদেব মহাতীর্থ গয়াধামে...রাজার ছেলে, স্নেহে লালিত, সম্ভোগে পালিত ;  
কিন্তু মানবের অন্তহীন কান্নার ঢেউ এসে পৌঁছয় সেখানে, পারঙ্গমতার সন্ধানে  
বোধিক্ষম্মূলে তলিয়ে যান মহা সম্বোধিসমুদ্রে...উর্ধ্বে নক্ষত্রখচিত অপার সমুদ্র,  
ভুলোকে গয়াস্রের বক্ষে বিষ্ণুপাদ, নিম্নে যুগযুগান্তব্যাপী তপশ্চর্যার পলিমাটি  
স্তরে স্তরে নেবে যায় স্তব্ধ এক মণিদীপ্ত গভীরে...সন্তজন তপস্যায় ভাস্বর ;  
গভীরনাথ ধ্যানস্থ ; মহাপ্রভুর দীপ্ত প্রেমকান্তি ; অমিতাভের করুণায় ত্রিভুবন  
পরিতৃপ্ত...ইতিপি সো ভগবা অরহং সম্মাসম্বুদ্ধো বিজ্ঞাচরণসম্পন্নো স্মৃগতো  
লোকবিদু অহুত্তরো পুরিসদম্মসারথী সখা দেবমহুস্মানং বুদ্ধো ভগবাতি...প্রণাম  
করি সেই জ্যোতির্ময় পুরুষকে যিনি ভগবান্, অর্হং, সম্যকসম্বুদ্ধ, বিদ্যা ও  
আচার সম্পন্ন, স্মৃগত, লোকবিদু, অহুত্তর, পুরুষদমনকারী, সারথী, দেবমহুস্মা-  
গণের শাস্তা, বুদ্ধ, এবং ভগবান্...ইহামুত্র শরণ প্রার্থনা করি সেই পরম  
কারণিক অমিতবুদ্ধের—

বুদ্ধং জীবিত-পরিয়ন্তং সরণং গচ্ছামি ।

॥ ৯ ॥

এই সেই বুদ্ধগয়া ! ভারতীয় তপশ্চর্যার পুণ্যময় বেদী ! এই সেই বোধিক্ষম্ম !  
যার মূলে আসন পেতে বসেছিলেন গৌতম ‘ইহাসনে শুভ্যতু মে শরীরম্’  
এই প্রতিজ্ঞা নিয়ে !

সখা স্ত্রনীলায়ত নেত্রহারী কন্তমুখারা নিপাতেন সিঞ্চং ।

পূজেমি তং সন্তদীনানি বোধিরাজং বিরাজং সিরসা নমামি ॥

শান্তা বুদ্ধদেব শুনীল-আয়ত-নেত্র-নিঃশৃত কান্তিরূপ জলধারায় যে বোধিরাজকে সাতদিন আরাধনা করেছিলেন আমি তাঁর বন্দনা করি ।

মূলে দুমিন্দসু নিসজ্জ যসু ধীরো সুবোধি চতুসচ্চমগ্গং ।

মারং জিনিহ্বা সমারং মুনিন্দো তম্পাদপিন্দং সিরসা নমামি ॥

যে তরুরাজের মূলে আসীন হয়ে মুনীজ্জ বুদ্ধ সাহুচর মারকে পরাভূত করে চতুরার্য্যসত্য অবগত হয়েছিলেন অবনতমস্তকে আমি তাঁর বন্দনা করি ।

ইতিপি সো ভগবা অরহং সম্মাসম্বুদ্ধো বিজ্জাচরণসম্পন্নো সুগতো লোকবিদু  
অমুত্তরো পুরিসদম্মসারথী সখা দেবমহুস্সানং বুদ্ধো ভগবাতি

বুদ্ধং জীবিত-পরিয়ন্তং সরণং গচ্ছামি ।

সম্যক্-সম্বুদ্ধ অমুত্তরগতিপ্রাপ্ত ভগবান্ সুগতের শরণার্থী ।

স্বাক্ষাতো ভগবতা ধম্মো, সন্দিট্ঠিকো, অকালিকো, এহিপস্সিকো,  
ওপনায়িকো, পচ্চত্তং বেদিতব্বে বিঞ্ঞুহীতি ।

ধম্মং জীবিত-পরিয়ন্তং সরণং গচ্ছামি ॥

ভগবান্ বুদ্ধপ্রচারিত সদ্ধর্ম সুচারুরূপে ব্যাখ্যাত, স্বসংবেত্ত, আশু ফলদানে সমর্থ,  
বিচারসহ গ্রহণীয়, নির্বাণপ্রাপক, এবং বিজ্ঞপুরুষ কর্তৃক প্রত্যক্ষতঃ জ্ঞাতব্য ; সেই  
ধর্মের আমি শরণার্থী ।

সুপটিপন্নো ভগবতো সাবকসজ্জো, উজ্জপটিপন্নো,

ঞায়পটিপন্নো, সমীচিপটিপন্নো

সজ্জং জীবিত-পরিয়ন্তং সরণং গচ্ছামি ॥

সন্মার্গে, ঋজু অষ্টাঙ্গমার্গে, বিচারনিষ্ঠ ও অত্যাশ্রম পথে ভগবান্ বুদ্ধের শ্রাবক সজ্জ,  
সুপ্রতিষ্ঠিত ; আমি সেই সজ্জের শরণাপন্ন ।

পাণাতিপাতা বেরমণী সিক্খাপদং সমাদিয়ামি । ১ ।

অদিম্মাদানা বেরমণী সিক্খাপদং সমাদিয়ামি । ২ ।

কামেসু মিচ্ছাচারো বেরমণী সিক্খাপদং সমাদিয়ামি । ৩ ।

মুসাবাদা বেরমণী সিক্খাপদং সমাদিয়ামি । ৪ ।

সুরা মেয়েষ-মজ্জ-পমাদট্ঠানা বেরমণী সিক্খাপদং সমাদিয়ামি । ৫ ।



প্রাণিহত্যা ( অহিংসা ), স্তেয়, মিথ্যাচার, মিথ্যাভাষণ, ও সুরাদিসেবন রূপ  
প্রমাদকারণ হতে বিরতি প্রার্থনা করে শিক্ষাপদ পঞ্চশীল চর্চা গ্রহণ করি।  
প্রণাম কর—

বুদ্ধে সাক্ষর্যে বন্দে, ধ্যে পচেকসম্বুদ্ধে ।

সত্ত্ব চ সিরসা য়েব তিথা নিচ্চঃ নমাম্যহম্ ॥

করণাবতার বুদ্ধ...বুদ্ধে সাক্ষর্যে বন্দে...নমো তস্ম ভগবতো অরহতো সম্মা  
সম্বুদ্ধস্ম...

‘দয়ালদা তো ধ্যানে বসলেন ; চল, ঘুরে আসি,’ বলে ফেপু। একটু এগতেই  
ফেপু পেয়ে গেলো কলকাতার এক বন্ধু, ভিড়ে গেল তার সঙ্গে ; আমি  
পরিক্রমা করি...দীঘির বাঁধানো ঘাটে একজন সন্ন্যাসীর সঙ্গে দেখা হয়। সৌম্য  
মূর্তি, মনন-তীক্ষ্ণ চক্ষু ; বয়স পঞ্চাশের কোঠায়। শ্রিতবদনে প্রশ্ন করেন, কোথা  
থেকে এসেছি। জবাব দিই, কলকাতা থেকে।

: কদিন থাকবেন ?

: আর দু-এক দিন।

: গয়াধাম কেমন লাগছে ?

: মন্দ নয়।

: বুদ্ধ গয়া ?

: অতি মনোরম স্থান। বুদ্ধকরণায় ডুবে যেতে ইচ্ছা হয়।

: বৌদ্ধ ধর্মে অনুরাগ আছে ?

: তা ঠিক নেই হয় তো। নৈরাশ্র্যবাদ ভাল লাগে না।

: কেন ? নৈরাশ্র্যবাদে দোষ কী ?

: ‘আমি’কে বাদ দিই কি করে ? বিভীষিকা মনে হয়।

: ‘আমি’কে পাচ্ছেন কোথায় ?

: আমাদের সবকিছু ভাবনায়।

: যদি ভাবনাটা ছেড়ে দেন ?

: ছাড়বো কি করে ? ভাবনা নিয়েই তো জীবন।

: জীবন মানে তো বন্ধন ? ভাবনা না ছাড়লে মুক্ত হবেন কী ভাবে ?

: কে মুক্ত হবে ? আমি তো ? তা হ'লে 'আমি'কে ছাড়া যাচ্ছে কোথায় ?  
নৈরাশ্র্যবাদ-ই বা টেকে কী-করে ?

: টেকে ঠিকই। যে আত্মা নেই সেটি হচ্ছে পরমহংসদেবের ভাষায় 'কাঁচা আমি'। যিনি থাকেন তিনি হলেন 'পাকা আমি'।

: তবে নেই বলার সার্থকতা কোথায় ?

: প্রক্রিয়া হিসেবে সার্থক। 'কাঁচা আমি'কে আশ্রয় করেই আমাদের তৃষ্ণাত্মিকা সব ভাবনা, স্তবরাং বর্জনীয়। সকল বাদীই বলেন, বিষয় ভাবনা ত্যাগ করো, অহংকার বর্জন করো। বৌদ্ধদের সাধন-প্রক্রিয়াটি হচ্ছে মূলোচ্ছেদী। যে বৃক্ষকে আশ্রয় করে প্রপঞ্চ পত্র-পুষ্প-ফলে শোভিত সেটিকে যদি এক কোপে কেটে দেন ? অর্থাৎ বৃক্ষরূপী এই অহংটি নেই, এই ভাবনা যদি করেন ? গীতার ভাষায়, অশ্বখমেনং সুবিরুঢ়মূলম্ অসঙ্গশস্ত্রেণ দৃঢ়েন হিষ্টা, ততঃ পদং তং পরিমার্গিতব্যম্।

: বৃক্ষটি গেলে থাকবে কী ? অথবা থাকবে কে ?

: থাকবেন পরমাত্মা বা 'পাকা আমি'। তাঁকে ব্রহ্ম-ও বলতে পারেন, শূন্য-ও বলতে পারেন।

: কিন্তু বুদ্ধদেব 'আত্মা আছে কি না' বংসগোত্রের এই প্রশ্নের কোনো জবাব দেন নি, চুপ করে ছিলেন।

: দক্ষিণামূর্তিস্তোত্রেও তো আছে, মৌনব্যাখ্যাগ্রকটতপরব্রহ্মতত্ত্বম্। অনাত্মবাদ নিয়ে দার্শনিক বিতণ্ডা অনেকে করেন, কিন্তু আসলে ওটি প্রক্রিয়া, সুবিরুঢ়মূল অশ্বখ বৃক্ষকে ছেদন করবার কৌশল। বৃক্ষ-প্রচারিত ধর্মের নাম 'এহিপসু'কি', 'সন্দিষ্টকি'; এসো, দেখো; অভ্যাস দ্বারা নিজেকে উপলব্ধি করো। সব জোরটাই তিনি দিয়েছেন সাধনার ওপর।

: তার কলে কি বিলম্ব সৃষ্টি হয় নি ?

: হয়েছে। সেই বিলম্ব নাশ করেছেন ভগবান্ শঙ্কর। তিনি সব জোর দিয়েছেন সাধ্যবিচারের উপর। 'অহং ব্রহ্মস্মি' এই বিচারই সাধন লাভ একই। মূল তত্ত্বও এক।

: শূন্য এবং ব্রহ্ম একই বস্তু ?

: বৌদ্ধ সাধুরা এবিষয়ে একমত নন। কেউ কেউ বলেন, শূণ্য মানে প্রপঞ্চের অভাব, পাতঞ্জলের অসম্প্রজ্ঞাত সমাধির তুল্য, কিন্তু উদানপাটলিগামিয় বগ্গে বুদ্ধদেব নির্বাণ সম্বন্ধে বলেছেন, ‘হে ভিক্ষুগণ! এমন একটি অবস্থা আছে যেখানে পঞ্চভূত নেই; সর্ব শূণ্যতা নেই, চন্দ্র-সূর্য, ইহলোক-পরলোক নেই; যেখানে আসা যাওয়া স্থিতি-চ্যুতি জন্ম মৃত্যু নেই; এ অবস্থা অচল, অতল, অনন্ত’। ঠিক উপনিষদের ‘অশব্দম্ অস্পর্শম্ অরূপম্ অবায়ম্’ অথবা ‘ন তত্র সূর্যো ভাতি, ন চন্দ্রতারকম্’-এর মতো। ‘অবস্থা’ এবং ‘আছে’ এই দু-টি শব্দের ওপর জোর দিয়ে শূণ্যকে কেউ কেউ উপনিষদের ব্রহ্ম বলেন। : দুটো শব্দা ওঠে। প্রথমতঃ, বংসগোত্রের প্রশ্নে এমনি ইতি-সূচক জবাব দিলেন না কেন?

: পুঁথিতে আছে, ভুল বোঝাবার সম্ভাবনা ছিল। তা হলে ধরে নিতে হয়, উত্তর না দেওয়াই ছিল সহুত্তর।

: তা কি করে সম্ভব?

: মৌনের ইঙ্গিতে। অর্থাৎ আত্মা ‘অস্তি’ এবং ‘নাস্তি’র উদ্দেশ্যে; অস্তি-পন্থায়-ও নেই, নাস্তি-পন্থায়-ও নেই; আছেন মজ্জিম-পন্থায়। জাগতিক ঘট-পটাদি বস্তু অস্তিকোটিতে আর আকাশকুসুম নাস্তিকোটিতে<sup>১</sup>, আত্মা এতদুভয়বিলক্ষণ, বেদান্তের পরিভাষায় যাকে ‘পারমার্থিক সং’ বলা হয়েছে।

: তা হলে চতুষ্কোটিনির্মুক্ত তত্ত্বটি কী?

: একই তত্ত্ব। ক্ষেমা-প্রসেনজিৎ-সংবাদে সংযুক্তনিকায় গ্রন্থে একটি প্রশ্ন করা হয়েছিল। মৃত্যুর পর তথাগত (১) কি থাকেন, (২) অথবা থাকেন না, (৩) অথবা থাকেন-ও-থাকেন না, (৪) অথবা থাকেন-ও-থাকেন-না না? উত্তর, এর কোনটাই না। পরবর্তী কালে নাগার্জুন হয় তো এই সংবাদের ভিত্তিতে শূণ্যকে আখ্যা দিয়েছেন চতুষ্কোটিনির্মুক্ত ‘অস্তি’, ‘নাস্তি’, ‘অস্তি-নাস্তি’, এবং ‘ন অস্তি-নাস্তি’র বাইরে<sup>২</sup>। শ্রায়ে মারপ্যাচ, তাৎপর্য অবাঞ্ছনসো গোচরম।

(১) সত্তা সম্বন্ধে চতুষ্কোটির (আগে উষ্টব্য) কোনো কোটিই নির্দেশ করা যায় না এ জাতীয় মত হয় তো সর্বপ্রথম প্রকাশ করেন বুদ্ধদেবের সমসাময়িক সঞ্জয় আচার্য (দীঘনিকায় ২-৩২)।

(২) অস্তি, যথা প্রাপকিক বস্তু, ঘটপটাদি; নাস্তি, যথা আকাশকুসুম; অস্তি-নাস্তি, যথা ঋগ্নিক বস্তু; ন অস্তি-নাস্তি, যথা হৃৎপাবনা। এতদতিরিক্ত বস্তুই ব্রহ্ম বা অম্বোধের “তথতা” (“ব্রহ্মোৎপাদ শাস্ত্র”)।

: সন্দর্ভ যদি উপনিষদের তত্ত্বই হলো তবে ধর্মচক্রের অভিনবত্ব কোথায় ? এটাই আমার দ্বিতীয় শঙ্কা।

: অভিনবত্ব তত্ত্বের দিক থেকে নয়, ইতিহাসের দিক থেকে। সমাজের বিশেষ বিশেষ অবস্থায় বিশেষ বিশেষ ব্যবস্থা, প্রকাশভঙ্গি, অনুশাসন ইত্যাদির প্রয়োজন হয়। পরে প্রচারের সঙ্গে প্রচারকের ব্যক্তিগত বোঁক ও দুর্বলতা এসে পড়ে ; ক্রমে নানারকম ফাঁকড়া বেরয়, জঙ্ঘল ও কাঁটাগাছে অমিতাভের আভাও ঢাকা পড়ে যায়। তবে একটা ভাববার বিষয় আছে। বৌদ্ধধর্মের মর্মকথা উপনিষদাদি শাস্ত্রে এবং জীবন্তরূপে মুনিঋষি ও সাধুসন্তের সাধনায় ছিল বলেই সমগ্র ভারতে হিন্দুধর্মের পুনঃপ্রতিষ্ঠা সম্ভব হয়েছিল। বুদ্ধদেব প্রথমে তো আলার কালাম ও উদ্রক রামপুত্রের<sup>১</sup> কাছেই তত্ত্ব এবং যোগাভ্যাস শেখেন।

: কী শিখেছিলেন তার কোনো সঠিক বিবরণ কোথাও আছে ? না শিষ্যরা চেপে গিয়েছেন ?

: শিষ্যদের শ্রদ্ধাজড়িতায় সত্য অনেক সময় চাপা পড়ে ঠিকই। তবে যেটুকু বিবরণ আছে তা থেকে একটা অনুমান করা যায়। আলার কালাম এবং রামপুত্র উভয়েই সাংখ্যবাদী ছিলেন। আলারের নিকট শিখেছিলেন ধ্যান ; হয় তো সাংখ্যোক্ত মহত্ত্বের পৌঁছে থাকবেন—পাতঞ্জলের অশ্মিতা-সমাপত্তি, infinite consciousness ; আর উদ্রকের নিকট হয় তো সাংখ্যবিচার শিখেছিলেন ও বিবেকখ্যাতি লাভ করেছিলেন। বৌদ্ধ ধ্যান-পর্যায়ে এর উল্লেখ নেই, কিন্তু ‘অঙ্গুত্তরনিকায়ে’ সর্বাবস্থার দ্রষ্টা হয়ে থাকবার নির্দেশ আছে।

: সাংখ্যের বিবেকখ্যাতিই তত্ত্বজ্ঞান নয় ?

: বিবেক দ্বারা পুরুষ যে প্রকৃতি থেকে আলাদা এই জ্ঞান হয়, প্রকৃতির জড়ত্ব সিদ্ধ হয় কিন্তু অস্তিত্ব লোপ হয় না। সূত্রাং দ্বৈত থাকে বলে চরম মুক্তি এ-ও নয়। এ জটাই হয়তো পাতঞ্জলে বিবেকখ্যাতির পর অসম্প্রজ্ঞাত ‘ঈমাধি অভ্যাসের নির্দেশ আছে।

(১) আলারের নিকট ‘অকিঞ্চনায়তন’ এবং উদ্রকের নিকট ‘নৈবসংজ্ঞা নাসংজ্ঞায়তন’ (মজ্জিম-২৬)।

: অসম্প্রজ্ঞাতই কি শেষ অবস্থা ?

: বৈদান্তিকরা স্বীকার করেন না। তাঁরা বলেন, অসম্প্রজ্ঞাত সমাধি দ্বারা অভাব প্রত্যয় হয়, একদেশী বুদ্ধমতের শূন্যতা। অভাব প্রত্যয়ের পর 'অহং ব্রহ্মাস্মি' বিচার দ্বারা ব্রহ্মজ্ঞান লাভ করতে হয়। ব্রহ্মজ্ঞানই চরম অল্পভূতি। বুদ্ধদেব বোধি তরুমূলে হয়তো ব্রহ্মঅল্পভূতি লাভ করেছিলেন। নিশ্চয় করে অবশ্য বলা যায় না, তবে খুবই সম্ভব; অনেক সাধু এরূপ বলে থাকেন।

গাড়োয়ান তাগিদ দেয় ফেরবার জ্ঞা। উঠে পড়লুম। প্রণাম করে আশীর্বাদ প্রার্থনা করি। স্বামীজী বলেন, মহাপরিনির্বাণের সময় বুদ্ধদেব আনন্দকে আশীর্বাদ করেছিলেন—

এই ভবসাগরে নিজেই নিজের দ্বীপ, নিজেই নিজের আশ্রয়, অপর কোনো আশ্রয়ই নেই। যিনি অগ্নি সকল আশ্রয় ত্যাগ করে স্বীয় আত্মাকে দ্বীপের গ্রাঃ আশ্রয় করেন তিনিই অনাগামিত্ত্বরূপ নির্বাণ লাভ করেন।

ইহাই শ্রেষ্ঠ আশীর্বাদ।

সো করোহি দ্বীপমন্তনো, খিগ্নং বায়ম, পণ্ডিতো ভব। স্বাত্মদ্বীপের শরণ নিয়ে তপস্বী করে চলুন, পরমপদ লাভ করবেন।

দিব্ৰম্ অরিয়ভূমিঃ এহিসি।

দিব্য বুদ্ধভূমিতে জেগে উঠুন।

তীর্থবাসের দিকে চলছি। গাড়ীর গতি মন্থর; পড়ন্ত বেলার বিবল আলো; শ্রান্তি-বিধুর পূরবীরাগে পরিবেশ আচ্ছন্ন; দয়ালদা ভাবগভীর; ক্ষেপু অশ্রুকাतर; ঘোড়াটিও ঝিমিয়ে ঝিমিয়ে চলে...প্রত্যেক তীর্থেরই একটি বিশেষ ব্যঞ্জন আছে... অযোধ্যায় যেদিন পৌঁছই মাকে নিয়ে, সেদিন সহরে হরতাল ছিল; দোকানপাট বন্ধ, রাস্তা লোকবিরল, সর্বত্র বিমর্ষ নীরবতা। প্রথমে সরযুর ধারে ঘাই; মা স্নান করে আছিকে বসেন...সরযুর ক্লাস্ত, ব্যথিত গতি...দূরে কে ভজন গায় 'সরযু কে তীর'...গুমরে-ওঠা কান্না চিত্ত মথিত করে...শ্রীরামচন্দ্রের কান্না, সীতাদেবীর অবিরাম অশ্রুধারা...লক্ষ্মণবর্জনের মর্মস্পদ আত্ননাদ... 'রামায়ণ' চোখের জলের ঘনবরষা...অশ্রুদীপ তীরে চোখ ঝাপসা হয়ে ওঠে...বিশ্বমানবের পুঞ্জীভূত বেদনা কতো কাল ধরে বয়ে নিয়ে চলছে অশ্রুদীপ সরযু...কোন করুণাময়ের চরণতলে.

এই আত্মপ্রবাহের পরিসমাপ্তি ?...সেদিনই ফিরে চললুম ; গাড়ীর জন্ত স্টেশনে অপেক্ষা করছি...একজন যাত্রী গুনগুন করে গাইছেন—

রঘুপতি রাঘব রাজা রাম, পতিতপাবন সীতারাম ।

সীতা রাম জয় রাজা রাম, রাজা রাম জয় সীতারাম ॥

রাম নাম ভারি মিষ্টি ; দুটি বর্ণই অর্ধস্বর, liquid sound, যেমনি কোমল তেমনি মধুর ; রাম নাম যেন অশরীরী, body নেই ; হৃদয়ে ধারণ করলে রস হয়ে মিলিয়ে যায়...

রাম, রাম, রাম, রাম, রাম, রাম, রাম ।

রাম, রাম, রাম, রাম, রাম, রাম, রাম ॥

ভক্তটির মুখ আনন্দোজ্জ্বল, অশ্রুসিক্ত...

...বুদ্ধগয়ার পরিবেশে যে বেদনা তাতে রামায়ণের ব্যক্তিনিষ্ঠ কাতরতা নেই, জীবনের সম্পর্কজড়িত অশ্রু নেই। এখানকার বেদনা নৈব্যক্তিক, বিশ্বজনীন, অবাক্ত ; অশ্রু শুকিয়ে রূপায়িত হয়েছে আকাশ জোড়া ব্যথায়...সাঁঝের আঁধার নেবে আসে...কলকাতার কথা মনে হয়...প্রাচীন না হলেও বম্বাই সহরের মতো one-dimensional পটে আঁকা ছবি নয়। ছবি মুগ্ধ করে, কিন্তু তাতে না আছে ইতিহাসের গভীরতা, না আছে আত্মিক উর্ধ্ব-আসীনতা ; heights ও depths উভয়েরই অভাব। ওয়ালর ( Waller )-এর অন্ধকূটি ( dark-cell )। পাঁচশ' বছর পরে যখন ধ্বংসস্তূপ দেখা দেবে তখন হয়তো অধঃ এবং উর্ধ্ব জোনাকি জ্বলেবে...কলকাতা three-dimensional...পতিতপাবনী গঙ্গা, কালীঘাটের পাঠস্থান, দক্ষিণেশ্বরে মহাতপা শ্রীরামকৃষ্ণের তপোভূমি, অদূরে মহাপ্রভুর লীলাক্ষেত্র...সব কিছুই অন্তর লোকের স্বপ্ন জাগায়। আর ইতিহাসের পলিস্তর কী ঐশ্বর্যমণ্ডিত—রামমোহন, বিদ্যাসাগর, বিবেকানন্দ, বঙ্কিম, রবীন্দ্রনাথ, শ্রীঅরবিন্দ, ক্ষুদ্ররাম, কানাইলাল...কিন্তু গয়ার সঙ্গে তুলনা হয় না। চতুর্দিক নিস্তব্ধ...মাঝে মাঝে ঝিল্লিরব ওঠে, শুক্লতা আরও গভীর হয়...চেতনার শিকড়গুলো চলে বুদ্ধের করুণাচিত্তের সন্ধানে কালস্তরের স্তূপ অতলে...উর্ধ্বে তারার দেশকে পেরিয়ে অসীমতা চলে মহাবোমে প্রজ্ঞাপারমিতের অসীমতায়...

ভগবা ভগবা যুক্তো, ভগ্গং কিলেস বা হতো ।

ভগ্গং সংসারমুক্তারো, ভগবা নাম তে নমো ॥



ঠাকুরঘরের পবিত্রতা নেই, মন্দিরের মঙ্গলধ্বনি নেই, আচার্যের শুচিতা নেই, শীলচর্যার সৌরভ নেই, অস্ত্রধারীর আশীর্বাদ নেই...নাঃ, 'সে আমার নয়'...

একবার গোঁহাটী গিয়েছিলুম দিদির বাসায়। জামাইবাবু একজন পাণ্ডা ডেকে দিলেন, তাঁর সঙ্গে গেলুম কামাখ্যাদেবীর দর্শনে। ব্রহ্মপুত্রের কোলে শ্রামাধমান পাহাড়; উপরে মন্দির; নীচে সহর, বস্তি। পাণ্ডাজী অতীতের কাহিনী বলেন; চিত্ত আকৃষ্ট হয়, প্রসন্ন হয় না...কামান্ধ্র আবেশ...পৌরাণিক যুগের আবছায়া রাজ্য...মাথার উপর কালো মেঘের আঁধার...পিচ্ছিল রাস্তার সর্পিল গতি...সাপের পিঠ বেয়ে চলা...ফণিমনসার গাছ ছোবল মাথতে উদ্ভত...ঝোপে ঝোপে গা ঢাকা দিয়ে কালো কুহকিনী...ব্যাঙের গোড়ানি ভেসে আসে, সাপে ধরে থাকবে...একটা লতা নেবে এসেছে, কুষ্ঠ ব্যাধিতে রসপুষ্ট ডগাগুলো হাওয়াতে দোলে...সব কিছু রসে ঠুসঠুসে...মেঘের কালো গা ফুলে ঢোল; জলো হাওয়া; মাটি সঁতসঁতে...ব্যাঙের ছাতার ছড়াছড়ি...টি-টি-টি-টি, একটা পাখী উড়ে যায় সস্ত্রাসে...গা ছম্‌ছম্ করে...লাল জবাগুলো আগুনের মতো জ্বলছে...আবার ব্যাঙের গোড়ানি...হ্রীং ক্রীং বৃং রং তং—ভয়ের কঙ্কাল মূর্তি...ত্রীং ত্রীং হ্রুং—কুঠার হস্তে ক্রোধরূপী করাল দৈত্য...ত্রীং ব্রীং ফ্রীং, হিংসাবিষে মসীবর্ণ শাঁকচূর্মী জ্বিভ চাটে...ক্রীং ল্রীং হ্রীং, ফ্রীং করে ওঠা কামনার উগ্র ফণা...আদিম যুগের দুঃস্বপ্নগুলো মস্তকালে গা বাড়া দেয়—ডাইনসর, মেগথেরিয়ম, প্টেরডাক্টিল, satyr, gnome, জিন।

ভূতপ্রতাপিশাচরাক্ষসগণা যক্ষাশ্চ নাগাধিপাঃ ।

দৈত্যাদানবপুঞ্জবাশ্চ ডাকিণ্যঃ কুপিভাস্তকাঃ ॥

কড়কড়, কড়কড়, কড়কড়.....

‘এই যে মন্দির’ বলেন পাণ্ডাজী। প্রদক্ষিণ করে প্রণাম করি...ছলনাময়ী প্রকৃতি, রাক্ষসী, আত্মরী! কুলকুণ্ডলিনীকে জাগাতে চাই মন্ত্রশক্তির কুহকে, উৎক্ষিপ্ত হয় পচা ডোবার পাকে কবর দেওয়া আদিম জানোয়ার, মনোগহনের ডাকিনী-যোগিনী। আত্মবলীকরণের মোহান্বিতা, অট-সাজেশন (auto-suggestion)-এর বিড়ম্বনা।.....পাণ্ডাজী একদিন থেকে যেতে বলেন, দ্রষ্টব্য অনেক আছে, চাহিদা কিছুই নেই। লোকটি ভদ্র, মিষ্টভাষী। রসের হাঁড়িতে মাছি ঢোকে, বেরয় না, মরে।.....জোরে পা চালিয়ে বাড়া ফিরি ;



প্রার্থনা করি, ‘হে কামাখ্যা দেবী! কামাখ্যা কালিয় সাপের কবল থেকে মুক্তি দাও, কর্দমপ্রোথিত পশুগুলো যেন আর উষ্ম না হয়, তোমার মায়াজাল কেটে বেরিয়ে আসার সামর্থ্য দাও ;

মায়ানঙ্কবিকাররূপললনা বিন্দ্বর্ধচন্দ্রাঙ্গিকে ।

হুঁ-ফট্ কারময়ি ত্বমেব শরণং মন্ত্রাঙ্গিকে মাদৃশঃ ॥

.....পরমহংসদেব তান্ত্রিক সাধক ছিলেন, কিন্তু তান্ত্রিক মার্গের প্রচার করেন নি ; দিব্যদৃষ্টিতে দেখেছিলেন মারণ উচাটন ইত্যাদির দিন শেষ হয়ে গেছে । এককালে হয়তো বশীকরণাদি প্রক্রিয়ার প্রয়োজন ছিল, কিন্তু জ্ঞান-বিজ্ঞানের আলোকে যে তামস জন্তুগুলো পালিয়েছে তাদের আবার ডেকে আনা মূঢ়তা মাত্র । কামৈস্তৈস্তৈহৃতজ্ঞানা প্রপদ্যন্তে অত্য়দেবতাঃ—কামনার পূজ্ঞো, ঈশ্বরের নয় । শ্রীরামকৃষ্ণ তাই জোর দিয়েছেন ঈশ্বরানুরাগের উপর, মনে-প্রাণে চেয়েছেন শুদ্ধা ভক্তি, জাহ্নবী ধারার মতো চিন্তকে যে পবিত্র করে, এগিয়ে নিয়ে যায় শান্তরসের শাস্ত অসীমতায়...

পাদপ্রান্তে রাখ’ সেবকে,

শাস্তিসদন সাধনধন দেবদেব হে ॥

সর্বলোক-পরমশরণ, সকল-মোহ-কলুষহরণ,

দুঃখতাপবিঘ্নতরণ শোকশান্তিষ্মিত্তরণ,

এস’ এস’ শূন্য জীবনে ॥

: এখনও ঘুমও নি ?—জিজ্ঞেস করেন দয়ালদা ।

: না ।

: রাত হ’য়েছে । এগারটার ঘণ্টা অনেকক্ষণ প’ড়েছে ।

: ঘুমবার চেষ্টা করছি । ভগবানের নিকট প্রার্থনা করছিলুম, পাদপ্রান্তে রাখ সেবকে ।

: সেখানেই তো আছি ।

: সেখানেই আছি !

: পানী বিচ মীন পিয়াসী !

: বুঝি না কেন ?

: ধীরে ধীরে রে মনা, ধীরে সব কছু হোয়ে ।

এই ভারতের পুণ্যতীর্থে

মালী সঁীচে সৌ ঘড়া, ঋতু আএ ফল হোয় ॥

: কাওরাছি যে !

: বিরহের জালা তো এখনও বাকী।

: জলে পুড়ে যদি থাক হয়ে যাই ?

:                   করণা তোমার কোন্ পথ দিয়ে

                  কোথা নিয়ে যায় কাহারে ।

সহসা দেখিলু নয়ন মেলিয়ে

                  এনেছ তোমারি দুয়ারে ॥

ଦ୍ଵିତୀୟ ଅଧ୍ୟାୟ

ସକଳି ଗରଜ ଭେଜ

( କ )

କାଳୀସ୍ରୀତି



( ক )

## কালীঘাট

দেশের বাড়ীতে ঠাকুরঘরে মা কালীর একখানা ফ্রেমে-আঁটা ছবি ছিল—শ্মশানবাসী শিব ; শিবের বৃকে দিখসনা কালী...গলায় মুণ্ডমালা, কোমরে নরহস্তের কটিবন্ধ ; হাতে বর, অভয়, রক্তস্রাবী নরমুণ্ড এবং অসি । চোখে পড়ে শুধু অসি আর নরমুণ্ড । মায়ের এ-পাশে ও-পাশে তাঁথৈ নৃত্যে ডাকিনী ঘোগিনী ; মাটিতে মড়ার ছিন্ন মাথা, হাত, পা, ধড় ; শেয়াল একটা মুখ গলিয়ে দিয়েছে কবন্ধের নাড়ীভূঁড়িতে...শুকুনী চোখ খাচ্ছে...গৃধিনী পাজর ঠোকরাচ্ছে...গাছের ডালে দু-চারটা কাক ..অদূরে একটি ক্ষীণ জলরেখা, কুকুর জল খাচ্ছে । “মা ! তুই কি এই দৃশ্য দেখেই জিভ কেটেছিস্ ?”—বলতেন আমার মামাবাবু । ঠিক ভোলানাথ ছিলেন মামাবাবু ; মড়া পুড়িয়ে সিদ্ধহস্ত, নেমস্তরে পঞ্চাশটা রসগোল্লা খেয়েও অটুট স্বাস্থ্য । কালীভক্ত ; শবসাধনা-ও নাকি ছিল ; কচিং কখনও আসতেন । এলেই মা কালীর ছবিটির সামনে বসে সন্ধ্যা-পূজা সেরে কাল্যাপরাধক্ষমাপণ স্তোত্র ( শঙ্করের ) শেষ করতেন—

ত্বং কালী ত্বঞ্চ তারা ত্বমসি গিরিসুতা স্তুন্দরী ভৈরবী ত্বম্ ।

ত্বং দুর্গা ছিন্নমস্তা ত্বমসি চ ভুবনা ত্বঞ্চ লক্ষ্মীঃ শিবা ত্বম্ ॥

মাতঙ্গী ত্বঞ্চ ধূমা ত্বমসি চ বগলা মঙ্গলা হিঙ্গুলাখ্যা ।

ক্ষন্তব্যো মেহপরাধঃ প্রকটিতরদনে কামরূপে করালে ॥

তারপর শ্রামাসঙ্গীত—

যে হয় পাষাণের মেয়ে তার হৃদে কি দয়া থাকে ।

দয়াহীনা ন হলে কি লাখি মারে নাথের বৃকে ॥

দয়াময়ী নাম জগতে, দয়ার লেশ মা নাই তোমাতে ।

গলে পরে মুণ্ডমালা, পরের ছেলের মাথা কেটে ॥

মা মা ব'লে যত ডাকি, শুনেও মা তা শোন নাকি ।

প্রসাদ এমনি লাখি-থেকো, তবু কালী ব'লে ডাকে ॥

দিদিমা যেদিন মারা গেলেন আকুল হয়ে সেদিন গেয়েছিলেন—

ও মা ! কেমন মাতা কে জানে ।

মা ব'লে মা ডাকছি কত, বাজে না কি মা তোর প্রাণে ॥

পাষাণী পাষাণের মেয়ে, বারেক না মা দেখিস চেয়ে ।

পেঙ্গী নিয়ে ধেয়ে ধেয়ে বেড়াস মা তুই ঋশানে ॥

আমি মা ব'লে তো ডাকবো না আর, বাজে কিনা দেখি এবার ।

বাজে কিনা মা তোর প্রাণে, তোর প্রাণে, তোর প্রাণে ॥

...সত্যি কথা হচ্ছে 'বাজে না' ; আগেও বাজেনি, এখনও বাজে না । অবসর-প্রাপ্ত একজন হেডমাস্টারের সঙ্গে প্রায়ই গল্পগুজব হয় । চীন-জাপানের যুদ্ধ চলছে ; একদিন শুধান, 'আচ্ছা, বলুন তো দেবলবাবু ! মা করুণাময়ী, জগজ্জননী, সন্তানের মা ; তাঁর এই সর্বনাশা ক্ষুধা কেন ? রোজ শত শত সন্তানের রক্তপান করেও কি তৃপ্তি নেই ? ছেলে-থেকো মা ! এর মানেটা কি ?' সাশ্রময়নে কখনও বা বলতেন, 'মা ! তোর করালরূপ সংবরণ কর ; অসহ্য এই যন্ত্রণা ! রেহাই দে মা !' গদগদকণ্ঠে আবেদন জানাতেন—

মুক্ত কর মা মুক্তকেশী ।

ভবে যন্ত্রণা পাই দিবানিশি ॥

কালের হাতে সঁপে দিয়ে মা, তুলেছ কি রাজমহিষী ।

তার, কত দিনে কাটবে আমার এ দুরন্ত কালের ফাঁসি ॥

কিন্তু দুঃখ কাটে না ; যন্ত্রণা ঘনিয়ে আসে তীব্রতর করালতায় ।

এই করেছ ভালো, নিষ্ঠুর, এই করেছ ভালো ।

এমনি করে হৃদয়ে মোর তীব্র দহন জালো ॥

??...খটকা লাগে । তীব্র দহন যদি জলে, চীনঋশানের শবাসনে বসতে পারি না । দহনও নেই, তীব্রতাও নেই । আছে তামস দুঃখবিলাস, অলস ভাবালুতা, —যা মা-কালীর ছবিতে খুঁজে পাই না । সাধারণ ছবি ; চার পয়সায় কেনা যায় ; কিন্তু আটের দিক থেকে উঁচুদরের প্রকাশ-ভঙ্গিমা—namby-pambyism-এর পরিবর্তে পাই তীব্র দহনের জ্বালা, রণক্ষেত্রের করালতা, সংহাররূপিণী ক্রুর ভীষণতা । অগ্নির সাতটি জিহ্বা—

কালী করালী চ মনোজবা চ সুলোহিতা যা চ সুধুম্বর্ণা ।

স্কুলিঙ্গিনী বিশ্বরূচী চ দেবী লেলাম্মান্না ইতি সপ্তজিহ্বাঃ ॥১০\*

যুদ্ধবিগ্রহ, মহামারী, রাষ্ট্রবিপ্লব, ইত্যাদি বিপদ্বয়ের মাধ্যমে সংসারকে ঋশানে পরিণত করে প্রকটিতবদনা কালীর সপ্তজিহ্বা...খটকাটা থেকে যায়...ছবি ছবি-ই ; আর্ট এজেন্সি উপভোগ্য যে বাস্তবের সঙ্গে সে দূরত্ব বজায় রেখে চলে । বায়স্কোপে

জঙ্গলের ছবি সোৎসুক নেত্রে দেখি, উৎফুল্লচিত্তে বাড়ী ফিরি, নিশ্চিন্তে ঘুমই।  
জঙ্গলে বাস করা যায় কি? ভীতিসঙ্কল অরণ্য শুধুই বিভীষিকা—আজ ছাগলটা,  
কাল গরুটা, পশু ছেলেটা, যদি জঙ্গলে অদৃশ্য হয় তবে ‘এই করেছ ভালো’ তো  
বলতে পারিই না, ‘কালী করালী’ও মুখে আসে না; ভয়ে, শোকে, শুধু অসহায়  
আর্তনাদ করি ..বাজে না কালীর প্রাণে...

\*

\*

\*

\*

সপ্তজিহ্বাই বটে। এবারে মহাযজ্ঞের অন্তর্ধানভূমি ইওরোপের রণাঙ্গন।...যদি  
আমাদের দেশে হতো? ভয়ে, শোকে, দুঃখে কাঠ হয়ে যেতুম; মা-কালীর ছবি  
দেখে চিত্ত কি রসে অমুবিদ্ধ হচ্ছে তার বিশ্লেষণ করা সম্ভব হতো না।...বাঁচা  
গেছে। ইওরোপের নরবলি কতটুকুই বা স্পর্শ করে আমাদের! অমৃতবাজারের  
পাতা উলটাই...আজকে পাঁচশ সাক...কালকে ছিল হাজার খানেক...লুক্‌ৎওয়ার্কে  
আরও একটা সহর ধ্বংস করেছে...ধ্বংসস্থল থেকে প্রায় তিনশ লোক টেনে বার  
করা গেছে...মৃত, অর্ধমৃত, কবন্ধপ্রায়; কারও বা চোখমুখের একধার উড়ে  
গেছে...যাবে না কেন?...আর এক পেয়লা চা দিসরে!...জাহাজ ডুবেছে আজ  
অনেকগুলো; লোকও মরেছে বিস্তর; বাঁচাবার চেষ্টা যে হয় নি তা নয়, কিন্তু  
হাওয়াই জাহাজ থেকে চলছিল অবিরাম গুলিবর্ষণ...বেশ জমেছে কিন্তু যুদ্ধটা...  
‘হিটলারে-ইংরেজে যুদ্ধ বেধে গেছে, নিত্য আসিতেছে খবর তার’...চায়ের আসর  
জমে ভাল। আমাদের আর কি? খবরের কাগজ পড়া, বাক্যবাণে শত্রুধ্বংস  
করা, সিনেমা দেখা...ভাল একটা ছবি এসেছে ‘মায়ামহলে’, রববার দিন বড্ড  
ভিড়, যাবো আর একদিন...আমরা আছি বেশ...মাথাও নেই, মাথাব্যথাও নেই।  
মাথা যাদের আছে মরুক তারা...মরবে না-ই বা কেন? কতো দিন থেকে মার  
চালিয়েছে আমাদের ওপর! অতিদর্পে হতা লঙ্কা...ক-বছর আর চলবে যুদ্ধ  
কে জানে! সোনা থাকলে মোটা লাভ করা যেতো...কতো লোক এই বাজারে  
লাল হয়ে গেল...বেশ ফাঁদে পড়েছে এবার...পড়বে না? পাপ কি কম  
জমেছে? প্রায়শ্চিত্ত করতে হবে না? The gods grind slow, but grind  
exceeding small...বাজার থেকে গলদা চিংড়ি এসেছে আজ...কি মারটাই না  
দিচ্ছে জার্মানরা! তুলো ধোনা করে ছেড়ে দিচ্ছে...ছেড়েই বা দিচ্ছে কোথায়?  
...Prisoners of War.....Concentration Camp...স্বদেশের বিরুদ্ধে  
প্রোপাগান্ডা পর্ষস্ত করিয়ে নিচ্ছে...খোদার মার যাকে বলে! The gods  
grind slow, but grind exceeding small...শ্রদ্ধানিবহনিধনে...

কোথায় দুঃখ ? সুখ-ই তো হচ্ছে।...কলেজে পড়বার সময় বিশ্বমানবের স্বপ্ন দেখতুম...Parliament of Man...Federation of the World...বুদ্ধদেবের বিশ্বমৈত্রী...বুকনিই সার ; স্বপ্নটাকে আজ খুঁজেও পাই না। মাহুঘের দুঃখ সর্বত্রই সমান ; কিন্তু চিত্ত সাড়া দেয় কৈ ? আবৃত্তি করি 'এই করেছ ভালো' ; লজ্জা হয় না তো ! মা-কালীর করালরূপের মনোজ্ঞ বিশ্লেষণ শুনি, আনন্দে তারিফ করে গাই—

এলো রণে ঐ গ্রামা বামা কে !  
কুস্তলবিগলিত শোণিত-শোভিত  
তড়িত-জড়িত নবঘনঝলকে ॥

কৈ, বুকে ঘা হয় না তো !...যাকগে মরুকগে, ছবিটা দেখে আসা যাক...

\*

\*

\*

\*

হুঁশ হলো যখন জিনিসপত্র আক্রা হতে লাগলো। দেশে গিয়েছিলুম ছুটি নিয়ে ; কিছুদিন থাকতে না থাকতেই চাল-ডালের দাম যেন আশুন...শেষে চালের মণ চল্লিশ টাকা...উর্ধ্ব্বাসে পালিয়ে এলুম...তারপর সব গেল গুলিয়ে...যা দেখলুম তা যে কোনো দিন দেখতে হবে স্বপ্নেও ভাবিনি...যে জগতের সঙ্গে পরিচয় ছিল ইন্দ্রজালের মতো সে উবে গেল...দিন নেই রাত নেই, আছে কেবল ক্ষুধা...মারাত্মক সর্বনাশা ক্ষুধা...কালান্তক বিশ্বগ্রাসী ক্ষুধা...অগ্নির সপ্ত জিহ্বা...ইওরোপে নয় ; কলকাতা সহরে, মা কালীর পীঠস্থানে, পীঠস্থানের বৃকের ওপরে...  
অন্ন দে গো, অন্ন দে গো, অন্ন দে গো, অন্নদে ।

জঠরের জালা আর সহে না তারা, কাতরা হইও না প্রসাদে ॥

'বি'বিট-ফুঁরি'। হাসি পায় ! লক্ষ লক্ষ সন্তান 'হা অন্ন', 'হা অন্ন' করে রাস্তায়, বাটে, মাঠে, পার্কে, এখানে, ওখানে, সেখানে। অন্নদা অন্ন দেন নি : অনাহারের ব্যাপক মহামারী...দু'শ নয়, চারশ নয়, লক্ষ লক্ষ লোক মরে গেল। অথচ গুদামে শত শত বস্তা চাঁল, হাজার হাজার মণ চাল...অন্ন দে গো, অন্ন দে গো, অন্ন দে গো, অন্নদে...কোথায় অন্ন ?...এতো মড়া ফেলে কে ? ...চাল আর এখন কেউ চায় না ; কে দেবে ?...কেন দে মা, কেন দে মা, কেন দে মা...কেনও শেষ হয়ে যায়...মড়ার কোলে মড়া জমে...দোতালার পাইপ দিয়ে নালিতে জল পড়ে ; পঙ্কপাল ছোটে সেদিকে দু-চারটা ভাতের দানার পিত্ত্যে...ডাক্তারবিনে কী পড়লো ? তাই নিয়ে মাহুঘ ও কুকুরে কাড়াকাড়ি...গুঁটকী ধরে



মরে আছে মা, বাচ্চাটা তার মাই চাটছে...এটা তো মরে নি এখনও ; মুম্বু, কাকে ধরেছে...চিলের ঠোঁট থেকে পড়ে একটা জিলিপি, ছেলেটা খপ করে ধরে, ছিনিয়ে নেয় ছেলেটার মা, তারপর খামচা-খামচি...লোকটা বোধ হয় কলেরায় মরেছে, ময়লার ভিতর দাঁত বের করে পড়ে আছে, মাছি ভ্যান্ ভ্যান্ করে চারদিকে ; চোখ দুটো নেই, কাকে খেয়ে থাকবে...দেশের নেতারা সব জেলে ; লেঠা চুকেছে।... মস্তব্য শুনি, কেড়ে খায় না কেন ? ছিনিয়ে, মাঝখর করে মরে না কেন?...কিন্তু সে-রাস্তায় তো চলিনি আমরা, গাঙ্গিজী তো তা শেখান নি...অহিংসা...ত্বয়া স্ববীকেশ...হঠাৎ হিংসায় নাবি কি করে?...

যতীন মুখুজ্যে প্রমুখ ষোদ্ধারা রণক্ষেত্রে মৃত্যুবরণ করেছেন ; সাঙ্ঘন্যার রাস্তা আছে, দেশের জ্ঞান প্রাণ দিয়েছেন—বীরের মৃত্যু। হিন্দু-মুশলমান দাঙ্গায় অনেকের জীবনান্ত হয়েছে ; ভাই-ভাই চিরদিনই মারামারি করে ; মৃত্যু আছে, কিন্তু মনুষ্যত্বও আছে—বিশেষতঃ আমাদের দেশে, যেখানে জুজুর ভয়েই সকলে মৃতপ্রায়। কিন্তু কালীঘাটের নরবলির কী অর্থ ? লাখে লাখে নর-নারী রাস্তার দুধারে মরে আছে...চতুর্দিকে ‘হা অন্ন’ রব, আর হোটেল চলে এন্টার মদ-মাংস, বিস্মৃতবসনা নটার নৃত্য ; কালোবাজারে অটেল টাকার ঝনঝনানি... সবই উলট-পালট হয়ে যায়...বন্ধু আমায় জিজ্ঞেস করেছিলেন, ছেলেটা যে মলো এর মানে কি?...কালীঘাটে যে নরবলি চলছে এর মানেটা কি?...কদিন থেকে যৌবনের একটি স্মৃতি ঊকি দিচ্ছে...বর্ষাকাল ; নৌকো ছাড়া যাতায়াত চলে না ; জেঠাইমাদের বাড়ী কে এলো যেন নৌকো করে...নিত্যকালী। জ্ঞাতিসম্পর্কে ভাইবি, ডাকনাম কালী ; সঙ্গে একটি শিশু ; সোয়ামী গাঁজা খায়, ঘরে চাল নেই, দুদিন উপোস করে বাপের বাড়ী চলে এসেছে। বাড়ীতে বাপ-মা নেই ; এক কাকীমা আছেন, তিনিই মাঝির পয়সা চুকিয়ে দিলেন।...কিন্তু কদিন খাওয়াবেন ? তাঁর সংসারও কোনোমতে চলে...ঝগড়া সুরু হয়...কেন এসেছিস এখানে মরতে ? মরবার আর জায়গা পেলি না ? কাল সকালে যদি তুই আমার ঘাড় থেকে না নাবিস, তবে ঝোঁটিয়ে দূর করে দেবো...সকালবেলা বেড়া কেটে দেখা গেল, ছেলেটাকে গলা টিপে মেরে কালী ফাঁসিকাঠে ঝুলছে... জিভ-বের-করা কালী মূর্তিট অনেকদিন পর্যন্ত হৃৎস্পন্দ হয়ে দেখা দিতো—my favourite nightmare।...ভুলে গিয়েছিলুম...কদিন যাবৎ আবার আসছে... দান্তে ( Dante ) নরক দেখেছিলেন, কিন্তু আমাদের নরক দেখেন নি ; দেখলে স্বর্গের স্বপ্ন জলে পুড়ে ছাই হয়ে যেতো...মরিতে চাহি না আমি সুন্দর ভুবনে,

এই সূর্যকরে, এই পুষ্পিত কাননে ? মানে হয় ?...ধরায় প্রাণের খেলা চিরতরঙ্গিত, বিরহ-মিলন কতো হাসি-অশ্রুময় ! পরিহাস নয় ?...গুলিয়ে যায় সব...মিথ্যার কারচুপি দিয়ে নিজেকে ঠকিয়ে এসেছি এতদিন ?...কোথায় 'শরৎ তোমার অরুণ আলোর অঞ্জলি' ? নর্দমার কালো পচা পুতিগন্ধময় শ্রাব, গলিত দেহের বীভৎস স্তূপ, ক্ষুধার্তের আর্ত হাহাকার !...‘নবনব রূপে এস প্রাণে’—মণিদার প্রিয় গান, স্বপ্নাতুর চিন্তে কতোবার শুনেছি, কিন্তু এই বিভীষিকার জন্ত কোনো দিনই তো প্রস্তুত ছিলাম না !...সীমার মাঝে অসীম তুমি বাজাও আপন সুর ? লীলা ? আমার চোখে যে মহা দুর্দৈব ! ভগবান্ লীলারস পান করুন, কিন্তু আমার দুর্ভোগ কেন ?...সেই দৃষ্টি নেই ? নেই যদি, তবে বীভৎসতা এসে আমাকে উপহাস করে কেন ?...মস্ত বড় এক বাবাজীর নাকি ‘বাণী’ বেরিয়েছে—নারায়ণ ভিক্ষার ঝুলি নিয়ে আজ দুয়ারে দুয়ারে মাথা ঠুকছেন ! ভারতবর্ষে তো নারায়ণ চিরকালটাই ঐ করে বেড়াচ্ছেন । ভিক্ষার ঝুলি নিয়ে কালী ভাইঝি তো ফাঁস দিয়ে মলো !...বাবাজী ক-মুঠো অন্ন দিয়েছেন ভিখিরী নারায়ণদের তা জানি না, কিন্তু আশ্রম ফণ্ডে লক্ষাধিক টাকা আছে !...হেঁদো কথা, আত্মপ্রবঞ্চনা...

আগুনের পরশমণি ছোঁয়াও প্রাণে ।

এজীবন পুণ্য করো দহন দানে ॥

মা-টা মরে গেছে, বাচ্চাটা মাই চাটছে...

তোমারি রাগিণী জীবনকুঞ্জে

বাজে যেন সদা বাজে গো...

হা-অরের পৈশাচিক আর্তনাদ, মৃতের গলিত দেহে মাছির ভ্যান্‌ভ্যানানি, তৃপ্ত কাকের ভরাট রব, উৎসবমত্ত কুকুরের কর্কশ কলধ্বনি...

কতো বর্ণে কতো গন্ধে কতো গানে কতো ছন্দে ।

অরুণ তোমার রূপের লীলায় জাগে হৃদয়পুর ॥

হোটেলের চোখ ঝলসানো আলো...মদ, মাংস, গান, নৃত্য...টেবিলের উপর জ্বিত বের করে কালী ছেলেটার গলা টিপছে...

কোন আলোকে প্রাণের প্রদীপ জালিয়ে তুমি ধরায় আস ! নর্দমার পচা থকথকে পুঁজরক্তের অবিরাম পানোৎসব—গৃহস্থের ঘরে, কালোবাজারে, হোটেল, প্রাসাদে, অলিগলিতে...লক্ষ লক্ষ কুমিকীট আকর্ষণ করে পান ‘এই বসুধার পাত্রখানি ভরি বারম্বার পুতিরক্তগন্ধময়’...

## ॥ ২ ॥

১২৪৩ সালের সঙ্গে একটা জগৎ-ই ধ্বংস হ'য়ে গেছে, আছে ভগ্নরূপ। তা-ও নেই। আগতামাশের স্বপ্নসৌধ এখনও সুন্দর; নারকীয় ক্রীড়াবিহার শুধুই গুহাকারজনক...যং কিঞ্চ জগত্যাং জগৎ, কিছুই থাকে না, ধরেও রাখা যায় না... পুরনো সুরগুলো খুঁজলে শুনেতে পাই কেঁউ কেঁউ...হুঙ্কা-হুয়া...কবিতা, সঙ্গীত, আদর্শ, অকুণ্ঠ প্রাণ, সবার উপরে মানুষ সত্য—vanity of vanities... বৈষ্ণবদর্শনের ভিত্তি রসশাস্ত্র, কিন্তু বীর ও বীভৎস রস বাদ দিয়ে। দেবাসুরের সংগ্রামকে বৈষ্ণবরা এড়িয়ে গেছেন, জীবনের বীভৎসতাকে অস্বীকার করেছেন; ফলে প্রাণের নির্ভীকতা এবং সত্যকে হজম করবার দুঃসাহস অর্জন করতে পারেন নি। সমুদ্রমস্থানে যে কালকূট ওঠে তাকে পান করবার শক্তি কোথায়? পথ চলতে রুখে দাঁড়ায় শুস্ত, নিশুস্ত, খর, দূষণ, কালীয় নাগ...এদের বধ করবার বীর্য কোথায়?...রবীন্দ্রনাথ বৈষ্ণবধারায় সঞ্জীবিত; বীররস, বীভৎসরস তাঁর চিত্তে সাড়া জাগায় নি। মহাকাব্যে সব রসের সমাবেশ এই জগৎ থাকার দরকার যে অন্তর্গত। জীবনকে সমগ্রভাবে দেখা সম্ভব হয় না। দেবাসুরের সংগ্রাম পাশ্চাত্য সাহিত্যে রূপ নিয়েছে ট্রাজিডি(Tragedy)তে মানুষের সঙ্গে অদৃষ্টের (Destiny) বা শয়তান (Satan, Evil)-এর দ্বন্দ্বাত্মক কথা-উপকথার মাধ্যমে। বৈষ্ণব তথা রবীন্দ্র-সাহিত্য শয়তানকে এড়িয়ে চলেছে; নব নব নয়নাভিরাম রূপ চেয়েছে—কিন্তু নারকীয় দৃশ্য? সুন্দরকে চেয়েছে গানে, গন্ধে—কিন্তু বীভৎসতা?...vanity of vanities, all is vanity... রবীন্দ্রনাথ ছিলেন একটা যুগ—ব্যক্তি নন। লুতাতস্তুর সস্তাও আজ সেখানে খুঁজে পাই না...ফুল ও মধুর প্রলোভনে এতদিন এগিয়েছি, হঠাৎ পাই কালকূট; ফুলের গায়ে সুকুমার বৃত্তির অল্পশীলন ছিল কাম্য, কিন্তু তাগিদ আসছে অসুরের সঙ্গে লড়াই করে অমৃতলাভের, হলাহল পান করে নীলকণ্ঠ হওয়ার। কৈ সেই বীর্যবন্তা? ভুল রাস্তা ধরে এখন আমরা নিঃস্ব, নিঃসহায়, দলিত, পিষ্ট, বিপর্যস্ত...

তাত্ত্বিক সাধক প্রেতনৃত্যে ভয় পান না, অহিবিষ পান করবার সামর্থ্য অর্জন করেন। শুনি; জানি না-তন্ত্রের ধারা-ও তো শুকিয়ে গেছে; কালীপূজাতে কুয়াণ্ড বলি দিই; উমা ঘরের মেয়ে, পরান পুতলী—

এবার আমার উমা এলে, আর উমা পাঠাব না।

বলে বলবে লোকে মন্দ, কারো কথা শুনব না।

কাল-ভৈরব পাগলা জামাই—

জামাই নাকি ঋশানবাসী গুনতে পাই ।

আমি ভেবে সারা বল না তারা, সত্যি নাকি শুধাই তাই ॥

মামাবাবুর কাছে অনেক ঋশাসঙ্গীত শুনেছি—এমন দিন কি হবে মা তারা, যবে তারা, তারা, তারা বলে দুনয়নে পড়বে ধারা ; ডুব দেবে মন কালী ব'লে ; তাই কালরূপ ভালবাসি, জগমোহিনী মা এলোকেশী ; বল মা তারা দাঁড়াই কোথা, আমার কেহ নাই শঙ্করী হেথা । কীর্তন নয়, তবে ঐ ধাঁচেরই—বৈষ্ণবের গা-ঘেঁষা, ভক্তিমূলক । রামপ্রসাদ কচিং কখনও অস্ত্র সুর ধরেছেন—

এবার কালী তোমায় খাব ।

তারা, গণ্ডযোগে জন্ম আমার,

গণ্ডযোগে জন্ম হলে সে হয় মা-থেকো ছেলে ;

এবার তুমি খাও কি আমি খাই মা,

দুটার একটা করে যাব ॥

ডাকিনী-যোগিনী দু-টা তরকারী বানিয়ে খাব ।

তোমার মুণ্ডমালা কেড়ে নিয়ে অবলে সন্ধ্যা দিব ॥

মা-ছেলের অভিমান, আবেদনের প্রচ্ছন্ন কোমলতা, যদিও ভাষায় কিঞ্চিৎ বীভৎসরসের আমেজ আছে । জীবনে যে পৈশাচিকতা চলছে তাকে হজম করবার ইঙ্গিত নেই ; রামপ্রসাদ বৈষ্ণব ভাবেরই প্রকারভেদ ! জহুমনি এক গণ্ডুয়ে গঙ্গা উদরস্থ করেছিলেন ; কিন্তু নর্দমার কালকূট ?...জীবনে যা কিছু সম্পদ আহরণ করেছিলুম সবটাই হিং টিং ছট্ হয়ে অদৃশ্য হয়েছে... পড়ে আছে কালীঘাটের হাড়-কাঠ, স্তূপীকৃত নরমুণ্ড ও কবন্ধ...ডাকিনীর ধড়গুলো বেদীর আগুনে বলসে নিয়ে হাড়গোড় শুদ্ধ চিবিয়ে খায়...পেঙ্গীর আগুনের চারদিকে নাচে...পিশাচগুলোর অট্টহাসিতে কালীঘাট শিউরে ওঠে...

॥ ৩ ॥

ছোটখাট একটা সাহিত্যের আসর ছিল ; অনিচ্ছাসত্ত্বেও গেলুম, বাধ্য হয়ে কিছু বলতেও হলো । ছেঁদো কথা আর মুখে আসে না, বিরক্তিতাই প্রকট করলুম...মাননীয় সভাপতি মহাশয় ইত্যাদি...কাব্যামৃত অগ্নাধিক পান করিনি এ বলা চলে না ; বাঙ্গালী মাত্রই করে থাকে । রসটা বরাবরই ফিকে লাগতো ; আজকের দিনে মনে হয়, ফিকে নয়—গোটাটাই ফাঁকি । সাহিত্যের

কী প্রয়োজন আমাদের জীবনে? সংসারে সুখ দুঃখ আছে; নেই বলবার জো নেই, কারণ তারা বাস্তব, ইন্দ্রিয়গ্রাহ্য, প্রমাণনিষ্ঠ। দম্ভশূল, পাবণ্ডসম্ভাষণ, কালোবাজারের কুমিকীট, চালে কাঁকর, আটায় প্রস্তরচূর্ণ, ঘুতে চর্বি, তেলে শিয়ালকাঁটার নির্ধাস ইত্যাদির প্রয়োজন কী তা বিচারসাপেক্ষ, কিন্তু এদের অস্তিত্ব সম্বন্ধে কোনো প্রশ্নই ওঠে না। অগুর উপাদানসম্বন্ধীয় যে জ্ঞান তাকে বিজ্ঞানসম্মত প্রমাণজ্ঞান বলা যায়, এবং এজাতীয় জ্ঞানের যে সার্থকতা আছে বিজ্ঞানের যুগে তা অস্বীকার করবার উপায় নেই। কিন্তু কাব্যাহুভূতির স্বরূপ কী? অনেকগুলো আনুভবিক প্রশ্ন এর সঙ্গে জড়িত। প্রথমতঃ, স্রষ্টার মৌলিক অনুভূতিকে ধরবার সামর্থ্য আমাদের নেই, হয় তো স্রষ্টারও নেই। চেতনা-প্রবাহে যে বুদ্ধ ক্ষণিকের জ্ঞান দেখা দিয়েছিল সে চিরদিনের জ্ঞান অদৃশ্য হয়ে গেছে; পরক্ষণে স্মৃতির কারচুপিতে যাকে ধরা হয় সেটি কিন্তু পূর্বক্ষণের বিলীন বুদ্ধ নয়। দ্বিতীয়তঃ, স্মৃতিনিষ্ঠ অনুভূতিটি স্রষ্টা ব্যক্তির নিজস্ব সম্পদ, কিন্তু রূপায়িত হয় সে সার্বজনীন কতকগুলো শব্দের ধ্বন্যাত্মক মাধ্যমে। ফলে, রূপস্রষ্টিতে স্বরূপগত কৃত্রিমতা একটু থেকেই যায়। তৃতীয়তঃ, শব্দের মাধ্যমে যখন ভিন্ন ভিন্ন ব্যক্তি সেই অনুভূতিকে উপলব্ধি করবার চেষ্টা করে তখন ব্যক্তিনিষ্ঠ সংস্কার, শিক্ষা ও দীক্ষার পার্থক্যবশতঃ প্রতিক্ষেত্রেই ভিন্ন ভিন্ন অনুভূতি প্রকট হয়। তারপর আছে মূলগত একটা শঙ্কা—স্রষ্টার প্রাথমিক অনুভূতিটি প্রমাণজ্ঞান জ্ঞান কিনা? ভগবান্ পতঞ্জলি বলবেন, ‘না; ওটি বিকল্পজ্ঞান মাত্র’। ‘শব্দজ্ঞানানুপাতী বস্তুশৃঙ্খা বিকল্পঃ’; মানে, বস্তু নেই অথচ শব্দের প্রভাবে যে আকাশকুসুমবৎ একপ্রকার মনোবৃত্তি হয়, কবিচিত্তের “অনুভূতি” (?) এই পর্যায়ভুক্ত। ক-সংজ্ঞক কবিগত আকাশকুসুমস্থানীয় এই ‘বিকল্প’ জ্ঞান যখন কথায় নিবদ্ধ হয় তখন সে খ-সংজ্ঞক আকাশ-কুসুমে পরিণত হয়। এই ‘খ’ আবার পাঠকবর্গের বিভিন্ন চিত্তে খ<sub>১</sub>, খ<sub>২</sub>, খ<sub>৩</sub>,... ইত্যাদি পরস্পর ভিন্ন আকাশকুসুমমালা সৃষ্টি করে; অথচ আমরা সকলেই বলে থাকি খ<sub>১</sub>, খ<sub>২</sub>, খ<sub>৩</sub>,... এবং ক ও খ পরস্পর সর্বতোভাবে সমান! Equal in all respects! হান্স ও করুণ রসের অধরী তামাক!

প্রয়োজনের কথা প্রথমেই উল্লেখ করেছি। প্রাচীন শাস্ত্রকারগণ বলেন, ‘প্রয়োজনমহুদ্ভিশ্চ ন মনোহপি প্রবর্ততে’; কী প্রয়োজন একথা না ভেবে মন্দমতিও কাছে প্রবৃত্ত হয় না। সাহিত্যসেবা দ্বারা কী প্রয়োজন সিদ্ধ হয়? আরিস্ততল্ রায় দিয়েছেন, সাহিত্য রচকের জ্ঞান সমাজজীবনে নৈতিক স্বাস্থ্য প্রতিষ্ঠিত

করে। নিজের দিকে তাকালে বা সাহিত্যিকদের জীবনী আলোচনা করলে এই যুক্তির অসারতা সহজেই ধরা যায়। রাসেল (Bertrand Russell) গাহেব বলেন, আধুনিক শিক্ষার সঙ্গে নৈতিকচরিত্রের কোনই সম্বন্ধ নেই; ধর্মনিষ্ঠ জীবন গড়ে তোলবার সমস্তা একটা সম্পূর্ণ আলাদা সমস্তা, এবং এর সমাধানও হয় সম্পূর্ণ আলাদা উপায়ে—বর্তমান শিক্ষার মাধ্যমে নয়। ডীন ইঞ্জ (Dean Inge) আরও জোরালো ভাষায় একবার বক্তৃতা দিয়েছিলেন, ‘খোঁয়াড়ে চুনকাম দেওয়া হচ্ছে, কিন্তু শূকরটি তেমনিই আছে’। তবে কি কাব্যামৃত থেকে আধ্যাত্মিক উন্নতি হয়? Spiritual value লাভ হয়? নৈতিক মানকে উন্নত করাই যেখানে অসম্ভব সেখানে আধ্যাত্মিকতার প্রশ্নই ওঠে না; অধিকন্তু ‘বিকল্প’ জ্ঞান দ্বারা অধ্যাত্মবিজ্ঞা অর্জন করা সম্ভব নয়। সৌন্দর্য্যভূতি? Aesthetic value? অসম্ভব নয়। পেইটর (Pater) প্রমুখ সৌন্দর্য্য-বিলাসীরা যে-জাতীয় aesthetic value লাভ করেছিলেন তাকে কণ্ঠ্যন স্নুথ বা sensationalism-এর উল্লেখ স্থান দেওয়া যায় না। আর যদি কণ্ঠ্যন-স্নুথই কাম্য হয়, তবে জাগ্রৎ রমণ ত্যাগ করে স্বপ্নদোষের জন্য উন্মুখ হয়ে থাকা মৃত্যু মাত্র। প্লাতো (Plato) বলেন, সাহিত্যরস আধ্যাত্মিক উন্নতির পরিপন্থী, এবং নৈতিক অবনতির পরিপোষক। তা সত্ত্বেও সোক্রেতেস্ (Socrates)-এর দৃষ্টান্ত উল্লেখ করে মন্তব্য করেছেন, ‘সাহিত্যরস হেয় এবং বর্জনীয় সন্দেহ নেই, কিন্তু আবাল্য ঐরসে পুষ্ট হয়ে এসেছি বলে তাম্রকূটাди সেবনের গায় ওটা বদ-অভ্যাসে দাঁড়িয়ে গেছে, ছাড়া যায় না’। আর একটা ভাববার কথা আছে। গ্রীস দেশে সোক্রেতেসের আমল পর্যন্ত শিবায়তনে শ্রদ্ধা ছিল; প্লাতো এই শ্রদ্ধার মর্যাদা রেখেছেন শিব (Good)-কে স্নন্দর (Beauty)-এর উপরে স্থান দিয়ে। পরবর্তীকালে অবিজ্ঞানস্নন্দর রাজপাট দখল করে নিয়েছেন শিবকে তাড়িয়ে। ইদানীং আমাদের দেশেও সেই ঝোঁকটা প্রবল হয়ে উঠছে; দৃষ্টান্ত তুলসীদাসজী ছিলেন ভক্ত, হয়েছেন কবি। শিবজী যে চট্ করে পরাজয় স্বীকার করে নেবেন তার লক্ষণ অবশ্য জাতীয় চেতনায় নেই। বুদ্ধ প্রমুখ শিবাবতারদের প্রভাব সর্বস্তরে অল্পপ্রতিষ্ঠ হয়ে আছে। অনেক কালের সংস্কার, মনের অন্তস্তল পর্যন্ত চলে গেছে তার শিকড়; ওপড়ানো সহজ নয়। অবিজ্ঞানস্নন্দরের আলো বড়জোর চন্দ্রাতপ; মুগ্ধ হই, কিন্তু ভুলি না যে কারবারটা ধার করা নকল বেসাত নিয়ে। অধিকন্তু অবিজ্ঞানশন শ্রামস্নন্দরের পূজো এখনও লোপ পায়নি। সখী চিত্রলেখা তাঁর

নাম রেখেছেন রসসিদ্ধ—বহুদূরে ; জ্যোতিষ্ক পেয়েছিলেন নীলকান্তমণি—দুর্লভ ; পুলস্ত্যের চোখে তিনি নয়নরঞ্জন—আছে নয়নের প্রদাহ ; চন্দ্রাবলীর মর্ম স্পর্শ করেছিলেন মোহনবংশীধারী—শুনি আর্ত হাহাকার ; রূপকারের দৃষ্টি পেয়েছিলেন বনের হরিণী ; বনমালীর হাতে বনকে সঁপে দিয়ে তিনি হয়েছিলেন বৃন্দাবনবাসী । কোথায় বনমালী ? কোথায় বৃন্দাবন ?...চিন্তে দেখি শুধু ঝোপ, ঝাড়, জঙ্গল ; বর্ষার জলে কতো আগাছা আর বিছুটি বনই না জন্মায় ! সাপ, বাঘ, কৈচো, কুমিতে ভরতি ...সাহিত্য এদের খোশগন্ধে মশগুল...বৃন্দাবনের মোড়ক লাগিয়ে ভাবি এই জঙ্গলই উদ্যান...বাস্তবের হাওয়া-বাতাস লাগতেই রংটা যায় চটে, আর বেরিয়ে আসে বাঘের জলন্ত চোখ, ভাল্লুকের মৃত্যু-আলিঙ্গন, সাপের ছোবল, বৃশ্চিকের দংশন...যে জঙ্গল ছিল সে জঙ্গলই আছে । কোথায় বৃন্দাবন ?...কোথায় বনমালী ?...

...তাস-পাশা খেলে আমরা সময় কাটাই, চিন্তাবিনোদন করি ; সাথী না জুটলে বই পড়ি, বায়স্কোপ দেখি । এটুকুই প্রয়োজন ; বাকীটা ধান্না-বাজি, যা দিয়ে পয়সা কামাই, বাহবা পাই, পরকে ঠকাই, নিজের ঠকি । ভাল লাগে না আর ...নেশা যাঁদের আছে, অসুখে পড়লে নেশাতে-ও সুখ পান না, অভ্যাস-দোষে সিগারেটটা ধরান, দু-চার টান দিয়ে ফেলে দেন—ধুন্তুর ছাই ! আমাদের দেখি অভ্যাস-দোষটাও কেটে গেছে, আছে শুধু ‘দূর-ছাই’ ।...কী আর এমন নেশা কাব্যের অম্বরী তামাক ? আরও জোরালো নেশার প্রয়োজন ।...মামাবাবুর কাছে এক ভৈরববাবার গল্প শুনেছিলুম—শ্মশানে থাকেন ; চিতায় মড়া চাপালে মাথার খুলিটা ত্রিশূল দিয়ে ফাটিয়ে তার ঘিটা আহারপাত্র নরকপালে ঢেলে নেন ও ভাতের সঙ্গে মেখে খান । মামাবাবু মস্তব্য করেন, ‘এমনি করেই নীলকণ্ঠ হতে হয় ; বুঝলি দেবু ? কিন্তু সে বড় শক্ত কথা হলো না ?’...শক্ত নয় : ভয়ঙ্কর, বীভৎস, ন্যাকারজনক...ছিন্নমস্তা !...অদ্ভুত কল্পনা...নিজের মুণ্ড কেটে রক্তপান ...কল্পনাই বা কি করে বলি ? ক্ষুদ্রিরাম, প্রফুল্ল চাকি ; বাঘা যতীন, সত্যেন বসু, কানাইলাল...শিবনাথ শাস্ত্রীকে জিজ্ঞেস করা হয়েছিল, “আপনি সত্যেনকে আশীর্বাদ করে এলেন, কানাইকে তো করলেন না ?” শাস্ত্রীমশায় জবাব দিয়েছিলেন, “কানাইকে আশীর্বাদ করবার যোগ্যতা অর্জন করতে হলে অনেক জন্ম তপস্বী দরকার”...ও-রাস্তায় তো যাই নি । সে সাহস কোথায় ?...মামুষ নয় এঁরা—দেবতা ।...১৯২১ সালে অসহযোগ আন্দোলনে যোগ দেবো ঠিক করেছিলুম । দয়ালদা বললেন—

: খুব ভাল কথা । দেশের জন্ত নিজেকে উৎসর্গ করবে—শুভ বাসনা, সংসংকল্প ;

সর্বান্তঃকরণে তোমাকে আশীর্বাদ করছি। মন্ত্রের সাধন কিংবা শরীর পাতন, এই প্রতিজ্ঞা নিয়ে ব্রতী হবে। কিন্তু...

: কিন্তু কি ?

: ছোটো কথা ভাববার আছে। প্রথমতঃ, সংসারের অবস্থা। অনেকটাই তোমার ওপর নির্ভর। তুমি পড়াশুনা ছেড়ে দিলে বাপ-মাকে পথে বসাবে।

: ঐ ভাবনা ভাবলে দেশমাতৃকার সেবা করা চলে ?

: তা মানি। কিন্তু বাস্তব সম্বন্ধে জাগ্রত না থাকলে পরে হৃদয়দৌর্বল্য আসতে পারে। সেটা বাঞ্ছনীয় নয়। শুধু জেলে যাওয়া, এবং জেল থেকে বাড়ী ফিরে আসা—এ-করে দেশের সত্যিকার সেবা হয় না ; শেষ রক্তবিন্দু দিয়ে সাধনার পথে এগিয়ে যেতে হবে যতোদিন সিঙ্কিলাভ না হয়। রামা-শ্রামা হয়ে লাভ কি ? কিন্তু মুখ্য কারণ এটা নয়।

: মুখ্য কারণটা কি ?

: সংস্কার। তোমার ঈশ্বরীয় সংস্কারটাই প্রবল, বা স্বধর্ম। পরধর্ম ভয়াবহ হতে পারে।

: ভয়াবহ কেন ?

: একটা জীবনই নষ্ট হয়ে যেতে পারে।

: ছোটো এক সঙ্গে চলে না ?

: সংস্কার-বিরোধী হলে চলে না। তোমার চলবে না। নিষেধ করছি না তোমাকে ; তবে আমার মত হচ্ছে, স্বধর্মকে আশ্রয় করে চলাই শ্রীকৃষ্ণ-দর্শিত পথ।

: কিন্তু দেশের সেবা—

: একাধিকভাবে সম্ভব। ভগবান্ ভিন্ন ভিন্ন লোককে ভিন্ন ভিন্ন সংস্কার দিয়েছেন, সেই সংস্কার নিয়ে চলাই ভগবৎ-সেবা। তাঁর সেবায় শুধু দেশ নয়,... বিশ্বের সেবা হয়। তস্মিন্ তুষ্টে জগৎ তুষ্টম্।...

...কোথায় সেই সংস্কার ? খুঁজে পাই না। নেতাদের মতো জেলে গেলে হতো, নিশ্চিন্তে থাকতুম। সে-ও ফাঁকি। বিবেক বলবে, ‘পালিয়ে আসলে কি হবে ? আমার দংশন থেকে নিস্তার নেই’।...রেহাই কি এখানেই পাচ্ছি ?...সন্ন্যাস নিলে হয় না ? চোখে ধুলো দেওয়া সার। নিজে খেটে এখন সংসার চালাচ্ছে ; গেক্সা নিলে আমি খাবো পরের ওপর আর সংসারের পাঁচজন খাবে ডার্টবিন থেকে।... সমস্তার সমাধান হয় না। আত্মহত্যা ? কালী ভাইঝি যেমন করেছিল ? ছেলেটা আর খিদেয় ট্যা ট্যা করে না ; কাকীমা দ্রুদ্র করে তাড়ান না ;



গেঁজেল সোয়ামী বুঁদ হয়ে আর পড়ে থাকে না...চাল-বাড়ন্তের লেঠা চিরদিনের মতো চুকে গেছে...নাঃ; জেলে যাওয়ার মতো-ই প্রচ্ছন্ন কাপুরুষতা। শাস্ত্রও বলে, মরা মানে ঘুমিয়ে পড়া, ঘুম ভাঙলে যথা পূর্বম্ তথা পরম্...প্রশ্নটা থেকেই যায়। কেন এই দুঃখ? এই বীভৎসতার মানে কি? এই সুন্দর ভুবনে কেন অসুন্দর? Why at all? বুঝি না।...দংশনটা বিবেকের; ভোগাদিতে মজে আছি বলেই বৃশ্চিকদংশন...ভোগের ইচ্ছাটাকে যদি উপড়ে ফেলা যায়? মুক্তির সন্ধান তো দেহধারণ করেই চালানো সম্ভব। তার রাস্তা বুদ্ধ-দর্শিত বাসনা-ত্যাগ। শাস্তি পাবো কিনা জানি না, কিন্তু বিবেকের পীড়ন থেকে হয় তো রেহাই পেতে পারি। প্রজ্ঞহাতি যদা কামান্—কিন্তু শিখে এসেছি ‘বৈরাগ্যসাধনে মুক্তি সে আমার নয়’। ত্যাগ করা যায় কি ভাবে? বৈরাগ্য এলে? বুদ্ধদেব একটি মড়া, একটি বৃদ্ধ, একটি রোগী দেখে সংসার ত্যাগ করলেন। আমি তো মৃত, মুমূর্ষু, রুগ্ন, আর্ত, ইত্যাদির পর্বতপ্রমাণ স্তূপ দেখেছি, কিন্তু বৈরাগ্য আসে না কেন? বড়জোর ঋশানবৈরাগ্য দেখা দেয়। তা নইলে দিনের পর দিন উদরপূর্তি করি কোন্ লজ্জায়? রুচি নেই? শুধু দেহধারণের জগ্ৰ? বাজে কথা। চা খাই...কাগজ পড়ি...বাজার করি...সাহেবকে সেলাম দিই...বিকলে চোঁয়াঢেকুর তুলে ময়দানে বেড়াই...লড়াইর খবর শুনি...এমন কি বায়স্কোপের ছবিও দেখি...কোথায় দুঃখবোধ? মনটা খারাপ হয়। ভোগোপকরণ আছে, বৃশ্চিক দংশন-ও আছে...রাস্তায় এতদিন পেয়েছি শুভ্র মেঘের রথ, নির্মল নীল পথ, ধৌত শ্রামল আলো-বালমল বন-গিরি-পর্বত...হঠাৎ দিশাহারার গ্রায় ঘুরপাক খাচ্ছি...সব রাস্তাই বন্ধ...জীবনের চারদিকে নেবে আসে আঁধারের দুর্লভ্য প্রাচীর...ঋশানের মড়া আগলে আগলে শ্রান্ত, ক্লান্ত, অবসন্ন রাজা হরিশ্চন্দ্র বলেছিলেন—

“আয় ঘুম! আয়!”

বিস্মরণের অমানিশায় যাক এই ছনিয়া ডুবে নিশিচ্ছ হয়ে!

আয় ঘুম! আয়!

( ৪ )

ওমর খৈয়ম বিশ্ববিধানকে ঢেলে সাজতে চেয়েছিলেন; পারেন নি। অগত্যা ডুব দিয়েছিলেন, এই বসুন্ধার যুক্তিকার পাত্রধানি ভরি বারম্বার। রামপ্রসাদ ডুব দিয়েছিলেন ‘ডুব দেরে মন কালী বলে হৃদিরত্নাকরের অগাধজলে’। রূপসাগরে ডুব

দিয়ে, দীপ্-দীপ্-দীপ্ জ্ঞানের বাতি জেলে, শ্রীরামকৃষ্ণ তলাতল পাতাল খুঁজে-  
ছিলেন, পেলেন হৃদয় মাঝে বৃন্দাবন। শেলী-ও রূপসাগরে ডুব দিয়েছিলেন, ময়লেন  
লবণ সমুদ্রে। রূপসাগরে দু-চার ডুব দিয়ে অরূপ-রতনের জায়গায় পেয়েছি  
ডাকিনী, প্রেতিনী, কবন্ধ...শেয়াল, কুকুর...বিশ্বতির অতল জলে ডুবে থাকাই  
ভাল। ছিলুমও।...১৯৪৫ সালে গান্ধিজীর একটা প্রার্থনা সভায় এক বন্ধু  
টেনে নিয়ে গিয়েছিল...সব কো সন্মতি দো ভগবান্...বেশ ঘুমুচ্ছিলুম, জাগিয়ে  
দিলেন গান্ধিজী...ভারতের অমানিশায় একমাত্র জ্যোতিষ, ভারতীয় তপশ্চর্যার  
দীপ্ত হোমায়ি,...আসমুদ্রহিমাচলের ভাস্বর প্রতীক! হে মহাত্মন! তোমাকে  
প্রণাম!...ভগবান্ শ্রীকৃষ্ণ আর্তভক্তকেও উদার আখ্যা দিয়েছেন। দৃষ্টান্ত পাই  
ভাগবতের গজ-গ্রাহ সংবাদে; গজরাজ তদেকশরণ হয়ে মুক্তি পান গ্রাহের কবল  
থেকে। সমগ্র ভারত আজ গ্রাহের মুখগহ্বরে। কোটি কোটি ভারতীয়ের  
পুরোহিত মহাত্মাজী; তদেকশরণ হয়ে আমাদের নিয়ে চলেছেন কল্যাণের পথে,  
মৈত্রীর স্বরাজ্যে। হাতে অসি নেন নি, হিংসার ক্রুদ্ধ পতাকা ওড়ান নি;  
শুধু গেয়েছেন দুর্গতিহরণ মঙ্গল নাম—

রঘুপতি রাঘব রাজা রাম, পতিত পাবন সীতা রাম।

রাস্তার উচ্চাবচে যখন কলুষ দেখা দিয়েছে, প্রতিভূ হয়ে অনশন করেছেন,  
আকুল হয়ে ডেকেছেন 'নির্বলকে বল রাম'। গজরাজ তদেকশরণ হয়েছিলেন  
নিজের মোক্ষার্থে; মহাত্মাজী তদেকশরণ হয়েছেন সমগ্রজাতির মুমুক্ষা নিয়ে।  
হে মহাতপা! হে ভক্ত-কুলাগ্রগণ্য! হে অহিংসার পূজারী! তোমাকে বার বার  
প্রণাম জানাচ্ছি।...

কিন্তু আলো অতিক্ষীণ, বারবার নিবে যায়। চেষ্টা করি, ভগবানের শরণাপন্ন  
হই, জপ করি 'নির্বলকে বল রাম'; গান্ধিজীর দীপশিখায় আবার পথ খুঁজি, নেবে  
আসে পুঞ্জীভূত অন্ধকার। বিভ্রান্ত হই। মনটাই ভেঙ্গে গেছে। তপস্তা  
চাই? তদেকশরণতা চাই? অবসাদের মূঢ়তায় কিছুই ভালো লাগে 'না।  
উপোস করি, পারের কাণ্ডারীকে ডাকি...কিছুতেই আস্থা নেই...কি যেন একটা  
হয়ে গেছে...পথও পাইনা, সোয়াস্তিও পাই না...

অবের আশা খেলব পাশা, বড়ই আশা মনে ছিল।

মিছে আশা, ভাঙ্গা দশা, প্রথমে পঁজুরি পেলো ॥

আবুনলুড্-এর একটি কথা প্রায়ই মনে আসে—standing between two  
worlds—one dead, the other powerless to be born; পূরনোকে

আঁকড়াতে গেলে পাই ছাইভস্ম; পরপারে কি আলোর জগৎ আছে? ...কে জানে?...অন্ধের মতো হাতড়ে হাতড়ে আর কতদিন চলা যায়?

মা আমায় ঘুরাবি কত,

( কলুর ) চোখ-ঢাকা বলদের মত ?

ভবের গাছে জুড়ে দিয়ে মা, পাক দিতেছ অবিরত ॥

জীবনের দিনগুলি মোর এমনি ভাবেই কাটবে ? মণিদা গাইতেন,

আমায় লোহারই বঁধনে বেঁধেছে সংসার

দাসখত লিখে নিয়েছে হায় ।

আমার খেটে, খেটে, খেটে, জনম গেল কেটে

তথাপি এ ছার খাটা না ফুরায় ॥

দয়ালদা বলছিলেন, বিরহের কান্না তো এখনো বাকী! এর কি শেষ নেই? আরও তুর্ভাগ আছে?...পাশের বাড়ীতে সেদিন কে ভজন গাইছিল। সাধারণ সুর; সুরও নয়; শুধু বেদনাগ্নুত স্বরে রামজীকে ডাকা—বিশ্বের অবসাদ যেন রূপ নেয় সেই করুণ আহ্বানে...কিন্তু এ তো কেবলই কান্না! অসহায় আর্তি! নির্জীব গোড়ানি!...জীবনের বীর্ষবস্তা, এগিয়ে যাওয়ার দৃঢ়তা, সত্যসন্ধানের অকুতোভয়তা—সব কিছুই হারিয়ে ফেলেছি। হারিয়ে লাভে মূলে মরণেরি সিন্ধুকূলে। নরকের ছবি দেখিয়ে মা কালী কালের কোলে ফেলে দিয়েছেন...

কোলে তুলে নে মা কালী

কালের কোলে দিস্ না ফেলে।

॥ ৫ ॥

কিছুদিন হলো ক্ষেপু মস্ত নিয়েছে। গুহাতিগুহ সব প্রক্রিয়ার সাহায্যে শ্রীভগবানকে জ্বালে ফেলবার চেষ্টা চলছে। আমাকে কিছু বলে না, এড়িয়ে চলে; যদিও কানে সব খবরই আসে। দেখা ময়দানে। ক্ষেপুর আনন্দ আজ ধরে না; ইস্টবেঙ্গল জিতেছে। জিজ্ঞেস করি—

: কেমন আছিস?

: আর কেমন! কলকাতার ওপর দিয়ে যা ঝড় বয়ে গেল! সেন্টার-ফরওয়ার্ড চমৎকার খেলেছে। ও যা শট, গোলীর সাখি আছে থামার ওকে?..

: আদায়পত্র কেমন হচ্ছে?

: তা গুরুর ইচ্ছায় মন্দ নয়...ওদের ফরওয়ার্ড লাইন্স একদম বাজে...

: গুরু ইচ্ছায় মানে ?

: ও ! তোকে বলিনি বুঝি ! খুব বড় মহাত্মা, নাম কৈলাস বাবা ; বিশ বছর তিব্বত আর কৈলাস করেছেন ; শুধু বরফ আর বরফ ; অতি দুর্গম স্থান, লোকালয়ের বহু দূরে । সেখানে সাধনা করে সিদ্ধিলাভ করেছেন ।

: চেহারা কি রকম ?

: তপ্তকাঞ্চন আভা, আজ্ঞামূলস্থিত বাহু, আনন্দোজ্জ্বল মুখশ্রী, অঁাখি সদাই ঢুলুঢুলু...

: গাঁজা খান নাকি ?

: তুই যেমন গাধা প্রশ্নটিও—

: বুঝেছি । অঁাখি ঢুলুঢুলু মদিরা পানে । গাঁজার চাইতে মদ ভাল ।

: বুঝতে তোর এখনো অনেক দেরি । মদিরাই বটে, ব্রহ্মরন্ধ্র থেকে ক্ষরিত হয় । ঢুকলো মাথায় ?

: না ।

: তা জানি । পুঁথিগত বিদ্যায় এসব তত্ত্ব বুঝা যায় না । এক্ষণে আর তোর হলো না কিছু ; ঘুরে আসতে হবে ।

: আপত্তি নেই, কিন্তু আফসোস এই যে তোকে আর পাবো না । ছট্ করে অনেকটা তো উর্ধ্বে উঠেছিস, এই জন্মেই একটা ব্যবস্থা করে দে না ?

: তোর এখনো দেরি আছে ।

: কেন ?

: বিশ্বাসে মিলয়ে কৃষ্ণ তর্কে বহু দূর ।

: আমার জন্ম তা হলে ঘুরে আসবি তুই ?

: ও সব ইয়ারকি ছেড়ে কোনও মহাত্মার চরণাশ্রিত হয়ে যা । আশ্রিত না হলে—

: ঈশ্বরকে ত্যাগ করে মাংসপিণ্ডের আশ্রয় ?

: গুরুতে মনুষ্যবুদ্ধি করতে নেই ।

: গুরুজী আহারাদি করেন তো ? তুই যা পেটুক, খেঁটের ব্যবস্থা—

: আচ্ছা, আসি আজ ।

: গোসা হলো ? কতোদিন পরে দেখা ! ইস্টবেঙ্গল জিতেছে, কোথায় ইলিশমাছ-ভাতে খাওয়াবি, তা না—রাগ করে, মুখ ঘুরিয়ে, ছেলেমানুষের মতো—

: বেশ তো, চল ।

: ও ভাবে বললে কি আর যাওয়া যায় ? তবে লোভ হচ্ছে ঠিকই। ইলিশ-মাছ-ভাতে বৌদি যা করেন ! সত্যিই উপাদেয়।

: উপাদেয় নয়, অপূর্ব। বাংলাদেশে পারবে কেউ ? আর শুধু মাছ-ভাতেই বা কেন ? ইলিশ মাছের মাথা দিয়ে কচুর শাক, কাঁটা দিয়ে ছাঁচি কুমড়োর তরকারি, ডিমের ডালনা ; ফুলকপি দিয়ে কৈমাছের ঝোল, চালতের অম্বল, বাসমতী চালের পায়েস...গুরুদেব বলেন—ঐ যা ! আজকে যে লক্ষ্মীবাব, নিরামিষ ; পূজো-আচ্চা আছে অনেক—

: তাতে আর কি হয়েছে ? হবে আর একদিন। একটু মাংস—

: মাংস নিষিদ্ধ—গুরুদেবের আদেশ।

: ভাল কথা, বউদি-ও নাকি মস্ত নিয়েছেন ?

: ছেলেমেয়েরা-ও।

: ছেলেমেয়েরা ! তারা মস্ত দিয়ে কি করবে ?

: গুরুদত্ত বীজ, নিজেই নিজের কাজ করে।

: ক্ষ্যাপা তুই চিরকালের, কিন্তু এমন বন্ধ পাগল হয়েছিস জানতুম না।

: যা বুঝিস না তা নিয়ে কাজলামি করিস না। আচ্ছা আসি।

: একদিন যাব'খন, ছেলেদের ভেতর মস্তের বীজ কি রকম গজাচ্ছে দেখে আসবো।

: বাড়ীতে আজকাল আমি খুব কমই থাকি।

: রববার ?

: রববার তো দম ফেলবার সময় নেই আমার।

: অর্থাৎ যেতে মানা করছিস ?

: তা নয় ; তবে মানুষের সরল বিশ্বাসে আঘাত করলে পাপ হয়। সেই পাপের ভাগী বরং নাই হলি।

ক্ষেপু তাড়াতাড়ি ট্রামে উঠ পড়লো।...ও চিরদিনই মাছ-মাংসের পরম ভক্ত, কিন্তু গুরুর আদেশে নিরামিষ চালিয়ে অস্বখে পড়ে। এখন নিষেধাজ্ঞা শুধু মাংসের ওপর, যদিও ছেলেরা দোকানে এন্টার কাউল-কারি চালায় ; গুরুদত্ত বীজের প্রভাবে তা হয়তো গজাঙ্গল হয়ে যায়। পরমহংসদেব বলেছিলেন, ভক্ত হবি তো বোকা হবি কেন ? কিন্তু বোকা না হলে দেখছি ভক্ত হওয়া যায় না ; যতো বেশী বোকা ততো বেশী ভক্ত। মানুষ নিজেকে কতো ভাবেই না ঠকায় ! মাংস ছেড়েছে ; কিন্তু উপুরি বেড়েছে—গুরুর কৃপায় ! খরচ ও হয়ে যায় গুরুদত্তীর

খেট ও মচ্ছবের চাহিদা যোগাতে।...চোখে জল আসে ; ক্ষেপুও গুরুকুপায় পর হয়ে গেলো!... বাড়ী এসে দয়ালদার চিঠি পেলুম... শুয়ে শুয়ে চিঠির কথাগুলো আওড়াই... নিফল চিন্তায় লাভ শুধু আয়ুক্য... বাজে চিন্তা ছাড়ো... ভগবানের নাম করো... তাঁকে দুঃখ জানাও, আতিহর ভগবান্ সকল দুঃখ মোচন করবেন... হয় তো... নিফলচিন্তা... বটে-ও ; কিন্তু ছাড়তে পারি কৈ?... বন্ধুজন কে কোথায় ছিটকে গেছে... বাইরের যোগ যেখানে আছে প্রাণের যোগ সেখানে নেই... অন্তরঙ্গ যারা ছিল তারাও পর হয়ে যাচ্ছে—অন্তরের দুর্লভ্য ব্যবধান... ক্ষেপুও কাছে গেলে দূরে সরিয়ে দেয়... দয়ালদা ভালবাসেন, স্নেহ করেন, আন্তরিক উপদেশ দেন—কিন্তু রোগ সারে না ; দূর থেকে রোগটা হয় তো বুঝতে পারেন না, দূরত্বই বেড়ে যায়... রাঁচীর মাস্টারমশায় ! একবার ঘুরে আসলে হয়... রাঁচীতে আছেন কি ? কোথায় আছেন তাও তো জানি না... এক ভরসা ছিল ভগবান্... রাত্রির অন্ধকারে তাঁকেও খুঁজে পাচ্ছি না... এই বিশাল জগতে আমি একা... অসহায়... নিঃসঙ্গ... we mortals live alone... হায় ভগবান্ ! তুমিও আমায় ত্যাগ করলে?... Oh God, my God ! hast thou forsaken me?... রজনী অন্ধকার... গভীর, কালো, মিশমিশে অন্ধকার... ও কে?... ও কে ? ককাল !... কে কে?... জিভ বের করে ছেলেটাকে গলা টিপে মারছে!... কালী! কালী! কালী!...

## ॥ ৬ ॥

যেমন age of angst তেমন উন্মনস্তার ব্যাধি ; যুগের ঋণ শোধ করতেই হয়... ভুগে উঠলুম অনেক দিন। একটু বাড়াবাড়ি নাকি হয়েছিল। জানিনা। নার্ভাস ব্রেক-ডাউন্ গোছের ; সময় নেয়। এখন সেরে উঠেছি। হলোও অনেক দিন, প্রায় আড়াই বছর। কী ভাবে যে কেটে গেলো—স্বপ্ন হু মায়া হু মতিভ্রমঃ। ডাক্তারবাবুর আদেশে ঘুরলুম অনেক—সাঁচী, অজন্তা, ইলোরা, দেওগিরি, ঔরঙ্গাবাদ, বম্বাই, পুণা, বাক্সালোর, তাজোর, মাহুড়া, সেতুবন্ধ, রামেশ্বর, শ্রীরঙ্গম, মাদ্রাজ, ওয়ালটোর, ভিজাগাপটম্। আমরা সাধারণতঃ গয়া-কাশী, মথুরা-বৃন্দাবন ঘুরে থাকি, দক্ষিণে বড় একটা যাওয়া হয় না। ওদিক-কার দৃশ্যে অভিনবত্ব আছে বলে ডাক্তারবাবু ওদিকেই যেতে বললেন। চিঙ্কা-পুরী-ভুবনেশ্বর যাওয়ার সংকল্প ছিল ; কিন্তু জরুরী তার পেয়ে বাড়ী ফিরেছি। যাকগে, অনেক ঘুরেছি ; ও-তিনটে আর একবার দেখা যাবে। ছুটিও প্রায় শেষ ; দুদিন ঘরেই বিশ্রাম করা যাক।

ঘরে বসে ভাবি, কী দেখলুম ? কিছুই দেখি নি...কতকগুলো আব্‌ছা ছবি চোখের ওপর দিয়ে চলে গেছে, মনকে স্পর্শ করেছে কিনা জানি না...একবার কেষ্টদার সঙ্গে মেলা দেখতে গিয়েছিলুম মাকে না জানিয়ে ; ভিড়ের মধ্যে হারিয়ে যেতে পারি, ছোট্ট ছেলে, মা হয় তো যেতে দিতেন না। ...রাধাচক্রের দিকে হাঁ করে তাকিয়ে ছিলুম, সেই ফাঁকে কেষ্টদা কোথায় তলিয়ে গেল। আর পাঁচজনকে দেখে লোভ সামলাতে পারলুম না, এক পয়সায় রাধাচক্রে চক্রর খেয়ে নিলুম। নাবতে আর পারি না, মাথাটা গুলিয়ে গেছে...দোকান পাট, লোকজন, রাধাচক্র, সব ঘুরপাক খাচ্ছে। ভয়ে ভয়ে কেষ্টদাকে খুঁজি, কিন্তু সব গুলিয়ে যায়...দু-চারবার হয়তো দেখেও থাকবো কেষ্টদাকে ; না দেখার সামিল, চরকির মতো সব ঘোরে। কেন উঠতে গেলুম রাধাচক্রে ? সম্বল ছিল একটি পয়সা, সাধ ছিল মুড়িমুড়কি খেতে খেতে বাড়ী যাবো...এখন ঘুরপাক খাচ্ছি...যদি কেষ্টদার দেখা না পাই ! পিছন থেকে বিরাশি সিক্কার এক কিল ; ‘কোথায় লুকিয়ে ছিলিরে দেবু ? খুঁজে খুঁজে হয়রানি।’ কেষ্টদার কিল খেয়ে মনে হলো রাধাচক্রটা থেমেছে। সবকিছু চোখের সামনে সহজভাবে ভাসছে দেখে চোখে জল আসে। কেষ্টদা ভাবে, মার খেয়ে কাঁদছি ; হাতে বুটভাজা গুঁজে দিয়ে বলে, ‘নে, খা ; চল্ এবারে বাড়ী...’

কলকাতা ফিরে মনে হচ্ছে, একটি কেষ্টদার এখনও প্রয়োজন—যিনি শক্-খেরাপি দ্বারা মনের সহজ অবস্থাটা ফিরিয়ে দেবেন।...দেখেছি অনেক কিছু, অর্থাৎ জল, মাটি, পাথর, গাছ ; গাছ, পাথর, মাটি, জল ; ঘূর্ণমান চলচ্চিত্রের অসহায় দ্রষ্টা। কাজকর্ম শুরু করেছে। ডাক্তারবাবু বলেন, ‘যা না করলে নয় শুধু তা-ই করবেন, কোনো কিছুতে মাথা ঘামাবেন না ; মাঝে মাঝে চিড়িয়াখানায় যাবেন, ছোট ছেলেদের মতো চেষ্টাবেন ; আর গোয়েন্দা কাহিনী পড়তে পারেন’।...কতো গোয়েন্দা কাহিনী পড়েছি ইয়ত্তা নেই। দাক্ষিণাত্য দেখার মতো—কতকগুলো ছবি, যখন যেটা চোখের সামনে আসে, দেখি ; পরক্ষণেই ভুলে যাই। কে খুন করলো, কোন্ গোয়েন্দা ধরলো, কি করে ধরলো, কার কী নাম, কে লিখেছে—’ কিছুই বলতে পারবো না। এই রাজ্যে ভাল-মন্দ, গ্রায়-অগ্রায়, সত্য-মিথ্যা, কোনো কিছুর বালাই নেই ; বাজে ঐ প্রশ্নগুলোর বামেলা থেকে দিব্যি ভুলে থাকা যায়। এইজগতই পড়ি—ভুলে থাকার জগত। কিন্তু কী ভুলে আছি, কেন ভুলে আছি, ভুল ভাঙবে কি না, কবে ভাঙবে, এসব চিন্তা উঁকি মারলে ক্রাইম ক্লাব ( Crime Club )-এর আর একধ’না বই নিয়ে আসি। শেষ হলোই

মন সাদা সেলেট; অথবা সেলেটের হিজিবিজি লেখা, ছু-চার দিন পর নিজে থেকেই মিলিয়ে যায়। যাক্। সময়টা কাটে তো।...

অনুধের সময় একটি দৃশ্য চোখে ভাসতো...এখনও দেখি...এইনশেনন্ট্ মেরিনার (ancient mariner) সাতসমুদ্র তের নদী পাড়ি দিয়ে চলেছে জগতের সবকিছু পিছনে ফেলে...ষিয়ে বাড়ীতে সানাই বাজে, রাগ তিলক-কামোদ...‘মৈ’ কৈসে জায়ু’র রেশটুকু কিছুতেই মিলিয়ে যায় না...তারপর অ্যালবেটসের হত্যা...‘সনি সনি স ঋ স’ ধেম্ গেছে...অথৈ জল, পার নেই কূল নেই, শুধু জল আর জল...পিপাসায় ছাতি ফাটে...এক কোঁটা জলও নেই মুখে দেওয়ার...জীবনের সব রস সাগরের নোনা জল...আকাশে আশুন ধক্ ধক্ করে...সাগরে কুমি, কীট, সরীসৃপ...ঘিন্ঘিন্ করে গা...মড়াগুলো জাহাজের এখানে, ওখানে, সেখানে...অসীম সাগরের অফুরন্ত জল, সব নোনা...এইনশ্যানন্ট্ মেরিনার একা...  
alone, alone, in the wide, wide sea...এপর্ষন্ত বুঝি, তার পরেরটুকু আর বুঝি না—I blessed them unaware! নরকের পর বৃন্দাবন এলো। কি করে?...বিভীষিকা দেখে?...উপোস করে?...প্রায়শ্চিত্তের ফলে?...প্রেমলাভের সাধন কি এই?...গঁ.জামিল মনে হয়। কোলরিজ্ (Coleridge) মরুভূমির উষরতা জেনেছিলেন, মরুত্বানের সম্মান পাননি। প্রেমের অধ্যায় তাঁর অনুভবের বাইরে; গতানুগতিকের তাগিদে মিলনের হিন্দোল রাগ ধরেছেন, ‘বুলনে বোলে শু;মরায়’ গেয়ে গান শেষ করেছেন। অহল্যাকে তিনি বুঝতেন a grief without a pang, void, dark and drear; আমিও বুঝি। তারপর আর বুঝি না। ভাবিও না। ডাক্তারবাবুর নিষেধ আছে। ভাবনা তবুও আসে; তখন চিড়িয়াখানায় যাই, পশুদের ছোলা-বাদাম খাওয়াই...বান্দরের কিচিরমিচির শুনি, ভেংচিকাটা দেখি...গুণারের চামড়া—আমাদের চাইতে পুরু কি?...হরিণের ভয়-চকিত নয়নে বোধ হয় এখনো ভেসে ওঠে ঝোপঝাড়ের কালো ছায়া আর বাঘের জলন্ত চোখ; হরিণের দিকে তাকালে চোখ ছলছল হয়...নম্র, কোমল, শান্ত, the gentlest of creatures in the world; ভরতমুনির প্রিয় জীব। তাই কি জন্মান্তরে হরিণ হলেন? নম্র, কোমল, শান্ত ভাবে সর্বাস্তঃকরণে ভোগ করবার জন্ত?...সাপের দিকে যাই না, সহ্য করতে পারি না; গেলে। ‘লাউকুন’ (Laocoon) এর ছবি মনে হয়—ইংরেজরা যেমন ভারতের ওষ্ঠে-পৃষ্ঠে-ললাটে জড়িয়ে...হাঁসগুলোর দিকে যাই...এখানে পরম তৃপ্তি...দেশের বাড়ীতে শোবার ঘরে একখানা ছবি ছিল—পাহাড়ের ধারে একটি ছোট্ট



পুকুর ; গাছের ছায়া পড়েছে পুকুরের জলে ; নির্জন বিবিক্ত পরিবেশ ; জল শান্ত, স্তব্ধ। কার এই ‘বিবিক্তদেশসেবিত্ত্বম্ অরতির্জনসংসদি’ ?...পুকুরের মাঝখানে একটি মরাল—খ্যানস্ব ; মুগ্ধ নয়নে চেয়ে থাকতুম...কী এর মানে ? দয়ালদা ছবিটি দেখে একদিন বলেছিলেন, ‘বাঃ ! খাসা ছবি—

একো হংসো ভুবনশ্রান্ত মধ্যে

স এবাগ্নিঃ সলিলে সংনিবিষ্টঃ ।

ভুবন, সলিল, অগ্নি, হংস...কী একটা সাড়া জাগে, কিন্তু বুঝিনা ; তবুও চেয়ে থাকি...হাঁসগুলোর কী আনন্দ ! খেলছে, সাঁতার কাটছে, ডুব দিচ্ছে, উৎফুল্ল হয়ে আনন্দ জানাচ্ছে...যেমন এককালে আমরা ছিলাম...কোথায় লুকিয়ে গেল সেই জগৎ ?...ধেং, ঐ কথাই উঁকি দিচ্ছে ; দু-হাতে সরিয়ে দিই। কিরতি পথে ক্রাইম্ ক্লাবের আর একথানা বই কিনি এস্প্রানেড্ থেকে...বেশ নেশা...খুনে কে ? Who done it ? দেখাই যাক...বোধ হয় ‘ঘ’...না, ‘খ’...উহু, নির্ঘাত ‘ক’...শেষ পাতায় দেখি ‘ঙ’। হাঁ, ‘ঙ’-ই তো বটে ; মাথায় যা পাগড়ি, খুনে না হয়ে যায় ! প্রথমেই তো ওর কথা ভাবা উচিত ছিল...কিন্তু ‘ঘ’—ও তো হতে পারতো...‘ঙ’ !...যাক্গে, মরুক গে, ঘুমই এবার ।...দিন গেল মিছে কাজে রাত্রি গেল নিদ্রে...মিছে মায়ায় বদ্ধ হয়ে বৃক্ষসম হৈলু...মঞ্জুমালী নাম রাখে অভীষ্ট পূরণ...দেব নারায়ণ...শ্রীমধুসূদন...বনমালী নাম রাখে বনের হরিণী...নম্র, কোমল, শান্ত—the gentlest of creatures...  
কোথায় বনমালী ?...  
কোথায় বৃন্দাবন ?...

॥ ৭ ॥

ইতিমধ্যে কতো কিছু-ই না ঘটে গেল ! স্বপ্ন হু মায়া হু মতিভ্রমঃ ? রাধাচক্রে ঘূর্ণপাক খাচ্ছি না তো ? ভারত স্বাধীন !...বিশ্বাস-ই হচ্ছে না ! আরও অসম্ভব মনে হয় এই যে মহাত্মাজী নেই ! অহিংসার পূজারীর মৃত্যু আততায়ীর গুলিতে !...এ-ও সম্ভব ?...হতভয় হয়ে ছিলাম অনেকদিন...মহাত্মাজী নেই !...১১৫ বছর পরমায়ু ছিল, কিন্তু সত্যিই নেই। প্রয়োজন আমাদের মিটেছে, আর কী দরকার ?...আমরাও ঠেকেছি...ভারত বিখণ্ডিত, বঙ্গভঙ্গ পুনঃপ্রতিষ্ঠিত...তবুও স্বাধীন তো ! স্বস্তির নিঃশ্বাস ফেলেছি...পৈতৃক সম্পত্তি নিয়ে ছেলেরা চিরদিনই ঝগড়া করে এসেছে ; কিন্তু কী এমন তাড়া ছিল ঝগড়া থামাবার ?...

ধৈর্য হারিয়ে ফেললুম। রক্তারক্তি দেখে যে তাঁরা ভয় খেয়ে গেলেন ; হাঁ, ভয়ই, ইনক্লাব জিন্দাবাদের বুলি কপচালে কী হবে ? দস্তুর মতো ভয় খেয়ে গেলেন। ক্রান্তিকারী, revolutionary, বিপ্লবী, কতো-কি—শেষে ভয়ে ভয়ে রাতারাতি বাঁটোয়ারা !...যাক গে, মরুক গে ; ভাইয়ে-ভাইয়ে যখন বনছে না, থাক আলাদা... উভয়ে-ই শান্তিতে আজাদী ভোগ করুক।...ঘোর অদূরদর্শিতা, ঘোরতর কাপুরুষতা, মহাত্মাজীর দৃষ্টি ঠিক ছিল ; কিন্তু মেঘ আমরা নইতো মানুষ...শেষে মেঘপালকও বিভ্রান্ত হলেন !...আমরা যখন ভুল পথ নিয়েছি, গান্ধিজী সরে দাঁড়িয়েছেন, সায় দেন নি ; ভুলকে তাই শুধরে নেওয়া গেছে। হঠাৎ মতিভ্রম হ'লো কেন ? যাকে পাপ বলে জেনেছিলেন তাকে বর্জন করলেন না কেন ?...মাযার কুহেলী ? অপত্য স্নেহের অক্ষতা ?...তবুও বিচলিত হইনি। বাপুজী তো আছেন ; কিছু কাল থাকবেনও ; সব ঠিক হো জায়েগা। সবই বেঠিক হয়ে গেলো ! শ্মশানে খুব চাঁচালুম, তারস্বরে চীৎকার করলুম—বাপুজী অমর হো গরোঁ। হলেন কি ?...সোক্রাতেসের কথা মনে হয় ; যাকে সত্য বলে জেনেছেন নির্ভীক ভাবে তার প্রচার করেছেন ; যাদের সত্যনিষ্ঠ করতে চাইলেন তারাই বিষ খাওয়ালেন ; অস্মানবদনে হেমলক পান করলেন। হাসিঠাট্টা শেষ পর্যন্ত ; অস্তিম মুহূর্তে শিয়াকে বলেন, 'ভাল কথা, ভুলেই গিয়েছিলুম ; মন্দিরে একটা কুকুট বলির মানত করেছিলুম ; বলির ব্যবস্থা করে দেবে। আসি।'.. অদ্ভুত চরিত্র ! আমাদের দেশে এর দৃষ্টান্ত পাই শহীদদের জীবনে—যতীন মুখুজ্যে, ক্ষুদিরাম, যতীন দাস, স্বর্ঘ সেন, প্রীতি ওয়াদেদার...অহিংসার রাস্তায় মহাত্মাজী ...'সব কো সন্মতি দো ভগবান'...কৈ দিলেন ? অহিংসার প্রতিষ্ঠা কোথায় হলো ? অহিংসার পূজারী শহীদ হলেন হিংসার যুগকাষ্ঠে। শহীদ হলেন, কিন্তু অমর হলেন কি ?...আমাদের ভিতর তিনি বেঁচে আছেন কি ? কৃতিত্ব নিয়ে ইতিমধ্যেই বিতণ্ডা শুরু হয়েছে। অহিংস-পন্থীরা বাপুজীর দোহাই দিয়ে বলেন, স্বরাজ আমরাই এনেছি, আমাদের-ই ভোগ্য। সহিংসবাদীরা বলেন, সিংহল, ব্রহ্মদেশ স্বাধীন হলো কী করে ? আজাদী এসেছে হিটলর-তোজোর লণ্ডডাঘাতে এবং ১৯৪২-এর প্রচণ্ড অভ্যুত্থান ও নেতাজীর আক্রমণের মাধ্যমে। মহাত্মাজী থাকলে ব'লতেন :

রঘুপতি রাঘব রাজা রাম, পতিত পাবন সীতারাম।

পতিত-পাবন রঘুপতিকে আমরা আর আমল দিই না, দস্তুর করে বলি মৈনে আজাদী ছিন লী ! মহাত্মাজী বেঁচে আছেন কি ? পটে আঁকা ছবি বা মঞ্চে

রাখা পাষণ মূর্তি হ'য়ে নয়, নৈমিত্তিক ফুলের তোড়ার বিবেকদংশনে বা বিশ্বরণে নয়—জ্যাস্ত মানুষের বকে তাজা ঘা হয়ে বেঁচে আছেন কি?... ভাষণ দিচ্ছি, ধূপধুনো জ্বালাচ্ছি, 'রঘুপতি রাঘব' করছি, বাপুজীকে কবর দিয়ে তাঁর নাম ভাঙিয়ে খাচ্ছি... প্রাণের স্পন্দনে, হৃদয়ের অনুভবে, স্মৃতির বেদীতে, চিন্তার গুহ্রতায় তিনি নেই—আছেন রাজসিক প্রহসনে...

গিয়েছিলুম দিল্লি একটু কাজে। রাজঘাটে যাই নি। হাতে একটা রববার ছিল, গুয়ে গুয়ে আকাশ-পাতাল ভেবেছি...মহাত্মাজীর বৃকের রক্ত...তাজা, গরম, টকটকে রক্ত বলকে বলকে পড়েছে এখানে! জলে যায় নি?...সমগ্র দিল্লি সহর যখন ধ্বংসলুপ হবে, পথঘাট যখন ইট-পাথর আগাছা ও জঙ্কলে নিশ্চিহ্ন হয়ে যাবে, আর চতুর্দিক হবে দুর্গম অরণ্য, যখন মহীরুহগণ করতালি দিয়ে মাথা নুইয়ে মহাত্মাজীকে প্রণাম জানাবে, তখন ঝিল্লিমুখরিত যমুনার পাড় দিয়ে কাঁটাগাছের ফাঁকে ফাঁকে রক্তাক্ত দেহে এগিয়ে গিয়ে দেখবো মহাত্মাজী বৃকের রক্ত দিয়ে রামজীকে পূজা করছেন, নবদ্বীপদলশ্যামকে কাঁচা রক্ত দিয়ে স্নান করছেন...প্রতি শোণিতবিন্দু মুখর হয়ে বলছে—

হে রাম, হে রাম, হে রাম...

\* \* \* \* \*

কোথায় মহাত্মাজী?...কোথাও খুঁজে পাই না তাঁকে। কুটোগাছটির মতো আবর্তে পাক থেয়ে চলছি—যেখানে আরম্ভ সেখানেই শেষ; আবার পাক খাই; এগুতেও পারিনা, বেরুতেও পারি না...শিয়ালদা স্টেশন দিয়ে গতাগতির মতো। দিনের পর দিন টানা-প'ড়েন করি...বিষাক্ত হাওয়া, বিষাক্ত ছায়া, বিষাক্ত আর্তনাদ...কতো আর উদ্ভাস্ত দেখবো? মানুষ পারে এভাবে থাকতে?...কুকুরবিড়ালের চাইতেও অধম, নরকের চাইতেও বীভৎস...মগর হিন্দুস্থান আজাদ হৈ?...আজাদীর ভালো ভাগ-বাঁটোয়ারা...এই নরকের পাপ দিয়ে রাজ পঞ্চান্নহাজারী মোটরগাড়ীতে 'গান্ধিজন্ম' করে যাতায়াত অবিরাম পয়োনালী সম, উড়িয়ে দুর্বিনীত দম্পতাকা...রোল্‌স্‌ রয়ন্‌ না হলে ভারতের মর্ষাদা হানি হয়? অর্ধভুক্ত, অর্ধনগ্ন গান্ধিজীর দেশে? বিপর্যস্ত শরণার্থীর অশ্রুদীপ্তিরে?...কতো আর দেখবো! দেখে দেখে পাষণ হয়ে গেছি...কোনো কিছুর-ই মানে হয় না...গান্ধিজী থাকলে কী করতেন? উদ্ভাস্তদের মাঝে বসে যেতেন,

রামজীকে ডাকতেন, উপোস করে আমাদের বিবেক উদ্ধুদ্ধ করতেন, রঘুপতির নিকট প্রার্থনা করতেন—সবকো সন্মতি দো ভগবান।...বৈকুণ্ঠ থেকে আমাদের দিকে চোখ ফেরান না যেন...বুকের ঘাটা টনটনিয়ে উঠতে পারে...ভালয় ভালয় গেছেন...রামনাম করে জিরিয়ে নিন...শান্তিতে ঘাটা শুকিয়ে যাক...

\* \* \* \* \*

ভারতে ঠাকুর-দেবতার সংখ্যা বড় কম নয়—উনকোটি, চুরাশি লক্ষ। বাড়াবাড়ি মনে হয়, কিন্তু অনেকেই বেঁচে নেই। এক যুগের ঠাকুর অল্প যুগের হুড়ি; কালেভদ্রে আত্মগোপন ধপধুনো জোটে হয়তো, কিন্তু সত্যিকার পূজা পান না; হুড়ি জমে জমে পাহাড় হয়; উনকোটি কী আর তেমন বেশী? পাঠ্যবস্তু আমাদের ঠাকুর ছিলেন শ্রীরামকৃষ্ণ, বিবেকানন্দ, গান্ধী; পরাধীনতার শ্রমের ভিত্তর নীতি ও ধর্মের বেদীতে আদর্শের অলুপ্তান ছিল...এযুগের ঠাকুর কালো বাজার, সিনেমাস্টার, ঠাট ও আত্মশ্রুতি। যেমন দেখবে তেমন শিখবে। ছেলেদের বলা হয়—চরিত্র গঠন করো, ডিসিপ্লিন্ শেখো, দেশকে গড়ে তোলো। যারা উপদেশ দেন তাঁরা কিন্তু দুর্নীতির কালাপাহাড়, অসংযমের বন্যা, দেশের রক্তচোষা জোক, মাংস-থেকো কুমীর, হাঙ্গর। বিরাট মিথ্যাচার, পর্বত-প্রমাণ ভগ্নামি, অনাবিল আত্মপ্রবঞ্চনা। ফল—ছেলেরা বায়স্কোপ দেখে, বিড়ি-সিগারেট কোঁকে, সারা বছর ধর্মঘট করে, পরীক্ষায় চুরি করে, ইন্ডিজিউটরকে ঠেঙায়, হেডমাস্টারকে খুন করে, ভাইস্-চ্যান্সেলরকে কয়েদ করে...সিনেমার কোন তারকার অশুভ করেছিল—বুলেটিন দেখবার জন্ত ছেলেদের কী ভিড়! তারকার অটোগ্রাফ নেওয়ার জন্ত মারামারি হয়ে যায়...“এটা কি তোমাদের ঠিক হচ্ছে?” ভাইপো উত্তর দেয়, “সকলের হাঁড়ির খবরই জানা আছে। ঐ তো সেদিন বক্তৃতা দিয়ে গেলো, ‘মৈনৈ ক্যা কিয়া হৈ! মাদকদ্রব্য বর্জন ইত্যাদি’—অথচ নিজেই একটি মদের পিপে...আপনি আচরি ধর্ম.....” পোষাকের কী ঘটা! আমাদের আমলে ছিল এক জোড়া চটি, এক জোড়া ধুতি, একটি কাঁমিজ। সেজেগুজে যারা আসতো তাদের নাম ছিল ‘নাতজামাই’, ‘নবাবপুত্র’ ‘আলালের ঘরের দুলাল’। এখন? সাহেবী পোষাকটাই রেওয়াজ হয়ে গেছে, ধুতিকামিজে লঘিমাবৃত্তি কাজ করে, স্তব্ধ বর্জনীয়... সরস্বতী পূজার সময় ছাত্রাবাসগুলোতে গুনতুম ওস্তাদজীদের গান-বাজনা অথবা মুকুন্দদাসের স্বদেশী যাত্রা এবং ‘হরিশ্চন্দ্র’

জাতীয় পুরনো যাত্রা। এখন অভিশপ্ত ‘মাইক’এর কল্যাণে গুনতে হয় ‘লারেশান্স’র বিস্ফোরণ—মা সরস্বতীর কান জর্জরিত, প্রতিবেশীর প্রাণ অতিষ্ঠ। ‘মা’ সরস্বতী ? মাতৃপূজা এ যুগে অচল। ক্ষেপু বলছিল, এবার নাকি সিনেমার তারকাদের মডেলে (!) সরস্বতীর মূর্তি বানান হয়ে ছিল...‘শ্রদ্ধাবান্ লভতে জ্ঞানম্’—চুলোয় থাক। বেঁচে থাক ‘অশ্রদ্ধয়া লভতে পাশম্’।...কোথায় ধর্ম ও নীতি? কোথায় moral ideal...তামসিক অনাচারে দেশ ডুবে গেছে...এই রোরবপয়োধিজল রোধিবে কে?...মহাত্মাজী থাকলে প্রার্থনাসভায়...অন্য দেবতার যুগ এটা, স্মৃতরাং রাজঘাটে ফুল চড়িয়ে গাই ‘রঘুপতি রাঘব...

\*

\*

\*

\*

পুরুষগুলো চিরদিনই একটু উড়নচণ্ডে, বেআক্কেল। দেশের ধর্ম বাঁচিয়ে রেখে-ছিলেন মায়েরা। তাঁরাও হাল ছেড়ে দিয়েছেন, বা দিচ্ছেন। এখন নাকি মধুর ভাবের ‘প্রগতি’-সাধনা চলছে। সেকেলে সুর (রামপ্রসাদী)—

মনের বাসনা শ্রামা, শবাসনা শোন মা বলি।

অস্তিমকালে জিহ্বা যেন বলতে পায় মা কালী, কালী ॥

আধুনিক সুর—

নূপুরের মতো বাজিবো চরণে চরণে,  
 প্লাঘাত করিয়া ফিরিবো দুয়ারে দুয়ারে ;  
 সাধিয়া মরিবো ইঁহারে, তাঁহারে, উঁহারে,  
 বাঁচিবো হাজার মরণে।

আমার এক ভাই পুলিশে চাকরি করে, দুর্নীতি-নিবারক সংস্থায়। ও বলে শুধুই টাকার শ্রাদ্ধ, কোনো কাজই হয় না; ধরলে কি হবে? দিল্লিতে গেলেই সব ধামা চাপা। কিছুদিন আগে কার্ণোপলক্ষে দিল্লি গিয়েছিল। স্থানীয় একজন সহকর্মীকে নিয়ে একটি জাতীয় মহাজাতিসদনে খোঁজ-খবর নিচ্ছিল। খবর এলো পেটেলজী মারা গেছেন। বিমূঢ় হয়ে ভাবে, তাই তো...সহকর্মীর তাগিদে এগয়; ঘুরতে ঘুরতে জাতীয় সৌধের এক পাশে দেখে একটি ‘বার’ (Bar)—মেয়েপুরুষে এন্টার মদ খেয়ে নরক গুলজার করে আছে। হতভম্ব হয়ে সহকর্মীকে জিজ্ঞেস করে, ‘ব্যাপার কী হে? এমনি ধারা মদ চলছে?’ : পেটেলজীর মৃত্যুতে শোক হয়েছে যে!

- : এদিকে বুঝি এমনই রেওয়াজ ?  
 : আগে ছিল না, এখন হয়েছে—নববিধান ।  
 : গান্ধিজীর মাদকদ্রব্য বর্জন ?  
 : হরিজনদের জন্ত ; এঁরা মহাজন ।  
 : মায়েরা-ও ?

নহ মাতা, নহ কন্যা ;  
 তুমি অকুণ্ঠিতা, অসম্বৃত্তা বিশ্বের প্রেয়সী,  
 বেলেন্সা উর্বশী ।  
 তোমার মন্দির গন্ধ...

\* \* \* \*

- : দেবু যে ! ক্ষেপুকে তুলিসনি তা হলে ?  
 : ভোলা কি যায় ? এক পেয়ালা চা, আর খবরের কাগজটা ।  
 : খবরের কাগজ ! খবরের কাগজ দিয়ে কী হবে ?  
 : খবর দেখবো, তাজা খবর যাকে বলে ।  
 : খবরের কাগজে খবর থাকে নাকি ?  
 : কী থাকে ?  
 : বক্তৃতা আর বাক্যবীরদের ছবি । এক ছবি রোজ চালিয়ে যাচ্ছে । আর বক্তৃতা ? খোড়-বড়ি-খাড়া, খাড়া-বড়ি-খোড় । কে ঐ বিদকুটে ছবির দিকে তাকায় ? ‘বক্ত্রিমা’ পড়ে কেউ ?  
 : একটু চোখ বুলিয়ে নিতে হয় বৈ কি ?  
 : বাজে বকিস না । কেউ পড়ে না । আমি অনেককে জিজ্ঞেস করেছি ; সকলেই বলে, হ্যাঁ, ঐ একটু ; মানে পড়ে না । পড়া উচিত নয় ।  
 : উচিত নয় কেন ?  
 : অনেক কারণে । প্রথমতঃ বক্তৃতা কিছু কম শুনেছি ? স্মরেন ঝাঁড়ুজ্যো-বিপিন পাল থেকে কতো যে জালাময়ী কথা শুনলুম, কতো হাততালি দিয়েছি, কতো জয়ধ্বনি করেছি । থেকে গিয়েছি, ঘেমা ধরে গেছে । দ্বিতীয়তঃ, বক্তৃতায় কোনো ফলই হয় না । হিন্দু-মুসলমান দাঙ্গা, বঙ্গবিভাগ, ভারতবিভাগ, কাশ্মীর আক্রমণ, কাশ্মীর সমস্যা, পরমাণু বোমা বিস্ফোরণ, বিশ্বযুদ্ধ—বক্তৃতায় থেমেছে

কোনোটা। মীমাংসা হয়েছে কোনো কিছুর? তারপর দেশবাসীকে উপদেশ—  
ও-তো লেগেই আছে। শোনে কেউ? শুনবেই বা কেন? নিজেরা তো টাকা  
নিয়ে মচ্ছব চালাচ্ছে, আর উপদেশের বেলা আমরা? চালাকির আর জায়গা  
পায় না? ইয়ারকি পেয়েছে? পার্থশালার ছাত্র আমরা? গোঁফে তে দিয়ে যে  
বড় লেকচার বাড়ছে? লাঠি ঘুরিয়ে যে বড় কাস্থেনি করছে? লোকে ‘বক্তিতা’  
ধুয়ে থাকে? টাকার দাম চার আনা হয়েছে, খবর রাখিস? যা মাইকেল  
চালাচ্ছে টাকার দাম এর পর কানাকড়ি হবে। দেখে নিস্ তুই।

: খুব চটে আছিস দেখছি। ইস্ট বেঙ্গল হেরেছে নিশ্চয়?

: বাজে কথা ছাড়।

: আসল কথাটা কী? “দরবারে না পেয়ে ঠাই?”

: টেক্স।

: টেক্স? কিসের টেক্স?

: হাত-সাক্ষাই টেক্স বা indirect tax।

: ও, পকেট থেকে টাকা উধাও হয়েছে?

: তোর মাথা হয়েছে। বক্তৃতার জন্য টেক্স দিতে হচ্ছে।

: বুঝলুম না।

: তুই কাগজ রাখিস তো?

: রাখি।

: কাগজে কী থাকে? বক্তৃতা। বক্তৃতা পড়ে না কেউ, তবুও কাগজ কিনে  
যাচ্ছে। ধরে নিলুম তুই পড়িস। পয়সা লাগে তোর?

: তা লাগে বৈ কি?

: কিসের জন্য লাগে? বক্তৃতাগুলোর জন্য, জরুদগব ছবিগুলোর জন্য। বোকা  
পেয়েছিস আমাকে? কাগজ বন্ধ করে দিয়েছি।

\*

\*

\*

\*

গীতাতে আছে দৈবী সম্পদের কথা।

অভয়ং সবসংস্কৃদ্ধির্জানযোগব্যবস্থিতঃ,

দানং দমশ্চ যজ্ঞশ্চ স্বাধ্যায়শ্চপ অর্জবম্,

ভবতি-সমানং দৈবীমভিজ্ঞাতশ্চ ভারত

পৌরাণিক যুগের কথা, প্রগতির দিনে কুহেলীর মতো শোনায়। বললে, ইঁ করে থাকে; ভাবে, লোকটার মাথা খারাপ, ধর্মের নেশায় পেয়েছে, মধ্যযুগীয় মনোবৃত্তি কোথায় ছুপয়সা করে নেবে তা না, দৈবী সম্পদ! Stuff and nonsense! এই ভারতের মহামানবের অগ্রগতির প্রতিবন্ধক এরা—গীতা, উপনিষৎ ইত্যাদি। ধম্ম-ধম্ম করেই গেল দেশটা...যারা বোঝে, যারা উৎকট প্রগতিপন্থী নয়, তারা হাসে; মন্তব্য করে, সে রামও নেই অযোধ্যাও নেই; অচল টাকা চালাতে গেলে লাভ হয় বিড়ম্বনা। বটেও। মাণিক নাকি আজকাল পয়সা করেছে; সোনার মাণিক ছিল, এখন কালো বাজারের এক উঁচু দরের মহাত্মা...যুগটা কীভাবেই না বদলে গেল—Evil, be thou my good। এখন দিন হচ্ছে তাদের জোর গলায় যারা বলতে পারে কোহিন্তোহিস্তি সদৃশো ময়া; আনুগতিক সম্পদ-কিন্তু কর্তা ব্যক্তি থেকে আরম্ভ করে সকলেরই পরম বাঞ্ছিত...বিষ্ণুপুরাণের বোর কলি—“ততশ্চ অর্থ এবাভিজনহেতুঃ, ধনমেব অশেষধর্মহেতুঃ, অভিরুচিরেব দাম্পত্যসম্বন্ধহেতুঃ, অনৃতমেব ব্যবহারজয়হেতুঃ, জীত্বমেব উপভোগহেতুঃ, রত্নতাম্রভাগিতেব পৃথিবীহেতুঃ, অত্যায এব বৃত্তিহেতুঃ—আভিজাত্য শুধু টাকার, ধার্মিক মানে বিত্তশালী, ইন্দ্রিয়ার্থে পাণিগ্রহণ, মিথ্যা মোকদ্দমাজয়ের সাধন, জীমাত্রই উপভোগক্ষেত্র, অর্থই ভূমিলাভের হেতু, এবং দুর্নীতি জীবিকা নির্বাহের একমাত্র উপায়। প্রাচীন হলেও শাস্ত্রকারদের অন্তত দূরদৃষ্টি...মহাত্মাজী যে সব আদর্শ বা values আমাদের স্মৃতিতে রেখেছিলেন, তাঁর সঙ্গে সঙ্গেই তারা বিদায় নিয়েছে; গুঁর তপস্শ্রাবতিতে বেদীতে বসিয়েছি এক বিরাট দানব, অতিকায় বুল-ডোজার (bull-dozer) যে সব কিছু পিষে ভূমিসাৎ করে চলছে; বেদীটিও হয়েছে ছাতুছাতু...উদ্বাস্ত। জাতটাই তো আজ উদ্বাস্ত হতে বসেছে, ইওরোপের ভাসমান জনশ্রোত...ছন্নছাড়া দিন-মজুর...গৃহ নেই, গৃহধর্মও নেই; ঠাকুরঘর নেই, ঠাকুরও নেই; তুলসীমঞ্চ নেই, স্বেচ্ছাতিও নেই; মাটি নেই, মাটির রসও নেই; মাটিতে যে শেকড়গুলো এতোকাল আঁকড়ে ছিল, উপড়ে তাদের কেলে দেওয়া হচ্ছে।...ইওরোপের দানব-ধর্ম নতুন করে বেছে নিয়েছি...সে দিন গিয়েছিলুম এক আত্মীয়ের সঙ্গে দেখা করতে। দেশে তাঁর চকমিলান বাড়ী ছিল, আম-কাঁঠালের বাগান ছিল; পুকুরে মাছ ছিল, ক্ষেতে প্রায় বছরের খান হতো; রামাঘরের পিছনে শাক-সবজির বাগান—সেখানে ফলতো লাউ, কুমড়া, বেগুন,



ঝিন্বে, শশা, শিম, লঙ্কা, যেদিনের যেটা ; নিজে খেতেন, পরকে বিলতেন । পেনশন নিয়ে পাকা একথানা ঘর করেছিলেন...পালিয়ে এসেছেন উদ্ধাস্ত হয়ে । আছেন বাগবাজারে এক অন্ধ গলির অন্ধকূপে । বসতে মাহুর দিলেন, কিন্তু জমিন এতো সোঁতসোঁতে যে কাপড় ভিজে ওঠে ; দরমার বেড়াকে গোবর দিয়ে পোক্ত করা হয়েছে, দুর্গন্ধে বমি আসে ; চুলোতে আগুন দিয়েছে সব, চারদিক অন্ধকার, দম বন্ধ হয়...

: এই নরকে আছেন কি করে ?

: যাব কোথায় ?

: গাছতলা এর চাইতে—

: মেয়েদের নিয়ে গাছতলায় যাই কি-করে ? সেখানেই কি ভেবেছ জায়গা আছে ; ঠাই নেই রে দেব, কোথাও ঠাই নেই ।

: কোনো বিহিত করা যায় না ?

: অসম্ভব । পঞ্চশীলের আঙত্য পড়ে গেছি যে !

: মানে ?

: বক্তৃতা, টেক্স, দুর্নীতি, আত্মীয়-পোষণ, বহুভাষ্য—এই পঞ্চশীল নরক গুলজার করে আছে । তার উপর আমরা বাঙ্গালী—সেখানেও পঞ্চশীল । গান্ধিজীকে আমরা আমল দিইনি, বাংলার প্রভাব কংগ্রেসে কিছুই নেই, এতটুকু জায়গা—লোক অনেক ; হিন্দ-হিন্দু-হিন্দি—আমরা হিন্দি জানিনা ; তারপর শরণার্থী—ন ঘরকা, ন ঘাটকা । কী উপায় হতে পারে ?

: চেষ্টা-চরিত্র করলে—

: কসুর করি নি । পাঁচ-সালার চাপে আরো মরেছি ।

: এরা আবার কারা ?

: ‘কারা’ নয়, ‘কী’ ; অর্থাৎ five year plan ; বাংলা ভাষায় ঐ এক অসুবিধা মূর্খ্য-দন্ত্য-তালব্যের উচ্চারণ-ভেদ নেই । সুবিধা-ও আছে ।

: পাঁচ সালার চাপ, ঠিক বুঝলুম না ।

: এক পাঁচ-সালা যাবে, আর এক পাঁচ-সালা আসবে । এ নিয়েই সকলে বস্তু, কারণ বস্তুর জলের মতো টাকা ঘরে আসছে । উদ্ধাস্তদের দেখে কে ? আন্তর্জাতিক সমস্তাও আছে তো ! U. N. O.-তে চীনকে ঢোকানো, স্নেহজ সমস্তা, হাঙ্গারী সমস্তা, এটম্ বোমা সমস্তা, বিশ্বমৈত্রী সমস্তা...এসব-কিছুর সমাধান করা চাই তো ? এই ভারতের মহামানবের সাগরতীরে বাস করি আমরা, বিশ্বের দরবারে

আমাদের কী মহিমাশ্রিত স্থান ! টি-বি-তে মরলেও ভারতের জয়-জয়কার হচ্ছে তো ! শুনেও শাস্তি ।

: B. C. G. নিয়েছে সব ?

: কী হবে নিয়ে ?

: ওটা প্রতিবেদকের কাজ করে ।

: সেজ্ঞাই তো নিচ্ছি না ।

: সেজ্ঞাই মানে—

: মানে টি-বি হওয়াটা-ই তো বাঞ্ছনীয় । এভাবে বেঁচে থেকে লাভ কি ?

: ছেলেরা—

: রোজ ঝুলে আপিসে যায়, রোজ ঝুলে আপিস থেকে ফেরে ; তারপর এই নরককুণ্ডে মাথা গোঁজে । আমিও বলি না, ছেলেরাও চায় না । পক্ষীলের জয়-জয়কার হক ; আমরা মরতে পারলেই বাঁচি ।

\*

\*

\*

\*

মহাত্মাজী বেঁচে থাকলে কী করতেন ?...নিষ্ফল চিন্তা । তাঁকে তো আমরা রামজীর কাছে পাঠিয়ে দিয়েছি...বোধ হয় সেজ্ঞাই আমাদের উপর রামজীর অভিশাপ...একটি একটি করে জীবনের সব স্বপ্নই বালির ঘরের মতো ধ্বসে পড়ে...কোনো illusion-ই ভগবান রাখেন নি যাকে ধরে বেঁচে থাকা যায় !... কী হবে ?...কে জানে ? মহাত্মাজীর জীবনের সব চাইতে বড় ট্রাজিডি এই যে . একটিও যোগ্য মন্ত্রশিষ্য রেখে যেতে পারেন নি ; রেখে গিয়েছেন শুধু তাঁর মৃত্যুর অভিশাপ...কোথায় এর পরিণতি ?...শাস্তকে নিমিত্ত করে শ্রীকৃষ্ণ যত্নবংশ নিপাত করেছিলেন । আমাদের অদৃষ্টে কী আছে ? তানহং ক্ষিপ্যাম্যজস্রম্ অশুভান্ আশ্রুরীষেব যোনিষু—ধ্বংস নয় তো ?...কে জানে ?...

\*

\*

\*

\*

ইওরোপের উত্তরতম সর্বত্র ছড়িয়ে পড়েছে—টি-এস-ইলিয়ট ( T.S. Eliot )-এর Wasteland ; one world-ই বটে, সকলেরই এক দুঃবস্থা...ও শাস্তিঃ

(om shanti) পাঠ করে কবিতা শেষ করলেই কি শান্তি আসে?...ইলিয়টের গ্রায় সকলেই মরুভূমিতে পথ হারিয়ে পিপাসার আতর্নাদ করে চলেছে...কেউ বা এরই ভিতর মলমূত্র তৈরি করে আসন বিছিয়ে নেয়...আমার এক বন্ধুপুত্র ছিল পাগল ; হাতের কাছে যা পেতো তা দিয়ে মাটি খুঁড়তো। ‘কী করছিস রে?’ ‘কুয়ো খুঁড়ছি।’ ‘কী হবে কুয়ো দিয়ে?’ ‘পৃথিবী এ-ফোড়-ও-ফোড় করে তলা দিয়ে বেরিয়ে যাবো।’...সে ভাবেই গেলো, কুয়োতে ঝাঁপিয়ে। লাশটা ছিল কুয়োতেই, কিন্তু প্রাণবায়ু পৃথিবীর বক্ষ ভেদ করে ও-পিঠ দিয়ে বেরিয়ে ছিল কিনা ভগবান জানেন...পাথর, বালি ও কাটাগাছে মরুভূমির সব রাস্তা নিশ্চিহ্ন... মরুভূমির আবার রাস্তা!...উপরে আগুন, নীচে আগুন...মরুভূমির বুক চিরে রাস্তা খুঁজি, অথবা নালী ধরে এগই জীবনধর্মের তাগিদে...ইউরোপ একদিন চেয়েছিল, আলো—আরও আলো; এখন চায়, রক্ত—আরও রক্ত...আদিম বর্বরতা। জীবন, সাহিত্য, শিল্পকলা, সর্বত্র এক রোগ, schizophreniaর নানা রূপ অভিযুক্তি—Primitivism, Barbarism (les fauves), Cubism, Abstract Art, Futurism, Expressionism, Dadaism, Sur-realism...Automatism, Infantilism, Vorticism...Fascism-Imperialism; Democracy-Communism. পৃথিবী এ-ফোড় ও-ফোড় করবার নানাবিধ চেষ্টা...আকাশ জলে, মরুভূমি জলে, চিতার আগুন জলে চিতে...উড়ো কতকগুলি চিত্র চোখে ভাসে...Picassোর Guernica...Van Goghএর The Prison Yard...Gauguinএর The Tahitians...Nevinsonএর La Patrie...Spencerএর The Resurrection...Bayesএর The Underworld...Daliএর Suburbs...Dali ও Bunuelএর The Andalusian Dog (চলচ্চিত্র)...Ensorএর Skeletons Warming Themselves...Paul Nashএর Sunrise: Inverness Copse...Duchampএর L. H. O. O. Q....Alfred Jarryর Ubu...এক মন্ত্র Je cherche le neuf, পারো তো নূতন কিছু করো; এক তাৎপৰ্য—মাটি খুঁড়ে পৃথিবীর ও-পিঠ দিয়ে বেরবার চেষ্টা...খুঁজি আনন্দের রাস্তা, পাই আগুন, রক্ত, ছাই, অন্ধকার—মরুভূমি। পল ক্লী (Paul Klee)-র ‘বন্যা’ ভাসিয়ে নেয় ধ্বংসের পথে সহরের পর সহর—Flood Swamps Cities... মরুভূমি...বালুর প্রচণ্ড ঝড়...একটি একটি করে সব সৌধ বালিচাপা পড়ে... দিনের পর দিন মরুভূমি এগিয়ে আসে বিশ্বের ক্ষুধা নিয়ে...আগুন...বালি...ঝড়...কোথায় নবদ্বাদলশ্রাম?

কুটল কুপথ ধরিয়া, দূরে সরিয়া, আছি পড়িয়া হে ;—

কিসে ফেলিল যেন গো আবরিয়া !

কবে আসিয়াছি, কেন আসিয়াছি, কোথা আসিয়াছি

গেছি পাসরিয়া ॥

কোথায় বনমালী ?...কোথায় বৃন্দাবন ?...শাপমুক্তি কি হবে না ?

যাবে কি হে দিন আমার বিফলে চলিয়ে ।

আছি নাথ দিবানিশি আশাপথ নিরথিয়ে ॥

হে ভগবান ! কোনোই যে আর সম্বল নেই ! জীবনের সুখদুঃখে, বাড়রাপটায়, সুদিনে দুর্দিনে তোমার দিকে চেয়েই পথ চলেছি...এমন আড়াল হয়ে গেলে ! কী নিয়ে আর বাঁচি ?...পার উত্তর গয়ে সমস্ত জনা রে । আমি যে তিমিরে সেই তিমিরে । দয়ালদা বলেন, নাম করে যাও । করি, কিন্তু ভিতরটা শুকিয়ে গেছে...যেই নাম সেই কৃষ্ণ ভঞ্জনী করি...অভ্যাস জড়তা মনে হয়, ভালো লাগে না...ঈশ্বর যদি আছেন তবে এতো দুঃখ কেন ? জীবনের সব আশা-আকাঙ্ক্ষায় এমন আগুন জালিয়ে দেন কেন ?...দয়ালদাকে আর কিছু বলি না ; বললে কষ্ট পান, ভগবানকে নালিশ জানিয়ে কাঁদেন...কী দরকার ? আপনাতে আপনি থাক মন...রাঁচী যাবো ? মাষ্টার মশায়ের কথা প্রায়ই মনে হয়...  
sweetest of souls I have known—কথা মধু, আচরণ মধু, স্বভাব মধু, অন্তর মধু,...আপন জন ..কিন্তু তিনি...সন্ন্যাস নিয়ে হিমালয় চলে যান নি তো !...যাঁর জোরে আপনাতে আপনি থাকা যায় সেই পরাণবন্ধুই যে আড়াল হয়ে আছেন !...জীবনের এই দুর্বহ বোঝা কতো কাল আর টানবো ! আর যে পারি না !...নির্বল কে বল রাম...হে রাম, হে রাম, হে রাম...

ଦ୍ଵିତୀୟ ଅଧ୍ୟାୟ  
ସକଳି ଗରଲ ଖେଳ  
( ଖ )  
କାଶୀଧାମ



## কালীধাম

॥ ১ ॥

অনেকদিন থেকে কালী থাওয়ার ইচ্ছা ; মামাবাবুর টেলিগ্রাম পেয়ে সুবিধা হয়ে গেলো। গিয়ে দেখি ভালই আছেন, তেমন কিছু হয় নি। কোন্ এক সাধুবাবা হাত দেখে বলে দিয়েছিলেন, ‘এখন-তখন অবস্থা ; যে-কোনো মুহূর্তে হার্ট ফেইল করতে পারে।’ বুকটা ধড়ফড় করছিল ক’দিন থেকে ; তাই শেষ দেখা দেখবার জন্ত আমাকে জরুরী তার। ডাক্তারবাবু সজ্জন লোক, মামাবাবুর বন্ধুস্থানীয় ; দেখে বলেছেন, ‘কিছুই হয়নি আপনার ; বেশী মিষ্টি খাওয়াতে পেটে বায়ু জমেছিল। এই বয়সে ২০।২৫টা সন্দেশ চলবে না—বড় জোর চারটে।’ আমি সায় দিয়ে বলি,

: ঠিকই তো বলেছেন ডাক্তারবাবু।

: আগে যে ৪০।৫০টা খেতুম।

: এখন বয়স হয়েছে তো।

: তবে আর নেমস্তন্ন খেয়ে লাভটা কি ?

: না-ই বা খেলেন।

: সে বড় শক্ত কথা হলো না ?

: কেন ?

: মড়া পোড়াবো, আর নেমস্তন্ন খাবো না ?

: ডাক্তারবাবু যখন নিষেধ করেছেন—

: বাজে কথা। দু-দশটা মিষ্টি খেলেই মরে যাবো ? আগে যে—

: কিন্তু এই দুর্দিনে কে আর নেমস্তন্ন করছে ?

: সে কথা যথার্থ। এই তো সেদিন—

: লিপিটে নাম ছিল না ? ভালই হয়েছে। লুচি-মিষ্টি আজ কাল যা-তা দিয়ে তৈরী হচ্ছে। যুদ্ধের পর থেকে তো ঘি একদম উধাও ; ঘিয়ের নামে যা চলে তা হচ্ছে চর্বি। তাইতো অসুখে পড়েছিলেন।

: হুঁ। তা বটে। নেমস্তন্ন খাওয়া দেখছি ছেড়েই দিতে হবে।

: একদম ছেড়ে দিন। এই তো সেদিন—গত রববার বোধ হয়—পাশের বাড়ীতে—

: ধামলি যে ?

: বলবো আপনাকে ?

: ভয় পাবো ভাবছিস ? কতো মড়া পোড়ালুম ! শ্মশান সাখনা করেছি, জ্বানিস ?  
মণিকর্ণিকার ঘাটে গিয়ে দেখবি আমার খাতির কতো !

: এখানে যদি মরি তা হলে তো কোনোই হেঙ্গাম পোয়াতে হবে না ?

: হেঙ্গাম বলিস কিরে ? রাজার হালা—ধেং ! কী যে সব অলঙ্কণে কথা  
বলিস !

: ঐ যা ! আসল কথাটাই ভুলে গেছি। আপনার জ্ঞান কলকাতা থেকে কি  
এনেছি বলুন দেখি ?

: কলকাতার মিষ্টি আমি মুখে-ই দিই না।

: মিষ্টি না ; অল্প জ্বিনিস। খলশে মাছ, কৈ মাছ, ঢেঁকির শাক, বেতের ডগা,  
কল্মিশাক ; আর এক শিশি কান্সন্দি।

: কেন এসব জ্বিনিস আনতে গেলি ?

: এখানে পাওয়া যায় না তো।

: তা বটে। কতো কাল যে এসব জ্বিনিস খাইনি ! বেঁচে থাক। বাবা বিশ্বনাথ  
তোর মঙ্গল করুন। মা ব্রহ্মময়ী তারা ! কী যে করলি ! সোনার বাংলা  
ছারখার করে দিলি !

: করলুম তো আমরাই।

: লেখাপড়া শিখে বুঝি তোর এই বুদ্ধি হয়েছে ?

সকলি তোমার ইচ্ছা, ইচ্ছাময়ী তারা তুমি।

তোমার কর্ম তুমি করো মা, লোকে বলে করি আমি ॥

আজকাল এসব কথাই ভাবি গুয়ে গুয়ে।

: ব্রহ্মময়ী তারার কথা ?

: উঁহঁ। অসুখে একা পড়ে থাকতুম, এলোমেলো সব কথা মনে আসতো....  
ছোট মেয়েদের ব্রতকথা—

মাঘমণ্ডল সোনার কুণ্ডল, সোনার কুণ্ডলে ঢেলে ঘি

( আমরা ) বড় মানবের পুত্রের ঝি।

তারপর পুকুর পাড়ে স্থায়ী-প্রণাম। মনে আছে তোর ?

: হঁ।



ওঠো ওঠো স্থিঠাকুর ঝিকিমিকি দিয়া ।

‘না উঠিতে পারি আমি হিমের লাগিয়া’ ।

হিমের পঞ্চধুটি শিয়রে থুইয়া

স্থি ঠায়েন কোন্ খান দিয়া ?

‘বামন বাড়ীর ঘাটখান দিয়া ।

বামনের মেয়েরা বড় সেয়ান,

পৈতা যোগায় বিহান, বিহান ।’

: বেশ তো মনে আছে তোর ! আর কী মনে আছে ?

: মামা বাড়ীর ছড়া : আম পাকে ; জাম পাকে ; মামাবাড়ী বেথুন<sup>১</sup> পাকে ।

: তুই ভুলিস নি এসব ? কতো দিন যে এসব খাইনি !

: কোন্ সব ?

: এই বেথুন, লটকা, করঞ্জা, পাকা গাব । কতো রকমের মাছই না ছিল ! বাঁশপাতা, স্নবর্ণখড়কা, কাচকিঙা, পাবদা, বউজা...কী দেশ ছিল ! সোনাল ফলতো ! সব ছারখার হয়ে গেলো ! মাঝে মাঝে ইচ্ছা হয়, যাই একবার দেশে ; বর্ষার দিনে, নৌকো করে ঘুরবো—

: আর লটকা-করঞ্জা থাকেন ? ও-সব চিন্তা ছাড়ুন । কাশীতে আছেন ; মাকে ডাকুন ; বাবা বিশ্বনাথকে দর্শন করুন ; কথা, কীর্তন, ভজ্ঞন, এসব শুনুন ; সাধুসঙ্গ করুন । কাশী তো সাধুসঙ্গের জায়গাই ।

: সে কথা যথার্থ । মহাতীর্থ কাশী ; আর সাধুর তো মেলা বসে আছে, দর্শনেই পুণ্য হয় ।

: আচ্ছা মামাবাবু ! ভাল সাধু কেউ আছেন ?

: সাধুর আবার ভালমন্দ কি রে ?

: হ্যাঁ, মানে, এই যেমন হরিহর বাবা ।

: সাক্ষাৎ শিব রে, সাক্ষাৎ শিব । অমন সাধু আর হয় না ।

: তাঁকে দর্শন করেছিলেন ?

: দর্শন বলিস কিরে ? কতবার মাথা লুটিয়েছি । বছর খানেক আগে এলি না ! সাক্ষাৎ শিব ছিলেন ।

: ঐ থাকের সাধু কেউ আছেন এখন ?

: পাগল না ক্ষ্যাপা! পলকে সৃষ্টি-স্থিতি-প্রলয় করতে পারতেন! অমনটি কি আর হয়?

: রাস্তা ঘাটে যে এতো সাধু দেখা যায়—?

: ভিক্ষুরী দল; লোক ঠকিয়ে থাকে। আমি যে এতো কাল আছি, আমিই সেদিন বোকা বনে গেলুম। বেশ চেহারা লোকটার—মাথায় জটা, গায়ে ভস্ম, হাতে চিমটা, মুখে বম্বম্ববম্ব; দেখলেই ভক্তি হয়। দিলুম হাতটা বাড়িয়ে।

: হাতটা? বাড়িয়ে দিলেন!

: ইয়ারে। বয়স হয়েছে তো! মাঝে মাঝে পরমায়ুটা পরখ করিয়ে নিতে হয় না?

: কী বললেন হাত দেখে?

: দেড়শ বছর পরমায়ু। দিলুম পাঁচটা টাকা। তারপর ডাক্তারবাবুর কাছে গুনি, লোকটা এক নম্বরের ঠগ। গেলো তো গচ্চা?

: শোনা যায়, এঁদেরই ভিতর দু-এক জনা খুব উঁচুদের মহাপুরুষ আছেন; গা ঢাকা দিয়ে থাকেন, ধরাছোঁয়া দেন না।

: আমিও শুনেছি—ডাক্তারবাবুর মুখে। তবে ঐ যা বললি, ধরাছোঁয়া দেন না।

: থাকেন কিভাবে?

: কিছুই বলা যায় না। কখনো পাগলের বেশে; কখনো ছেঁড়া কাঁথা গায়ে, দুর্গন্ধে ঘেঁষা যায় না; কাছে গেলে থুথু ছিটিয়ে দেন। অথচ ভিতরে টনটনে জ্ঞান, সদাশিবের অবস্থা।

: কিন্তু ধরা যায় কি করে?

: সে-ই তো বড় শক্ত কথা হলো না?

: সাধুদের তো কৃপার শরীর, আমাদের কৃপা করবেন না?

: নিশ্চয় করবেন। সাধুরা কৃপা না করলে সংসার যে উচ্ছন্ন যেতো!

: একটা খটকা—

: কী আবার খটকা? তোর বড্ড খুতখুতে মন। চিরকালটাই। কিছুতেই সোয়াস্তি নেই তোর।

: খটকা মানে, ভাবছিলুম আমাদের মতো পাপীতাপীদের যদি কৃপা না করেন?

: তবে কি সাধু মহাত্মাদের কৃপা করবেন? তা হলে আর কৃপার শরীর কি করে হলো

: কিন্তু ধরবো কিভাবে ? সাধারণ মানুষের মতো ওঁরা থাকেন না ?

: ওঁরা কি আর সাধারণ মানুষ ?

: আপনি এতোকাল কাশীতে আছেন, দু-এক জনাকে নিশ্চয় চিনতে পেরেছেন ?

: বড় ছরুহ ব্যাপার রে দেবু।...হ্যাঁ, ডাক্তারবাবু বলছিলেন, অসীষাটের কাছে নাকি একজন ভাল মহাত্মা আছেন।

: মহাত্মাজীর কী নাম ?

: নাম তো জানা নেই, তবে লোকে নাম দিয়েছে হুঁবাসা মুনি। বড় কড়া লোক। যাবি তো ডাক্তারবাবুকে সঙ্গে নিস্।

## ॥ ২ ॥

পরম পবিত্র ধাম কাশী, মোক্ষধর্মের পীঠস্থান, আর্য উপনিবেশের প্রাচীন তীর্থ, কাশিকা, মহাশ্মশান, বারাগসী, বরুণা ও অসীর সঙ্গমস্থল, ‘অবিমুক্তঃ...বরণায়াঃ নাশ্রাঙ্ক মধ্যে প্রতিষ্ঠিত ইতি,’ বরণা ও নাশীর মধ্যস্থান জীবরূপ অবিমুক্ত বারাগসী,<sup>১</sup>

বিশ্বরাজ্যে জীবাত্মার মুক্তি নিকেতন।

ভূতলে ত্রিদিব কাশী আনন্দকানন ॥

এতং ভগবতা বারাগসিয়ং ইসিপতনে মিগদায়ে অহুস্তরং ধম্মচক্রং পবত্তিতং, এই ঋষিপতন বারাগসীর মৃগদাবে ভগবান বুদ্ধ ধর্মচক্র প্রবর্তন করেন, প্রচার করেন শান্তির মহতী বাণী ‘অকুপ্পা মে চেতো বিমুক্তি, অয়মস্তিমা জাতি, নশ্চিদানি পুনব্ভবোতি’, অবিদ্যাশী আমার নির্বাণমুক্তি, এই আমার অস্তিম ভবচক্রমণ, আর আমার জন্মান্তর নেই। নমো তস্মৈ ভগবতো অরহতো সম্মাসম্বুদ্ধসস্ম।... শোনা যায়, এই ঋষিপতনেনম হুসংহিতার টীকা রচনা করেন কুম্ভকভট্ট, নিরুক্ত রচনা করেন ষাঙ্ক, ব্যাকরণসূত্র প্রণয়ন করেন ভগবান্ পাণিনি, এবং শারীরকভাষ্য প্রণয়ন করেন পূজ্যপাদ শ্রীমং আচার্যশঙ্কর। ঋষিদের গোড়াপত্তন হয় তো করেন মহর্ষি কপিল ও গৌতম, কারণ সাংখ্যসূত্রের এবং স্থায়সূত্রের প্রচার নাকি এই বারাগসীতেই প্রথম হয়। তারপর ইতিহাসের কতো ডেউ চলে গেছে..... রাজা জয়চন্দ্র...সুজ্ঞন সিংহ...বেণীমাধবের ধ্বজা ও গুণজ্ঞেবের অপকীর্তি... মনসারাম...বলবন্ত সিংহ...ওয়ারেন হেস্টিংসের সঙ্গে চৈৎ সিংহের যুদ্ধ ও গবাক্ষ-পথে পলায়ন...শিবালয় ঘাটে ‘খালিমহল’... ”

মাত্রা পিত্রা পরিত্যক্তা যে তাত্ত্বা নিজবন্ধুভিঃ,

পদে পদে সমাক্রান্তা যে বিপত্তিরহর্নিশম্,

মধ্যে বন্ধুজনং যেষামপমানঃ পদে পদে,

ষেবাং কাপি গতির্নাস্তি তেষাং বারাণসী গতিঃ ।

কিন্তু চৈৎসিংহের গতি হয় নি...স্বপ্ন সৌধ ভারতের ইতিহাস...বৃদ্ধ...ভূত্বা ভূত্বা  
প্রলীয়তে...কাশীধাম মহাশ্মশানং...কোথায় আনন্দকানন ? মামাবাবুর প্রিয়  
গানটি শুনলুম সকালবেলা—

আমি যাই রে ভাই সেই আনন্দকাননে ।

সংসারের লোকে যারে শ্মশান বলে ভয় পায় মনে ॥

ভূতের বোঝা আজকে ভূতে মেশাইবার শুভ দিন ।

ঘটাকাল আজকে আমার মহাকাশে হবে লীন ।

রক্তগত বায়ু আমার মিশবে মহা সমীরণে ॥

নিত্যানন্দ ধাম সে যে, সদাই আনন্দময় ।

পিতা সদানন্দ আমার, মাতা যে আনন্দময়ী ।

যার লাগে পরমক্ষুধা, খেতে দেয় আনন্দমুখা ।

তাইতে দ্বিজ গোবিন্দের আজ, এতো আনন্দ মরণে ॥

কোথায় আনন্দ ? কেবলই মরণের কালো ছায়া !...অশেষ অমঙ্গলের পিছনে  
সত্যিই কি শিব লুকিয়ে আছেন ?...পাক খাই, ভাবি, আবার পাক খাই...ঘুরলুম  
আজ অনেক...মন্দিরময়ী নগরী...ঘাটের তো অস্ত নেই...তুলসীদাসজীর  
সমাধিতীর্থে প্রণাম করি...কতো কথাই মনে হয়...মিনতি জানাই—

ইতনী মিনতি রঘুনন্দন সে দুখদ্বন্দ্ব হামারা মিটাও জী,

আপনপদপঙ্কজপিঞ্জরমেঁ চিতহংস হামারা বৈঠাও জী ।

“তুলসী”—দাস কহে কর জোড়ি ভবসাগর পার উতার জী ॥

...বিশ্বনাথজীর মন্দির !...হে বিভো বিশ্বনাথ ! হে প্রভো শূলপাণে ! হে  
মহাদেব শস্তো ! হে মহেশ ! হে শিবকান্ত শান্ত ! হে স্মরারে পুরাত্নে !

নমস্তে নমস্তে বিভো বিশ্বমূর্তে ।

নমস্তে নমস্তে চিদানন্দমূর্তে ॥

...অন্নপূর্ণার মন্দির !...মা অন্নপূর্ণা !...চোখে জল আসে...কোথায় তুই অন্ন  
দিলি ?...লক্ষ লক্ষ লোক ‘হা অন্ন’, ‘হা অন্ন’ করে শুকিয়ে মরলো !...গতিস্বং  
গতিস্বং গতিস্বং ভবানি !...রাত কি পোহাবে না ?

বিবাহে বিধায়ে প্রমাদে প্রবাসে,

জলে চানলে পর্বতে শত্রুমধ্যে ।

অরণ্যে শরণ্যে সদা মাং প্রপাহি,

গতিস্থং গতিস্থং ত্বমেকা ভবানি ।

...মনের অন্ধকার কাটে না...তমসো মা জ্যোতির্গময়...অস্তহীন তমস্রা...  
জীবনটা হয় তো অন্ধকারে ঠোঁকর খেতে খেতেই শেষ হয়ে যাবে মণিকর্ণিকার  
চিতাগ্নিতে...মহাতীর্থ কাশী ! মৃত্যু এখানে সকলেরই কাম্য—মোক্ষ হয় । মরে  
তো কতো লোকই, মণিকর্ণিকার চিতাভস্মে সব শেষ হয়...তারপর ? কী হয় কে  
জানে ?...গয়া বিষ্ণুস্থান, বিষ্ণুপাদ দর্শনে মহাপ্রভুর প্রেমলাভ হয়েছিল । কাশী  
শিবস্থান : এখানে মোহান্ধকার দূর হয়, জ্ঞানের আলোকে অবিচ্ছিন্ন নষ্ট হয়...  
সেজগুই নাম কাশী ।...অন্ধঃ তমঃ, আমার চিত্তাকাশে কেবলই ঘনান্ধকার...  
মরাই ভালো...মণিকর্ণিকায় জ্বালিয়ে দেবে...চিতাভস্ম গঙ্গায় ফেলে দেবে...  
বল হরি, হরিবল...চিতায় গঙ্গাজল...ওঁ শান্তিঃ...দশাশ্বমেধ ঘাট !...এখানে  
পিতামহ ব্রহ্মা দশটি অশ্বমেধযজ্ঞ সমাপন করেছিলেন...পরম পবিত্রস্থান...কতো  
লোক গঙ্গাস্নান করে যায়—দ্বিগুণ দেহে, শান্ত মনে...স্তোত্র পাঠ শুনি—

“দিনমপি রজনী সায়ং প্রাতঃ শিশির-বসন্তো পুনরায়াতঃ ।

কালঃ ক্রীড়তি গচ্ছত্যাযুস্তদপিন মুঞ্চত্যাশাবায়ুঃ ॥”

জীবনের সব আশা, সব স্বপ্নই তো ধূলিসাৎ হয়েছে ; আর কেন ?...এ জীবনের  
দিনগুলি মোর...

“অগ্রে বহিঃ পৃষ্ঠে ভানু রাত্রৌ চিবুকসমপিতজানুঃ ।

করতলভিক্ষা-তরুতলবাস স্তদপিন মুঞ্চত্যাশাপাশঃ ॥”

তরুতলে বাস...করতলে ভিক্ষা...চিবুক-সমপিত জানু...কতো কথাই মনে পড়ে...  
...কতো ছবি চোখে ভাসে...বন্ধুরা সব কে কোথায় গেলো !...দেশটাও গেছে...  
কথা বলবারও লোক নেই...দয়ালদা গাইতেন—

মনের কথা কইব কি সই, কইতে মানা ।

দরদী নইলে প্রাণ বাঁচে না ॥

মনের মাহুষ হয় যে জনা, ( ও তার ) নয়নেতে যায় গো চেনা,

সে দুই-এক জনা ;

ভাবে ভাসে, রসে ডোবে, ( ও সে ) উজান পথে

করে আনাগোনা ॥

হু-এক জনাও নেই...নিঃসঙ্গ জীবন...আপনাতে আপনি থাকা ছাড়া উপায় নেই। দেকারতে ( Descartes )-র মস্ত ছিল cogito ergo sum, আমি চিন্তা করি অতএব আমি আছি। ইওরোপ যেদিন থেকে এই মস্ত্র দীক্ষা নেয় সেদিন থেকে ইওরোপীয় সমাজে এসেছে মানুষের নিঃসঙ্গতা, নিজের ভিতরে নিজের নির্বাসন। ভারত সম্বন্ধে একথা ঠিক নয়। যাক্কেই নিক্তে<sup>১</sup> আছে, যাক্কেই ঐতিহ্য যখন মৃতপ্রায়, পুরোহিতবর্গ বিলীময়মান দেবগণকে আবেদন জানিয়েছিলেন, ‘আমাদের কী গতি হবে! কী উপায়ে আবার দর্শন পাবো আপনাদের?’ উত্তর আসে, ‘এর পর দেবত্বলাভের উপায় হবে মননের দিব্যাস্ত্র।’ মনন! কী এর মানে? সাংখ্যের বিবেক? অনাত্ম বস্তু থেকে আত্মাকে পৃথক করা?...প্রবৃহৎসূক্তাদিবেদীকাং ধৈর্ষণং? মুঞ্জাতৃণ থেকে যেমন ইষীকা পৃথক্কৃত হয়? ধৈর্ষ সহকারে? ...এরই নাম মননের দিব্যাস্ত্র?...“পরমে ব্রহ্মণি কোহপিন লয়ঃ!” বিবেকদ্বারা ব্রহ্মে পৌছন যায়?...বুঝি না ঠিক...এদিকে দিন ঘনিয়ে আসে...ক’দিনই বা আর বাঁচবো! সম্ভায়ন ( G. Santayana ) বলেন, জীবমাত্রই তার মনোগহনে আবদ্ধ—কীরকেগার্দ ( Kierkegaard )-এর অলজ্জা চিন্ত-কারাগার...বিরিট এক cloud of unknowing...মেঘ কাটে না...অন্ধকার ঘনিয়ে আসে গাটতর হয়ে...দিন তো গেলো, সন্ধ্যা হলো...কোথায় নৌকো? “পুনরপি জননং পুনরপি মরণম্...পুনরপি রজনী পুনরপি মাসঃ...কস্মৎ কোহং কৃত আয়াতঃ?”

জুড়াইতে চাই—কোথায় জুড়াই,

কোথা হতে আসি, কোথা ভেসে যাই।

ফিরে ফিরে আসি, কতো কাঁদি হাসি,

কোথা যাই সদা ভাবি গো তাই ॥

জানি না কেবা, এসেছি কোথায়,

কেন বা এসেছি, কে বা নিয়ে যায়।

কতো আসে যায়, হাসে কাঁদে গায়,

এই আছে আর তখনি নাই ॥

ক্ষেপু ঠিকই বলে; গুরু দরকার। অন্ধকারে হাতড়ে হাতড়ে চলা যায় না আর ...চরণাশ্রিত? মন সায় দেয় না...‘চেলা’ তো অনেক দেখলুম—বোকা, ভণ্ড, শ্রদ্ধাভ্রু; আর গুরুজী-সাধুবাবা? লম্বোদর, অহংমুখ, বাহ্যাম্বেট, স্বয়ংবীর,

(১) মনুষ্য বা ঋষিঃসংক্রাম্য দেবানব্রবন্ কো ন ঋষির্ভবিষ্যতীতি, তেভ্য এতৎ তর্কমুখিঃ প্রায়চ্ছন ( ১৩-১-১২, পরিশিষ্ট )।

পশ্চিমতম্ভমান ।...যেমনটি চাই তেমনটির দর্শন পাচ্ছি কোথায়?...আমার ধাত্তে  
সইবে, আমার ধাত্ত বুঝবেন...দয়ালদার মতো স্নেহ করবেন...দয়ালদার সঙ্গে  
বনে...উপদেশ দেন, গুরুগিরি করেন না...রাস্তা দেখান, ঘাড়ে চাপেন না...দোষ  
দেখান, দোষী করেন না...সঙ্গে চলেন, যেমন পরাণবন্ধু হে সখা আমার...  
ভগবানকে চিরদিন ঐ নামেই ডেকেছি; এখন আর সাড়া দিচ্ছেন না; অভিমানে  
বলি 'আর কতোকাল থাকবো বসে'...হয়তো একদিন মুখ ফিরিয়ে চাইবেন...হয়তো  
পাঠিয়ে দেবেন 'মনের মানুষ, কাঁচা সোনা'...মণিদার দরদভরা সুর ভেসে আসে—

দেখেছি রূপসাগরে মনের মানুষ কাঁচা সোনা ।

( তারে ) ধরি ধরি মনে করি ধরতে গিয়ে আর পেলাম না ॥

( কবে ) সৃজনের সঙ্গে হবে দেখা শুনা ।

মরমে জ্বলছে আগুন আর নিভে না ॥

পথিক কয় ভেবো নারে; ডুবে যাও রূপসাগরে ;

ডুবিলে পাবে তারে, আর ভেবো না ;

সে যে মনের মানুষ কাঁচা সোনা ॥

## ॥ ৩-অ ॥

ডাক্তারবাবু সঙ্গে যেতে পারলেন না, একাই গেলুম; 'দুর্বাসাজীকে দেখলে  
প্রথমটায় একটু ভয় হয় । রক্ষ চেহারা, কালো রং, ভরাট গাভীর্ষ, ঠোঁটে  
রহস্তপ্রবণতার রেখা; চোখে স্নিগ্ধতা; একটু তীক্ষ্ণতাও—খানিকটা সোক্রাতেসের  
সঙ্গে যেন মিল আছে । প্রণাম করে চূপ চাপ বসে আছি । নাম তো দুর্বাসা  
মুনি ! থাকি বসে...আর এক দিন না হয় ডাক্তারবাবুকে নিয়ে আসবো, তাঁর  
মারফৎ কিছু জিজ্ঞাসাবাদ করা যাবে...ডাক্তারবাবুর খুব উচ্চ ধারণা...বলবো  
কিছু? যদি ভাগিয়ে দেন? যদি বিদ্রূপ করেন? কী দরকার?...  
চূপচাপ থাকাই ভালো...হয় তো অন্তর্মুখী হয়ে আছেন...সাদুরা অনেক  
সময় নির্বাক থেকেই প্রশ্নের মীমাংসা করে দেন...মৌনব্যাখ্যা প্রকটিত-  
পরব্রহ্মতত্ত্ব...গুরুোস্ত্র মৌনং ব্যাখ্যানং শিষ্যা হু ছিন্নসংশয়া:...তেমন বরাত কি  
আর হবে?...বেশ শাস্ত পরিবেশ...গোলমাল নেই...লোকজন বড় একটা কেউ  
আসে বলে মনে হচ্ছে না...হয় তো ভয়ে...এক পক্ষে ভাল...হই-চই নেই...  
শিষ্যদের অশিষ্টতা নেই...মোটর গাড়ীর ভিড় নেই...অর্থাৎ অলৌকিক কোনো  
শক্তির খেলা দেখাতে পারেন না বোধ হয়...শক্তি থাকলে কি আর রক্ষা ছিল !

মেলা বসে যেতো! অস্বস্তি মনে হচ্ছে. উঠবো? ... দেখি আর একটু... হঠাৎ প্রসন্ন করেন—

: কি চাই...

: আপনাকে দর্শন করতে এসেছি।

: কেন?

: সাধু দর্শনে পুণ্য হয়, তাই।

: সাধুর লক্ষণ জানেন?

: জানি বলতে পারি না, তবে গীতায় পড়েছি—অশ্বেষ্টা সর্বভূতানাং মৈত্রঃ করুণ এব চ—

: এতো মাঙ্কাতার আমলের লক্ষণ!

: সাধুর লক্ষণ তো—

: বদলায় না, বলছেন? ভুল ধারণা। The old order changeth yielding place to new; মহাজনো যেন গতঃ, যুগধর্ম, zeitgeist—এসব শোনে নী?

: শুনেছি, কিন্তু সাধুদের উপর এগুলোর ব্যাপ্তি আছে জানতুম না।

: ব্যাপ্তি আছে বৈ কি! সাধুরা তো মাহুযই; যুগধর্মকে এড়াবেন কী করে?

: সাধু মানে যিনি অসাধ্যসাধন করেছেন। যদি যুগধর্মের আওতা থেকেই নিজেকে মুক্ত করতে না পারলেন—

: তবে আর সাধু হলেন কী করে?—এ তো মাঙ্কাতার আমলের যুক্তি, বর্তমানে অচল। মডার্ন সাধু হবেন মডার্ন লক্ষণাক্রান্ত।

: যথা?

: হাজার হাজার শিষ্য থাকবে, পদস্থ লোকের সংখ্যাই তার ভিত্তর বেশী; সফরের সূচী কাগজে ছাপানো হবে; যাতায়াত আকাশমার্গে, মানে এরোপেনে; আশ্রমফণ্ডে মোটা টাকা চাই; নিয়মিত চাঁদ আদায়ের জন্য তসিলদার ঘুরবে; স্তাবক দিয়ে জীবনী লেখানো হবে; সাধনার পদ্ধতিতে নৃতনস্থ থাকা চাই; শাস্ত্রকে অবশ্য বাদ দেওয়া চলবে না, তবে মনগড়া ব্যাখ্যা দিয়ে তাকে যুগোপযোগী করে নিতে হবে। এর নাম হচ্ছে প্রগতি, neo-religion; নব সহজিয়ার এই ersatz পন্থায় চলুন, সুখে থাকবেন : you can have the best of both the worlds; এই হচ্ছে পন্থা।

: ও পথ আমার নয় বলেই এখানে এসেছি।

: পণ্ডিত্রম। কারণ, আমি যে অসাধ্য সাধন করে সাধু হয়েছি তার প্রমাণ কি?



: প্রমাণ উপস্থিত করবার যোগ্যতাই যে নেই আমার। আর যোগ্যতা থাকলেও সাধুদের উপর তা প্রয়োগ করা—

: সম্ভত নয়, বলছেন? দু-টি তুল হলো। প্রথমত: আপনার পুণ্যসঞ্চয় হবে কিনা তা অনিশ্চিত থেকে যাচ্ছে। দ্বিতীয়ত: প্রমাণ প্রয়োগ না করলে তত্ত্ব নিশ্চয় কী করে হবে?

: তর্কপ্রতিষ্ঠানাম্। তর্ক দ্বারা কি তত্ত্ব প্রতিষ্ঠা হয়?

: তর্ক না করলে এই প্রতিজ্ঞাই বা পৌঁছবেন কি করে? সাধু যা বলেন তা যদি অবিচারে মেনে নেন, তবে লাভ হবে শুধু শ্রদ্ধাজড়তা।

: তর্ক করে সাধুদের বিরাগভাজন হওয়া কি বাঞ্ছনীয়?

: সাধুর কাছে যান কেন? তাঁকে কৃতার্থ করতে, না নিজের কল্যাণের জন্ত? প্রকৃত সাধু বিরক্ত হন না, জিজ্ঞাসু দেখলে খুশীই হন, এবং তাঁর প্রশ্নের সমাধান করে আনন্দলাভ করেন।

: Ersatz-পন্থীরাও তো তর্ক দ্বারাই নিজেদের মতবাদ প্রতিষ্ঠিত করছেন? তাঁদের দোষ কোথায়?

: দোষটা ব্যক্তিগত নয়, তত্ত্ব ও বৃত্তিগত। মানুষ সংস্কার-বশে এটা-সেটা চায়, এবং পায়, বা পাওয়ার জন্ত চেষ্টা করে। প্রশ্ন হচ্ছে এটাই শেষ চাওয়া ও পাওয়া কিনা?

: নাসৌ মুনির্যন্ত মতং ন ভিন্নম্—নানা মুনির নানা মত।

: সেখানে নিজের বিবেকবুদ্ধি এবং অহুভূতিই পথনির্দেশক।

: তুল করার সম্ভাবনা থেকে যায়।

: শুধু সম্ভাবনা নয়, তুল করেও। ভুলের ভিতর দিয়েই তো মানুষ চলছে। তবে ভুলের স্বভাব এই যে সে ভাঙে, যদি জাগ্রত থাকা যায়। আত্মবিলেপণ চাই; শাস্ত্র, যুক্তি, এবং অহুভূতির সাহায্যে নিজেকে বারবার পরখ করে নেওয়া চাই। শাস্ত্র মানে সাধুসঙ্গও বটে—এমনি সাধু যাদের ‘চাহ গঙ্গ, চিন্তা মিটা, মনুবাঁ বেপরবাহ’।

: আর বৃত্তিগত দোষ কি?

: সাধু যদি চাঁদার খাতানিয়ে বেড়ান, বা অহুরূপ অপচেষ্টায় লিপ্ত থাকেন, তবে বুঝতে হবে ঝামেলা খতম হয় নি। কি অধৈর্যবাদী, কি বিশিষ্টাধৈর্যবাদী, কি গৈরিগিরী, গোস্বামীবাবাজী, সকলেরই তত্ত্বনিষ্ঠ হওয়া দরকার—আত্মকীড় আত্মরতি: ক্রিয়াবান্।...যুগধর্মকে এজ্ঞাই জানা দরকার। পথে অসংখ্য কাঁটা

ও গর্ত। চোখ চেয়ে বিচার করে না চললে যুগের এই অধর্ম-গহ্বরে পড়ে যেতে পারেন।... আসল কথা কি জানেন? বিবেকবৈরাগ্য না হলে কিছু হয় না। উইলিয়ম ল'র (William Law) একটি কথা আছে—turning to God without turning from self; পরমহংসদেব যেমন বলতেন, ‘আমি মরিলে যুচিবে জঞ্জাল’। ‘আমি’-কে না মেরে যারা জঞ্জাল ঘোচাতে চায় তারা আরও জঞ্জালে আবদ্ধ হয়ে পড়ে। তারপর চলে আত্মপ্রবঞ্চনা, rationalisation, গোলক ধাঁধা খেলায় যেমন পুনঃ নরকে পতনম্।

: এতো মিথ্যাচারের কথা বলছেন; ঋতাচার আশ্রয় করলে—

: সেখানেও জঞ্জাল এসে জোটে—সাংখ্যাকারের ‘তুষ্টির্বধা’। তত্ত্বজ্ঞানীকেও ছাড়ে না, মুমুক্শুর তো কথাই নেই।

: বুলুম না ঠিক।

: মধুসূদন সরস্বতী গীতার টীকা লিখেছিলেন ‘অদ্বৈতসিদ্ধি’র পর—অর্থাৎ বহু সাধনা ও বিচার পরিপাকের ফল এবং অভিজ্ঞতার সমুদ্ভিতে পূর্ণ। বইখানা পড়বেন। সাধক হুই শ্রেণীর—কৃতোপাস্তি ও অকৃতোপাস্তি। উপাসনা, যোগাভ্যাস ইত্যাদি দ্বারা যাঁদের চিত্ত নির্মল হয়েছে তাঁরা অনেক সময় সমাধিজ স্থখে আবদ্ধ হয়ে পড়েন; মাগুকে এই বিষ বা তুষ্টির নাম দেওয়া হয়েছে “রসাস্বাদ”। এঁরা সাধু কিন্তু জ্ঞানী নন, কারণ মহাবাক্য বিচার দ্বারা জ্ঞান লাভ করেন নি।

: ভক্তরা তো বলেন, চিনি হতে চাই না মা, চিনি খেতে ভালবাসি।

: এর নামই তুষ্টি—সুখসঙ্গেন বন্ধাতি। অতাস্থিকও বটে। চিনি কেউ হয় না—জীব স্বভাবতঃই চিনি বা ব্রহ্মস্বরূপ। জ্ঞানী এবং অজ্ঞানীর পার্থক্য এই যে একজন তাঁর স্বরূপ জানেন, অপরজন জানেন না। হরিদ্বারের টিকিট কেটে যদি মাঝরাস্তার সৌন্দর্যে মুগ্ধ হই ও নেবে পড়ি, তবে ভুল করা হবে। রাস্তায় ধর্মশালা আছে, পথিক সেখানে বিশ্রামও করে; কিন্তু মোহ আসে যখন ধর্মশালা গন্তব্যস্থলে পরিণত হয়। জীবপ্রকৃতিতে এজাতীয় মোহ আছে, কিন্তু মোহ কাম্যও নয় তত্ত্বও নয়।

: কিন্তু জ্ঞানী তো গন্তব্যস্থানে পৌঁছে গেছেন; তাঁর সম্বন্ধে এই যুক্তির প্রয়োগ সম্ভব কি?

: কৃতোপাস্তি জ্ঞানীর সম্বন্ধে এই যুক্তি চলে না, কারণ বিরোধী সংস্কারের অভাব বা পরিশুদ্ধি হেতু তিনি তত্ত্বসাক্ষাৎকার মাত্রই জীবমুক্ত। কিন্তু অকৃতোপাস্তি

জ্ঞানীর বিরোধী সংস্কার থাকে, সুখ-দুঃখাদির ভোগও হয়; এঁরাই গীতোক্ত “অপরমযোগী”। কৃতোপাস্তি জ্ঞানীরা “পরমযোগী।”

: অপরমযোগীর তা হলে লাভ কী হলো ?

: অজ্ঞানের আবরণী শক্তির নাশ হেতু স্বরূপ-নিশ্চয়, ‘কোথা হতে আসি কোথা ভেসে যাই’ এই সমস্তার অন্তিম সমাধান; এবং প্রারব্ধভোগান্তে বিদেহমুক্তির চিরশান্তি।

: জ্ঞান দ্বারা যদি অজ্ঞানের নাশই হলো তবে প্রারব্ধ আসে কেন? প্রারব্ধ তো অজ্ঞানেরই কাজ ?

আসে যে তা অনুভবসিদ্ধ। না আসলে মোক্ষশাস্ত্রই অসিদ্ধ হয়ে যেতো, সকলকেই চলতে হতো সাংখ্যোক্ত অন্ধপরমারাত্নায়ে। অর্থাৎ তত্ত্বজ্ঞানও প্রারব্ধবশতঃ হয়, সুতরাং প্রারব্ধের নাশক হয় না।

: তবে তো অজ্ঞানীর মতো জ্ঞানীকেও প্রারব্ধজ্ঞান সুখদুঃখাদি ভোগ করতে হচ্ছে ?

: অজ্ঞানীর মতো নয়। রজ্জুজ্ঞানের পর সর্পদর্শন হলেও সর্পভ্রম আর হয় না। তবে ভুগতে যে হয় তা ঠিকই। এজ্ঞানই অপরমযোগীর সম্বন্ধে শাস্ত্রের বিধান হচ্ছে মনোনাশ এবং বাসনাশ্রয় বা পুনঃপুনঃ তত্ত্বসেবা দ্বারা গীতোক্ত স্থিতপ্রজ্ঞত্ব লাভের চেষ্টা।

: প্রারব্ধ যদি স্থিতপ্রজ্ঞত্ব লাভ না থাকে ?

: কী আছে তা তো জানা নেই। সুতরাং শাস্ত্র বলবে, স্থিতপ্রজ্ঞ হওয়ার জ্ঞান চেষ্টা করো। তারপর যিনি তত্ত্বসাক্ষাৎকার পর্যন্ত পৌঁছলেন তিনি থেমে যাবেন কেন? মুক্তির জ্ঞান-ই না চেষ্টা? জীবমুক্ত না হতে পারলে চেষ্টা থেকে বিরত হবেন কেন? বিরোধী সংস্কারের প্রাবল্যে বিস্মৃতি আসতে পারে, কিন্তু সেই বিস্মৃতি সাময়িক।

: দৃষ্টান্ত ?

: মহর্ষি যাজ্ঞবল্ক্য। জ্ঞানলাভের পর তিনি সংসারী হন, দুটি বিবাহ করেন, জনকরাজ্যের পৌরোহিত্য করে বিত্তসঞ্চয় করেন, পণ্ডিত সভায় সকলকে পরাস্ত করে খ্যাতি অর্জন করেন। তারপর সংসার ত্যাগ করে জীবমুক্তির জ্ঞান বিদ্বৎ-সম্মান নিয়ে তপস্যায় ব্রতী হন। অর্থাৎ পরমযোগী হয়ে ব্রাহ্মী স্থিতি লাভ করেন। এষ ব্রহ্মবিদ্যাং বরিষ্ঠঃ। সাধুজী নির্বাক, আত্মস্থ, প্রশান্ত...আমি-ও

(১) “আদৌ তু যোকো জ্ঞানেন দ্বিতীয়ে রাগসংকরাৎ। কর্মকরাভূতীরন্ত ব্যাখ্যাৎত যোকলক্ষণম্।”

নিজের ভিতর ডুব দিতে চেষ্টা করি, দেখি লক্ষ্যশূন্য লক্ষ বাসনা ছুটেছে  
গভীর আঁধারে... প্রশ্নাম করে বিদায় নিই।

## ॥ ৩-আ ॥

: একটা প্রশ্ন আছে।

: কী ?

: প্রেমলাভের উপায় কী ?

: অবাক করলেন।

: কেন ?

: বাঙ্গালীর মুখে এ প্রশ্ন শোভা পায় না।

: আমি বাঙ্গালীর অধম।

: আমার জিভ নেই বলার মতো হচ্ছে ব্যাপারটা।

: বুঝলুম না।

: প্রেম লাভ কী-করে হয় এই তো প্রশ্ন আপনার ?

: আজ্ঞে হাঁ।

: যা-করে ছোটবেলা থেকে প্রেমলাভ করে আসছেন...খোল করতাল বাজিয়ে।

কীর্তন করেন তো ?

: করি না, শুনি। অথবা শুনতুম। এখন আর ভালো লাগে না।

: কেন ?

: জীবন-সমস্তার সমাধান-সূত্র ওতে খুঁজে পাই না; অবাস্তব ভাবালুতা মনে হয়।

: ভাল কথা নয়। বাঙ্গালীর মুখে এমনধারা কথা শুনবো আশা করিনি।

: তাহলে কীর্তন করতেই উপদেশ দিচ্ছেন ?

: বাঙ্গালীর কী আর সম্বল ? মহাভারতের কৃষ্ণ, মথুরার কৃষ্ণ, দ্বারকার কৃষ্ণ—  
সব ত্যাগ করে ধরেছি বৃন্দাবনের কৃষ্ণ এবং খোল করতাল। ও-ছাড়া আব  
গতি কী ? আমরা গান গেয়ে থাকি—বেদবেদান্ত পায় না অন্ত খুঁজে বেড়ায়  
অন্ধকারে। আর ভাবনা কিসের ? বেদ বেদান্ত তো নস্তাং করে বসে আছে।  
শিলার (Schiller)-এর একটি কথা আছে—Against stupidity even the  
gods are helpless, চূড়ান্ত মূর্খতা যেখানে কাম্য দেবতারও সেখানে  
অসহায়, কিছু করে উঠতে পারেন না।

: ভক্তির রাস্তাও তো আছে একটা ?

: কোথায় আছে ? আছে রসকীর্তন, নায়ক-নায়িকা ভাবের ছাড়াছড়ি।  
 ব্রহ্মভীষ্ম সমীক্ষায় কী দাঁড়াবে ?

: শুদ্ধাভক্তির ধারা ?

: ছিল ; যুগধর্মের প্রভাবে অত্যন্ত ঘোলাটে হয়ে গেছে। তার সঙ্গে আবার  
 মিশেছে রবিবাবুর গান, মানে পাঁচ ঘাটের জল ; ফলে প্রাচীন ধারাটির  
 নাজেহাল অবস্থা। সবই যুগধর্ম। ঘি আর পেটে সয় না, দালদা ছাড়া  
 গতি কী ?

: বৈষ্ণব মহাজন আর রবিবাবুতে—

: আকাশ-পাতাল প্রভেদ। রবিবাবু বৈষ্ণবদের বিগ্রহ তাগ করেছেন ; বৈষ্ণব-  
 সাধনায় নাম-নামী অভেদ ; পৌত্তলিকতার ভয়ে রবিবাবু ‘নাম’ বর্জন করেছেন,  
 যদিও হরেন্দ্রনামৈব কেবলম্ ; রেখেছেন শুধু বৈষ্ণবদের মন্দির ও তার  
 কারুকার্য ; আবার কবীর প্রমুখ সাধুদের ব্রহ্মজ্ঞানকে ছুঁয়ে দিয়েছেন—বৈরাগ্য  
 সাধনে মুক্তি নেই। যোগাসন ? বার্থচেষ্টা। ইন্দ্రిয়ের দ্বার রোধ ? মুঢ়তা।  
 ব্রহ্ম সত্য, জগৎ মিথ্যা ? হিং টিঃ ছট্। শাস্ত্র ? তর্কজাল। যে রাস্তায় যিনি  
 চলেন নি সে রাস্তা সম্বন্ধে বলবার তাঁর কী অধিকার ? শেষ পর্যন্তও তিনি  
 মত বদলান নি। আমার এক বন্ধু রবিবাবুর ‘রোগশয্যায়’ কবিতা থেকে পড়ে  
 শোনাচ্ছিলেন—অরণ্য সভাটিই খাঁটি জিনিস, বৈরাগ্য-বাদীরা যদি তার অপবাদ  
 করে থাকেন তা শুধু ঋষিদের “অহংকৃত আশ্রবাক্যবৎ”<sup>১</sup>...কিন্তু কবীরপন্থীদের  
 সবটুকু বর্জন করেন নি ; রেখেছেন তাঁদের অরূপরতনের খোলসটি। এর সঙ্গে  
 জুড়ে দিয়েছেন পাশ্চাত্যদের প্রকৃতি পূজা। অর্থাৎ মন্দির বৈষ্ণবদের,  
 চুনকাম কবীরপন্থীদের এবং চুমকি ও জহরৎ প্রকৃতিপূজক পাশ্চাত্যদের—  
 ভিতরে না আছেন শ্রামশূন্যের, না আছেন শিব। উপনিষদের পুরুষকে  
 হাতছানি দেওয়া হয়েছে, কিন্তু বিজাতীয় জাঁকজমক দেখে তিনি গা ঢাকা দিয়ে  
 সরে পড়েছেন।

: রবীন্দ্রনাথকে যদি প্রাণব্রহ্মের ঋষি বলি ?

: কাব্যের দিক থেকে বলছেন তো ? কারণ মতবাদই বিচারের বিষয় হতে  
 পারে।

: হ্যাঁ, কাব্যের দিক থেকেই বলছি, ব্যক্তির দিক থেকে নয়।

- : তবে কবি শব্দ প্রয়োগই নির্দোষ।
- : ঋষি বললে—?
- : দোষ হয় ; কারণ প্রাণত্রস্ত তত্ত্ব নয় ; প্রাণ জড় বস্তু, দৃশ্য, মিথ্যা।
- : ঋষি না বলে উপাসক যদি বলি ?
- : কিসের উপাসক ? প্রাণ তো তত্ত্ব নয়।
- : ‘সীমার মাঝে, অসীম তুমি’ এই মন্ত্রের ?
- : ঘটজ্ঞানের উপাসনা হয় না ; উপাসনা করাও নিরর্থক।
- : বুঝলুম না।
- : ঘট সীমিত বস্তু ; সেই অধিষ্ঠানে ‘অসীম’ গৃহীত হলে অথও সত্তা ঘটরূপে দেখা দেয়। এটাই জীবের স্বাভাবিক অবস্থা—এর জ্ঞান উপাসনার কোনো প্রয়োজন নেই। “অসীমের” অধিষ্ঠানে সীমিত ‘ঘট’ গৃহীত হলে ঘট চিন্ময়রূপে দেখা দেয়। এই অল্পভূতি তাত্ত্বিক, ও প্রযুক্তসাধ্য। শাস্ত্র হবে অজ্ঞাতজ্ঞাপক ; অজ্ঞাত তত্ত্বটি কী, এবং সেই তত্ত্বলাভের সাধন কী, এদুটো দিগ্‌দর্শন থাকে শাস্ত্রে। জ্ঞাত-জ্ঞাপক হলে শাস্ত্র শাস্ত্রই নয়।
- : সীমার মাঝে—
- : ও হয় না। ভগবান্‌ শ্রীকৃষ্ণ এজ্ঞাই বিশেষ করে সাবধান করে দিয়েছেন—ন ত্বহং তেষু, তে ময়ি।<sup>১</sup>
- : সৌন্দর্যের উপাসক বলা যায় তো ?
- : সৌন্দর্য তো ঘটজ্ঞানেরই অবস্থাবিশেষ, তত্ত্ব নয়।
- : তত্ত্ব নয় কেন ?
- : অসুন্দর আছে বলে।
- : অসুন্দর তো নিষিদ্ধই হচ্ছে ?
- : এড়ানো হচ্ছে, নিষিদ্ধ হচ্ছে না। নিষিদ্ধ হলেও সামগ্রিক দৃষ্টি আসে না। অঘটকে নিষেধ করে ঘটের জন্ম, সুতরাং ঘট এবং অঘট উভয়ে সমসত্ত্বাক। তেমনি অসুন্দরকে নিষেধ করে সুন্দরের উৎপত্তি, অতএব উভয়ে সমসত্ত্বাক। অর্থাৎ ব্যাবর্তক বৃত্তিতে দ্বন্দ্ব থেকেই যায়।
- : দুঃখকে বর্জন করে সুখকে খোঁজা তো জীবের স্বাভাবিক ধর্মই ?
- : নিশ্চয় ; কিন্তু স্বন্দের অবসান হয় না বলে প্রাপ্তি হয় কেবলই দুঃখ।
- : সুন্দর যদি তত্ত্ব না হয় তবে শ্রামসুন্দরের স্থান কোথায় ?

ঃ ‘শ্রাম’ মানে ‘অশব্দম্ অস্পর্শম্ অরূপম্ অব্যয়ম্ তথারসং নিত্যম্ অগন্ধবচ্চ যৎ’<sup>১</sup> ; এই ‘শ্রামই’ ‘সুন্দর’ ।

ঃ শব্দস্পর্শাদির নিষেধে ব্যাবর্তকবৃত্তি আসছে না ?

ঃ নিত্যবস্তু সম্বন্ধে এই শব্দা ওঠে না । সত্তা-ও-স্ফুরণরূপ নিত্য শ্রামসুন্দর শব্দস্পর্শাদি যাবতীয় বস্তুর আত্মা । সুন্দর এবং অসুন্দর উভয়কে আমরা যুগপৎ তখনই গ্রহণ করি যখন উভয়ের অন্তর্য্যুত আত্মা শ্রামসুন্দর গৃহীত হন—যত্র ত্বস্ত সর্বম্ আত্মৈবাত্মং<sup>২</sup> । নিত্য শ্রামসুন্দরের সঙ্গে অনিত্য রূপরসাদির ব্যাবর্তক সম্বন্ধ হয় না, কারণ নিত্য এবং অনিত্য সমসত্তাক নয় । আর যদি ব্যাবর্তক সম্বন্ধ মানেন তবে রূপরসাদির সৈত্তা এবং স্ফুরণই অসম্ভব হয় ।

ঃ রূপরসাদির ভিতর তো আমরা শ্রামসুন্দরকেই খুঁজছি ?

ঃ কিন্তু পাচ্ছি কৈ ? ন ত্বহং তেষু, তে ময়ি । অজ্ঞানাজ্ঞাকারে খোঁজা হচ্ছে । তবে সব খোঁজাই তাঁকে খোঁজা ।

ঃ শেষ পর্যন্ত দেখা দেন তো ?

ঃ দেন বই কি !

ঃ তা হলে অবিচার ভিতর দিয়ে চলতে চলতে জ্ঞানেতে পৌঁছই ?

ঃ নিশ্চয় । জীবমাত্রই তো সাধক—মম বত্স্যান্তবর্তন্তে মনুষ্যাঃ পার্থ সর্বশঃ<sup>৩</sup> । পরমাত্মা সকলেরই আত্মা ; সকলেই সাধক ।

ঃ বিশেষ অর্থে সাধক কে ?

ঃ গীতার ভাষায় ‘অনন্তাশ্চিন্তয়ন্তো মাং যে জনাঃ পযুপাসতে’<sup>৪</sup>, অর্থাৎ যারা প্রাপঞ্চিক সব কিছু চিন্তা ছেড়ে শুধু ঈশ্বর-চিন্তায় নিযুক্ত থাকেন । এই অর্থে সাধক ছিলেন তুলসীদাস, কবীর, হরদাস, লোকনাথ গোস্বামী, নরোত্তমদাস, রামপ্রসাদ, কমলাকান্ত । প্রেমলাভের প্রস্ন করেছিলেন তো ? বৈরাগ্য ছাড়া প্রেম হয় না । ধরুন বৈষ্ণবদের—

সুখের লাগিয়া এঘর বাঁধিহু অনলে পুড়িয়া গেল ।

অমিয় সাগরে সিনান করিতে সকলি গরল ভেল ॥

সাধকের এই জালা, সর্বহারার এই বেদনা রবীন্দ্রনাথের কাব্যে কোথায় আছে ? কোথায় ‘হিয়া দগদগি পরান পোড়নি ?’ সংসার পুড়ে ছারখার হয়ে যাবে, চিন্তা জলে মরুভূমি হবে, ভগবানের নামে ‘দেওয়ান’ হয়ে যাবে, যেমন হয়েছিলেন মীরা বাঈ—তবে না সাধনা । জ্ঞান, বীর্ষ, বিবেক, বৈরাগ্য, তপস্তা,

শীলচর্চা, সব ছেড়ে ফাঁকতালে প্রেমলাভ করতে চেয়েছে বাঙ্গালীরা; তার কল পাচ্ছে এখন। কিন্তু তবুও কি শিক্ষা হচ্ছে? যা তো আর কম খায় নি! এখনো খাচ্ছে! কিন্তু ঘুম ভাঙে কৈ?

: তত্ত্বসাধনাও তো বাংলার একটা বিশিষ্ট সম্পদ?

: হারিয়ে ফেলেছি। সাধনার ধারা অবিচ্ছিন্ন থাকে সাধকের তপস্যা ও বীর্যের প্রভাবে। সাধক কোথায়? যা-ও বা আছেন তাঁদের সঙ্গে সমাজ-জীবনের যোগ কোথায়?

: পরমহংসদেব?

: শুদ্ধ তত্ত্ব; বৈষ্ণবসাধনার রকমফের। ম-কারাদি নিয়ে শব-সাধনা কোথায়? বীরাচারই হলো তত্ত্বের বৈশিষ্ট্য; কিন্তু আমাদের সমাজ ও-জিনিসকে কোনোদিনই ভালো চোখে দেখে নি। কাজেই ধারা শুকিয়ে গেছে। বাঙ্গালীদের ধাত হচ্ছে বৃন্দাবনী বৈষ্ণবের। সত্যকে দেখবার ও হজম করবার সাহস ও বীর্য হারিয়ে ফেলেছি। বিপ্লবীদের ভিতর ঐ ধারা সতেজ হয়ে উঠেছিল; ভেজাল অহিংসাবাদ এসে আবার তার মুখে বালি চাপা দিয়েছে। সুতরাং সম্বল মাত্র রসকীর্তনের আত্মপ্রবঞ্চনা।

: তত্ত্বধারাকে পুনরুজ্জীবিত—

: ও হয় না। ধারা একবার শুকিয়ে এলে তাকে বাঁচানো মুশ্কিল! মরা গাঙে আর বান ডাকে না।

: অনুকূল অবস্থা তো আছে এখন বাংলাদেশে। যে শ্মশানলীলা চলছে—

: তা সন্দেহও হচ্ছে না কেন? আসলে তাত্ত্বিকদের বীরাচারও একটা উৎকট ভাববিকার, *Sentimental grotesquerie*।

: বুঝলুম না।

: তাত্ত্বিকরা শ্মশান সাধনা করেন কেন? মড়া দেখে মৃত্যুর সঙ্গে লড়াই করা, ভয় তাড়াবার জন্তু কারণ পান করা, তাগ করার জন্তু ভোগ করা—এসব মনের বিকার ছাড়া আর কী? শ্মশানের ডোম মহাভৈরব হয় না কেন? অতো মড়াও কেউ বাঁটে না, অতো মদও কেউ খায় না। শ্মশানে না গেলে যদি বৈরাগ্য না হয় তবে শ্মশান-বৈরাগ্যের বেশী আর কিছু হয় না। জীবনের ক্রুরতা ও বিভৎসতার সঙ্গে পরিচয় দরকার? কলকাতার সহরে তো তার মচ্ছব<sup>১</sup> লেগে আছে—এমনি উৎকট, যে তাত্ত্বিকরা স্বপ্নেও তা ভাবতে পারেন না। তা সন্দেহও ভৈরব বাবা হতে পারি না কেন আমরা?



: অনুধাবন করে দেখি না বলে।

: ঠিক বলেছেন। অনুধাবন করে দেখা দরকার, বিচার করা দরকার; স্বপ্নরূপে, পুঞ্জানুপুঞ্জরূপে, নিবিষ্ট চিত্তে, তন্ময় হয়ে বিবেকের শানিত অন্ত্র ব্যবহার করা দরকার। কিন্তু এই বিচার নিভৃত গৃহকোণে ভালো হয়, না শ্মশানে মদ খেয়ে মড়ার বুকে বসে, 'বল হরি হরি বল' ইত্যাদি লোমহর্ষক ধ্বনির মাদক আবেশে ভালো হয়?...তত্ত্ব সাধনা এজগতই হয়তো লোপ পেয়েছে। কিছু কিছু শক্তি হয়; মারণ, বশীকরণ ইত্যাদির প্রলোভন আসে; মোহাক্ষ হয়ে আত্মপ্রবঞ্চনা করে... কিন্তু যে মৌলিক প্রশ্নের মীমাংসার জন্ত শ্মশানে আসা, যে বিবেকনিষ্ঠা ও চারিত্রিক দৃঢ়তা দ্বারা সেই মীমাংসা সম্ভব সেগুলোকেই ডুবিয়ে দেয় বিশ্বস্তির পৌনঃপুনিক কারণবারিতে।

: উপায় নেই তা হলে? পড়ে পড়ে কেবল মারই খেতে হবে?

: অজ্ঞানেনাবৃতং জ্ঞানং তেন মুহুস্তি জন্তবঃ। উপায়?

সাধুজী চূপ হয়ে গেলেন, চোখ স্বপ্নাতুর...কী ভাবছেন...ধ্যানস্থ...গানিকক্ষণ পর দীর্ঘনিঃশ্বাস ফেলে বলেন—

: এক কালে বিপ্লবী ছিলাম; গীতাই ছিল পথপ্রদর্শক; সংস্কারটা হয় তো এখনো যায় নি—গীতার উপর কটাক্ষ দেখলে সহ্য হয় না। গীতাত্তেই তান্দ্র রাস্তার খোঁজ পাই। ছেড়ে দিলুম আগেকার পথ...পরিত্রাজক হয়ে ঘুরে বেড়াই...মন অশান্ত, গন্তব্যের বালাই নেই...দু-চোখ যেখানে নিয়ে যায় সেখানেই যাই...দু-দিন থাকি, আবার চলি...তেজপুর এসে শুনলুম এক মহাত্মার কথা। চল্লম তাঁর খোঁজে। গভীর জঙ্গল...জনমানবের চিহ্ন নেই...ব্রহ্মপুত্রের ধার দিয়ে সফ্র একটি পায়ে-হাঁটা রাস্তার দাগ...আসামের জঙ্গল, কখন কী বেরিয়ে আসে বলা যায় না...ঘণ্টা দুই চলবার পর দেখি ছোট্ট একটি পাহাড় নদীর কোল ঘেঁষে দাঁড়িয়ে। এমনি একটি পাহাড়ের গুহায় নাকি সাধুজী থাকেন। খুঁজে খুঁজে গুহার রাস্তা বের করে ঢুকে পড়লুম...ঘন নিঃশব্দ অন্ধকার...বাঘভাল্লুকের আশ্রয় হওয়াও বিচিত্র নয়...ক্রমে অন্ধকার ফিকে হয়ে আসে...চোখ চেয়ে দেখি মহাত্মাজীর প্রশান্ত গম্ভীর মূর্তি। হয় তো ধ্যানস্থ ছিলেন। বসলুম...জমাট স্তব্ধতা...কোন এক নিরুপম নিথর রাজ্যে এসে পড়েছি...কতক্ষণ ওভাবে ছিলাম মনে নেই...সাধুজী আমার দিকে তাকিয়ে বলেন—

মনন করো বেটা, মনন করো।

## ॥ ৩-ই ॥

: দুর্বাসার কাছে এতো ঘন ঘন আসতে নেই।

: মার্জনা করবেন, কিন্তু ‘দুর্বাসা’ না-হওয়াই বাঞ্ছনীয় নয় ?

: ( হেসে বলেন ) তা বলা যায় না।

: কেন ?

: যেমনি বুনো ওল তেমনি বাঘা তেঁতুল দরকার।

: বুনো ওল না হয়ে শকরকন্দও তো হতে পারে ?

: তা হলে বাঘা তেঁতুলের প্রয়োজন নেই। কি জানেন ? অনেক রোগ আছে যার ওষুধ হচ্ছে শক-থেরাপি ( Shock-therapy )। আমার এক গুরুভাইর দৃষ্টান্ত দিচ্ছি। ভাল সাধক, বেশ সাধন ভজন করে যাচ্ছে ; হঠাৎ খেয়াল চাপলো, কিছু টাকা জমানো দরকার, নইলে পরিব্রাজক জীবনে বড্ড কষ্ট হয়। প্রথমে চাকরি নিলো ; তারপর একখানা বই লিখতে শুরু করলো। একদিন জিজ্ঞেস করি—

: কতো জমলো ?

: হাজার খানেক। আর এক হাজার হলেই ছেড়ে দেবো।

: এক হাজারেই ইতি দেবে যে বলছিলে ?

: জিনিসপত্র বড্ড মাগগি হয়ে যাচ্ছে।

: এখন থেকে কি দাম স্থির হয়ে থাকবে ?

: তা নয়, তবে—

: ধ্যান হচ্ছে ?

: ভালো বসছে না, বইর কথা—

: ছেড়ে দাও সব।

: বইটা আদ্যেকের উপর হয়েছে, এখন—

দিলুম কষে এক চড়। পরদিন গুরুভাই বেশ প্রসন্নচিত্তে এসে বললে, ‘চললুম দাদা, মোহটা কেটেছে।’ আমি মস্তব্য করি, ওষুধটা একটু নূতন ধরণের।

: মোটেই না। চীনে জেন শাখার বৌদ্ধদের ভিতর এই প্রক্রিয়ার প্রচলন আছে। মনের ভিতর জট পাকিয়ে গেলে তাঁরা কোয়াঙ্ ( Koan ) প্রয়োগ করেন—একটা কি দুটো কথা, কথার মানেও অনেক সময় থাকে না, অথবা বৈদ্যুতিক আঘাত। ধরন, গুরুশিষ্য পুকুর পাড় দিয়ে যাচ্ছেন। শিষ্য বলছেন, ‘ধ্যান বসে না কেন ?’ গুরুজী এক ধাক্কা দিয়ে শিষ্যকে পুকুরে ফেলে দিলেন।

: মানে ?

: “ডুব দেবে মন কালী বলে” ।

: দাওয়াইটা যেমনি উৎকট তেমনি উদ্ভট ।

: প্রকৃতির একমাত্র অমোঘ অস্ত্র ।

: প্রয়োগ ক্ষেত্র ?

: ব্যাষ্টি ও সমষ্টি জীব ।

: দৃষ্টান্ত ?

: যুদ্ধ বিগ্রহ, মহামারী, প্রাণ, ভূমিকম্প, ইত্যাদি সমষ্টির জন্ত ; শোক-তাপ, দুঃখ-দারিদ্র্য, আধি-ব্যাধি, আশাভঙ্গ, ইত্যাদি ব্যাষ্টির জন্ত । একরকমের নেচারোপাধি ।

: সাধুরা তা হলে প্রকৃতির পদাঙ্কানুসরণ করাই শ্রেয়ঃ মনে করেন ? অর্থাৎ মড়ার উপর খাঁড়া ধরেন ? কৃপার কোনো স্থান নেই ?

: কৃপার তো ঝড় বয়ে যাচ্ছে দেশে ! ইংরেজরা কৃপা করে আপনাদের স্বরাজ দিয়েছেন ! গান্ধিজী কৃপা করে স্বরাজ পাইয়ে দিয়েছেন ! গান্ধিজীর অনুচরগণ কৃপা করে স্বরাজের ফল খাওয়াচ্ছেন ! সরকারী বেসরকারী সব অনুষ্ঠানে তো কেবলই কৃপাভিক্ষা ও কৃপাদান । কৃপার উপরই তো সকলে বেঁচে আছে...তারপর সাধুমহাত্মা ? কৃপা করবার জন্ত তাঁরা তো আসমুদ্রহিমাচল ঘুরে বেড়াচ্ছেন ! দয়ানিধি, পতিতপাবন, আশ্রিতবৎসল—ভবে এসেছেন শুধু জীবকে তরাবার জন্ত । তাঁদের চরণাশ্রিত হয়ে যান, হেলায় লঙ্কা করিবে পার । আপনার কিছুই করতে হবে না, অথবা যা খুশি করে যেতে পারেন...Sin that you may be forgiven—পারের কাণ্ডারী তো আছেই ।...কতো সাধু দেখলুম ! শিষ্য ও শ্রাবক জুটিয়ে নিজেও ডুবেছেন, পরকেও ডুবিয়েছেন...সমাজ যাতে উচ্ছৃঙ্খল না হয় সেজন্ত গৃহীদের সঙ্গে বিরক্তদের যোগ থাকা দরকার—কিন্তু যোগাযোগের ফল-দেখে এখন শিউরে উঠি । প্রয়োজন বিরক্তদের আদর্শে গার্হস্থ্যজীবন পরিশুদ্ধ হওয়া ; কিন্তু হচ্ছে গৃহীদের ভোগাদর্শে বিরক্তদের সর্বনাশ ।

: অনেক প্রতিষ্ঠান থেকে কল্যাণকর কাজও তো হচ্ছে ?

: উলট পুরাণ হলো না ? সন্ন্যাস মানে কর্মত্যাগ । কাজ করবে তো সংসার ত্যাগ কেন ? কর্মদ্বারা চিত্তশুদ্ধি গৃহস্থের ধর্ম । গৃহীরা সে কাজের ভার সন্ন্যাসীদের ঘাড়ে চাপিয়ে অধর্ম ডুবে আছে ; আর সন্ন্যাসীরা কাজের অছিলায়

শিষ্য করছে, চাঁদা উঠাচ্ছে, মঠ আশ্রমের নামে জমিদারি করছে, আর ভবপারের কাণ্ডারী সঙ্গে জাহান্নমে যাচ্ছে। এক প্রতিষ্ঠানের সঙ্গে অগ্র প্রতিষ্ঠানের আবার কী রেষারেষি! কোন্ প্রতিষ্ঠানের মালিক শ্রেষ্ঠ কাণ্ডারী এই নিয়ে বক্তৃতা, প্রবন্ধ, প্রচার, প্রোপাগেণ্ডা। আর প্রতিষ্ঠানের ভিতর যে কী পঙ্কিলতা! ধন্দ, কলহ, দলাদলি, বিদ্বেষের চূড়ান্ত!

: তা হলে তো আমরা অনেক ভালো আছি।

: নিঃসন্দেহ। কারণ আত্মপ্রবঞ্চনা নেই। সংসারী লোক জানে এবং বলে, ‘পাপীতাপী আমরা, বড়রিপুর দাস। কী করি! ভগবান্ যখন দয়া করবেন!’ উত্তম কথা। কিন্তু দয়াবতারের দালালরা?

মন ন রংগাএ, রংগাএ জোগী কপড়া

কান বা ফড়ায় জোগী, জটবা বাঢ়োলৌ,

দাটী বঢ়ায় জোগী হোই গোলৌ বকরা।

: সংসারীদের যে বাগড়া তার কারণ খুবই স্পষ্ট—একটা আপেল, তাতে কে কতোটা দাঁত বসাতে পারে। কিন্তু সাধুরা—

: কোথায় সাধু? দালালি করেই সময় পায় না, সাধনভঞ্জন করবে কখন? সব অক্ষমতার বিলাস, সুপার-ইগো (Super-ego)র খেলা। কার গুরু বড়! অদ্ভুত মনোবৃত্তি!

: গুরুর প্রতি শ্রদ্ধা—

: এতো শ্রদ্ধা নয়, মূঢ়তা; এবং আধুনিক যুগের অবদান। হিন্দুদের বিশেষত্ব হচ্ছে নৈর্ব্যক্তিক তত্ত্ববিচার। অদ্বৈতবাদ, দ্বৈতবাদ, বিশিষ্টাদ্বৈতবাদ, সাংখ্যবাদ, কর্মবাদ, অনেক এমন মতবাদ আছে। শাস্ত্রীয় আলোচনা হচ্ছে এর কোনটি স্রুতি এবং যুক্তি দ্বারা কিভাবে প্রতিষ্ঠিত হয় এ নিয়ে; শঙ্কর বড় কি রামানুজ বড় এ নিয়ে মাথাঘামানো ছিল না। সাধারণ লোকের ভিতরও যে ধন্দ ছিল তা সাধ্যবস্ত “রাম” কিংবা “শিব”কে অবলম্বন করে। “রামদাস” বড় কি “শিবদাস” বড় এ প্রশ্ন উঠতো না, কারণ উভয়েই সাধু, অতএব নমস্। তত্ত্বকে ছেড়ে মানুষকে ধরা হচ্ছে যাবনিক মনোবৃত্তি। হিন্দুধর্মবিগর্হিত এই মনোভাব প্রচারের মাধ্যমে সবাইকে যবন করে ছেড়েছে; দলীয় সংকীর্ণতা আধ্যাত্মিকতার স্থান নিয়েছে; নির্ভীক নৈর্ব্যক্তিক তত্ত্বচিন্তা দেশ থেকে বিতাড়িত হচ্ছে। বাঙ্গালীরা অক্ষম বেশী বলে এই রোগের প্রকোপও তাদের ভিতর বেশী।

: গলা শুনুন। বিলেতের একটি বাইবেল প্রচারণী সংস্থার পাত্রী সাহেব বড় এক

সাবানের কারখানার মালিকের নিকট সাহায্য চান। মালিক নিজের খরচায় দু-হাজার কপি বাইবেল ছাপিয়ে পাঠিয়ে দিলেন। বিলি করার পরদিন বিরাট এক মারমুখো জনতা বাইবেল প্রতিষ্ঠানের স্মৃতি—আকাশ মর্দাবাদ ধ্বনিতে মুখরিত। ব্যাপার বুঝে পাদ্রী সাহেব থ হয়ে গেলেন—সাবানের মালিক প্রত্যেক অধ্যায়ের শেষে একটি মরেল (moral) জুড়ে দিয়েছিলেন—

সুতরাং প্রত্যেক যিশু-প্রাণ ব্যক্তির কর্তব্য আমাদের X-মার্ক সাবান ব্যবহার করা।

: সেদিন রেডিওতে কমার্সিয়াল প্রোগ্রামে এ জাতীয় প্রচার শুনছিলুম—

ধুবিয়া জল বিচ মরত পিআসা।

সচ্চা সাবুন লেহি ন মুরথ, ধোবু বারহ মাসা ॥

সুতরাং কবীর বলে শোনো ভাই সাধু সুরজ সাবুন ইস্তেমালা কীজিয়ে। কিন্তু আপনার গল্লের—

: আছে একটু বাকী। কিছুদিন আগে কলকাতায় গিয়েছিলুম। আমার এক বন্ধু বললেন একখানা স্তবস্তোত্রের বই কিনে দিতে। দোকানে ভালো একখানা সংকলন পেয়েছিলুম; ছাপা বাঁধাই উৎকৃষ্ট; দামও খুব বেশী নয়। পাতা উলটোতে উলটোতে দেখি মাঝখানটাষ প্রতিষ্ঠান বিশেষের কাগুরারী উপব স্তোত্র, প্রার্থনা, শরণাগতি ইত্যাদি....

: আমাদের শেষ দুর্গটিরও যদি এই অবস্থা হয় তবে আশার বাতি তো একটিও থাকে না। এককালে মনে করতুম গান্ধিজীর সত্যগ্রহই কল্যাণের রাস্তা। কিন্তু গুর মৃত্যুর পব দেশে যে অন্ধকার নেবে এসেছে তাতে মনে হয় শেষ পর্যন্ত আমার আশঙ্কা সত্যে না পরিণত হয়।

: কী আশঙ্কা?

: সোক্রাতেসকে হত্যা করে তাঁর দেশবাসী ছারখার হয়ে গেছে; যিশুকে ক্রুশ-বিদ্ধ করে ইহুদীজাতি চরম দুর্গতি টেনে এনেছে। তেমনি যদি যুগযুগান্তর ধরে আমাদেরও অভিশপ্ত জীবন বহন করতে হয়—

: হতো, যদি ভারতে পতিতপাবনী গঙ্গা না থাকতো।

: গঙ্গা?

: গঙ্গাকে নাবিয়ে এনেছিলেন ভগীরথ তাঁর তপস্যার প্রভাবে। তপস্যার হোমান্নি ভারতে কখনো নিবে যায় নি। মহাতপাদের অভাব এখনো নেই। তাঁদের সাধনার ফল সুরধুনীর পুণ্যসলিল; সকল পাপ মা গঙ্গাই বিধোত করে নেবেন

...আর যদি তা না-ই হয়, ইওরোপের গায় ভারতও যদি ধ্বংসের পথে এগিয়ে চলে—ক্ষতি কী? দেশ-স্বাধীন সংস্কারটা এখনো কাটিয়ে উঠতে পারি নি; তবে বিক্ষিপ্ত আর তেমন হয় না; ধ্যানে বসলে বা একটু বিচার করলে তাড়ান যায়। নিজের অভিজ্ঞতা থেকেই বলছি, কোনো কিছুই জগতই মোহ রাখতে নেই। ভারতের জগতও নয়। মহাকালের বুকে কতো অনন্ত কোটি বিশ্বব্রহ্মাণ্ড ফুলিঙ্গের মতো জ্বলে ছাই হয়ে যাচ্ছে! কে তার খবর রাখে! যাক না নিবে বিশ্বব্রহ্মাণ্ড! আপনার তাতে কী? যাক ভারত খণ্ডের মতো শেষ হয়ে, ক্ষোভ কিসের? আপনার সত্তাকে বিনাশ করতে পারে কার সাধ্য?.....

নহি দ্রষ্টু দৃষ্টে বিপরিলোপো বিঘ্নতে...

অবিনাশিত্বাৎ!

॥ ৩-ই ॥

: কৃপার স্থান সত্যিই নেই?

: চিরকাল নাবালকই থাকবেন? নিজের পায়ে কোনো দিনই দাঁড়াবেন না? ভয়টা কিসের? নায়মাত্মা বলহীনে লভ্যঃ।

: মহাত্মারা কৃপা করেন না?

: করলেও কৃপাপ্রার্থী হয়ে নিজেকে ছোট করবেন কেন? বিশেষতঃ কৃপা করবার শক্তিই যখন নেই! পাঁচ হাজার বছরের মানব সভ্যতায় বুদ্ধদেবের মতো দ্বিতীয় আর একজন মহাত্মা আজ পর্যন্ত জন্মান নি। তিনি বলছেন, আমি তোমাকে রাত্তা দেখাতে পারি কিন্তু এক পা-ও এগিয়ে দিতে পারি না। আনন্দকে তো খুবই স্নেহ করতেন; মহানির্বাণের ঠিক আগে তাঁকে আশ্বাস দিচ্ছেন, নিজের জগত যত্ন করো, নিজের উন্নতির জগত সচেতন হও, নিজের কল্যাণ সম্বন্ধে অবহিত হও। কৈ! তাঁকে তো নির্বাণ পাইয়ে দিতে পারেন নি।

: সংসারে তো আমরা পরস্পরকে সাহায্য করে থাকি? অর্থ দিয়ে, সেবা দিয়ে, স্নেহভালবাসা দিয়ে—

: প্রাপ্তির ক্ষেত্রে তা সম্ভব, যেমন রাজপুরুষ তার আশ্রিতদের সাহায্য করে থাকেন; যদিও সেটা বাঞ্ছনীয় নয়। কিন্তু আত্মা সদাপ্রাপ্ত; অজ্ঞানহেতু স্বেচ্ছা বৃত্তিতে পারা যায় না। অজ্ঞানের নাশক জ্ঞান, করুণা নয়।

: তা হলে ভারতীয় তপস্বীদের তপশ্চর্যা আমাদের পাপনাশ কি ভাবে করবে? গ্রীকদের বা ইহুদীদের মতো—

: পার্থক্য আছে। গ্রীকরা সোক্রেতেসের জ্ঞানকেই প্রত্যাখ্যান করেছে, বিষ খাইয়ে মারাটা গোণ। তেমনি ইহুদীরা যিশু খ্রীষ্টের প্রেমধর্ম ও দিব্যজীবনকে অগ্রাহ্য করেছে; ক্রুশে বিদ্ধ করাটা প্রতীকমাত্র। ভারতের শ্রোতধর্মকে আমরা কখনো বিস্মৃত হই নি। বৈদিক যুগে যে আগুন জালানো হয়েছিল তাকে যুগের পর যুগ তপস্বীরা দীপ্ত রেখেছেন। সেই আগুনে নিজের প্রদীপ জালিয়ে নিতে পারেন—এই অর্থে কৃপা। নিবে গেলে জালাবেন কি করে? সেই দুর্ভাগ্য থেকে আমরা বেঁচেছি, এই মাত্র। কিন্তু নিজের প্রদীপ নিজেকেই জালাতে হবে, কৃপা করে কেউ জালিয়ে দিতে পারেন না।

: জালাবার উপায় ?

• “মনন করো বেটা, মনন করো।”

: ইওরোপের পণ্ডিতরাও তো মনন করছেন।

: মুখ্য প্রমাণটি বাদ দিয়ে।

: কোন্ প্রমাণ ?

: আপ্ত প্রমাণ, শ্রোত প্রমাণ, মহাবাক্য<sup>১</sup>রূপ শব্দপ্রমাণ।

: শব্দপ্রমাণের তাৎপর্য ঠিক বুঝি না। আমার এক দার্শনিক বন্ধু বলেন, আচার্য শঙ্কর যেখানেই যুক্তি দিতে পারেন নি সেখানেই ঋতিবাক্য উদ্ধৃত করে দায় সেরেছেন।

: পাশ্চাত্য যুক্তিবাদীদের এখানটায়ই ভুল হয়। পরোক্ষ বিষয়েই অনুমান প্রমাণ সার্থক, যেমন ‘পর্বতো বহিমান্ ধূমাত্’। কিন্তু অনুমিত্বারা অগ্নি প্রত্যক্ষ হয় না। পরমাত্মা সদা প্রত্যক্ষ—সাক্ষাদ্ অপরোক্ষাদ্ ব্রহ্ম<sup>২</sup>। অপরোক্ষ বস্তু সম্বন্ধে শব্দই মুখ্য প্রমাণ; যেমন ঘটাদি বস্তু দর্শনে চক্ষুরিন্দ্রিয়ই মুখ্য প্রমাণ। অনুমান প্রমাণ দ্বারা ঘটের অস্তিত্ব সিদ্ধ হয়, কিন্তু ঘটদর্শন হয় না। তেমনি আত্মদর্শনপক্ষে দশমমুমুসি<sup>৩</sup>। আপাতদৃষ্টিতে ‘ব্রহ্ম সত্য ও জগৎ মিথ্যা’ অসম্ভব বলে মনে হয়; এই অসম্ভাবনা নিবৃত্ত হয় মনন দ্বারা। আর বিষয়ভাবনা হেতু

(১) মহাবাক্য চারটি : (ক) ঋগ্বেদীয় ‘প্রজ্ঞানং ব্রহ্ম’ (ঐতরেয়); (খ) সামবেদীয় ‘তত্ত্বমসি’ (ছান্দোগ্য); (গ) যজুর্বেদীয় ‘অহং ব্রহ্মাস্মি (বৃহদারণ্যক); (ঘ) অথর্ববেদীয় (‘অয়মাত্মা ব্রহ্ম’ (মাণ্ডুক্য)।

(২) বৃহদারণ্যক ৩-৫-১।

(৩) প্রতিষ্ঠা আখ্যায়িকা। দশজন লোক নদী পার হয়ে দেখে একজন নেই। পঞ্চচারী এক প্রবীণ ব্যক্তি এদের কান্নাকাটির কারণ শুনে বুঝিয়ে দিলেন যে গণনাকারী নিজেকে বাদ দিয়ে নয়জন গুণেছিল। গণনাকারী নিজেই দশম পুরুষ—“দশমমুমুসি”।

চিত্তের বিক্ষেপবশতঃ মনন তত্ত্বাবগাহী হয় না ; এ জ্ঞান বিক্ষেপাত্মকে বিপরীত ভাবনা নিবৃত্ত করতে হয় নিদিধ্যাসন দ্বারা। কিন্তু তত্ত্বজ্ঞান লাভ করতে হয় শব্দপ্রমাণের সাহায্যে।

: মননের উপায়টা যদি একটু বিশদ করে বুঝিয়ে দেন।

: সাধুজী চূপ করে কী ভাবেন...পানিক বাদে প্রশ্ন করেন।

: ও নিয়ে মাথা ঘামিয়ে কী দরকার ? বেশ তো সুখে আছেন।

: সুখে নেই, অসুখে ভুগছি। অনেকদিন থেকেই।

: ও ! কী অসুখ ?

: সে অনেক কথা। যদি দয়া করে শোনেন তবে বলি।

: বেশ তো। বলুন।

বললুম। অনেক কথাই বললুম। মনটাও একটু হালকা হলো। সাধুজী মন দিয়ে শুনছিলেন। একটু নরমও হলেন। বললেন,

: দুঃখবোধ তো ভালো জিনিস। পরহিতে কাজ করুন না ?

: রুচি নেই ; প্রশ্নের মীমাংসা হয় না।

: সাংসারিক কাজকর্ম ও ভোগাদিতে ডুবে থাকুন।

: চেষ্টার ক্রটি হয় নি। তাৎকালিক বিন্দুটি আসে ; তারপর যথাপূর্বম্ তথা পরম্—একটানো অবসাদ।

: দুঃখের হাত থেকে সহজে নিষ্কৃতি নেই। আরও অনেক দুঃখ পোয়াতে হবে।

**From the frying pan to the fire !**

: আপত্তি নেই, যদি আগুনে পুড়ে সোনা হতে পারি।

: যদি আধ-পোড়া হয়ে থাকেন ?

: এ জন্মে তা হলে আশা নেই ?

: জন্মান্তরের কথা কে জানে ?

: তা হলে নিরুৎসাহ করছেন কেন ?

: খুব দুঃখ পাচ্ছেন, না ?

: মনে তো হয়।

: হঁ। দুঃখের যদি আত্যস্তিক নিবৃত্তি চান তবে বুদ্ধদেবের রাস্তায় চলুন।

বাসনার জ্ঞান দুঃখ, বাসনার নিবৃত্তিতেই শান্তি। জন্ম-মৃত্যু-জরা-ব্যাধি-দুঃখ-দোষানুদর্শনম্—এই ভাবনা দ্বারা বাসনা ত্যাগ করুন, দুঃখময় জগৎ শূন্যে পর্যবসিত হবে।



: কী থাকবে ?

: সর্বং শূন্যং শূন্যম্ ।

: শূন্যের দ্রষ্টা কেউ থাকবে না ?

: তা হলে সাংখ্যযোগ। প্রচলিত বৌদ্ধমতে শূন্যের দ্রষ্টা স্বীকৃত হয় না, যদিও মতভেদ আছে। সাংখ্য-পাতঞ্জল দর্শনে দ্রষ্টার স্বরূপে অবস্থিতিই তত্ত্ব। স্মৃতরাং দৃশ্য জীব-ও-বিশ্ব-প্রকৃতি থেকে দ্রষ্টাকে পৃথক্ করুন, বিবেক খ্যাতি লাভ হবে। মনন মানে প্রকৃতি হতে দ্রষ্টা পুরুষকে পৃথক্ করা।

: সাংখ্যবাদীরা তো প্রকৃতির সত্তা মানেন ?

: তা মানেন।

: দুঃখরূপ প্রকৃতি তা হলে থেকে যাচ্ছে না ?

: প্রকৃতি সম্বন্ধীয় অবিবেকই দুঃখের কারণ ; বিবেক খ্যাতিতে জগৎপ্রপঞ্চ ও মন-বুদ্ধি-অহংকার-চিত্ত, অর্থাৎ প্রকৃতি ও তৎকার্য জড় ও দৃশ্য হয়ে যায় ; স্মৃতরাং দুঃখদায়ক হয় না।

: কিন্তু ঈশ্বরের স্থান তো সাংখ্যানুভূতিতে নেই ?

: তা নেই। ঈশ্বরীয় সংস্কার যার আছে তার জন্ম ভক্তিমার্গ।

: ভক্তিমার্গে মননের প্রয়োগ কোথায় ?

: সব রাস্তাটাই। ভক্তিদ্বারা ঈশ্বরলাভ করতে চান তো ?

: আশ্চে ইয়া।

: ঈশ্বরলাভ হয় না কেন ?

: হয় তো ডাকার মতো ডাকতে পারি না বলে ; কিন্তু কী ভাবে ডাকলে ডাকার মতো ডাকা হয় তা জানি না।

: ঈশ্বরার্থে সর্বত্যাগ না করলে ডাকার মতো ডাকা হয় না।

: সর্বত্যাগ মানে ?

: জগৎ, ভারতবর্ষ, নিজের সুখদুঃখ, মন-বুদ্ধি-অহংকার, দেহ-ইন্দ্রিয়াদি, সব কিছু। জাগ্রত থেকে অহরহ মনন করতে হবে সর্বত্যাগ হচ্ছে কিনা, কেন হচ্ছে না, কোথায় জট পাকিয়ে আছে, ইত্যাদি। দেশের ভাবনা, পাখির গান, অশ্রু-পুলক-কম্প—এ সব-ও কম বন্ধন নয় ; বর্জনে দুঃখ আসে।

: সর্বত্যাগ হলে থাকবে কী ?

: থাকবেন ঈশ্বর—সচ্চিদানন্দ।

: ‘আমি’ থাকবো না ?

- : জলে যেমন চিনি থাকে—একাকার ও তৎস্বরূপ হয়ে।
- : তা হলে ভক্তির প্রয়োজন কী ?
- : একনিষ্ঠা ভক্তি না থাকলে ত্যাগই করতে পারবেন না। ঈশ্বরে যদি অচলা ভক্তি না থাকে, কার কাছে নিজেকে উজাড় করে দেবেন ?
- : অচলা ভক্তি আসবে কী করে ?
- : আছে, ধরে নিতে হবে।
- : যদি না থাকে ?
- : নাম করুন।
- : নামে যদি রুচি না থাকে ?
- : নাম করতে করতেই রুচি আসে, রুচির সঙ্গে ভক্তি বাড়ে, ভক্তি বাড়তে বাড়তে অচলা হয়।
- : সেই বিশ্বাস ছিল ; নামও করতুম। কিন্তু এখন রুচি নেই।
- : নেই কেন ?
- : বললুম তো আপনাকে : মনটাই যেন মরে গেছে—মনমরা যাকে বলে ; সিনিসিজম্ (cynicism) কিনা জানি না, তবে ঈশ্বরের নব নব রূপ দেখে ঈশ্বর-সন্তায়ই সন্দেহ এসেছে। দয়াময় আর্তিহর ভগবানের সঙ্গে আর্তি ও দুঃখের কি সমন্বয় হতে পারে ? ভেবে কূল-কিনারা পাই না।
- : ঈশ্বরে আর বিশ্বাস নেই ?
- : ঠিক যে নেই তা-ও বলতে পারি না। তবে মনের শঙ্কাগুলো থেকেই যাচ্ছে, নিরস্ত হচ্ছে না।
- : কী শঙ্কা ?
- : ঈশ্বর আছেন যদি তবে দুঃখ কেন ? পাপ, অসত্যের জয় কেন ? সব জায়গায়ই তো ঠকছি। ধর্মক্ষেত্রে অধর্ম কেন ? সবটাই কথার কারচুবি নয় তো ? আর পাঁচটার মতো এটাও ব্লাফ্ (bluff) বা ধান্ধা নয় তো ?
- : ছেড়ে দিন না এ-সব চিন্তা ?
- : পারি কৈ ? একই চিন্তার আবর্তে পাক খাচ্ছি।
- : তা হলে জ্ঞানমার্গের সাধনা করুন। মনন করতে হবে—ব্রহ্ম সত্যং, জ্ঞানম্ বিখ্যাতা জীবব ব্রহ্মৈব নাপরঃ। অর্থাৎ বিখ্যাত বিচার দ্বারা জগৎ ত্যাগ করে মহাবাক্যের শ্রবণ, মনন, ও নিদিধ্যাসন দ্বারা জীব ও ব্রহ্মের একাত্মতা উপলব্ধি করুন।

: হরেরদরে কিন্তু একই দাঁড়াচ্ছে—জগৎবর্জনটা সর্বত্রই সমান।

: তাতে আর সন্দেহ কী? রিস্ত না হলে পূর্ণ হওয়া যায় না! সর্বত্যাগই সাধনার মূল সূত্র।

: মূল সূত্র এক, লক্ষ্যও এক। ভিন্ন ভিন্ন রাস্তা কি তবে রুটির পার্থক্য হেতু?

: রুটির পার্থক্য আছে ঠিকই, তবে লক্ষ্য এক নয়।

: সব রাস্তায় একই জায়গায় পৌঁছনো যায় না?

: সাধ্য যদি ভিন্ন হয়, সিদ্ধি এক কী করে হবে? গীতাকার বলেন, ‘যে যথা মাং প্রপদ্যন্তে তাংস্তথৈব ভজাম্যহম্’।

: কিন্তু পথের শেষে?

: পথের শেষ আর যাত্রার শেষ এক জিনিস নয়। পথগুলো হচ্ছে ছক-কাটা; হাত তুলে অবধি দেখিয়ে দেওয়া হয়েছে; কিন্তু যাত্রার শেষ গৃহীত পথের অবধিকে অতিক্রম করেও হতে পারে। যেমন সাংখ্যমার্গের শেষ সীমা বা last post হচ্ছে বিবেক। কিন্তু প্রকৃতি বিবিক্ত হলেও নষ্ট হয় না; স্মৃতরাং ভেদবুদ্ধি থেকে যাচ্ছে। এই ভেদবুদ্ধিকে তাড়াবার জ্ঞান পাতঞ্জলোক্ত নির্বীজ সমাধি অভ্যাস করতে হয়; তার ফল প্রকৃতির পূর্ণ উপশান্তি।

: অর্থাৎ বৌদ্ধদের শূন্যাবস্থিতি?

: একটু পার্থক্য আছে। বৌদ্ধদের শূন্য বৈরাগ্যসম্ভূত; পাতঞ্জলের শূন্য বিবেকরূপ তত্ত্বনিষ্ঠ।

: এখানেই কি যাত্রার শেষ?

: বৈদাস্তিকরা স্বীকার করেন না।

: কেন? কী আর বাকি রইলো?

: সাংখ্যোক্ত বিবেকে যে ভেদবুদ্ধি বা logical opposition আছে নির্বীজ সমাধিতে তাকে ঘুম পাড়িয়ে রাখা হয়, কিন্তু নিরস্ত করা হয় না। কারণ-বশতঃ উদ্বুদ্ধও হতে পারে।

: শেষ তবে কোথায়?

: দ্রষ্টা ও দৃশ্যের বিবেকে নয়, একাত্মতায়; ‘যত্র ত্রস্ত সর্বম্ আত্মৈবাত্মং’—এই অনুভূতিতে। ‘সর্বভূতস্বমাআনং সর্বভূতানি চাত্মনি’ এই চরম দর্শনেই সকল স্বপ্নের চিরশান্তি।

## ॥ ৩-উ ॥

- : কাল যাচ্ছি দ্বারকা ; গুরুভাইর তাগিদ এসেছে।
- : সেখানে আশ্রম আছে ?
- : আশ্রম না, কুটিয়া। গুরুদেব সেখানেই দেহ রাখেন।
- : তারপর কোথায় যাবেন ?
- : কিছুই ঠিক নেই। আজ এখানে, কাল ওখানে।
- : কোথাও বসে যান না কেন ?
- : সন্ন্যাসী হবে ‘অনিকেত’ ; কোথাও বসতে নেই।
- : জিজ্ঞাসুর কল্যাণের জন্ম ?
- : কোথায় জিজ্ঞাসু ?
- : নেই ?
- : আছে, কিন্তু বিরল—

সাঁচে কা কোন্সি গাহক নহঁী, বুটে জগৎ পতীজ জী।

কহৈ কবীর সুনো ভাঙ্গি সাধো, আক্কাঁকো ক্যা কীজৈ জী ॥

সত্যি কথা শুনেতে কেউ চায় না, চায় স্তোকবাক্য। সাধুরাও অনেক সময় স্তোকবাক্য দিয়ে সরে পড়েন।

- : ভালো সাধুরাও কি তা করেন ?
- : তিব্বতীবাবার নাম শুনেছেন নিশ্চয়ই ? বড় মহাত্মা ছিলেন। এলাহাবাদে আমার এক আত্মীয় তাঁর মহাভক্ত ; তিনি একবার বায়না ধরলেন, মন্ত্র দিতে হবে। তিব্বতীবাবা বললেন, ‘আচ্ছা বাবা, দিচ্ছি একটি মন্ত্র ; রোজ সকাল সন্ধ্যায় জপ করতে হবে দাঁড়িয়ে দশবার, হাঁটু গেড়ে দশবার ; আবার দাঁড়িয়ে, আবার হাঁটু গেড়ে, এমনি পাঁচবার ; তারপর বসে আটবার ; মোট ১০৮ বার। মন্ত্র খুব জাগ্রত ; বিশ্বাস নিয়ে জপ করে যাবে’। বাবাজীকে একান্তে জিজ্ঞেস করলুম।

- : এটা কী করলেন ?
- : খুব ভালো প্রক্রিয়া ; উপকার হবে।
- : কী উপকার হবে ?
- : ভুঁড়িটা কমে যাবে।
- : শুধু ওঠ-বস করতে বললেন না কেন ?
- : করতো না। সঙ্গে জপ আছে, ঠিক করে যাবে।

আমি প্রশ্ন করলুম, তিনিও তিব্বতী বাবার ওষুধ এক-আধটুকু প্রয়োগ করেন কি না। জবাব দেন,

: ও আমার খাতে সয় না। এক ভদ্রলোক কিছুদিন আসতেন এখানে। তাঁর মত হচ্ছে, ঈশ্বরই সব হয়েছেন—স্ত্রী, পুত্র, মান, যশ, সব তিনিই; এইভাবে নাকি তিনি সাধনা করেন। একদিন জিজ্ঞেস করলুম, ‘সব তো তিনিই, কিন্তু তিনি বস্তুটী কী তা নিশ্চয় করেছেন?’ কে কার কথা শোনে! ভদ্রলোক কেবলই বলেন, সব তিনিই। প্রশ্ন করি, সব যদি তিনিই তবে মলমূত্রও তিনি, ডাক্তারবিনের আবর্জনাও তিনি, নর্দমার ক্লেদ, রাস্তার মড়া, কুকুর-বিড়াল এসবও তিনি? ‘পুত্রং দেহি, বিত্তং দেহি, যশো দেহি’ যেমন বলেন, তেমনি বলুন তো ‘রোগ, শোক, মৃত্যু দাও; মার বুক থেকে ছেলেকে ছিনিয়ে নেও, বাপের স্নমুখে ছেলেমেয়ে না খেয়ে মরুক; এসব তুমিই।’ পারেন বলতে?...রেগে গেলেন ভদ্রলোক। তখন ধমক দিয়ে বলি, ‘স্ত্রী-পুত্রাদি নিয়ে স্নুখে আছেন, থাকুন; ভোগবাসনা আছে, প্রাণভরে ভোগ করুন; ওসব বুকনি ছেড়ে দিন। অধ্যাত্মবিঘাটা ছেলেখেলা নয়’। তারপর আর ভদ্রলোক আসেন না।

: প্রকৃত জিজ্ঞাসুও তো আছে। তাদের প্রয়োজনে—

: যতদিন দরকার বসে যেতে পারি।

: আমার তা হলে “জিজ্ঞাসা” আসে নি?

: বলা শক্ত। হয় তো বা এসেছে।

: তবে মন্ত্র দিন।

: রামৈয়াকী তুলহিন লুটা বজার।

কনফুঁকা চিদকাসী লুটে, লুটে জোগেসর করত বিচার।

কহত কবীর সুনো ভাঙ্গ সাধো, ইস ঠগনীসে রহো হসিয়ার ॥

: মানে, গুরুর প্রয়োজন নেই?

: প্রয়োজন আছে বৈ কি? গুরু ছাড়া এরাস্তায় চলা শুধু কঠিন নয়, অসম্ভব।

: সেই আবর্তেই স্কেলে দিচ্ছেন।

: কেন?

: গুরুর প্রয়োজন; বলছেন, হুঁশিয়ার। আপনার সাহায্য চাইছি, তাতেও নারাজ।

: নারাজ নই, তবে বিঘ্ন অনেক। প্রথমত: গুরু শিষ্যের মনের গড়নে খানিকটা সমানধর্মিত্ব থাকা দরকার। আমি শক-থেরাপিস্ট, আপনি বাঙ্গালীদের মতোই মুহু-স্বভাব। স্পর্শকাতর-ও।

: আপনিও তো বাকালী !  
 : জীবনে ঠোঁকর খেয়ে খেয়ে—  
 : তত্ত্বলাভের পরও কি আঘাতের দাগ থাকে ?  
 : কিছুটা থেকে যায় বোধ হয় ; *Substratum of nature* হয়তো বদলায় না ।  
 অন্ততঃ আছে এখনও ।  
 : আর কী বিয় আছে ?  
 : দীর্ঘকাল গুরুর সাহচর্য দরকার ; আমি তো কালই চলে যাচ্ছি ।  
 : দীর্ঘকাল সাহচর্য দরকার কেন ?  
 : গুরুর নিকট শাস্ত্রপাঠ না করলে তাৎপর্য ধরা যায় না ; কাজেই সময় সাপেক্ষ । শ্রবণের সঙ্গে সঙ্গে মনন-নিদিধ্যাসন অভ্যাস করতে হয় । অভ্যাস আরম্ভ করলে নানারূপ বাধা, বিয়, শঙ্কা ইত্যাদি উপস্থিত হয় ; গুরুর সঙ্গে আলোচনা করে সে সব সরাতে হয় । বড় বন্ধুর পথ, না চললে ঠিক ধরা যায় না । সংসারী জীব কতকগুলো অবলম্বন নিয়ে থাকে—আত্মীয়, বন্ধু, মান, যশ, টাকা ইত্যাদি অসংখ্য রজ্জু দিয়ে দেহবৃক্ষটিকে বেঁধে রাখা হয় । সত্যিকার সাধনা আরম্ভ করলে সব বাধনগুলো কেটে দিতে হয় ; তারপর শিকড়গুলোও কাটলেন ; কিন্তু সূক্ষ্ম তন্ত্রীগুলো তখনও রস আহরণে ব্যস্ত ; আপনি কখনো ছেড়েছেন, কিন্তু কখনো আপনাকে ছাড়ছেন না—অথচ জীবনে কোনোই অবলম্বন নেই । রোজের পর রোজ তত্ত্ববিচার করে চলছেন, কিন্তু পাচ্ছেন একটানা উত্তরতা, চিন্তের স্তব্ধতা । তার উপর আবার ব্যাধিও এসে জোটে...কী যে কষ্ট শুধু ভুক্তভোগীই জানে । বুদ্ধদেবের একটি কথা আছে—

হিরীমতা চ দুজ্জীবং নিবং স্মৃতিগবেসিনা ।

অলীনেন'প্লগব্ভেন স্তদ্ধাজীবেন পস্‌সতা ॥

বিনয়, গুচিতা, তত্ত্বাত্মশীলন, শীলচর্চা, বিশুদ্ধিমাগসেবা, ইত্যাদিতে যারা রত থাকেন তাঁদের জীবন দুঃখময় । আমি নিজেই কতো বার ভেবেছি, দিই সব ছেড়ে, কিছু নেই এ রাস্তায়, কেবলই মরুভূমির গুরুতা ; বিপ্লবী জীবনই ভালো, **something real and tangible to fight against** ; গুরুদেবের কাছ থেকে পালিয়ে যাবো কিনা এ প্রশ্নও মনে উঠেছে । সেজন্তাই বলছিলুম, বেশ তো আছেন । বড় বন্ধুর পথ—“ক্লেশঃ অধিকতরশ্বেভাম্ অব্যাক্তাসক্তচেতসাম্ ।” গীতার কথা ।

: ‘সু সুখং কতুর্ম্’ একথাও তো আছে গীতাতে ?

: প্রক্রিয়ায় কোনো দুঃখ নেই ঠিকই। উদ্বাবাহ, হেঁটমুণ্ড, কণ্টকাসন, ত্র্যতাপবাস, কতো সব কুচ্ছ্রসাধনের উল্লেখ ও দৃষ্টান্ত পাওয়া যায়—বিশেষতঃ জৈনদের সাধনায়। জ্ঞানমার্গের সাধনা এই তুলনায় সু সুখং কতুর্ম্—কোনো হাতিয়ারের প্রয়োজন নেই, প্রক্রিয়ানৈপুণ্যের ভোজবাজি নেই—শুধু একান্তে এক মনে বিবেকবৈরাগ্যের সঙ্গে তত্ত্ববিচার করে যাওয়া। কিন্তু নিরালস্য হয়ে তিষ্ঠানোই দায়, যদি জীবন্ত একটি ব্রাহ্মী স্থিতির দৃষ্টান্ত চোখের সামনে না থাকে।

: আপনার গুরুদেব—

: ধ্যানস্থই প্রায় থাকতেন। একদিন গুরুতার কথা বললুম : পিঠে হাত বুলিয়ে আশ্বাস দিলেন, ‘সকলেরই হয়’। পাতঞ্জলের যোগবিজ্ঞের সূত্রটি<sup>১</sup> উদ্ধৃত করে বুঝিয়ে দিলেন, যোগাভ্যাস করলে ও-সব চিন্তমল দেখা দেবেই ; নয় তো চিত্ত নির্মল কী করে হবে ? সব ঠিক হয়ে যাবে ; শুধু লেগে থাকা চাই..... এজ্ঞাহুই গুরুর প্রয়োজন। কানে হুঁ দেওয়ার জ্ঞান নয়, সাহচর্যের জ্ঞান, রাস্তার অন্তরায়গুলো সম্বন্ধে জাগ্রত করিয়ে দেওয়ার জ্ঞান, অবসাদ আসলে নিজের অভিজ্ঞতা দ্বারা উৎসাহিত করার জ্ঞান।

: মরুভূমি পার হওয়া দেখছি আমার অদৃষ্টে নেই !

: নেই কেন ?

: বড় কঠিন মনে হচ্ছে।

: কঠিন তো বটেই। সহজিয়া চান ? Made easy হলে মান্নষের মর্যাদাবোধ ক্ষুণ্ণ হয় না ? ঈশ্বরলাভের দুর্জয় অভিযানকে ঘুমপাড়ানীর গানে পর্যবসিত করতে চান ?

: আমি অন্য কথা ভাবছিলাম, মানে, আমার সামর্থ্যে কুলবে কিনা।

: মান্নষেরই তো হয়। নিজেকে হীনবীর্য ভাববেন কেন ? ‘ইহাসনে গুণ্যতু মে শরীরম্’ এই দৃঢ় প্রতিজ্ঞা নিয়ে লেগে যান, হতেই হবে।

: এই জন্মে যদি না হয় ?

ইহ চেদবেদীদথ সত্যমস্তি।

ন চেদিহাবেদীন্নহতী বিনষ্টিঃ।<sup>২</sup>

(১) ব্যাখ্যানানন্দশরপ্রমাদালস্তাবিরতিভ্রান্তির্নালকভূমিকদ্বানবস্থিতদ্বানিচিতিবিক্ষেপান্তে-  
হস্তরায়ঃ (১-৩০)।

(২) কেন ২-৫।

জন্মান্তর আছে কিনা, এবং থাকলে কী হবে-না-হবে, কে জানে ?

: ‘স মহাত্মা সুদূর্লভঃ’ নয় ?

: আত্মবিশ্বাস না থাকলে তত্ত্বলাভ করবেন কি করে ?

: গুরুলাভই যে হলো না।

: হবে, হবে। ঘাবড়াবেন না। প্রশ্ন জেগেছে, উত্তর আসবে না ? একি হয় ? আধ্যাত্মিক জগতেরও একটা অমোঘ নিয়ম আছে ; তার ব্যতিক্রম কখনও হয় না।

: প্রারন্ধে না থাকলে নাকি হয় না ?

: আপনার প্রারন্ধে নেই এ খবর কোথায় পেলেন ?

: ভুগে ভুগে নিজের সম্বন্ধে আর তেমন আস্থা নেই।

: না ভুগলে কি এ রাস্তায় কেউ আসে ?

: এ রাস্তায় চলবার সম্পদ থাকা চাই তো ?

: মা শুচঃ সম্পদং দেবীম্ অভিজ্ঞাতোহসি পাণ্ডব।

## ॥ ৪ ॥

দশাশ্বমেধ ঘাট ; যাত্রীদের ভিড় এখানে লেগেই আছে ; গান, কীর্তন, ভজন, কথা, ও স্নানার্থী। স্নান করলে হয় ; সাঁঝ পেরিয়ে গেছে ; যাক। দুর্বাসাজীকে আগে যেন দেখেছি !...কৈ, সাক্ষাৎ তো কোনো দিন হয় নি আগে !...গঙ্গাজল মাথায় দিই...হরিদ্বারের কথা মনে হয়...একই গঙ্গা, তবুও এক নয়...কাশীর গঙ্গা মানে মণিকর্ণিকার ঘাট...কতো কোলাহলই না জীবনে সৃষ্টি করি...অক্ষয় কীর্তি...অমর বাণী...হইচই...হঠাৎ সব চূপ...‘চার জনে মিলি খাট উঠাইনি রোবত লে চলে ডগর ডগরিয়া’...চিঁতাভস্ম...গঙ্গাজল...ওঁ শান্তিঃ। তারপর অন্ধারের আসন নিয়ে বসেন শিবজী ! মড়া পুড়িয়ে তাই পিছন ফিরে দেখতে নেই...দেখলে ক্ষতিটা কী ?...দেখা যায়ও না—এক-আধ বার চেষ্টা করেছে, দর্শন পাই নি। মৃত্যুর পর দেখা যায় ? এখানে দেখা না পেলে যে ‘মহতী বিনষ্টিঃ’ ! চিঁতাভস্ম-গঙ্গাজল-শিবম্। একটা আনুপূর্ব আছে বোধ্য হয়...ত্রৈলোক্যস্বামীকে সাক্ষাৎ শিব বলা হতো। ছোটবেলা গুর ছবি দেখেছি...মনোগহনে কাশী আর ত্রৈলোক্যস্বামী এক হয়ে আছে...অদ্ভুত চোখ ; কতো সাধুর ছবি দেখেছি, কিন্তু অমন চোখ কোথাও দেখিনি—স্থির অথচ সর্বগ্রাসী ; ভয় হয়, আকর্ষণও করে...দুর্বাসাজীর চেহারা অগ্নধরণের—স্বস্থ, বৈরাগ্যপূর্ণ, যেন গাছতলায় বসে



আছেন...স্বপ্নে দেখেছিলুম ঠুকে ?—একটি আমবাগান, আসনে উপবিষ্ট একজন সাধু ; প্রণাম করতেই বললেন, ‘প্রণবমন্ত্র জপ করো’ ; স্বপ্নদৃষ্ট সেই সাধুজীর মতো যেন চেহারা...ভুলও হতে পারে। শক্-থেরাপি পছন্দ করেন। কেন ? অনেক ঠোঁকর খেয়েছেন বলে ? বিপ্লবী জীবনের শক্ ?...জীবনের এই না জানা ঘটনাগুলোর সম্বন্ধে কোঁতুহল হয়, কিন্তু জানবার উপায় নেই। ইতিহাস লেখা এখন আমরা শিখেছি, কিন্তু ঐতিহাসিক দৃষ্টি আমাদের মজ্জাগত ধর্ম নয়। বিশ্বব্রহ্মাণ্ডটাই বৃহদ্রের মতো ওঠে, লয় পায়। ব্যক্তিগত জীবনের খণ্ডিত কাল-পরম্পরার কী মূল্য ?...সেইজন্মই হয় তো জীবনী লেখা আমাদের ধাতুস্থ হয় না—বিশেষতঃ সাধুদের জীবনী। মালমসলা নেই বললেই চলে...জীবনসংগ্রামের ঘাত-প্রতিঘাত তো মায়া়র তরঙ্গমাত্র...কী প্রয়োজন সেদিকে নজর দিয়ে ? নজর দেওয়া নিরাপদও নয়—অহমিকার চোরাবালিতে বিপদের আশঙ্কা আছে। ...কতো মহাত্মা সমগ্রজীবনের সাধনা দিয়ে শাস্ত্রের টীকা লিখে গেছেন ; টীকাগুলো অমূল্য সম্পদ, কিন্তু টীকাকারের নামও খুঁজে পাওয়া যায় না।...কিছু দিন আগে এক মহাত্মার জীবনী পড়ছিলুম—না আছে ঘটনা, না আছে চিত্ত-লহরীর কোনো পারস্পর্য। অন্তশ্চেতনার বিকাশ কী করে হলো, কোন্ নিম্পত্তির পর কোন্ দ্বন্দ্ব দেখা দিল, কেন দেখা দিল, কী তার স্বরূপ, কিভাবে তার নিম্পত্তি হলো, দ্বন্দ্ব ও সমন্বয়ের কী ধারা ও রূপ এবং কোন্ অবস্থাচক্রে ও সাধন বলে দ্বন্দ্বাভীত পূর্ণতায় এসে পৌঁছলেন—কিছুই বুঝবার উপায় নেই। যোগাভ্যাস করলেন, সমাধিস্থ হলেন, তত্ত্ব লাভ করলেন, ব্রাহ্মী স্থিতিতে সমাসীন হলেন ! জীবনটা যেন একটা প্রক্রিয়া মাত্র, যার শেষ ধাপ ব্রহ্মানন্দের পরম পুথ ! অথচ এঁদের জীবনেই থাকে চূড়ান্ত চিন্তাসম্পদ। কর্ম ও কথার হইচই থাকলেও সাধারণ লোকের জীবনে কতটুকুই বা অগ্রগতি ? জায়ন্তে চ ত্রিয়ন্তে চ—এর বেশী আর কী ?...সাধুদের জীবনী যারা লেখেন তাঁরা পরম ভক্ত, অর্থাৎ সত্যকে দেখবার বা যাচাই করবার সাহস নেই ; কিন্তু অদ্ভুত ক্ষমতা তাঁদের ! মাটির সঙ্গে কোনোই সম্পর্ক নেই, অথচ আকাশে অজস্র ফুল ফুটিয়ে যাচ্ছেন ; অথবা অণু প্রমাণ ঘটনাকে রং ফলিয়ে পর্বতাকার বিস্ময়ে রূপান্তরিত করেন ? ধাঁধা লাগে, কিন্তু পথিকের কোনো দৃষ্টিই খোলে না।.....

মানুষের চিন্তরাগ, জীবনের আলো-ঐশ্বর্য, প্রাণের দ্বন্দ্ব, মনের লুকোচুরি, সংঘাতের বেদনা, নৈরাশ্রের কালো ছায়া, নব নব উষার নিত্য নূতন আরক্তিম, অর্থাৎ মানবতার দিক্‌টা এক বিরাট শূণ্য...দুর্বাসাজী এক-আধটুকু ইঞ্জিত

দিয়েছিলেন...কিন্তু বোধিধর্মের শঙ্ক-খেরাপিতে কী করে বিশ্বাস এলো?...বোধিধর্ম-ও এক অদ্ভুত চরিত্র!...দাক্ষিণাত্যে ঘর; খ্রীষ্টীয় ছয় শতকে চীনে গিয়ে জেন বৌদ্ধমত প্রবর্তন করেন। কী ঘটেছিল তাঁর জীবনে? কোয়াঙ (koan)-এর সঙ্গে তাঁর জীবনের কী সম্বন্ধ?...জানবার উপায় নেই। হাতীর দাঁতের মূর্তিটি (খ্রী: ১০ শতক) কিন্তু অপূর্ব! জাপানী শিল্পীর তৈরী; ছোট্ট দেহাবয়ব, সুন্দর নিখুঁত; চাদরে গা ঢাকা, হাতে মালা, গলায় হার, কানে কুণ্ডল, আর চোখ! তাইতো! ঠিক ত্রৈলোক্যস্বামীর মতো!...বোধিধর্মের চোখে ভীতির বাজনা আরও তীব্র, uncanny ভাবের চূড়ান্ত স্ফোতন, কী দেখে যেন ত্রাস লেগে গেছে! শূন্য?...হয় তো। ত্রৈলোক্যস্বামী—শূন্যকেও হজম করে ফেলেছেন। অগস্ত্যমুনি সমুদ্রপান করেছিলেন। হয় তো একই অর্থ। সমগ্র বিশ্বপ্রপঞ্চকে গ্রাস করে ত্রৈলোক্যস্বামী শিব হয়ে বসে আছেন...ঋশানে শিব...ত্রিভুবন উদরস্থ করে শিবত্বলাভ?...ত্রৈলোক্যস্বামী—বারাণসী—মণিকর্ণিকা—আনন্দধাম! দেহ-ত্যাগের পর বিশ্বনাথের আবির্ভাব! মণিকর্ণিকায় চিত্তাভ্যাস; মানে সর্বত্যাগ?...বোধিধর্মের শূন্য? বাসনাগ্নির নির্বাণ ও গন্ধোদকে ওঁ শান্তি: ? শান্তিই কি তত্ত্ব? সব জালার উপশান্তি—যেন অভাবসূচক। তারপর শিবত্ব?...উপায়?...মনন করো বেটা, মনন করো...ব্রহ্ম সত্য, জগৎ মিথ্যা—এই মনন?...ব্রহ্মকে জানি না...আর জগৎ? থাক আর না থাক, আমার তাতে কী?...

ন মৃত্যু ন শঙ্কা ন মে জাতিভেদঃ পিতা নৈব মে নৈব মাতা ন জন্ম ।

নবক্লুমিত্রং গুরুনৈব শিষ্যশ্চিদানন্দরূপঃ শিবোহং শিবোহম্ ॥

দূর হতে সানাইর সুর ভেসে আসে; রাগ কেদারা; সুরের কম্পনে রূপায়িত হয়ে ওঠে কেদারনাথের উদাস গান্ধীর্ষ। মীড়ের আকুঞ্চে অস্ত্রশ্চেতনা মোড় ঘুরে ঘুরে এগোয় শিবলোকের তটভূমির সঙ্কানে...সুরের হিল্লোলে ক্রন্দসী আচ্ছন্ন... এবার ধুনের তরঙ্গে আশুদ জলে ওঠে...মণিকর্ণিকার আশুদ...চিত্তানলের উধ্বশিখা...বিশ্বময় আশুদ ছড়িয়ে পড়ে...বিশ্বজন মন্ত্রপাঠ করে—কস্মৈ দেবায় হবিষা বিধেম?...সহস্রশীর্ষ সুরের অগ্নিতে আরত্ৰিক বাজে কাশীশ্বর কুন্দারনাথ বিশ্বেশ্বরের...বিরাট, ভাস্বর, শুকগভীর দেবমূর্তি...মূর্তি নয়...জ্যোতির্ময় চক্ষু... সর্বগ্রাসী চক্ষুরাততম...সহস্রজিহ্বা অগ্নির ভোক্তা, ভর্তা, মহেশ্বর...হে বিশ্বস্তর! হে মহাদেব! হে কাশীনাথ! হে রুদ্র! যন্তে দক্ষিণং মুখং তেন মাং পাহি নিত্যম্ ।

ଦ୍ଵିତୀୟ ଅଧ୍ୟାୟ

ସକଳି ଗରଳ ଡେଲ

( ଗ )

ଜନ୍ମଭୂମିଷ୍ଠ



## জন্মভূমিশ্চ

॥ ১ ॥

কাশী থেকে ফিরে কেবলি মনে হচ্ছে দেশ থেকে একবার ঘুরে আসি শেষ দেখা যাকে বলে। মামাবাবুকে নিষেধ করার ফল হয়তো—ভূটো আমার ঘাড়ে চেপে বসেছে।...একলা যাবো?...ক্ষেপুকে সঙ্গে নিলে হয়...ক্ষেপু কিন্তু বেশ বদলে গেছে, আগের মতো গোঁড়ামি নেই...অনেকটা ধাতস্থ; হয় তো অবস্থাচক্রে...গুরুদেব দেহত্যাগ করেছেন, আয় কমতির দিকে, সংসারের চাপ বেড়েছে...ইষ্ট বেঙ্গলের খেলা থাকলে যেতে চাইবে না...হার-জিতের পরিস্থিতি বুঝে কথা পাড়লে রাজী হতে পারে...হারের মুখে গেলে হয় তো কথাই কইবে না...যাক গে, দেখাই যাক...

: কীহে দেবলচন্দ্র! তীর্থ করা হলো?...কাশী থেকে ফিরলি কবে?

: মাস খানেক হবে বোধ হয়।

: তুই তো এখন বেশ ভালই আছিস!

: একরকম। তবে মনটা এখনো জোড়া লাগে নি। এজ্ঞে—

: তোর বাঙ্গালে গৌ ছাড় এবারে; কারু চরণাশ্রিত হয়ে যা। নিজের কেরামতিতে কি আর ভবসিন্ধু পার হওয়া যায়?

: তোর নৌকায় নিয়ে চল না? না হয় ওপার থেকে নৌকোটা পাঠিয়ে দিস।

: ও-সব চালাকি রাখ। গুরু করে ফেল—দিব্যি পাল তুলে চলে যাবি।

: ইষ্ট-বেঙ্গলের খবর কি?

: হারে নি—ড্র। তখনই বলছিলুম—

: দেশে যাবি নাকি?

: গেলে হতো। যাবি তুই? ছ-জনা—মন্দ হতো না। একটা ঝামেলায় পড়েছি। দেখি...আমাদের কেউটা আজ কাল খুব কীর্তন গাইছে...ভাল কথা, একজায়গায় কীর্তন আছে; চল শুনে আসি।

: রস পাই না।

: বায়স্কোপও তো দেখে কতো লোক! বিনা পয়সায়, ‘কিউ’তে না দাঁড়িয়ে, কীর্তনানন্দ ভোগ করবি—আপত্তিটা কিসের?

: কীর্তনের নামে রসাতাস, ভাবের অসামঞ্জস্য—গা জ্বালা করে। কোথায় আনন্দ?

: সে ভয় নেই। সুরানন্দ বাবাজীর নাম শুনিস নি ?

: না তো। সুরানন্দ ! মদ খান নাকি ?

: ঐ তো তোর রোগ ! সুরা না ; সুর, মানে রাগ-রাগিণী। বাবাজী ভাল কীর্তন করেন। অপরূপ চেহারা, সিন্ধের গুরুয়া, এরোপ্পেনে যাতায়াত, কাগজে টুর প্রোগ্রাম (tour programme), এনগেজমেন্ট (engagement) করে ভেট-মূল্যকাত—বেশ আপ-টু-ডেট (up-to-date) সাধু ! কিন্তু ইন্টারভিউ (interview) পাওয়াই মুশ্কিল।

: শিষ্য না হলে দর্শন দেন না বুঝি ?

: উহু। মেয়েদের ভিড় লেগেই আছে—লেডিজ্ ফার্স্ট। অনেকবার চেষ্টা করেও সুবিধে করতে পারি নি। তারপর একদিন সট্ করে ঢুকে পড়লুম। শিষ্যরা তো এই মারে কি সেই মারে ! পথ আগলে বলে, ‘ও-দিকে যাচ্ছেন যে বড় ! আপনার মাথা খারাপ নাকি ? গুরুদেব এখন ডেসিং রুম্-এ।’

: তারপরও তুই ওখানে যাস ?

: সাধুদের উপর রাগ কবতে নেই। অন্য কারণও আছে। শিষ্যদের সঙ্গে ভাব করে নিয়েছি।

: বেশ মডার্ন সাধু দেখছি ! কীর্তন সুবিধার হবে বলে তো মনে হচ্ছে না।

: আগে শোনই। আমি অনেকবার শুনেছি। ভাল গলা। গানেই তো বাজার মাত করে ফেলেছেন। বেশ মডার্ন কীর্তন !

: কীর্তন আবার মডার্ন কিরে ? তেঁতুলের আমসত্ত্ব ?

: না শুনে টিপ্সনী কাটবি না। চল্।

ফেপু মহারাজের পালায় যখন পড়েছি, শুনতেই হবে। শুনলুম। মাঝখানটায় উঠে আসাটা অশোভন দেখাতো। ফেপু হয়তো গালাগালিও করতো। প্রসাদের পাট ছিল মডার্ন, বেশ লোভনীয় ; কলা বাতাসা কিংবা মালপুয়া নয়—কচুরি, সন্দেশ, বিস্কুট, আপেল, চা। মডার্ন কীর্তনের টি-পার্টি...মহিলারা গিজগিজ করছেন ; টি-পার্টি আরম্ভ হওয়ার আগে সুরানন্দকে আরতি করে প্রসাদ খাওয়ানো হলো—একাজের ভার পেয়েছিলেন মহিলাভক্তবৃন্দের দ্বিতীয় ঠাণ্ডা বিশিষ্ট ভি-আই-পি, মানে ক্লাস ওয়ান (class I) ...যাক গে, মরুক গে... সুখে থাকাটাই বড় কথা...

: দেখলি তো ! তোকা গায় ! তোর কেমন লাগলো ?

: মন্দ কি ?

: বিনা টিপ্সনীতে ‘মন্দ কি’ !...তা হলে ভালোই লেগেছে ?...কীর্তন তো কতো জায়গায় শুনি, কিন্তু এই বাজারে এমন প্রসাদ !...সন্দেহের পাকটা আর একটু কড়া হলে—এটাই বুঝি তোর অন্য কারণ ? কিন্তু প্রসাদ সম্বন্ধে টিপ্সনী কাটা ঠিক নয়...বৈষ্ণবাপরাধ হবে।

: টিপ্সনী তো নয়। তবে যাক গে।...কচুরির ঘিটা বেশ ভালো ছিল—খাটি ঘিয়ের গন্ধ ; এবাজারে দুর্লভ।

: দালদাও তো হতে পারতো ?

: সে ভয় ছিল বলেই খোঁজ নিয়ে রেখেছিলুম। আমাকে কি কাঁচা ছেলে ভেবেছিস ?

: যদি দালদা হতো ?

: খেতুম না। দালদা আমার সহ হয় না।

: প্রসাদ তো ? অগ্রাহ্য করা—

: প্রসাদ কণিকামাত্র। ভেঙ্গে একটু মাথায় দিতুম।

: প্রকারান্তরে অবজ্ঞা করাই হতো।

: তা বলে দালদা খেতে হবে নাকি ?

: সাধু নাগমশায়কে পাতায় করে প্রসাদ দিলে পাতা পর্যন্ত খেয়ে ফেলতেন।

: হুঁ ; তা বটে। নাগ মশায়—তা নাগ মশায়ের মতো ভক্তি আশ্রুক আগে। শুধু শুধু দালদা খেয়ে লাভটা কি ?...এখানটায় ট্রামে উঠবো। মোটের উপর কীর্তন তোর ভালই লেগেছে, কি বলিস ?

: এর নাম কীর্তন ? মাথা ধরে গেছে। লোকটা এক নম্বরের জোচ্চোর ; ধরে চাবকানো উচিত।

: তাই বল ! আমি ভাবছি দেবলচন্দ্র চুপ মেরে আছে কেন ? তবে কি শরীরটাই আবার খারাপ হলো ? দেবল দি ক্রিটিক অথচ মুখে বা-ট নেই। ঐ যে ! ট্রামটা এসে গেছে। চলি আজ। আর একদিন কথা হবে...

মাথাটা ধরা ছিল। হেঁটেই চললুম। বেশ দক্ষিণে হাওয়া ; খানিকটা হেঁটে যেন বেঁচে গেলুম...শরীরটা ঠিক সারে নি দেখছি...স্নায়ুগুলো সবল আর কোনো দিনই হবে না...গাঁয়ে মানুষ হয়েছি, পথচলার নেশাটা এখনো আছে...দৈহিক শ্রান্তি আসে কিন্তু মনটা চাঞ্চল্য হয়...একবার বেড়াতে গিয়েছিলুম পাবনার এক গণ্ডগ্রামে ; ঠাকুরদের জমিদারি ; আমার এক কাকাবাবু কাজ করতেন তাঁদের সেরেস্ভায়, সকালে চা খেয়ে বেরিয়ে পড়লুম...নতুন দেশ, বাঁধানো রাস্তা, গন্ধ

গাড়ী, অচেনা মানুষ...আবেশে চলি...মাঝে মাঝে মনে হয়, কিরি এবারে...  
 রাস্তার দিকে তাকাই...দূরে একটা মন্দির না! দেখা যাক...হয়তো কোনো  
 সাধু আছেন...অনেকটা যে এলুম...মন্দিরটাও তো আর দেখা যাচ্ছে না...  
 দেখি একটু এগিয়ে...খাল যে! লোকজন অবশিা পেরিয়ে যাচ্ছে...না, আর  
 এগনো ঠিক নয়...গাছতলায় একটু জিরিয়ে নেই বরং...ঘড়িটাও আনি নি...  
 কটা জানি বাজে!...এমনি খাল পেরিয়ে ইস্কুলে যেতুম; সঙ্গে গামছা থাকতো  
 ...ধুতি, গেঞ্জি, কামিজ, বই, সব মাথায় করে খাল পার হই...এ তো ইস্কুল ঘর  
 ...সেরেছে! ঘন্টা তো পড়ে গেলো...ছুটছুট...আজ আবার তক্ষক পণ্ডিতের  
 ক্লাস...নির্ঘাত নীল-ডাউন (Kneel down); না হয় স্ট্যাণ্ড আপ্, অনু  
 দি বেঞ্চ (Stand up on the bench); পণ্ডিত হলেও এই আদেশগুলো  
 ইংরিজিতেই দিতেন...কথা বলতেন পণ্ডিত ভাষায়—অর্থ সংস্কৃত। ক্লাসে টু' শব্দ  
 করলে শাস্তি ছিল 'বাস-বাক্য বল তো রে'। কেঁদার সাতখুন মাপ ..“কীর্তনে  
 গিয়েছিলুম সার।” এই ওজুহাতে পাশের নম্বরও পেয়ে যেতো...পণ্ডিত মশায়ের  
 বয়স হয়েছিল, ক্লাসে প্রায়ই ঢুলতেন...একদিন হেডমাষ্টার মশায় এসে হাজির...  
 আমাদের মৃদুগুজন হঠাৎ থেমে যায়; হয়তো সেকারণেই পণ্ডিত মশায় পরিস্থিতিটা  
 বুঝে নিয়ে চোখ বুজেই বলেন, “ভেবে দেখলুম, মধ্যপদলোপী কর্মধারয়।”...  
 নিকটেই মামাবাড়ী; কালবৈশাখীর দিনে মাঝে মাঝে মামাবাড়ী চলে যেতুম।  
 মামাবাবু বিপত্নীক, ছেলেপিলে ছিল না, কর্মস্থলে থাকতেন। দেশে থাকতেন  
 দিদিমা...কী যত্নই না করতেন! এমন স্নেহ আর হয় না। রাত্রি বেলা  
 খাওয়া দাওয়ার পর শুকনো নেকড়া দিয়ে পা মুছিয়ে, আঙ্গুলের ফাঁকে ফাঁকে  
 সরষের তেল লাগিয়ে, মশারি ফেলে, গায়ে হাত বলিয়ে ঘুম পাড়াতেন—যেন  
 নারায়ণ ঠাকুরকে শুইয়ে দিচ্ছেন...স্নেহের অমৃতপ্রস্রাবিণী...দিদিমার কথা ভাবলে  
 এখনো চোখে জল আসে...

কোয়ারটারস-এ কিরে দেখি বাড়ীর লোক বেশ ভাবিত হয়ে উঠেছেন। কাকাবাবু  
 বলেন, ‘তোমার দেরি দেখে ভয় হচ্ছিল! নূতন জায়গা, হয়তো পথ ভুল করে  
 ঘুরছি।’...কলেজ স্কোয়ারে বসেছিলুম। বাড়ী ফিরতে রাত প্রায় দশটা...  
 শুয়ে শুয়ে কীর্তনের কথাই ভাবছিলুম। এর নাম কীর্তন!...পাবনার সেই গাঁয়ে  
 কীর্তন শুনেছিলুম...যেমনি গলা, তেমনি আখর, আর অপূর্ব খোলার বাজনা...  
 শ্রোতার তন্ময় হয়ে শুনছিল...নদী তরঙ্গসঙ্কুল...মাঝি তরী নিয়ে এসেছে...  
 পারের কড়ি এক আনা নয়, দু-আনা নয়...নয় আনা নয়...পুরোপুরি বোল



আনা...আড়ালে বসে কী কান্নাটাই না কেঁদেছিলুম...মডার্ন সাধু! মডার্ন অভিষাপ...সব আদর্শ-ই জ্বলাজ্বলি দিয়ে বসেছি...দয়ালদা একদিন এক সাধুর কথা বলছিলেন।

: তখন আমি জামালপুর থাকি। গুরুদেব বললেন ‘এখান থেকে ৭৮ মাইল দূরে একটি ভাঙ্গা বাড়ীতে একজন মহাত্মা থাকেন; দর্শন করে আসবি।’... পড়ে একটি দালানবাড়ী চারদিকই ভাঙ্গা, একটি কুঠরির সামনে বাঁশের কঙ্কির দরজা, তার দিয়ে বাইরের দিক থেকে বাঁধা...ভিতরে গিয়ে দেখি কেউ নেই; পোয়ালের উপর একটি কঞ্চল বিছানো রয়েছে; এক কোণে একটি ঘড়া আর দু-চারটে জিনিস...বাইরে এসে দরজা বন্ধ করে দিলুম; অদূরে একটি গরু বাঁধা ছিল। গাছতলায় বসে ভাবি, সাধুজী যদি আজ না ফেরেন!...পনের বোল মাইল হাঁটা হবে...পশ্চিম যদি হয়!...পিপাসা লেগেছিল...ফিরবো? কী আর কাজ!...ধ্যান করি বসে...বিকেল নাগাদ বরং ফিরবো...ঘাস মাথায় করে একজন লোক এলো, নগ্ন দেহ, মলিন বেশ। গরুটিকে ঘাস বিছিয়ে দিয়ে আমার কাছে এলো; জিজ্ঞেস করে—

: কী চান আপনি?

: সাধুজীর দর্শনে এসেছিলুম।

: কোথা থেকে আসছেন?

: সহর থেকে।

: অনেকটা হাঁটতে হয়েছে। আশুন ভিতরে।

এক গ্লাস দুধ ও জল দিল লোকটি। খেয়ে গ্রন্থ করি।

: সাধুজী কখন আসবেন?

: আমিই এখানে থাকি।

লজ্জিত হয়ে ক্ষমা চাই। গৈরিক ছিল না, বুঝতে পারি নি। তারপর কথা হলো। খাঁটি অদ্বৈতবাদী সাধু, পূর্ণ জ্ঞানী; তবু যেন চোখে ভাসছে...যাওয়ার মুখে জিজ্ঞেস করলুম,

: গরু রেখেছেন কেন? অনুবিধা হয় না?

: পেটে কিছুই সয় না, গ্যাস্ট্রাইটিজ না-কি, ডাক্তারবাবু শুধু দুধ ভাত খেতে আদেশ করেছেন। চালটা ভিক্ষায় জুটে যায়; গরু একটি বাধ্য হয়ে রাখতে হয়েছে। মাপ চেয়ে, প্রণাম করে বিদায় নিলুম...খাঁটি সাধুর সঙ্গ না করলে দৃষ্টি খোলে না। সেজন্তু গুরুদেব কোনো মহাত্মার খবর পেলেই বলতেন, ‘দর্শন করে এসো’।

শুধু যে আদর্শ-ই নষ্ট হচ্ছে তা নয় ; রুচিবিকার-ও ঘটেছে । মডার্ন কীর্তন মানে মডার্ন ভূনিখিচুড়ি—লাল আলু, গোল আলু, লঙ্কা, গরম মসলাও যেমন আছে, তেমনি আছে পেঁয়াজ, রসুন, ডিম, মেটে...মডার্ন কীর্তন—কীর্তন+রবীন্দ্রসঙ্গীত+ভজন+শ্রামাসঙ্গীত+আধুনিক গান । আরম্ভ হলো গৌরচন্দ্রিকা দিয়ে ; তারপর পদাবলী ; মহাজনের পদ যতক্ষণ ছিল ঠিকই ছিল ; আধর দিতে গিয়েই তালগোল পাকিয়ে ফেললেন, রসাতাসের পর রসাতাস...হঠাৎ চাবুক মারেন, আমার নয়ন-ভুলানো এসে । কথা, ভাব, পরিবেশ, সংবেদন সম্পূর্ণ আলাদা । কিন্তু এখানেও স্থিতি নেই ; সুর হলো ভজন—সুর ও ভাবের অভূত সাংকর্ষ...ভজনের বৈশিষ্ট্য নিঃসঙ্গতা ও বৈরাগ্য ; কীর্তনের বৈশিষ্ট্য রমের গুরুপাক ও বহুজনের সাহচর্য । ভজন শান্ত ও স্থির ; কীর্তন উচ্ছল, উদ্বেলিত । কীর্তনে ভোগ হয় বহুর সঙ্গে পথের আনন্দ ; ভজনে চাই আকাশতলে একাকী বসে ভগবানের সান্নিধ্য । কীর্তনে বাজে একাধিক তারের মিশ্রগুঞ্জন, অরকেস্ট্রা ; ভজন একতারার নিঃসঙ্গ রাগিণী । রবীন্দ্রসঙ্গীত তুষ্টিমূলক ; আরাধ্য গোঁণ, মুখ্য তাঁর নৃপুরধ্বনি । শিউলি ফুলের রাশি, শিশিরভেজা ঘাস, আলোছায়ার আঁচল, বনদেবীর শঙ্খরব—আর প্রয়োজন কিসের ? নয়ন-ভুলানো তো এসেই গেছে...যতনে হৃদয়ে রেখো আদরিণী শ্রামা মাকে !...কোথা থেকে কোথায় ! রসাতাস-দোষ হলে মহাপ্রভু কীর্তনীয়াকে তাড়িয়ে দিতেন ; গৌরচন্দ্রিকা দ্বারা তাঁকে ডেকে আনা হয়েছিল ; অভিষাপ দিয়ে নিশ্চয় সরে পড়ে থাকবেন...রবীন্দ্রসঙ্গীতের পর শ্রামাসঙ্গীত !...মামাবাবুর কাছে অনেক শ্রামাসঙ্গীত শুনেছি...একটা প্রপঞ্চোপশম ভাব থাকে ; মন জগৎকে ছেড়ে, নামরূপকে বর্জন করে, শূণ্যবগাহী হয়...কথার সঙ্গে যে সব রাগরাগিণী ও তাল ব্যবহার করা হয় তাদের দ্যোতনা আঁধার সমুদ্রের—sublime । কোথায় পূর্ণিমারাতের বঁধুয়া, কোথায় শরৎলক্ষ্মীর অঙ্গসৌষ্ঠব, কোথায় অমানিশার চুর্গম যাত্রা, আর কোথায় ‘অব মৈ কোঁন উপায় করু’র নির্জন গান্ধীর্থ...আগে রেওয়াজ ছিল ‘মধুরেণ সমাপয়েৎ’ ; এখনকার রেওয়াজ ‘গরলেন’, নইলে আধুনিকত্ব বজায় থাকে না । সুরত্যাং শেষে এলো ‘টিপিক্যাল আধুনিক গান’ যা শুনলেই মনে হয় বয়স্ক লোক দাড়ি গোঁফ কামিয়ে শাড়ি পরে, গালে হাত দিয়ে মেয়েলী ঢং এর অনুকরণ করছে...অর্থাৎ ‘অনুরোধের অসির’ ..সর্বত্রই এক ‘সুর’ মানে ‘বেসুর’ । কিছুদিন আগে একটা পরব ছিল । ক্রটিসম্পন্ন ভঙ্গলোক খারা রাত্রি দশটা পর্যন্ত তাঁরা আজাদ হিন্দ এর ‘খন্ড’ লাউড্‌স্পীকারে চালালেন সিনেমার কণ্ঠকণ্ঠা অশ্রাব্য রেকর্ড । অগ্নিবর্ণ যখন

ধামলো তখন শুনি পাঁড়েজীদের আড্ডার ভঞ্জন—রাম স্মির, রাম স্মির, এহী তেরো কাজ হৈ।... মহাপ্রস্থানের পথেও তো মূলের ঢেকুর তুলে চলি...যাক্ গে মরুক গে, আমার ও-ভাবনায় কাজ কি ?

সাগরকূলে বসিয়ে বিরলে হেরিব লহরমালা ।

মনোবেদনা কব সমীরণে, গগনে জানাব জালা ॥

তাই ভালো.. আপনাতে আপনি থাক মন...কিন্তু একা যাবো ? ক্ষেপু যেতে পারবে বলে মনে হচ্ছে না...একা যাওয়া ঠিক হবে কি ?...যদি ফিরে আসতে না পারি ?...তাই তো !...পাশের বাড়ীতে কে গান গায়—

মন মাঝি তোর বৈঠা নেরে—

আমি আর বাইতে পারলাম না ।

(আমি) সারা জনম বাইলাম বৈঠা রে,

তবু মোর মনের নাগাল পাইলাম না ॥

ভান্ধা দাঁড় আর ছেঁড়া দড়ি রে,

নৌকার হালে জল আর মানে না ।

অফর বেলায় ধরলাম পাড়ি রে,

নদীর কূল কিনারা পাইলাম না ॥

পদ্মা নদী একবার পাড়ি দিতেই হয় । একাই যাবো, যা থাকে বরাতে । তারপর...হয়তো আর পর নেই...

## ॥ ২ ॥

একাই চলছি । আজ বৈশাখী পূর্ণিমা ; যাত্রা করা হয়তো ঠিক হয় নি— পক্ষান্তে মরণং ধ্রুবম্ ।...কী আছে কপালে ?...বুদ্ধঃ শরণং গচ্ছামি ।...হৃদকের জল কেটে মছুর গতিতে স্টীমার এগচ্ছে ; এক কোণে বসে জলের দিকে চেয়ে আছি...ভেবেছিলুম এমন করে পিছনকে পিছনে ফেলে চিরদিন চলাবো... ভাগ্যদোষে পড়ে গেলুম ঘূর্ণপাকে...এই সেই পদ্মানদী...কতো বার পাড়ি দিয়েছি...পদ্মার খর স্রোতের মতো ছিল প্রাণের উচ্ছল গতি...বর্ধাবাদলের মতো চিত্তের আবেশ...মজের মতো আওড়াতুম ‘দেখি নাই’ কভু দেখি নাই এমন তরঙ্গী

বাওয়া'...কী তৃপ্তি নিয়ে দেশ থেকে ফিরতুম আপন কর্মস্থলে...কোথায় সেই শিশির-ভেজা মন?...স্বপ্ন শিকড়গুলোও কে যেন উপড়ে ফেলে দিয়েছে...পাতা ঝরে গেছে...আছে শুকনো কাঠ...যে দেশ আমার স্বদেশ ছিল সে দেশ আমার স্বদেশ নয়...খেদ করেছিলেন স্টীভেন্সন ( R. L. Stevenson ), কিন্তু আমাদের মর্মস্তদ ব্যথা তিনি জানেন নি...পদ্মার সেই পুরাতন ছন্দ...ঘোলাটে জল...লাশ্রময়ী গতি...অমল ধবল পালে মন্দ মধুর হাওয়া...স্টীমারের সারেঙ সাহেব হয়তো বা আমাদেরই গাঁয়ের লোক, চাচা সাহেবের সঙ্গে কতোবার ছাদে কাঁচের ঘবে বসে গল্পগুজব করেছি...এখন ভাবি দেখা না হওয়াই ভাল...দু'পাডেব দৃশ্য তেমনি নয়নাভিরাম...জল কেটে, ফেনা তুলে, বাঁশি বাজিয়ে স্টীমার চলেছে...বাঁশির সেই পুরনো সুর, যার ডাক শুনে কতো অচিন দেশে হৃদয়ের অন্তর্গত দেবতাকে খুঁজে বেড়িয়েছি, কতো অজানা রাস্তা ধরেছি...কতো ঘাস কতো ফুল...কতো পাখী ও জোনাকি পোকা...পাহাড়ের ওপারের স্বপ্ন...মার্ঠের শেষে গাছ...গাছের ফাঁকে সৌজতির রহস্যময় আবহান...একটা দৈত্য এসে সব তছনছ করে দিল...অনেকদিন আগেকার কথা; একবার বাস্তবপূজো হচ্ছিল মার্ঠে, গাছতলায়; কোদাল দিয়ে মাটির চাপড়া তুলে গোবর দিয়ে বেশ করে নিকিয়ে পূজোর আয়োজন করা হলো...ফুল, বেলপাতা, দুর্বা, চন্দন, আশ্রপল্লব, গঙ্গাজল, এবং নৈবেদ্যর জগ্গ চাল, কলা, বাতাসা, দুধ, দই, ক্ষীর ইত্যাদি। পুরুতঠাকুর গিয়েছিলেন নারায়ণ বিগ্রহ আনতে; একটি ছেলে বাঁশের কঞ্চি নিয়ে কাক তাড়াচ্ছে। হঠাৎ এক বাঁদরের আবির্ভাব—এসেই চালকলা সাবাড় করতে লাগলো; আমাদের দেশে বাঁদর নেই, ছেলেটি ভয়ে দিল চোঁচা দৌড়। বাঁদর দেখে এলো কুকুর...ফলারের শেষে গরু ও ছাগল এসে ফুল, দুর্বা, বেলপাতা, সব সাফ করে দিল। পুরুতঠাকুর এসে দেখেন—বাঁদর, কুকুর, গরু ও ছাগলের পায়ের দাগ, গোময়, ছাগলের নাদি, গোমূত্র...এখন আছে শ্মশানের পোড়া কাঠ, মড়ার খুলি, শেয়াল কুকুরের লড়াই...

রাম হলেন রাজা ;

থেতে পায় না প্রজা ।

বাঁদরে খায় কলা ;

আমরা ? কানমলা ॥

কেন এমন হলো?...পাল তুলে একটা নৌকো যাচ্ছে...বর্ষাকালে একবার ছোট্ট একটি নৌকো করে পদ্মায় এসেছিলুম ইলিশ মাছ ধরতে। কেষ্টদা এবিষয়ে ওস্তাদ, আমি আনাড়ি, দর্শকমাত্র। গুঁড়ি গুঁড়ি বুষ্টি ও হাওয়ার ঝাপটা চোখে মুখে লাগে...কাপড় জামা ভিজ়ে যায়...কেষ্টদার অফুরন্ত উৎসাহ... আমার বিস্ময় ও ভয়—যদি নৌকোটা উলটে যায়।...হাশে ছিল জগাদা, চৌকশ মাঝি; তবুও বুকটা ছুড়ুড় করে...ছুষ্টার চেষ্টা ও নানা রকম কারবাই সত্ত্বেও জ্বালে আর ইলিশ এলো না...এপাশে, ওপাশে কিন্তু একটা ছোটো ধরছে—তকতকে, বাকবাকে অঙ্গসৌষ্ঠব, যেন রূপোর পাতে মোড়ানো...আজও পদ্মানদীতে তেমনি হাওয়া বয়ে যায়, তেমনি গুঁড়িগুঁড়ি বুষ্টি পড়ে, চিল ওড়ে...ছেলেরা তেমনি পদ্মা নদীতে আসে পাল তুলে, বৈঠা বেয়ে, মাছধরার উম্মাদনায়...যে দেশ আমার স্বদেশ ছিল সে দেশ আমার স্বদেশ নয়...চণ্ডীদাসের ধূধা ধরে বলতে ইচ্ছা হয়—

আমার প্রাণের দেশ যে করেছে পর।

দিবস ছুপবে যেন পোড়ে তার ঘর ॥

কোন পাপে জন্ম হয়েছিল এদেশে?...কোন অপরাধে দেশ বিদেশ হয়ে গেলো?

দেশের কথা বলিতে বলিতে পাজর ফাটিয়া উঠে।

শঙ্খবণিকের করাত যেমতি আসিতে যাইতে কাটে ॥

...ঐ সেই কাশবনের চড়াটা; স্টীমার ওখানেই ভিড়বে...একবার স্টীমার ধরতে এসে দেখি ছেড়ে দিয়েছে—আবার রাত্রি আটটায় স্টীমার। বেলা দশটা থেকে সমস্ত দিনটা কাটিয়েছিলুম বালুর চড়ায়। লোকালয় প্রায় তিন-চার মাইল দূরে; চড়াতে টিকিট ঘর, মালঘর, ছু-চারটে দোকান, যাত্রীর সংখ্যা কম; মুড়ি মুড়কি, চিঁড়াগুড়, দই-ফাঁর সন্দেশ-রসগোল্লা, পান, বিড়ি-সিগারেট ইত্যাদি বিক্রি হচ্ছে। চাষের দোকানও আছে, বাবুরা বেষ্টিতে বসে চা খাচ্ছেন। কর্মস্থলে কালকে হাজিরি দেওয়া একান্ত দরকার, তাই আর বাড়ী ফিরে গেলুম না। নির্জন উদাস পরিবেশ; শীতের হাওয়ায় কাশবন ছলছে; নদীতে ছু-চারটে নৌকো, অমল ধবল পাল এবং হাল বৈঠার গোঙানি...হালে বসে মাঝি তামাক খায়...শীতের দিনের রোদ মিষ্টি কিন্তু বেশীক্ষণ পোয়ানো যায় না... একান্তে একটি গাছের নীচে বসে ছিলুম; সারেকী নিয়ে একজন বৈষ্ণব সামনে এসে দাঁড়ালেন, জিজ্ঞেস করেন, ‘বাবু গান শুনবেন?’...ভিথিরী গোছের বেশ!

কী আর এমন গান গাইবেন ?...বোধ হয় পরসূ চান। তবে সময়টা কাটানো চাই তো ; শোনাই যাক। বললুম, ‘বেশ তো’।

: কী গান গাইবো ?

: আপনার যা ভালো লাগে।

হরি হরি বিফলে জনম গোড়াইলু।

মল্লয় জনম পাইয়া, রাখাক্ষ না ভজিয়া

জানিয়া গুনিয়া বিব খাইলু ॥

গোলোকের প্রেমধন, হরিনাম সংকীর্তন,

রতি না জন্মিল কেনে তায়।

সংসার বিষানলে, দিবানিশি হিয়া জ্বলে,

জুড়াইতে না কৈলু উপায় ॥

\* \* \* \*

হাহা প্রভু নন্দমুত

করণ করহ এইবার।

নরোত্তম দাস কয়, না ঠেলিহ রাঙ্গা পায়

: আপনি তো বেশ ভাল গাইতে পারেন। যত্ন করে—

: ই্যা বাবু। যাত্রাদলে ছিলুম এককালে। ওস্তাদের কাছে গান শিখতে হয়েছিল—বেশ মেহনত করে।

: যাত্রাদল ছাড়লেন কেন ?

: কিছুদিন ঝোঁক ছিল ; তারপর আর ভালো লাগলো না। সঙ্গটা সুবিধের নয়। একদিন ঝগড়া হলো—গান নিয়েই। আমি বলি এক গান ; অধিকারী মশায় বলেন, ‘না, অল্প গান গাইতে হবে’। দিলুম ছেড়ে।

: আর একখানা গান হবে না ?

: বেশ তো। এগানটির কথা বৃন্দাবনী সারঙ্গে বাঁধা। শুধুন। দিনের বেহাগ ; উপযোগী স্থান-কাল ; ভালো গাইয়ে, ভক্তও। তবুও ভাবছিলুম, কি জানি কেমন হয়।

সখাগণ সঙ্গে সঙ্গে যত্ননন্দন  
 বিহরত যমুনাক তীর ।  
 প্রিয়দাম শ্রীদাম নুবল মহাবল  
 গোপ গোয়াল সঙ্গে বলবীর ॥  
 বাজত ঘনঘন বেণু,  
 আনন্দে চরত সব ধেনু,  
 নৃপুংর রুণু কুহু বাজে ।  
 গোবিন্দ দাস পহুঁ নিতি নিতি  
 ঐছন বিহরত বিদগধ রাজে ॥

প্রাণ ঢেলে বাবাজী বৃন্দাবনী সারঙ্গটি গাইলেন । বেদনার সঙ্গে গান্ধীর্যের, আকুতির  
 সঙ্গে স্বেষের, বৈরাগ্যের সঙ্গে মাধুর্যের অপূর্ব মিলন । স্তব্ধ হয়ে গুনছিলুম ।  
 বাবাজীর চোখে জল দেখে আমিও অভিভূত হই । চোখ মুছে বাবাজী বলেন,  
 : বাবুর তো বেশ ভক্তি আছে ।  
 : কোথায় ভক্তি ? সাধুসঙ্গের গুণ । মধুর ভাবের একখানা—  
 : গুরুদেবের মানা আছে বাবু !  
 : কেন ?  
 : আমি নামকীর্তনই করে থাকি । আপনার হয় তো ভালো লাগবে না, তাই  
 মহাজনের পদ ধরেছিলুম । গুরুদেব যখন মস্ত্র দেন তখন আদেশ করেছিলেন,  
 ষড়রিপু ষতদিন পুড়ে ছাই না হয় ততদিন যেন রসকীর্তন না করি... ভগবানের  
 নাম নিয়ে পড়ে আছি, জানি না, এজীবনে তাঁর দয়া হবে কিনা ।  
 : নামকীর্তনই না হয় করুন একটু ।  
 : সে কি আপনার ভালো লাগবে ?  
 : অনেকদিন শ্রীকৃষ্ণের অষ্টোত্তর শতনাম গুনি নি । যদি দয়া করে—  
 : দয়ার কথা বলবেন না বাবু, অপরাধ হবে । ভগবানের নাম করবো—  
 আপনার ভালো লাগলে আমারই পুণ্য.....

জয় জয় গোবিন্দ গোপাল গদাধর ।  
 কৃষ্ণচন্দ্র কর কৃপা করুণাসাগর ॥  
 জয় রাধা গোবিন্দ গোপাল বনমালী ।  
 শ্রীরাধার প্রাণধন মুকুন্দ মুরারি ॥

হরিনাম বিনেরে গোবিন্দ নাম বিনে ।  
 বিফলে মনুষ্য জন্ম যায় দিনে দিনে ॥  
 দিন গেল মিছে কাঞ্জে, রাত্রি গেল নিদ্রে ।  
 না ভজিলু রাধাকৃষ্ণ চরণাবিন্দে ॥  
 কৃষ্ণ ভজিবার তরে সংসারেতে আইলু ।  
 মিছে মায়ায় বদ্ধ হয়ে বৃক্ষসম হইলু ॥  
 ফলরূপে পুত্রকন্যা ডাল ভাঙ্গি পড়ে ।  
 কালরূপে সংসারেতে পক্ষী বাসা করে ॥  
 যখন কৃষ্ণ জন্ম নিলেন দেবকী উদরে ।  
 মথুরাতে দেবগণ পুষ্পবৃষ্টি করে ॥  
 বসুদেব রাগি আইল নন্দের মন্দিরে ।  
 নন্দের আশ্রয়ে কৃষ্ণ দিনে দিনে বাড়ে ॥  
 শ্রীনন্দ রাখিল নাম নন্দের নন্দন ।  
 যশোদা রাখিল নাম যাছু বাছাধন ॥  
 \* \* \* \*  
 অনন্ত রাখিল নাম অন্ত না পাইয়া ।  
 কৃষ্ণ নাম রাখেন গর্গ ধ্যানেন্তে জানিয়া ॥  
 \* \* \* \*  
 বৃন্দাবনচন্দ্র নাম রাগে বৃন্দাদূর্তী ।  
 বিরজা রাখিল নাম যমুনার পতি ॥  
 \* \* \* \*  
 হরে কৃষ্ণ নাম রাগে প্রিয় বলরাম ।  
 ললিতা রাখিল নাম দূর্বাদলস্থাম ॥  
 \* \* \* \*  
 নাম ভজ নাম চিন্ত নাম কর সার ।  
 অনন্ত কৃষ্ণের নাম মহিমা অপার ॥  
 যেই নাম সেই কৃষ্ণ ভজ নিষ্ঠা করি ।  
 নামের সহিত আছেন আপনি শ্রীহরি ॥  
 ভক্তবাহুপূর্ণকারী নন্দের নন্দন ।  
 নরোত্তম কহে এই নামসংকীর্তন ॥



লোক জন্মে গিয়েছিল। কার্তন শেষ হতেই ফরমাশ হয়, একথানা পদাবলী ধরুন। বাবাজী উত্তর দেন, নামের পর আর কিছু চলে না। শ্রোতার সব প্রশ্নান করলে জিজ্ঞেস করি,

: আচ্ছা বাবাজী! নামের পর আর কিছু চলে না কেন?

: আমি তো বাবু বুঝিয়ে বলতে পারবো না; তবে গুরুদেব বলতেন, যেই নাম সেই কৃষ্ণ, তার পর নাই। নামই মধু, তারপর আর উচ্ছেভাজা কেউ খায় কি?

: শুধু কৃষ্ণ নাম-ই তো যথেষ্ট; এতো নাম কেন?

: যার যেমন ভাব।

: নরোত্তম বাবাজী তেঁা সব নামই গেয়েছেন?

: গুরুদেব বলতেন, ভাবের পর প্রেম। প্রেম এসে গেলে সব ভাবেই ভগবানকে আশ্বাদ করা যায়। নরোত্তম গোসাঁই প্রেমিক ছিলেন। প্রেম না আসা পর্যন্ত এক নাম নিয়ে থাকতে হয়।

: আপনার গুরুদেবের কথা একটু বলুন।

অনেক কথাই বললেন, কেঁদে বুক ভাসিয়ে:...রমের সাধনা বাঙ্গালীরা খুবই করেছিল...সবই উলট-পালট হয়ে গেল...স্টীমার ঘাটে লেগেছে, নেবে পড়লুম। ঘড়িটা সঙ্গে আনি নি। ভয়ে ভয়ে এক বস্ত্রে এসেছি। বেলা প্রায় দশটা হবে হয় তেঁা...আগেকার দোকানপাট কিছুই নেই...বালু আর তপ্ত হাওয়া...কাশবন নিশিচ্ছ...সব ধু ধু করছে...বিরাত এক মরুভূমি!...তাড়া ছিল না কিছু, পুঁটুনীতে খাবার নিয়ে এসেছিলুম...পদ্মাতে স্নান করতে করতে গঙ্গার কথা মনে হয়...মা গঙ্গা ভারতসন্তান সকলেরই মা, পদ্মা আমাদের নিজের মা; পদ্মার জল মাতৃস্নেহের মতো পুত কিন্তু নিজস্ব...সেই স্নেহধারা থেকে আজ চিরদিনের মতো বঞ্চিত...এজল আমার নয়...অপরাধীর কুণ্ঠা নিয়ে ডুব দিই...এটাই শেষ ডুব...হাতে অমৃত পান করি...জীবনে আর হবে না...হাতে জল নিয়ে চেয়ে থাকি...আবার জল নিই, মাথায় দিয়ে বলি,

মা তুই পরের দুয়ারে পাঠালি তোর ঘরের ছেলে।

তারা যে করে হেলা, মারে ঢেলা, ভিক্ষার ঝুলি দেখতে পেলে ॥

সংকল্প করে একটা শেষ ডুব দিই, তারপর উঠে পড়ি।...পরিচিত রাস্তা, কিন্তু অচেনা ঠেকে...লোকজনের চলাচল নেই বললেই হয়...যারা ছিল ভিক্ষার ঝুলি নিয়ে তারা আজ নিরাশ্রয়, শরণার্থী...রাস্তায় পড়ে ভাজা ভাজা হচ্ছে...বক্তৃতায়

বিশ্বপ্রেমের তুফান, আশ্বাস-বাণীতে ভূষর্গ লজ্জিত—বাস্তবে তারা যে করে হেলা, মারে ঢেলা।...দূর হয়েছে কপটবন্ধু ; নিকট, পরমশত্রু...রোদ খাঁ খাঁ করে... একটা বটগাছের ছায়ায় বসি...কতোবার যাতায়াত করেছি এই রাস্তায়...পায়ের দাগটুকুও চোখে পড়ে না...একটা ঘুঘু ডেকে ওঠে...কী করণ ও উদাস রব ! ভৈরোঁ। রাগের বিলীয়মান রেশটুকুর একটানা অহরণন।...আগেকার দিনে ভিটেতে ঘুঘু চরানো হতো...ঘুঘু কেন ? কোনো কিংবদন্তী আছে নাকি ?... ঘুঘুর ডাকে ঘরছাড়ানো সুরটুকু ঠিকই আছে...হলোও তো ঘরছাড়ানো...তা-ই বা কি-করে বলা যায় ? ঘরগুলোই যে নেই ! কতোটা রাস্তা তো পেরিয়ে এলুম—মা লক্ষ্মীর পায়ের ছাপ কোথায় ?...আছে ভিটে-মাটি-উচ্চর উঁচু উঁচু টিবি...এককালে ঘরবাড়ী ছিল—মামুষের হাসি কান্না, ঠাকুরঘর, তুলসীমঞ্চ, শঙ্খধ্বনি... সর্বত্র ঘুঘুর করণ উদাস ক্রন্দন...আবার ঘরের দিকে চলি ; ঘরটি আছে কিনা জানা নেই...ঘুঘুর ডাকই ভালো—এখন মামুষের আওয়াজে পাই ভয়, শঙ্কা, ভ্রাস...নিকট যে এখন পর, পরম শত্রু ! ঐ আমাদের বাড়ী না ! কী জানি !...হয় তো...এই রাস্তায় একবার ফুটবল খেলা দেখে বাড়ী ফিরছিলুম ; ঘনঘটা আগে থেকেই ছিল, হঠাৎ ঝড়-জল আরম্ভ হলো...চারদিক অন্ধকার... রাস্তা অত্যন্ত পিছল...সামনে কিছুই দেখা যায় না...মাঠের মাঝখানে আশ্রয়ও নেই...সঙ্গে আলো নেই, টর্চ নেই...পা পিছলে পড়লুম বলে ! . শুধু ঘন ঘন বিজলি চমক—তু-পা দেখে এগই ; আবার অন্ধকার...আজকে ক্ষণপ্রভার আলোটুকুও নেই...দুপুরের প্রথর রোদ—midnight at noon...মাবেমাঝে অশরীরী আর্তের তপ্ত নিঃশ্বাস ; আকাশে চিলের বৃক্ষাটা আহত রব...midnight at noon...মধ্যাহ্নের দীপ্তি নিয়ে শ্মশানের কালিমা...এসে পড়েছি। প্রণাম !... পুকুরটা আছে, বাড়ীঘরের চিহ্নও নেই...স্নান করবো ? কিন্তু জলের যা অবস্থা—গাঢ় সবুজবর্ণের একটা সর পড়ে আছে ! নাঃ, সাহস হয় না...পুকুরের এক পাশে, আমাদের ঘরের কোণের সেই হিজলগাছটি এখনো আছে ; আগেব দিনের মতো লালফুলের চাদর বিছানো রয়েছে...শুয়ে পড়লুম...কতো দুপুরের শয্যা, কতো স্বপনের নীড় ! শ্রান্ত ছিলাম, গা এলিয়ে দিতেই বেঘোরে ঘুমিয়ে পড়লুম। উঠলুম প্রায় তিনটে সাড়ে তিনটে হবে। এমন ঘুম অনেকদিন ঘুমই নি। কলকাতার ছেদহীন কোলাহলে মামুষ ঘুময় ঠিকই, কিন্তু ঘুমটা হয় আধ-জাগরণ অভ্যস্ত হয়ে গেছি বলে টের পাই না। আজ যেন স্নায়ুশির অতলজলে ডুবেছিলাম, কেউ কিছু ছিনিয়ে নিলে বা গলাটা এক কোপে কেটে ফেললে হয়তো জানতেও

পারতুম না...গাছটার বয়স হয়েছে ; ছোটবেলা থেকে এমনিই দেখে আসছি...  
 ঐ ডালটায় বসে ভাবতুম, কান্ন বোধহয় বৃন্দাবনের ঘনশ্রাম কোনো গাছের  
 ডালে পা ঝুলিয়ে বাঁশি বাজান...হয়তো একদিন এই ডালটায়ও এসে বসতে  
 পারেন...আকাশে সেদিন কালো মেঘ ছিল ; এই ডালটায় বসে অনেকক্ষণ  
 ডাকলুম—কৃষ্ণ হে, কৃষ্ণ হে...হে কৃষ্ণ, হে কৃষ্ণ...দেখা দিলেন না। ঝড় এসে  
 গেলো ; চোখ মুছে নেবে পড়লুম...

নাম ভজ, নাম চিস্ত, নাম কর সার।

অনন্ত কৃষ্ণের নাম, মহিমা অপার ॥

কৃষ্ণ নামের অপার মহিমা ? তার ফলেই কি এ দশা হলো ? মহিমা যে নেই  
 তা বলতে পারি না। কিছু দিন আগে যাদবপুর 'জয় হিন্দ টি স্টল'-এর এক  
 কোণে বসে চা খাচ্ছি ; মাঝখানটায় একটা গোল টেবিলের চারদিকে যুবকদের  
 চা-সহযোগে তর্ক চলছে.....নেতাজীর ভক্ত বলছেন—

: যতো ছিল নাড়াবুনে হলো তারা কীর্তনীয়, কাস্তে ভেঙ্গে গড়ে করতাল।

একজন প্রশ্ন করেন, 'তার মানে ?'

: মানে অতি স্পষ্ট। নেতাজী নেই বলেই হাড়হাবাতেরা করে খাচ্ছে। যোদন  
 'জয় হিন্দ' বলে এসে দাঁড়াবেন তিনি, থেমে যাবে সব ছুঁচোর কীর্তন ; সেলাম  
 ঠুকে সব বলব—জয় হিন্দ। নেহরুজীর ভক্ত উত্তর দেন—

: ভয়ে সব আঁতকে উঠবে ঠিকই, মানে ভূতের ভয়ে।

: সবজ্ঞাস্তা বাক্যবাগীশের পদলেখকগণ এমনিই বলে থাকে বটে। রাখবে না  
 কোনো খবর, কিন্তু হলপ করে বলবে—বঁচে নেই। যতসব ইয়ে—

: বঁচে আছেন তো আসেন না কেন ?

: সময় হলেই আসবেন।

: আসলেই বা কী ? Spent force দিয়ে কাজ হয় না।

: যতো কাজ হয় নেহরুজীকে দিয়ে ?

: সে বিষয়ে আর মনেহ কী ?

: আহা ! কী কাজটাই না করেছেন ?

একজন টিপ্পনী কাটেন—

যাহা তুমি করিয়াছ সব ভুল করি।

যাহা তব অবদান শুধু গুণাগারি ॥

: কী কাজটা করেন নি, বলুন। ভারতের এক সন্ধিক্ষণে দেশের ভার ঘাড়ে নিয়েছেন ; দেশকে এক করে রেখেছেন, শতধা ছিন্ন হওয়ার সর্বনাশ থেকে বাঁচিয়েছেন ; জীবনযাত্রার মান উঁচু করেছেন ; আমাদের চিরাগত অন্ধ কুসংস্কার তাড়িয়েছেন ; বিশ্বের দরবারে ভারতের সম্মান ও প্রতিষ্ঠা বাড়িয়েছেন...নেহরুজী যদি এখনও সেরে দাঁড়ান—

: বাঁচি। অফুরন্ত বক্তৃতা থেকে বাঁচি ; বিষ্ণুশর্মার হিতোপদেশ থেকে বাঁচি ; আর আপনাদের জ্বরকোট ও চোস্ত পায়জামা থেকে বাঁচি। সর্বনাশ থেকে বাঁচান নি মশায়, সর্বনাশ ডেকে এনেছেন ; ভারতকে দ্বিখণ্ডিত করেছেন ; লক্ষ লক্ষ বাঙ্গালীকে ছন্নছাড়া ভিখিরী করে দিয়েছেন ; আর U.N.O. র প্যাচে পড়ে কাশ্মীরকে থোয়াতে বসেছেন। আপনি স্পাই নন তো ? : আপনি ফেপা কুকুর নন তো ?

‘Shut up’ ; ‘Shut up’ ; ‘তবেরে,’ ‘তবেরে’.....তারপর আন্তিন গুটিয়ে দ্বন্দ্বযুদ্ধ। কেউ থামবার চেষ্টা করে, কেউ উসকানি দেয় ; দু-একটা পেয়লা ভাঙ্গে ; দোকানী চিংকার করে। অর্থাৎ বেশ গজকচ্ছপের লড়াইর মতো অবস্থা..... হঠাৎ কানে আসে—

কই কৃষ্ণ এলো কুঞ্জে প্রাণসই।

দেরে, কৃষ্ণ দে, কৃষ্ণ এনে দে,

রাধা জানে কিগো কৃষ্ণ বই॥

মৃদঙ্গের ধ্বনি, মহাজনের পদ, কীর্তনের প্রাণ-মাতানো সুর—রাধা জানে কিগো কৃষ্ণ বই।

রাস্তা দিয়ে গেয়ে যাচ্ছে। মুগ্ধ হয়ে শোনে সবাই। যুযুধান দৈত্যগুলো ঘুমিয়ে পড়ে ; সকলেরই চোখ ছলছল, মন বিরহকাতর ; সকলের অন্তশ্চেতনায় বিরহিণী রাধা কঁদে ওঠে ‘কই কৃষ্ণ এলো কুঞ্জে প্রাণসই’.....বাঙ্গালীর দৈবী সম্পদ... কতো কাল ধরে কঁদেছি ‘কৃষ্ণ দে, কৃষ্ণ এনে দে’...

কিন্তু অমিয় সাগরে সিনান করিতে সকলি গরল ভেল।...শ্রীকৃষ্ণও ভুল হয়ে যায়...তিনিও ভুলেছেন আমাদের...অপরাক্তের রোদ এসে মুখে পড়ে। ঊর্ধ্বে উত্তরের বাগানের দিকে যাই...কতো গাছই না ছিল—আম, জাম, কাঁঠাল, নারকেল, কুল, তেঁতুল, চালতে, গাব, বাঁশবন, বেতবন, কাঁটা গাছ...বেশ অন্ধকার থাকতো। একবার বাগানের এক নিভৃত কোণে আমরা পাঁচ-সাতজন চক্রে বসে হরিকে ডাকছিলুম ; চোখ বুজে, মনে মনে। থানিকক্ষণ পর কেউদা চোঁচিয়ে

ওঠে—পেয়েছি, পেয়েছি। খুব ভয় হলো। হরিকে ডাকা এক জিনিস; কিন্তু চাক্ষুষ দেখা! ভয়ে যদি অজ্ঞান হয়ে যাই! ভয়ে ভয়ে চোখ খুলে দেখি, কিছুই নেই, শুধু আবছায়া অন্ধকার। কেষ্টদা বলে, ‘আমার সামনে এসে দাঁড়ালো; হাত বাড়িয়ে যেই চোখ খুললুম, দেখি নেই।’ জগদা গালাগালি দেয়, ‘তুই একটা আস্তো গাধা! চুপিচুপি বললি না কেন? আমরা সবাই দেখে নিতুম’। জেঠামশায় পাশ দিয়ে যাচ্ছিলেন; আমাদের গলা পেয়ে বজ্রগস্তীর স্বরে হুঙ্কার দেন, “কে রে ওখানে?” হাওয়ার মতো সব মিলিয়ে গেলুম। কেষ্টদার কথা যে বিশ্বাস করেছিলুম তা নয়, তবে মনের কোণে একটু ‘কি জানি, হয়-তো-বা’ ছিল। আজ হাসি পায়। বাড়ীর দক্ষিণধারে একটি কদমগাছ ছিল; ফুলের কী সজ্জা! ...কেষ্টদা নাকি এই গাছে শ্রীকৃষ্ণকে পা ঝুলিয়ে বেণু বাজাতে দেখেছে। জানতুম ধান্ধাবাজি; তবও জ্যোৎস্না রাতে গাছেব আড়ালে চুপিচুপি দাঁড়িয়ে থাকতুম—দেগি নি কিছু। কদমগাছটি আর নেই। দক্ষিণ পূর্ব কোণে কালীব কাকীমাদের ঘর, যে ঘরে কাকী ফাঁস দিয়ে জিভ বের করে ঝুলছিল; ঘরের চিহ্নও নেই... বাগান আর চেনা যায় না; অনেক গাছই নেই, ‘কোনো কোনো গাছে মানুষের মাথা’...অর্থাৎ নারকেল গাছ; একটিও নেই। বাগানে ঢুকতেই উত্তর-পশ্চিম কোণে একটি জাম গাছ; ডাল ভেঙ্গে একবার পড়ে গিয়েছিলুম; গাছটি নেই। ঈশান কোণের তেঁতুলগাছটি আছে। কেষ্টদার মতে ওটি ভূতের বড় আড্ডা। একবার কালীবাড়ীর পূজারীঠাকুর কালীপূজা শেষ করে পাঠার মাথাটি নিয়ে বাড়ী ফিরছিলেন। তেঁতুল গাছের পাশ দিয়ে বাস্তা; গভীর রাত, অমাবস্তা; বাড়ে হাওয়া। হঠাৎ দেখেন বাস্তা নেই...লঠনটা দপ্‌দপ্‌ করে নিবে গেলো...বিরাট এক অন্ধকার পূজারীঠাকুরকে পিছনে ঠেলছে...পাঠার মাথাটা দশমণ ভারি, দুহাত দিয়ে ধরে রাখতে পারছেন না; গাছ থেকে গোঁগোঁ শব্দ...কিন্তু পূজারী-ঠাকুরের সঙ্গে ছিল মৃত্যুঞ্জয় কবচ; ‘কালভৈরবঋষিগায়ত্রীচ্ছন্দঃ শ্রীমহারুদ্র দেবতা’ বলে স্তোত্র পাঠ করতেই আলোটা জলে উঠলো; বাস্তা দেখা যাচ্ছে; মড়মড় করে একটা ডাল ভেঙ্গে পড়ে। পূজারীঠাকুর পাঠার মাথাটা ফেলে দিয়ে বাড়ী যান... কেষ্টদার নোটবুকে মৃত্যুঞ্জয় কবচের মাহাত্ম্য লেখা ছিল—

ভূতপ্রেতপিশাচাত্মা যক্ষরাক্ষসপন্নগাঃ ।

দ্রাঘদেব পলায়ন্তে দ্বীপাদ্ দ্বীপান্তরং ধ্রুবম্ ॥

আমার এক কাকাবাবু ছাত্রবৃত্তি পরীক্ষার্থীদের পণ্ডিত ছিলেন। জন্মভূমি সম্বন্ধে-

তঁার কৃত একটি স্তোত্রের ছন্দঃপতন ও ব্যাকরণ অন্তর্ভুক্তি থাকা বিচিত্র নয়। কিছু কিছু মনে পড়ে—

এষা পল্লী ভবেৎ কাশী দীর্ঘিকা পুষ্করস্তীর্থঃ ।  
 পদ্মা বৈ অলকানন্দা, বটস্বক্ষয় এব চ ॥  
 কদম্বতরুশাখায়াম্ আসীনো নন্দনন্দনঃ ।  
 গোচার্ণভূমৌ চাপি খেলতি সখাভিঃ সহ ॥  
 উত্তরশ্রামস্তি বনং বৃক্ষরাজিসমাবৃতম্ ।  
 তিস্তিভীষীর্ষভাগে তু বিরাজতে ভূতনাথঃ ॥

\*

\*

\*

অস্মিংস্তীর্থে যস্য জন্ম মহাপুণ্যফলহেতো ।  
 ন স পুনরাবর্ততে, ন স পুনরাবর্ততে ॥

তাই সব দেশ ছাড়া!...বড় গাবগাছটা এখনো আছে...একবার লুকোচুরি খেলায় এই গাছটির মগডালে লুকিয়েছিলুম...অনেকক্ষণ বসে আছি...সন্ধ্যা হয়ে আসে...আমার কথা কি ভুলে গেলো?...কেউ তো আসছে না খোঁজে...আকাশটা কী উঁচু! শেষ নেই! কতদূর চলে গেছে!...আরও উঁচুতে? নিবে যায় হঠাৎ আকাশটা...বুকটা ছুঁছুঁ করে...কোনো প্রকারে গাছ থেকে নাবি...ঐ মাটি...গম্ভীর অজানা ভয়ের উদাত্ত রব—হতোম পেঁচার ডাক—অন্তহীন গহবরের সীমাহীন অন্ধকার...ভয়ে হয়তো গাছ থেকে পড়েই যেতুম, লোক জন দেখা যাচ্ছিল তাই রক্ষে...বুকের ঢিবিবি আওয়াজ কতোক্ষণ যে ছিল!...চিঁচিঁ—একটা চিল উড়ে যায়; উদাস সুর, কিন্তু ভাব-লঘু—হাওয়ায় গা এলিয়ে চলার অলস ছন্দ...ঘুঘুর ডাকের কক্ষণ গাম্ভীৰ্য নেই...এখানটায় আমাদের ঘর ছিল; বসলুম। রামপ্রসাদ চেয়েছিলেন, ‘মাটির ঘরে বাঁশের খুঁটি মা, পাই যেন তায় খড় যোগাতে’।...আমরা চাওয়া-পাওয়ার উদ্দেশ্যে...চালা নেই, খড় নেই, খুঁটি নেই, আছে মাটির ঢিবি। মধু বৈরাগী-কার্ত্তিকমাসে প্রভাতী গেয়ে টহল দিতো...

দিন গেল মিছে কাজে রাত্রি গেল নিদ্রে ।

না ভজিহু রাধাকৃষ্ণ চরণাবিন্দে ॥

তদ্ভালস মনে কী এক অপূর্ব সংবেদন জাগতো...কোথায় মধু বৈরাগী ? কোথায়  
 শ্রীরাধার প্রাণধন মুকুন্দ মুরারি...মিছে মায়ায় বন্ধ হয়ে বৃক্ষসম হইল...পুকুরধারের  
 গাছটি ! ‘পাখী ঐ যে গাছিল গাছে’ ! ভোলাদা আর আমি ঐ ডালটায় বসতুম  
 ...জলের দিকে উৰ্ হ’য়ে বারোঁয়া রাগিনীর পাখী-ও-মানুষের প্রতীক্ষায় গাছটি  
 এখানো ঝুঁকে দাঁড়িয়ে আছে.. কান পেতে শুনেছে সে মানুষ আসে  
 কিনা, সে পাখী গায় কিনা...ডন্ (Dawn) কুকুরের করুণ  
 মুখখানা ভেসে ওঠে ; সখ করে সহর থেকে এনেছিলুম—বিলিতি কুকুর,  
 নাম রেখেছিলুম Dawn ; নিজে মাছ না খেয়ে ডনকে খাওয়াতুম...বড়ই  
 জালাতন আরম্ভ করলো, বিশেষতঃ কাকীমা-জ্যেঠাইমাদের দোরগোড়ায় ; তা  
 নিয়ে রোজ ঝগড়া-বিবাদ। বাবা ছিলেন অত্যন্ত শান্তিপ্রিয় লোক ; অশান্তি  
 দেখে একদিন বলেন, ‘কালকের ভিতর কুকুরটাকে বিদেয় না করলে আমি  
 জলগ্রহণ করবো না’...ডনকে নিয়ে মাসীমাদের গাঁয়ের দিকে চললুম...ডন  
 কিছুতেই সঙ্গ ছাড়ে না ; টিল মারি, তবুও আসে...পাঁচ-ছ মাইল পর একটা  
 খাল। থেয়া নৌকোতে আমি পেরিয়ে গেলুম...ওপার থেকে ডন কেঁউ কেঁউ  
 করতে লাগলো...কতো দিন যে ওর জন্তু কেঁদেছি, কতো বার স্বপ্নে দেখেছি ওর  
 কাতর মুখ, ছলছল চোখ, মুক বেদনা...বৈতরণীর ওপারে হয়তো ডন আমার  
 প্রতীক্ষায় এখানো দাঁড়িয়ে আছে...খাঁদের জন্তু ডনকে তাড়ালুম আজ তাঁরা কেউ  
 নেই...সকলেই বিতাড়িত...হারাধনের একটি ছেলেও বেঁচে নেই...যদি থাকে  
 কেউ বেঁচে সে হয়তো মনের দুঃখে দেশান্তরে গিয়ে কাঁদছে ভেউ-ভেউ...চার  
 দিকেই কাঁটা গাছ...একটা কাঁটাগাছে তারার মতো লাল ফুল ফুটে আছে..  
 ভিটেমাটি উচ্ছন্ন...ঘুঘু চরানো হয়েছে...আমাদের ঠাকুর ঘরের ভিটেতে হাল  
 চালানো হয়েছিল বোধ হয় ; পাশের তুলসীমঞ্চ বিছুটির বন...কোটর পেঁচা  
 ডেকে ওঠে...অলক্ষ্যে ডাক, কিন্তু অনাগতের ইঙ্গিতে পূর্ণ ; মনে হয় অন্ধকার  
 কেটে এসেছে। অরুণোদয়ের মাঙ্গলিক বাজবে এবার—কিন্তু বর্তমান পরিবেশে  
 তার কোনো মানে হয় না। তুলসীমঞ্চের উদ্দেশে প্রণাম করি . দিদিমা সঁজুতি  
 দিয়ে ঠাকুরকে শোয়াতেন, তারপর ঠাকুরঘরের দাওয়ায় বসে জপ করতেন...  
 ঠাকুরঘর নেই, তুলসীমঞ্চ নেই, বাতি নেই, বাতি দেওয়ায় লোক নেই  
 ...আছে কাঁটা গাছ ; বিছুটি বন।...একটি একটি করে সব বাতিই  
 নিবে গেলো...কি নিয়ে আর বেঁচে থাকি ? অস্তহীন তমিষা ? ও নিয়ে  
 বাঁচা যায়?...কী দুঃখ পেয়ে বুদ্ধদেব বলেছিলেন—সর্বং দুঃখং দুঃখং, সর্বং

শূণ্যং শূণ্যম্ ?...হে তথাগত ! সব বাতিই তো নিবিয়ে দিয়েছ ! শূণ্যের  
বেদনাটুকু আর রেখে দিয়েছ কেন ? রিক্ত করেছ, পূর্ণ করো না কেন ? দন্ধ  
নিঃশ্বাসেই কি জীবনটা ছাই হয়ে যাবে ?...অতন্ত্রিত জ্যোতির দ্বিধাতায় ঐ ওঠে  
সঙ্কাতারা ! জীবনের কালরাত্রি ভেদ করে তুমি কি তেমনি জলে উঠবে না ?  
করণার পরশ দিয়ে নিয়ে যাবে না সেই “অক্ষিত অমৃতলোকে” ? পৌছিয়ে  
দেবে না ‘যত্র জ্যোতির্ অজস্রং, যস্মিন্ লোকে স্বর্ হিতম্’ ? হে অমিতাভ !

যত্রানন্দাশ্চ মোদাশ্চ

গুদঃ প্রমুদ আসতে ।

কামস্তু যত্রাপ্তাঃ কামাস্

তত্র মাম্ অমৃতং কুধী ॥



ତୃତୀୟ ଅଧ୍ୟାୟ

ଓଁ ମଧୁ ଓଁ ମଧୁ ଓଁ ମଧୁ

(କ)

ଆଶ୍ଚର୍ଯ୍ୟ ଅଶାର



## (ক) মাষ্টার মশায়

॥ ১ ॥

বিকেল বেলা ; কলেজ-স্কোয়ারের এক কোণে বসে আকাশ-পাতাল ভাবছি—  
আকাশ হচ্ছে ঈশান, পাতাল হচ্ছে নরক ; জন্মভূমি ঈশান, কর্মভূমি নরক ।  
ঈশান ও নরক ; নরক ও ঈশান—এমনি ঈশান যে চিতা জালাবার অধিকার-  
টুকুও নেই । আছি এবং মরবো এই ভারতের মহাদানবের নরককুণ্ডে...মুক্তির  
সব রাস্তাই বন্ধ । এককালে কতো স্বপ্নই না দেখেছি এখানে বসে...পুণ্যতীর্থ এই  
পথ...কতো যুবক কতো ভাব ও চিন্তার আবেশে, কতো মহান্ আদর্শের  
অনুপ্রেরণায়, এই রাস্তা দিয়ে চলে গেছে...দূর দূরান্তরে গিয়ে স্বপ্নকে রূপ  
দিয়েছে...প্রাণের আহুতি দিয়েছে কষ্টে দেবায়...কোন অজানার করাল আঙ্গানে  
‘বিদায় দেহ ভাই’ বলে আকাশসমুদ্রে পাল তুলেছে...আকাশ হঠাৎ ভেঙ্গে পড়ে  
দানবের তাণ্ডবনৃত্যে ! কালীসাপক মুকুন্দদাস গেয়েছিলেন—

আসিছে নামিয়া গ্রায়ের দণ্ড—রুদ্র, দীপ্ত, মৃতিমান্ !

তন্ময় হয়ে ওঁনেছি, জপের মালায় দিন গুণেছি...দণ্ড এলো কিন্তু আমাদেরই  
উপর অভিষাপ হয়ে ।... শকুনির চক্রে পাশা উলটে গেলো...

দুর্যোধনো মহ্যময়ো মহাদ্রুমঃ

স্বন্ধঃ কর্ণঃ শকুনিপুস্ত্র শাখা ।

দুঃশাসনঃ পুষ্পফলে সমৃদ্ধে

মূলং রাজা ধৃতরাষ্ট্রোহ মনীষী ॥

যুধিষ্ঠিরো ধর্মময়ো মহাদ্রুমঃ

স্বন্ধোহর্জুনো ভীমসেনোহস্ত্র শাখা ।

মাদ্রীসুতো পুষ্পফলে সমৃদ্ধে,

মূলং কৃষ্ণে ব্রহ্ম চ ব্রাহ্মণাশ্চ ॥

মহাভারতের আশ্বাসবাক্য ; অটুট বিশ্বাস ছিল । শুধুই স্তোকবাক্য ! অনৃতমেব  
জয়তে, ন সত্যম্ !...কোথায় ধর্মের জয় ?...শ্রীকৃষ্ণ নিজেই বা কতটুকু ধর্ম  
বাঁচাতে পেরেছিলেন ?...মহাভারতের যুদ্ধ থামাতে পারেন নি ; ক্ষাত্রশক্তির  
বিপর্যয়ের পর এলো অরাজকতা, অনাচার, স্বৈরাচার, অধর্মের ক্রুর ব্যাপকতা...

গাণ্ডীবধারী অর্জুন মেয়েদের রক্ষা করতে পারেন নি দস্যুর হাত থেকে... পাপের প্রকোপে যদুবংশ ধ্বংস হয়ে গেলো...পঞ্চপাণ্ডব মহাপ্রস্থানে গেলেন...ভারতবাসী ঘোর অন্ধকার : অধর্ম একচ্ছত্র সম্রাট...সত্যমেব জয়তে ? বাজে কথা...ঋশান ও নরক, নরক ও ঋশান...দুর্ধোষনো মহ্যময়ো মহাক্রমঃ...শকুনিস্তম্ভ শাখা...কোনো কিছুই মানে হয় না—যেমন স্বপ্ন ! কতো কিছু দেখি, কী তার অর্থ ?...সেদিন স্বপ্ন দেখছিলুম কোন এক তীর্থে যাচ্ছি ; আমার আগে একজন যাত্রী—দোহার গড়ন, কসাঁ রং, মুখ দেখা যাচ্ছে না ; চেনা চেনা মনে হয় ; এগবার চেষ্টা করি, ধরতে পারি না ; পা চালাই, কিন্তু পিছনেই পড়ে থাকি...কোথায় দেখেছি এঁকে ? পূর্বজন্মের স্মৃতি ?...কে জানে ?...কোনো কিছুই মানে হয় না...পুণ্যতীর্থ ভারত, কিন্তু কী তার ইতিহাস ? চিরটা কাল মারই থেলো...ভারত এক বিরাট রহস্য-স্ফিংক্স (Sphinx) এর অস্তহীন প্রশ্ন, সপ্তর্ষিমণ্ডলের চিরন্তন জিজ্ঞাসা ; যিনি উত্তর জেনেছেন তিনিই অমৃত ; আমাদের ভাগ্যে হাড়িকার্ট...পাশে এক ভদ্রলোক এসে বসলেন...পুকুরের ধারে একটা 'গোলাপ ফুল ফুটে আছে...ফুলের মতো সুন্দর এ জগতে কিছুই নেই...জাতকের একটি গল্প মনে পড়ে। সারিপুত্র একজন শ্রমণকে দেহের কদর্যতা ও নশ্বরতা সম্বন্ধে ধ্যান করতে উপদেশ দিয়েছিলেন ; ধ্যান বসছে না শুনে বৃদ্ধদেবের কাছে তাঁকে নিয়ে এলেন। বৃদ্ধদেব বললেন, 'পূর্বজন্মে ইনি স্বর্ণকার ছিলেন, কারুকার্যে অদ্ভুত দক্ষতা ছিল, ...কদর্যতার ধ্যান এঁর বসবে না। সামনের ঐ জলাশয়ে যে পদ্মফুল ফুটে আছে তার ধ্যান করুন...একটার পর একটা পাপড়ি খসে পড়বে...সৌন্দর্য মিলিয়ে যাবে অস্তহীন মহাশূন্যে...কোথায় মহাশূন্য ? কিন্তু ফুলটি কি সুন্দর ! নীচে সবুজ ঘাস ; মালী জল ঢেলে স্নান করিয়ে গেছে ; হাওয়াতে ঘাসগুলোর তৃপ্ত শিহরণ...ছোট শিশুর মতো সজীব, প্রাণবন্ত...ওখানটায় শুয়ে গোলাপফুলটির দিকে তাকিয়ে জীবনটা মহাশূন্যে লয় করে দিতে পারলে বেঁচে যেতুম...অসম্ভব...মরুভূমি...বালু ও কাঁটা গাছ...বালুতে চাপা কাঁটাগাছ...কিন্তু ঘাসগুলোর কি অপূর্ব সজীবতা ! ফুলটি এক অপার্থিব আনন্দে দোল খাচ্ছে ! এই নরকে ?...একি সত্যি ?

: দেবলবাবু না ! ভালো আছেন তো ?

পাশের ভদ্রলোকটির দিকে তাকাই। মাঠের মশায় ! রাঁটাতে কিছু দিনের পরিচয়েই যিনি পরমাত্মীয় হয়েছিলেন...এখানে মাঠের মশায় ! গোলাপফুলটির মতো লাল টকটকে মুখখানা—কে যেন আবার ঢেলে দিয়েছে !...And the

angel of the Lord appeared unto him in a flame of fire out of the midst of a bush and he looked, and behold, the bush burned with fire...আনন্দের দীপ্তিতে মুখখানা ফুলের মতো বিকশিত, আঙনের মতো লাল ! এখানে ? এই অপাধিব আলো ! একি সম্ভব ?

: চিনতে পারলেন না ?

অভিভূতের মতো চেয়ে আছি...অসম্ভব, অপ্রত্যাশিত...স্বপ্নের সেই যাত্রী ? যাকে ধরতে গিয়ে ধরতে পারি নি ?...প্রণাম করলুম। তারপর মুখ ঝুঁজে কাঁদতে লাগলুম ! অনেক কালের চাপা কান্না—থামাতে পারি না...মাষ্টার মশায় চুপ করে বসে ছিলেন...কিছু বললে হয়তো বেসামাল হয়ে পড়তুম...মনটা বেশ হালকা হয়ে গেছে...সহজভাবে প্রশ্ন করি ‘কবে এলেন ?’

: মাস খানেক হলো।

: রাঁচীর খবর কি ?

: অনেক কাল রাঁচী-ছাড়া। কিছুদিন ছিলুম বৃন্দাবনে ; তারপর কাশী, পুুলিয়া, হাজারিবাগ, ধানবাদ, পাটনা, গয়া...এখন কিছুদিন এখানেই থাকবো।

: কোথায় আছেন ?

: বেলেঘাটা। আসবেন ; আলাপ-সালাপ হবে।

অনেক কথা হলো ; রাঁচীর কথাই বেশী—মুরাবাদির মাঠ, গোঁধা পাহাড়, বড়কা তলাও, রাঁচী পাহাড়, স্নবর্ণরেখা নদী, ফুলবাবার আশ্রম, হযূর্নদীর ধার, চুটিয়ার বাবাজী মশায়...নিজের কথাও বললেন। কোনো বন্ধনই নেই এখন ; ভাইপোরা মানুষ হয়েছে, তাদের কাছে এখানে-ওখানে থাকেন। বর্তমানে বেলেঘাটায় দিদির বাড়ীতে আছেন ; থাকবেন কিছুদিন। আমি আর বিশেষ কিছু বলতে পারলুম না—কথা যোগাচ্ছিল না ; মনটাও ছিল থমথমে। চুটিয়ার বাবাজী মশায়ের সম্বন্ধে, মাষ্টার মশায় বলেছিলেন, ‘ঐর স্মরণে গঙ্গান্নানের ফল হয়’। আমারও মনে হলো গঙ্গান্নান করে পুত দেহে, স্নিগ্ধ চিত্তে বাড়ী ফিরলুম।

## ॥ ২ ॥

আমার সব কথা শুনে মাষ্টার মশায় বলেন,

: ভালোই তো হয়েছে।

: ভালো ?

: মোহ কাটানো কি কম তপস্বী ? যেখানে যেখানে স্নেহের বন্ধন ছিল ভগবান্ সেগুলো কেটে দিয়েছেন । ভালো নয় ?

: কিন্তু দুঃখ ?

: দুঃখ মানুষের আসে ; কিন্তু দুঃখবোধ অতি বিরল—পোড়াভাত ছেঁড়া-কাঁথা সবেও আসে না । দুঃখবোধ এলে তত্ত্বজিজ্ঞাসার অধিকার জন্মে । সর্বং দুঃখং দুঃখং—হাড়ে হাড়ে একথা না বুঝলে সাধন ভজন সার্থক হয় না ; সাধুরা এমনই বলেন ।

: কিন্তু কেন এই দুঃখ ?

: বুদ্ধদেব বলেন : ‘কেন’ দিয়ে কী কাজ ? অসুখ হলে ঔষধ সেবনই বিধি । স্নেহের রোগ হলো কেন এই প্রশ্ন না করে আরোগ্য লাভের চেষ্টা করাই সম্ভব নয় ?

: তা না হয় মানলুম ; ওষুধও না হয় খেলুম, কিন্তু রোগ হয় কেন, এই প্রশ্নটা থেকে যায় না ? ভগবানের রাজ্যে এই দুঃখ কেন ? Why at all ? দুর্ভিক্ষ দেখলুম ; উদ্বাস্ত দেখছি ; নীতি নেই, সমবেদনা নেই, আদর্শ নেই...ভারতের জীবন যেন বিরাট এক অভিশাপ ! Why at all—এই মৌলিক প্রশ্নটা থেকে যাচ্ছে না ?

বলতে বলতে কাতর হয়ে পড়ি । আমার কথা শুনে মাষ্টার মশায় কোথায় তলিয়ে গেলেন ! অদ্ভুত মুখের চেহারা ! সেদিনকার গোলাপফুলটির মতো আনন্দোজ্জ্বল নয়—ছাইএর মতো ফেকাসে । জীবন প্রদীপ যেন নিবে গিয়েছে, দেহের শুকনো খোলটা পড়ে আছে ; অন্তরাত্মা নির্বাণের মহাশূন্যে লীন...সহজ অবস্থায় ফিরে এসে বলেন,

: প্রশ্নটা থেকে যায় ঠিকই ।

: উত্তর ?

: বৈদাস্তিক সাধুরা বলেন—জগৎটা মায়িক, স্বপ্নবৎ ; এছাড়া এই প্রশ্নের কোনো উত্তর নেই । মানে, আমার জানা নেই ।

: রামপ্রসাদ অলুযোগ করেছিলেন,

কারো দুশ্কেতে বাতাসা ( গো তারা )

আমার এমনি দশা, শাকে অন্ন মেলেকৈ ?

স্বপ্নবৎ মনে নিলেও স্নেহস্বপ্ন এবং দুঃস্বপ্নের পার্থক্য কেন ?

: পার্থক্য দেখে কে ?

- : আমিই দেখি।
- : তা হলে গোটাটাই আপনার স্বপ্ন নয় ?
- : অর্থাৎ দুঃস্বপ্ন ?
- : তা তো বটেই। নইলে স্বপ্ন ভাঙ্গে না।
- : দুঃস্বপ্নের কারণ কি ?
- : অজ্ঞান।
- : অজ্ঞানের কারণ ?
- : অজ্ঞানের কারণ নেই।
- : নেই কেন ?
- : অবস্থা দোষ আসে—কারণের কারণ, তত্ত্ব কারণ, তত্ত্ব কারণ, এমনভাবে কোনোদিনই সিদ্ধান্তে পৌঁছতে পারবেন না। দ্বিতীয়তঃ, কারণ সাধারণতঃ দেশ-কাল-সাপেক্ষ ; দেশকালের কারণ অজ্ঞান ; সুতরাং অজ্ঞানের কারণ সম্বন্ধে প্রশ্ন ওঠে না। এজ্ঞানই অজ্ঞানকে অনাদি বলা হয়।
- : যার আদি নেই তার তো অন্তও নেই ?
- : অজ্ঞান অনাদি হলেও সান্ত। জ্ঞান দ্বারা যে অজ্ঞানের নাশ হয় তা তো সকলেরই প্রত্যক্ষগোচর।
- : দৃষ্টান্ত ?
- : জল সম্বন্ধে আমাদের অজ্ঞান কবে শুরু হয়েছিল কেউ জানে না ; মানে, অনাদি। রসায়নশাস্ত্রের অধ্যয়ন দ্বারা যখন সেই অজ্ঞান নষ্ট হয় তখন তাকে সান্তই বলতে হয়। শিক্ষা, দীক্ষা, মানব সভ্যতা, ইত্যাদির মূল সূত্রই তো এই যে অজ্ঞান জ্ঞাননাশ।
- : একটা খটকা থেকে যায়। স্বপ্ন বলে সবটা উড়িয়ে দেওয়া escapism নয় তো ? মায়াবাদ সম্বন্ধে এই শঙ্কা অনেকে তুলে থাকেন।
- : একজন মহাত্মাকে আমি এই প্রশ্ন করেছিলুম। তিনি জবাব দিলেন, এটা দার্শনিক শঙ্কা নয়। পরমাত্মার সত্তা ছাড়া যখন দ্বিতীয় সত্তাই নেই তখন কে পালাচ্ছে, কোথা থেকে পালাচ্ছে, কেন পালাচ্ছে, এসব অবাস্তব প্রশ্ন।
- : জবাবটা হয় তো ঠিকই, কিন্তু খটকা থেকে যায়।
- : কেন ?
- : ঠিক বুঝিয়ে বলতে পারবো কিনা জানি না। হিস্ট্রী অব ইওরোপিয়ন ফিলসফি ( History of European Philosophy )-তে রাসেল সাহেব ( Bertrand

Russell ) বলেছেন, হিউম্ (Hume)-এর মতবাদ অকাট্য (irrefutable) হলেও মন তাতে সায় দেয় না (unconvincing)। আমার সংশয়টা ও-জাতীয়...জীবনটা যেন ত্রায়ের একটা সিদ্ধান্তমাত্র ; ফলে বুদ্ধিচাতুর্যের অন্তরালে যে প্রাণশক্তি কাজ করে সে সাড়া দেয় না। হয়তো এজ্জুই বেদান্তবাগীশ হই, কিন্তু তত্ত্ব নিশ্চয় করতে পারি না। অর্থাৎ ‘ব্রহ্ম সত্য, জগৎ মিথ্যা’ ; ‘বাসনাই বন্ধন, নির্বাসনতাই মুক্তি’, ‘হরেনীমৈব কেবলম্’ ;—ইত্যাদি তত্ত্ব হিসাবে হয়তো নির্দোষ, কিন্তু জীবনের দিক থেকে প্রাস্ত-স্পর্শী, প্রাণ-স্পর্শী নয়। রাসেল সাহেব সম্বন্ধে যেমন বলা হয় : মানুষ তাঁর কাছে ক, খ, গ...সরল করতে তিনি ওস্তাদ ; ফল—over-simplification ; তিনি ফরমুলা তৈরী করেন, কিন্তু মানুষ আড়ালে পড়ে যায় অজ্ঞাত সংখ্যার ইন্ড্রজালে...

মাষ্টার মশায় কোনো উত্তরই করেন না। মুখ চোখ পাথরের মতো স্থির।...ঠিক ভাবে হয় তো বলতে পারি নি...হয় তো বেলাভূমিকে সাগর ও সাগরকে বেলাভূমি ভাবছি...ব্যস্তচেতনায় কতটুকুই বা ধরা যায়?...অন্তঃচেতনা—কূল কিনারা পাই না, অসীম অনন্ত ; সাগর?...কিন্তু কারবার তো আমাদের ব্যস্ত নামরূপ নিয়েই...নামরূপই যদি ক, খ, গ হয়?...তা হলেও নামরূপ যিনি অভিব্যক্ত করছেন তাঁর সঙ্গে আত্মিক সম্বন্ধ থাকবে নিশ্চয়!...মাষ্টার মশায় হয়তো বলবেন, জীবনটাই একটা ফরমুলা...আবার জিজ্ঞেস করি, আমার বক্তব্য হয় তো—

: ঠিকই বলেছেন। জীবনধর্মকে বাদ দিয়ে সাধনা হয় না, ফরমুলা কষে তত্ত্বে পৌঁছনো যায় না।

: জীবনধর্ম ও মায়াবাদ—এর সামঞ্জস্য হয় কী করে ?

: জীবনধর্ম কী চায় ?

: ভোগ, satisfaction, তৃপ্তি।

: কোনো ভোগে চিত্তের উপশান্তি হয় কি ?

: তা হয় না ; এবং হয় না বলেই নিতানুন্তন ভোগক্ষেত্র সৃষ্টি করি।

: পূর্ব পূর্ব ভোগে তা হলে বৈরাগ্য আসে স্বীকার করতে হয় ?

: তা আসে।

: অর্থাৎ ভোগ্যবস্তু ভোগ উৎপাদন করেই চরিতার্থ হয় ?

: হ্যাঁ, তাই বটে।

: ভোগের পর ভোগ্যবস্তু কি করেন ?



: ফেলে দিই—উচ্ছিষ্টবৎ ।

: জগৎটা যদি তেমনি উচ্ছিষ্ট হয়ে যায় ?

: অভিনব ভোগক্ষেত্র সৃষ্টি করবো ।

: কি ভাবে ?

: তা—নূতন ভোগক্ষেত্র—কি ভাবে—ঠিক বুঝতে পারছি না ।

: আমাদের শাস্ত্রে চন্দ্রলোক, সূর্যলোক, ধ্রুবলোক, ইত্যাদির কল্পনা আছে ।

: সে তো কল্পনামাত্র । অথবা জগতেরই নামাস্তর ; নূতন কিছু নয় ।

: ভূ-ভুব-স্ব-মহ-জন-তপ-সত্য এই সপ্তলোকও আছে ।

: এগুলো কল্পনা নয় ?

: অনুভবের দিক থেকে বাস্তবও বলতে হয় । শিশু-বালক-কিশোর-যুবক-প্রৌঢ়-বৃদ্ধ-মুর্খ একই জগৎ দেখে, কিন্তু অনুভব করে ভিন্ন ভিন্ন জগৎ । এগুলো জীবের নৈসর্গিক ভোগক্ষেত্র । যদি এগুলোতে বৈরাগ্য আসে ?

: অচল অবস্থা, মনে হচ্ছে ।

: স্বপ্নবৎ হয়ে যদি জগৎ নূতন ভোগ সৃষ্টি করে ?

: সে একটা দিক বটে, কিন্তু—

: কিন্তু কি ?

: তা হলে জগৎ মিথ্যা, ব্রহ্মজ্ঞান, দ্রষ্টাভাব, সবটাই তো ভোগ ?

: তাতে আর সন্দেহ কি ? এজ্ঞাই সাংখ্যকার বলেন, প্রকৃতি ভোগাপবর্গদায়িনী ।

: এ ভোগও তো উচ্ছিষ্ট হয়ে যাবে ?

: যাবেই তো ।

: ভোগ শেষ হলে ?

: থাকবেন ভোক্তা নিজের স্বরূপে ।

: প্রকৃতি থাকবে না ?

: কী প্রয়োজনে ? ভোগ এবং অপবর্গ দেওয়ার পর প্রকৃতির পারার্থ্য শেষ হয়ে যায় । কোন্ প্রয়োজনে আর থাকবে সে ?

: সবটাই তা হলে ভোগ ?

: দার্শনিকরা তাই বলেন । তবে প্রকারভেদ আছে ।

: ভোগ এবং কুভোগ নিয়ে ?

: তা নয় । বাঞ্ছিত, অবাঞ্ছিত, সবটাই ভোগ । অথবা সবটাই বাঞ্ছিত ; ত্যাগে অবাঞ্ছিত হয় ।

: প্রকারভেদ তা হলে কি নিয়ে ?

: নাট্যক্ষেত্রে যারা অভিনয় করেন তাঁদের একরকম ভোগ—সাধারণ জীবের যেমনি। অভিনয়ের দ্রষ্টা যারা তাঁদের ভোগ অগ্রবিধ—ব্রহ্মজ্ঞদের যেমনি। যিনি অধিনায়ক বা স্টেজ ম্যানেজার (Stage Manager) তাঁর ভোগকে ভোগ না বলে লীলাও বলা যায়—যেমন ঈশ্বরের। ঈশ্বর লীলাময়, ব্রহ্মজ্ঞ লীলাদর্শী কেবল সাক্ষী, অগ্র জীব লীলার ক্রীড়নক। অভিনয় শেষ হলে সকলেরই স্বরূপে স্থিতি।

: জীবের এই অসহায় অবস্থা কেন ?

: সব অবস্থাই জীবের—যখন যে অবস্থায় থাকবার অভিরুচি হয় তখন তৎতৎ ভোগ দেখা দেয়।

: এ ভাবে দেখলে জীবনের সার্থকতা হয়তো ধরা যায়...ভোগের সঙ্গেই তা হলে বৈরাগ্য লুকিয়ে থাকে ?

: ভোগাপবর্গ সৃষ্টির তাই অর্থ। ভোগ হলো স্থিতিশীল বা static ; বৈরাগ্য হলো গতিশীল বা dynamic ; চিত্ত এক ভোগ থেকে অগ্র ভোগে যেতেই পারতো না যদি প্রতি ভোগ বৈরাগ্যধর্মের উপর প্রতিষ্ঠিত না হতো।

: অর্থাৎ প্রতিক্ষণ আমরা মরি বলেই বেঁচে আছি ?

: চিত্তধারা ওভাবেই কাজ করে। ধারা শেষ হলে চিত্ত স্বরূপে স্থিত হয়। কাল-প্রবাহের চিত্তই কালাতীতের চিৎ।

: কাল থেকে কালাতীতে পৌঁছনো যায় কী ভাবে ?

: নচিকেতাকে ষমরাজ্ঞ উপদেশ দিয়েছিলেন,

হৃদা, মনীষা, মনসাভিরুণ্ঠো

য এনং বিদুরমৃতান্তে ভবন্তি।<sup>১</sup>

হৃদয়ের অমুরাগ, মনীষার সংকল্প, এবং মনের বিচারবুদ্ধি একত্র হলে তত্ত্বামৃত লাভ হয়। জীবনধর্মের এই ত্রিবেণীসঙ্গমই মহাতীর্থ। এই তীর্থে জ্ঞান না করলে অমৃত ও অভয় হওয়া যায় না।

: ত্রিবেণীসঙ্গম হয় না কেন ? এই তিনের ভিতর কি বিরোধ আছে ?

: বিরোধ তো আছেই ; সেইজগুই সাধনার প্রয়োজন। অবস্থা আলাদা সত্তা এদের নেই—তিনে এক, একে তিন। কিন্তু সংস্কারের পার্থক্যহেতু ঝাঁকের পার্থক্য থাকে।

: কি রকম পার্থক্য ?

: আমার গুরুদেবের দৃষ্টান্ত দিচ্ছি। তাঁর বহুমুখী সাধনা ছিল; শিষ্যদের প্রকৃতি অনুযায়ী মন্ত্র বা সাধনা দিতেন। তিনি বলতেন, ‘ভক্তিমার্গে অমুরাগের প্রাবল্য, তত্ত্বমার্গে সংকল্পের, জ্ঞানমার্গে বিচারের’।

: বৌদ্ধের প্রাবল্যে ত্রিবেণীসঙ্গমে তো বাধাও সৃষ্টি হতে পারে ?

: বাধা তো আসেই।

: বাধা সরাবার উপায় ?

: গুরুদেব সহকারী সাধনের উপর জোর দিতেন। যেমন, বৈষ্ণব ভক্তকে বলতেন, ‘নায়মাত্মা বলহীনেন লভ্যঃ’; ধ্যান ও বিচারের সাহায্যে ভাবের স্তৈর্য ও চরিত্রের দৃঢ়তা আসে। তান্ত্রিক শিষ্যকে বলতেন, ‘শ্রদ্ধাবান্ ভজতে যো মাং স মে যুক্ততমো মতঃ’<sup>১</sup>; শ্রদ্ধা, ভক্তি, বিচার ইত্যাদি না থাকলে অমুরাগ আসে না; অমুরাগের অভাবে দিগ্ভ্রম হয়।<sup>২</sup> বৈদান্তিক শিষ্যকে বলতেন, ‘নৈষা তর্কেণ মতিরাপনেয়া’<sup>৩</sup>; বুদ্ধদেবের মতো দুঃখভাবনা করবে, মৈত্রীভাবনা দ্বারা সর্বজীবের কল্যাণকামনা করবে; চর্যানিষ্ঠ ও শীলভদ্র না হলে বিচার তত্ত্বাবগাহী হয় না। এইভাবে সাধনা পূর্ণাঙ্গ ও পরিশুদ্ধ করবার উপদেশ দিতেন।

: আমার অভিজ্ঞতা সামান্যই। কিন্তু বন্ধু-বান্ধবদের ভিতর দেখেছি, অনেকেই মন্ত্র নিয়ে কতকগুলো সংকীর্ণতার ভিতরে নিজেকে আবদ্ধ করে ভাবেন মুক্তির পথে এগিয়ে যাচ্ছেন। আপনার গুরুভাইরা বোধ হয় এ সব অন্ধতা থেকে মুক্ত ছিলেন।

: মুক্ত ছিলেন ঠিক বলা যায় না। তবে গুরুদেবের শাসন ছিল খুব কড়া। একজন সন্ন্যাসী শিষ্য ঘন ঘন কীর্তনে যেতেন শুনে ধমকে দিলেন, ধ্যান-বিচার ছেড়ে যখন খোল ধরেছ তখন গেরুয়াটি আর রেখেছ কেন?...একজন শিষ্য ছিলেন গোপাল-ভক্ত; গোপালকে ক্ষীর, ননী, পেঁড়া, নাড়ু খাওয়াতেন; গোপালের অনুখ হলে ওষুধের ব্যবস্থা করতেন; গোপালের সঙ্গে কথাবার্তাও নাকি হতো। আমরা তাঁকে সমীহ করে চলতুম। গুরুদেব একদিন তাঁকে বললেন, ‘কালকে মধুকুক্ষা ত্রয়োদশী, খুব শুভদিন; কাল গোপাল ঠাকুরকে গঙ্গাতে বিসর্জন করে আসবে; গুরুবাক্য যেন লজ্জিত না হয়’।

: বিসর্জনের ব্যবস্থা কেন ?

: নইলে মোহ কাটতো না। গুরুদেব বলতেন, এসব হচ্ছে মনের অন্ধ গলি; সাধক ভাবে খুব এগিয়ে যাচ্ছি, আসলে ঘুরপাক খাচ্ছি! অনেক সময় একটা জগ্নাই নষ্ট হয়ে যায় এই obsession এর চোরা বালিতে।

: রাস্তায় এতো বিঘ্ন আসে কেন ?

: হৃদয়, মনীষা ও মন এক সঙ্গে চলে না বলে। চিত্তের একটা বৃত্তি এগিয়ে আছে, আর দুটো পিছনে ; পিছনে যারা আছে তারা খেয়াল মার্কিন অল্প রাস্তাও ধরে। দ্বিধা-বিভক্ত এই শক্তিকে সংহত করে চালানোই সাধনা। সেজন্য সর্বদা জাগ্রত থাকা দরকার।

: বৃত্তিগুলো গোলমাল সৃষ্টি করে কেন ?

: করে যে তা জানা দরকার। কেন করে তা বলা শক্ত। শ্রীকৃষ্ণ অবশ্য কারণ নির্দেশ করেছেন—

দৈবী হ্যেবা গুণময়ী মম মায়া দুরতয়া ।<sup>১</sup>

: মায়া কাটানো দেখছি দুক্ল ব্যাপার।

: গুরুদেব বলতেন, প্রায় অসম্ভব।

: অসম্ভব ?

: অসম্ভব—যদি ভগবান্ লক্ষ্য না হয়ে উপলক্ষ্য হয়ে পড়েন। মনে প্রাণে তাঁকে চাইলে তিনিই মায়া কাটিয়ে দেন—মামেব যে প্রপঞ্চস্তে মায়ামেতাং তরন্তি তে ।<sup>২</sup>

: ‘অসম্ভব’ বলাতে একটু ঘাবড়ে গিয়েছিলুম।

: আমিও গুরুদেবের কথায় শঙ্কিত হয়েছিলুম ; জিজ্ঞেসও করেছিলুম, ‘তা হলে সাধনা করে লাভ কি ?’ তারপর তিনি বুঝিয়ে দিলেন, ‘প্রকৃতির অপবর্গ না দেওয়া পর্যন্ত নিস্তার নেই ; তবে পাঁচ ঘাটের জল না খাওয়ালে প্রকৃতির তৃপ্তিও হয় না’।

: কপালে দুঃখ তা হলে আছেই ?

: আছে যে তা তো দেখতেই পাচ্ছেন। তবে দুঃখ না বলে তাকে জগৎও বলতে পারেন।

: তাতে লাভ ?

: সম্যক্ দৃষ্টির সুবিধা হয়। সেই ত্রিবেণীকে ধরুন। মন বিচার দ্বারা দেখছে, যে জগৎ অনিত্য, প্রতিকল্প রূপ বদলাচ্ছে ; হৃদয় অনুভব দ্বারা দেখছে যে জগৎ ভোগদ্বারা উচ্ছিষ্ট হয়ে যায়—সুতরাং বর্জনীয় ; মনীষা সংকল্পদ্বারা নূতন জগৎ সৃষ্টি করতে চায়। তিনের সমবেত চেষ্টায় দেখা দেয় সত্যের অখণ্ড পূর্ণ রূপ—যং লক্শ্য চাপরং লাভং মত্ততে নাধিকং ততঃ।

॥ ৩ ॥

আমার একটু ইতস্ততঃ ভাব দেখে মাষ্টার মশায় বললেন,

: বিশেষ কোনো প্রশ্ন আছে ?

: ব্রহ্মবিদ্যালাভের কী উপায় ?

: সাধুরা বলেন, শ্রোত্রিয় এবং ব্রহ্মনিষ্ঠ<sup>১</sup> গুরুর নিকট শ্রবণ, মনন, নিদিধ্যাসন অভ্যাস করতে হয়।

: আমাকে তত্ত্বাভ্যাসের রাস্তাটা দেখিয়ে দিন।

মাষ্টার মশায় বেশ দ্বিধাগ্রস্ত হয়ে পড়লেন। বলেন,

: আমি কি করে দেখাবো ? যারা রাস্তার শেষ দেখেছেন, যারা শ্রোত্রিয় এবং ব্রহ্মনিষ্ঠ, তাঁরাই একাজের ভার নিতে পারেন। আমি তো পথিক মাত্র, এবং ঠিক পথে চলছি কিনা তাও জানি না।

: এজীবনে আমার আর কিছু হবে না দেখছি।

: না, না, তা নয় ; হবে না কেন ? নিশ্চয় হবে...আচ্ছা, কোনো মহাত্মার খোঁজ পেলে আপনাকে জানাবো।

: যতদিন খোঁজ না পাওয়া যায় ততদিন যদি আপনার সঙ্গে চলি ?

: সে তো ভাল কথা। এক সঙ্গে শাস্ত্রপাঠ, মনন, নিদিধ্যাসন করা যাবে। পরস্পরের উপকার হবে। জ্ঞানের রাস্তায় পরস্পরের সঙ্গে শাস্ত্রালোচনাও সাধনার অঙ্গীভূত।

পঞ্চদশীতে আছে—

তচ্চিস্তনং তৎকথনম্ অগ্নোক্তং তৎপ্রবোধনম্।

এতদ্ একপরত্বঞ্চ ব্রহ্মাভ্যাসং বিতুর্ভূতঃ ॥

\* \* \* \* \*

মাষ্টার মশায় অনেক মহাত্মার কাছে নিয়ে গেছেন, কিন্তু গুঁর চাইতে মহত্তর লোকের দর্শন আজ পর্যন্ত পাই নি ; সন্ধান নেওয়ারও প্রয়োজন বোধ করি না... ‘পরানবদ্বু হে সখা আমার’—এই সম্বন্ধই ভালো। গুরুগিরির চাপ নেই ; চেলা-শুলভ অঙ্কতা নেই ;...অস্থি-চর্মের আশ্রিতত্ব নেই...গুধু আছে পথচলার সাহচর্য, তত্ত্বনিশ্চয়ের ঐকান্তিকতা, সত্যদর্শনের অকুতোভয়তা। আমাকে খুবই স্নেহ করেন, কিন্তু ভাবনা হয় স্নেহের মর্দাদা রাখতে পারবো কিনা।...শাস্ত্র নিয়ে তর্ক কম করি নি, বেয়াড়া তর্কও করেছি। কোনো দিন নিজের মত জাহির করেন নি,

আলোচনা স্ত্রে এতটুকু উদ্ভা প্রকাশ করেন নি...চিন্তের প্রশান্ততা, চোখের স্নিগ্ধতা, মুখের স্থিততা এতটুকু ক্লিষ্ট হয় নি।...“তাইতো, প্রশ্নটা বেশ জটিল মনে হচ্ছে, কোনো মহাত্মা এলে জিজ্ঞেস করে নেওয়া যাবে”...“আচ্ছা, গীতাভাষ্যে আচার্য শঙ্কর কি লিখেছেন পড়ুন তো”...“সাধুরা বলেন, গুরুতা আসে কিন্তু থাকে না”...“আপনি যা বলছেন তা-ও হতে পারে; একটু ভেবে দেখবেন তো।” ...‘একটু ভেবে দেখবেন’ বললেই বুঝে নিতুম, ঠিক বলছি না, বিচার করলে ভুলটা ধরা পড়বে...আমাদের মহাত্মা একজন হোমিওপ্যাথিক ডাক্তার আছেন; চিকিৎসক ভালো, সরল প্রকৃতি; বক্তৃতায় পঞ্চমুখ, যে জগৎ খেতাব পেয়েছেন “নেতৃবিশেষের সঙ্গে ব্রাকেটে ফার্স্ট”; আরও একটি বৈশিষ্ট্য আছে—সজ্ঞার কঁটার মতো প্রতিক্রিয়ায় অহংটি উচিয়ে থাকে। মাষ্টার মশায় ঠিক উলটো, অহং-টি আছে বলেই মনে হয় না; কিন্তু জ্ঞানমার্গের সাধু! আগে বৈষ্ণব সাধনা ছিল, তার জের বোধ হয়—এমন ‘তুণাদপি সুনীচ’ সাধু চোখে পড়ে না... অহমিকা জালিয়ে ছাই করে ফেলেছেন...খোচ-খাচ যে এক আধটুকু নেই তা নয়। সাধুর খবর পেলেই দর্শন করতে যান; পরিচয় একটু অগ্রসর হলেই শুধান, “আচ্ছা স্বামীজী! আমার কিছু হবে?”...কেউ কেউ বলে দিয়েছেন, “হওয়া কি চারটি খানি কথা? আপনি বান্ধালী, তার উপর গৃহী; নাম নিয়ে পড়ে থাকুন; জ্ঞানমার্গ আপনাদের জগৎ নয়।” নিরাশ হন, ধ্যানের মাত্রা চড়িয়ে দেন। কেউ কেউ বলেছেন, “আপনার হওয়ার আর বাকী কী? ব্রহ্মবিহারে রাজহংসের মতো বিচরণ করছেন...” শুনে আশ্বস্ত হন।

আমি একদিন জিজ্ঞেস করলুম,

: আপনি এসব প্রশ্ন করেন কেন? কোনো সন্দেহ হয়?

: না, তা হয় না; তবে—

: তবে কি?

: এতো দুর্লভ বস্তু! কতো কঠোর তপস্তার ফলে তত্ত্বলাভ হয়! আমি কী আর এমন তপস্তা করেছি? তাই ভাবি, ভুল হচ্ছে না তো!

: কিন্তু ভুল হচ্ছে বলে কি কোনো শঙ্কা ওঠে?

: সাংখ্যোক্ত ‘তুষ্টি’ যদি হয়?

: শাস্ত্র ও মহাত্মাদের অনুভূতির সঙ্গে মিলিয়ে কোনো গরমিল পেয়েছেন?

: তা পাই নি। তবে ঐ যা বললুম, তেমন কিছু তপস্তা তো করি নি; তাই যাচাই করে নিতে ইচ্ছা হয়।

মাষ্টারমশায় তপস্য়া না করে থাকলে কে যে তপস্য়া করেছেন জানি না, কী যে তপস্য়ার মানে তাও বুঝি না। আমরাও যে এক-আধটুকু তপস্য়া করি নি তা নয়...খালি তক্তপোশে শোয়া, মাথায় বালিশ না দেওয়া, নিত্য গঙ্গান্নান, নিরামিষ আহার...একাদশী—পূর্ণিমা—অমাবস্যা—শিবরাত্রির উপবাস...একবেলা খাওয়া, ত্রিসন্ধ্যা আফ্রিক করা, খালি পায়ে চলা, একবস্ত্রে থাকা...চিনি-লবণ বর্জন, শিখাধারণ, দাড়িরাখা, সাবানের বদলে গঙ্গামাটির প্রলেপ, নিমস্ত্রণবর্জন, ঔষধার্থে গঙ্গাজল পান...সব কিছু চেখে দেখেছি, দু-চার দিন বা দু-চার মাস সবাইকে ট্রায়াল (trial) দিয়েছি...কিন্তু আসন থেকে কিছুতেই শূন্যে ওঠা গেল না! ছেড়ে দিলুম পথটা। কতোবার যে এমনি ছেড়েছি আর ধরেছি...কতো হাসি, বিদ্রূপ, কটাক্ষ সহ করেছি...সে এক করুণ হাস্যকর ইতিহাস...

: কিরে দেবু মাংস খাচ্ছিস!

: হ্যাঁ মামা বাবু! ধরেছি আবার।

: তোর মতিগতির কিছু স্থিরতা নেই। তুই ‘বান্দাল’ হতে পারলি না।

: কেন?

: যা ধরবি তা করবি—ভীষ্মের প্রতিজ্ঞা। তা না হলে বান্দাল কি রে?

এই হিসাবে মাষ্টার মশায় ‘বান্দাল’ না হয়েও স্থিরপ্রতিজ্ঞ। একটানা তপস্য়া চালিয়ে গেছেন সমস্ত জীবন। মস্ত নেওয়ার পর গুরুদেবের আদেশে দীর্ঘ নিঃশ্বাস ফেলেছেন। ‘মাষ্টার বাবু! ও-সব বাজে কুচ্ছ সাধন ছেড়ে দাও; তত্ত্বের পিছনে লেগে থাকাই পরম তপস্য়া; খাওয়া-পরা ছেড়ে শরীর-মনকে অবসন্ন করলে সাধনা হয় না’। গুরুবাক্য—অতএব বালিশ মাথায় দেওয়া, এক জোড়া ধূতি ও ক্যান্ডিসের জুতো পরা, অসুখে গঙ্গাজল সহ কুইনাইন খাওয়া ইত্যাদি সুখসম্ভোগে বড়ই ম্রিয়মাণ থাকতেন, ‘বিলাসিতা পক্ষে’ ডুবে আছেন ভেবে নিজের আধ্যাত্মিক উন্নতি সম্বন্ধে হাল ছেড়ে দিয়েছিলেন...স নিশ্চয়েন যোক্তব্যো যোগোহ নির্বিন্-চেতসা...খেদহীন চিন্তে নিরবচ্ছিন্ন তপস্য়ার অদ্ভুত দৃষ্টান্ত!...শুধু সাধনার দিক থেকে নয়; সাংসারিক নানা কষ্ট ও দুর্বিপাকের সঙ্গে মুখ বুজে লড়াই করেছেন; অসহ্য যন্ত্রণা ভোগ করেছেন...কিন্তু কোনোদিন কারু বিরুদ্ধে নালিশ করেন নি; সংসারের দুর্বহ ভারে হৃদয়োগ হয়েছিল, তা সত্ত্বেও অন্নানবদনে নিজের কাজ করে গেছেন...অসীম ধৈর্য...infinite capacity to take infinite pains—with a smile...

: ‘অনির্বিন্চেতসা’ মানে কি?

মাণ্ডুক্য আছে—

উৎসেক উদধৈর্ষদ্বং কুশাগ্রৈগৈকবিন্দুনা ।

মনসো নিগ্রহস্তদ্বদ্ ভবেদ্ অপরিখেদতঃ ॥১০

কুশের অগ্রভাগদ্বারা একবিন্দু একবিন্দু করে সমুদ্র শোষণ করতে যে অধ্যবসায় ও ধৈর্ষের দরকার মনোনিগ্রহের জ্ঞান তেমনি অধ্যবসায় ও ধৈর্ষের দরকার ।

: এতো ধৈর্ষের কী প্রয়োজন ? বা কেন প্রয়োজন ?

: ধ্যান আরম্ভ করলে দেখা যায়, মন কেবলই এখানে ওখানে ছুটে বেড়াচ্ছে ; যদি অধৈর্ষ হন তা হলে মন আরও চঞ্চল হবে, অর্থাৎ ধ্যান বসবে না । তারপর ধীরভাবে মনকে তত্ত্বাভিমুখী করবার চেষ্টা করছেন কিন্তু মন এগচ্ছে না, যেন স্তব্ধীভূত হয়ে আছে ; এখানেও ধৈর্ষের দরকার । মন যদি এগিয়ে তত্ত্বাবগাহী হয়, তখনও চিন্তে চাক্ষুশ্য দেখা দেয় ; চঞ্চল হলে আর অনুভূতি হবে না, মন তত্ত্ব থেকে সরে আসবে । এসব কারণে ধৈর্ষ বা উদাসীনতার একান্ত প্রয়োজন । কিন্তু এই প্রয়োজনীয় জিনিসটি আমার নেই । ধ্যান না বসলেই মনে হয়, দিই ছেড়ে, এসব আমার রাস্তা নয়, বাজে কাজে অনর্থক সময় নষ্ট । মাষ্টার মশায় হাসেন ; বলেন ‘কর পণ নর গণ’র অবস্থায় সকলকেই নাকের জ্বলে চোখের জ্বলে এক হতে হয় ।...মাষ্টার মশায়ের মতো তপস্তু ! আমাকে দিয়ে হবে না । খেদ করে একদিন বলছিলেন, ‘কুমারিল ভট্ট তুষানলে দেহত্যাগ করেছিলেন ; সে-তুলনায় আমরা কী আর করেছি ।’...উধববাহু হয়ে কণ্টকাসনে বসা হলো না—এজাতীয় একটা আপসোস হয়তো মাষ্টারমশায়ের মনোগহনে লুক্কায়িত আছে...দুর্বাসাজী ঠিকই বলেন—ভারতে মহাতপাদের জন্ম এখনো হয় বলেই আমরা বেঁচে আছি ; নইলে দেশটা পুড়ে ছারখার হয়ে যেতো...দুর্বাসাজী—বেশ জোরালো চরিত্র ; substratum of natureটুকু আছে বলে মানুষের তটভূমিতে কিছু পরিচয় সম্ভব...সজ্জার কঁটা দু-চারটে না থাকলে বোধ হয় চারিত্রিক বৈশিষ্ট্য ঠিক কোটে না । মাষ্টার মশায়—আমাদের তটভূমি পেরিয়ে গেছেন ; সাগরে ঝাঁপ দিলে, যোগাযোগের সূত্রগুলো কেটে কেললে, হয়তো একটা ‘স্বাভাবিকতা’র সন্ধান পাওয়া যায়—not a character but a soul, কায়ী নহ্ন, ব্যক্তি নয় ; শুধু দীপ্তি.....

: কি বলছিলেন, দেবল বাবু ?

: ধৈর্ষের তাত্ত্বিক রূপটি কী ? মানে, Metaphysical aspect ?



: ধৈর্য মানে ব্রহ্ম। সূর্যদেব যেমন সব কিছু প্রকাশ করেন কিন্তু কোনো কিছু সম্বন্ধেই তাঁর হেয়ত্ব-উপাদেয়ত্ব বুদ্ধি নেই, ব্রহ্মও তেমনি সমভাবে, নিরপেক্ষ হয়ে, আত্মক্ষত্ত্ব পর্যন্ত সব কিছু প্রকাশিত করেন। ব্রহ্মের মতো ধীর না হলে ব্রহ্মানুভূতি হবে কি করে? সমস্ত যোগ উচ্যতে।

এমনি শাস্ত্রালোচনা প্রায়ই হয়; তর্কটা জমে ভালো যেদিন মাষ্টার মশায়ের এক পুরনো ছাত্র আলোচনায় এসে যোগ দেন। ভদ্রলোক দর্শনের ছাত্র ছিলেন; দর্শনের শিক্ষক নন, কিন্তু সত্যিকারের দার্শনিক; আপন-ভোলা লোক। আমরা নাম দিয়েছি বেদব্যাস...ব্যাসজী আমার নমস্—শুধু যে ঠুর কাছে বিচারের স্বস্বতা ও অকুতোভয়তা শিখেছি তাই নয়। মাষ্টার মশায়ের সঙ্গে প্রথম পরিচয় এঁরই মাধ্যমে হয়; এ কারণেও বিশেষভাবে ইনি আমার ভক্তি ও শ্রদ্ধার পাত্র। ...মাষ্টার মশায়ের সান্নিধ্যে আমরা দুজনা বিচারের সূত্র ধরে কতো সমুদ্র যে পাড়ি দিয়েছি...লোকালয়ের বহুদূরে আকাশচুম্বী পর্বতের ছায়াদেশে বিল্লিরবের ব্যাপক শুক্লতায় ডুব দিয়ে নিজেকে হারিয়ে ফেলি এক চিরসুস্থির নিরুন্মতায়...বৈশাখের প্রচণ্ডতাপে দগ্ধ হয়ে যখন দিশাহারা তখন হঠাৎ দেখি উচ্চশির অসংখ্য তালগাছের ঘনচ্ছায়ায় তালপুকুরের ঘুমিয়ে-পড়া স্ফটিক জল, অবগাহন করি পরমশান্তির নিবিড় পূর্ণতায়...মাঘের হাড়কাঁপানো শীতে দেয়ালের পাশে দাঁড়িয়ে অরুণালোকের স্মৃর্ত পরশে মনের পাপড়িগুলোকে খুলে ধরি...মনসিজ অজস্র আলোর নিঝরিণীতে স্নান করে স্নিগ্ধ, তৃপ্ত, উৎফুল্ল...

দিনের পর দিন সাহচর্য না পেলে; সপ্তলোকবিচরণের চাক্ষুষ প্রমাণ না দেখলে; বন্ধুত্বের নিবিড়তা, আচরণের মধুরতা, তপস্কার একনিষ্ঠা, শীলচর্যার অক্লান্ততা—এসব যে কল্পনা নয়, মানুষের জীবনে সত্যিই মূর্ত হয়ে দেখা দেয় তা না জানলে; ব্রহ্মলোকের অস্তিত্বে কোনো দিনই হয়তো খাঁটি বিশ্বাস হতো না। বুদ্ধদেব বলেন,

শীলগন্ধ সমো গন্ধো কুতো নাম ভবিস্‌সতি।

যো সমং অনুবাতো চ পাটিবাতো চ বায়তি ॥

বায়ুর অনুকূলেই পুষ্পগন্ধ প্রবাহিত হয়; শীলগন্ধ অনুকূল প্রতিকূল উভয় দিকে প্রবাহিত হয়। মাষ্টার মশায় শীলগন্ধ; সর্বদিক থেকে তাঁর উদ্দেশ্যে প্রণাম জানাচ্ছি। ভাগবতের একটি শ্লোক মনে পড়ে—

মুনিঃ প্রসন্নগম্ভীরো হৃব্বিগাছ্যো দূরতায়ঃ।

অনন্তপারো হৃক্ষোভ্যঃ স্তিমিতোদ ইবার্ণবঃ।

হে প্রসন্নগম্ভীর অনন্তপার অক্ষুদ্র মহামুখি! তোমাকে প্রণাম! ত্রিবেণী সঙ্গম! দুর্গহ

ব্যাপার! ফেসাদেই পড়েছি! ‘সে আমার নয়’ বলে কেটে পড়াই সঙ্গত...কিন্তু যাবো কোথায়? সব রাস্তাই যে বন্ধ—যে রাস্তা ধরেছি সেটিও...আসন নিয়ে তোড়জোড় করে খানে বসি—বিড়ম্বনা মাত্র। ধৈর্য? তারও তো একটা সীমা আছে?...অসীম ধৈর্যের প্রয়োজন?...সে আমার শক্তির বাইরে!...চেষ্টা করতে দোষ কি?...বসি আসন নিয়ে...মনটা বেশ লেগে আসছে...আপূর্ণমাণম্ অচলপ্রতিষ্ঠম্...উঠে দাঁড়াই; ঘুমিয়ে পড়েছিলুম...বেশ আপদ তো। মন বসলেই ঘুম পায়!...আবার বসি...আগেকার স্থির ভাবটি পালিয়ে গেছে; চেষ্টা করি, আপূর্ণমাণম্ অচলপ্রতিষ্ঠম্ সমুদ্রের কথা ভাবি...কালকে চাল কিনতে হবে...দামটাও এখন চড়া! বক্তৃতা শুনলে যদি পেট ভরতো! তবে ভারত ভূষণ!...ধেং! মনটাই যে কালোবাজারে ঢুকছে...কতো বক্তৃতা হলো, কিন্তু কালোবাজার আরও মিশমিশে কালো হয়...হু-হাত দিয়ে কালোবাজার সরাই...‘যুক্ত আসীত মংপর’! হে মোর অশান্ত মন! পরমাত্ম-চিন্তায় ডুবে যাও! যুক্ত আসীত মংপর:...শাস্তিঃ নির্বাণ-পরমাং মংসংস্থামধিগচ্ছতি...অচলপ্রতিষ্ঠ পরমাত্মাতে ডুবতে না পারলে শাস্তি কৈ? শাস্তিঃ নির্বাণপরমাম্...নির্বাণের পরম শাস্তি...বুদ্ধদেবকে নিয়ে কি হলোড়বাজিই না হলো!...কোথায় বুদ্ধদেবের পঞ্চশীল, আর কোথায় আমাদের পঞ্চশূল!...কামাত্মার ভোগৈশ্বর্যের দিকে গতি! কী ঢঙ্কানিনাদ!...ভোগৈশ্বর্যপ্রসক্তানাং তন্মাপহৃতচেতসাম্...আমারই মতো! অবাস্তুর কথায় চিত্ত বেশ অপহৃত হয়ে দোষাহুসন্ধানে লেগে গেছে...এমনি পাপ-মন নিয়ে এগনো সম্ভব কি?...কেনই বা পাগলা হাওয়ার মতো এমনি ঘুরে বেড়ায় মন? কী লাভ হচ্ছে?...নিষ্ফল চিন্তা! নিষ্ফলও নয়; মনটা তো বিষিয়ে ওঠে! তবুও ঘরের খেয়ে বনের মোষ তাড়াচ্ছি...বনের মোষ হলে তবু ছিল ভাল; তাড়াচ্ছি তো মনের মোষ! তাড়াচ্ছি কি? শুধুই পিছনে ছুটছি...গো-পালকের দশ অবস্থা দেখিয়ে চীনা শিল্পী বিখ্যাত ছবি এঁকেছেন...প্রথম দশায় রাখাল গরুর পিছনে প্রাণপণ ছুটেছে...ছুটে ছুটে হয়রাণ, দিশাহারা...দশম অবস্থায় গরুর পিঠে চড়ে, আরাম-সে—প্রথম দশায়ই তো আমি কাবু...নাঃ; জোর করে মন থেকে সব চিন্তা তাড়িয়ে স্থির হয়ে বসতে হবে স্তর্চো দেশে প্রতিষ্ঠাপ্য স্থিরমাসনমাত্মনঃ...যুগ্মাদ যোগম্ আত্মবিশুদ্ধয়ে...

ওঁ মনোবুদ্ধ্যাহঙ্কার চিন্তানি নাহং

নচ শ্রোত্রজিহ্বে ন চ শ্রাণনেত্রে।

ন চ ব্যোমভূমি ন তেজো ন বায়ু

শির্দানন্দরূপঃ শিবোহং শিবোহম্ ॥

...কালী ফাঁস দিয়ে মারা গেলো !...আমার ড'ন্ কুকুরটি আজ কোথায় ? কেউ হয়তো আদর করে রেখে থাকবে...মরে যায় নি তো ? ফ্যাল ফ্যাল করে আমার দিকে তাকিয়েছিল !...হারাধনের একটি ছেলে কাঁদে ভেউ ভেউ...ড'ন্ হয়তো এমনি কাঁদছে !...আমারও কি কান্না কম হলো ? কালকে তো বড়কর্তা অপমানই করলেন !...কাজ ফেলে রোজ গিয়ে সেলাম করতে হবে !...At the fag end of service !...যা জীবনে কোনো দিন করি নি ! My dear Boss ! you have made a mistake...দিব্যি 'শিবোহহম্' চালাচ্ছি !...কি করা যায় ?...

যতো যতো নিশ্চরতি মনশ্চকলমস্থিরম্ ।

ততন্ততো নিয়ম্যেতদ্ আত্মন্যেব বশং নয়েৎ ॥

বেশ ; তা-ই করি। মনকে বেশে আনবার চেষ্টা করি।...বেশে কি আসে !...সজাগ হই ; বিচার করি ; অন্ন-প্রাণ-মন-বিজ্ঞান-আনন্দ এই পঞ্চকোষ থেকে নিজেকে আলাদা করবার চেষ্টা করি...মননের যন্ত্র পুনঃ পুনঃ প্রয়োগ করি...মন কিছুতেই বাগ মানে না—নীচের তলার এক অন্ধ কুঠরিতে গিয়ে রাগ করে বসে আছে। সাধ্যসাধনা করি ; শ্রেয়োলাভের কথা শুনাই ; যুক্তি দ্বারা মনের মনগড়া ওজর-আপত্তি কাটিয়ে ভাবি এবার বোধ হয় সাড়া দেবে...কিন্তু ভবী ভোলবার নয়। চোখে ঠুলি লাগিয়ে সেই যে থাম ধরে বসে আছে ! আলো এবং আকাশ ওর অসহ ! কিছুতেই অন্ধ কুঠরি ছাড়বে না !...কতো আর বুঝাবো !...কি করা যায় ?...অব মৈ' কোন উপায় কর'...অব মৈ' কোন উপায় কর'...অব মৈ' কোন উপায় কর'...হু চোখ বেয়ে জল পড়ে...

অব মৈ' কোন উপায় কর'

জনম পায় কছু ভলৌ ন কীন্হৌ, তাতে অধিক ডর'

...অব মৈ' কোন উপায় কর'...

...অব মৈ' কোন উপায় কর'...

...অব মৈ' কোন উপায় কর'...

...হরি ওঁ, হরি ওঁ, হরি ওঁ...

...অব মৈ' কোন উপায় কর'...

...হরি ওঁ, হরি ওঁ, হরি ওঁ...

॥ ৫ ॥

: উপনিষদের পঞ্চকোষ বিচার এবং সাংখ্যের পুরুষ-প্রকৃতি বিবেক কি একই প্রক্রিয়া ?

: পঞ্চকোষ বিচার দুভাবে হয়—নেতি নেতি করে নিষেধমুখে এবং ইতি-ইতি করে খ্যাতিমুখে। নেতি-বিচারে সব নিষিদ্ধ হলে অভাবপ্রত্যয় বা বৌদ্ধদের শূন্যাত্মভূতি হয়। ইতি-বিচারে পঞ্চকোষ বিবিক্ত হয়, নিষিদ্ধ হয় না, দৃশ্যকোটিতে চলে যায়; অর্থাৎ যাবতীয় দৃশ্যপ্রপঞ্চ জড়, এবং তার দ্রষ্টা পুরুষ চেতন সাক্ষী; এই বিবিক্ত অত্মভূতিই সাংখ্যের বিবেক খ্যাতি।

: অভাব-প্রত্যয়ই কি পাতঞ্জলের অসম্প্রজ্ঞাত সমাধি ?

: অভাব-প্রত্যয়ের পরিপক্ব অবস্থা বলতে পারেন।

: পাতঞ্জলে প্রথম বিবেক খ্যাতি কেন ?

: ঠাঁদের প্রক্রিয়াই অমনি—স্থূল হতে সূক্ষ্ম, সূক্ষ্ম হতে সূক্ষ্মতর সূক্ষ্মতমে পৌছতে হয় পূর্ব পূর্ব ভূমির দ্রষ্টা হয়ে নিজেকে আলাদা করে। শেষে আঁমি দ্রষ্টা এবং প্রকৃতি দৃশ্য এই বিবেক খ্যাতিকেও ত্যাগ করতে হয় বৈরাগ্য ভাবনা দ্বারা অসম্প্রজ্ঞাতভূমিতে প্রতিষ্ঠালাভের জগ্ন—তন্মাত্রা নিরোধে সর্বনিরোধান্নবীজঃ সমাধিঃ<sup>১</sup>। কিন্তু বেদান্তের নেতি-বিচার ও সূক্ষ্মপ্তি-বিচারে প্রথমে অভাব প্রত্যয় হয় এমনি শাস্ত্রকারদের ইঙ্গিত আছে। নৈষ্কর্মা সিদ্ধিতে আছে—

অনুমানাদ অয়ং ভাবাদ্ ব্যাবৃত্তেহভাবমাপ্রিতঃ।

ততোহপ্যস্ত নিবৃত্তিঃ স্তাদ্ বাক্যাদেব বুভুংসতঃ ॥<sup>২</sup>

: বেদান্ত বিচারে বিবেক খ্যাতি হয় না কেন ?

: হতেও পারে। তবে হবেই বলা যায় না; কারণ, বেদান্তমতে পুরুষ প্রকৃতি থেকে আলাদা নয়; পুরুষ প্রকৃতির উপাদান কারণ এবং অধিষ্ঠান। সূত্রগ্রন্থ নেতিবিচারের পর উপাদান কারণ বা অনুস্মৃত সত্তাকে লাভ করতে হয় মহাবাক্যবিচার দ্বারা।

: কি ভাবে ?

: কার্যকে উপাদান কারণে লয় করে।

: লয় করবার উপায় ?

: বিচার। ঘট-পটাদি জ্ঞানে ‘ঘট’ পটজ্ঞানে বাধিত হয়, ‘পট’ ঘটজ্ঞানে বাধিত হয়; উভয়ই অনুস্মৃত জ্ঞানই সং। ‘আদ্যাবন্তে চ যন্নাস্তি বর্তমানেহপি তং

তথা—যে আদিতেও নেই অন্ততেও নেই সে বর্তমানেও নেই, যেমন স্থাপ্তিক রথগজাদি। সর্বানুস্মৃত জ্ঞানের কোনো কালেই বাধ নেই, স্মৃতিরাজ জ্ঞান-স্বরূপই এক অদ্বিতীয় সদবস্তু। আত্মা যে প্রপঞ্চে অনুস্মৃত এবং প্রপঞ্চের অধিষ্ঠান তা সাংখ্যবাদী মানেন না। দৃষ্টি ভেদে দর্শনও ভিন্ন হয়, অর্থাৎ দ্বৈতস্পর্শী।

: অধিষ্ঠান বিচার ও উপাদান কারণ বিচার কি আলাদা ?

: একটু প্রকারভেদ আছে। জাগ্রৎ-স্বপ্ন-সুষুপ্তি বিচার দ্বারা প্রপঞ্চের ভ্রমত্ব সিদ্ধ হয়, এবং জগৎ স্বপ্নবৎ প্রতিভাত হয়। এই স্বপ্নের বা ভ্রমের অধিষ্ঠান কে ? বৌদ্ধ মতে ভ্রমের অধিষ্ঠান স্বীকার করা হয় না; স্মৃতিরাজ তত্ত্ব হয় শূন্য। বৈদান্তিক বলেন, অধিষ্ঠানশূন্য ভ্রম হয় না। সর্পের অধিষ্ঠান যেমন রজ্জু, প্রপঞ্চভ্রমের অধিষ্ঠান তেমনি আত্মা। এই আত্মাই পরমার্থ সং।

: বিচার অনেক সময়ই দেখি বসে না, ভাষা-ভাষা থেকে যায়। এর প্রতিকার কি ?

: আছত্তিরসকৃদ্ উপদেশাৎ<sup>১</sup>; আনুশ্ঠেয়ামৃত্যোঃ কালং নয়দ্ বেদান্তচিন্তয়া; অভ্যাসবৈরাগ্যাভ্যাং তন্নিরোধঃ<sup>২</sup>—সকলেই এক কথা বলেন। পুনঃ পুনঃ অভ্যাসই এক মাত্র রাস্তা; বৈরাগ্যভাবনা দ্বারাই বিচার তত্ত্বাবগাহী হয়। অর্থাৎ লেগে থাকা দরকার। তবে একটা বিষয়ে সাধুরা জাগ্রত থাকতে বলেন।

: কোন্ বিষয়ে ?

: বেদান্তবিচার প্রথম পুরুষে বা মধ্যম পুরুষে হয় না। তত্ত্ব হচ্ছে সদা অপরোক্ষ, স্মৃতিরাজ উত্তমপুরুষনিষ্ঠ। বিচার ‘তুমি’ বা ‘তিনি’র কোঠায় গেলেই তত্ত্ব দৃশ্য কোঠিতে চলে যায়। সোহংস্বামী বলতেন, থার্ড পার্সনে (third person) বেদান্ত হয় না। মহাবাক্যগুলোতে এজন্তাই জোর দেওয়া হয়েছে ‘অহম্’-এর উপর।

: ‘অহং ব্রহ্মস্মি’ এই মহাবাক্যবিচারে কি প্রকারভেদ আছে ?

: আছে। সাধারণতঃ ভাগ ত্যাগ লক্ষণার বিধি আছে। সগুণ ব্রহ্মের উপাসনায় প্রতিষ্ঠিত হয়ে ঋরা নিগুণে যান তাঁদের পক্ষে এই বিচার বিশেষ উপযোগী। মনের গড়ন ঋদের বিবেকধর্মী তাঁদের প্রক্রিয়া একটু অগ্ন রকমের। ভাগ-ত্যাগ এখানেও আছে। আমি দ্রষ্টা, জগৎ দৃশ্য। সাংখ্যবাদী দৃশ্য থেকে দ্রষ্টাকে আলাদা করেন। বেদান্ত সাধনায় দ্রষ্টা এবং দৃশ্যের উপাদান কারণকে, অর্থাৎ উভয়ের নাম-রূপ ভাগ ত্যাগ করে উভয়ানুস্মৃত দৃকস্বরূপ সচ্চিদানন্দ পরমাত্মাকে, গ্রহণ করাই বিধি।

: তার মানে সগুণ ঈশ্বরের জায়গায় বিচারের বিষয় হবে দৃশ্যপ্রপঞ্চ ?

- : সাধুরা তাই বলেন ।
- : এটাই কি মুখ্য প্রক্রিয়া ?
- : বেদান্ত মতে হয়তো এটাও মুখ্য নয় । সাংখ্য থেকে বেদান্তে পৌঁছবার রাস্তা এটা ।
- : মুখ্য বিচারটি কি ?
- : বিচারের কোঠা পেরিয়ে এলে ‘অহং ব্রহ্মস্মি’ এই বাক্য থেকেই ব্রহ্মাকারা বৃত্তি উৎপন্ন হয়—

সদেবেত্যাদিবাক্যোভ্যঃ প্রমা স্ফুটতরা ভবেৎ ।

দশমস্তমসীতাস্মাদ যথৈবং প্রত্যগাত্মনি ॥<sup>১</sup>

‘তুমি দশম’ এই উপদেশ থেকে যেমন ভ্রান্ত ব্যক্তির ‘আমি দশম’ এই জ্ঞান হয়, তেমনি ‘তুমি ব্রহ্ম’ এই উপদেশ থেকেই ‘আমি ব্রহ্ম’ এই প্রমাজ্ঞান উৎপন্ন হয় ।

- : কিন্তু হয় না কেন ? কতবার তো ‘অহং ব্রহ্মস্মি’ করলুম—
- : প্রথমে অসম্ভাবনা ও বিপরীত ভাবনা নিবৃত্ত করা দরকার । বিচার দ্বারা অসম্ভাবনা ও ধ্যান দ্বারা বিপরীত ভাবনা নিবৃত্ত হলে চিত্ত স্থির ও নির্মল হয় ; তখন বাক্য থেকে জ্ঞান উৎপন্ন হয় ।
- : দুটো শব্দ থেকে কি করে ব্রহ্মজ্ঞান হবে ঠিক বুঝতে পারি না ।
- : নিদ্রিত অবস্থায় কেউ যদি আপনার নাম ধরে ডাকে তবে জেগে ওঠেন তো ?
- : তা উঠি ।
- : জাগ্রত অবস্থাও ঘুমিয়ে থাকার মতো—তত্ত্বের দিক থেকে । সচ্চিদানন্দই আপনার আসল নাম । স্মৃতিরং সেই নাম ধরে ডাকলে ঘুম ভেঙে যায় ও স্বরূপে প্রতিষ্ঠা হয় । মহাবাক্যলক্ষিত নামই জীবের সত্যিকার নাম ।
- : মহাবাক্যের তা হলে বিশেষ শক্তি আছে ?
- : তা আছে, মানে প্রমাণনিষ্ঠ শক্তি ; যেমন ঘটদর্শনে চক্ষুর বিশেষ শক্তি আছে । এসম্বন্ধে বার্তিককার বলেন—

দূর্বচছাদ্ অবিদ্যায়া আত্মছাদ্ বোধরূপিণঃ ।

শব্দশব্দেরচিন্ত্যত্বাদ্ বিদ্বন্তং মোহহানতঃ ॥

অগৃহীত্বৈব সম্বন্ধম্ অভিধানাভিধেয়য়োঃ ।

হিত্বা নিদ্রাং প্রবৃধ্যন্তে স্মৃশ্ণন্তে বোধিতাঃ পরৈঃ ॥

বোধরূপ আত্মার নিকট অবিজ্ঞা দুর্বল, ন্যূনসত্ত্বাক ; শব্দের অচিন্ত্য শক্তি হেতু মোহ নাশ হলে আত্মতত্ত্বের অবগতি হয়, যেমন সুপ্ত ব্যক্তি অগ্নি দ্বারা প্রবুদ্ধ হয়ে নিদ্রা ত্যাগ করে।

ঃ এক মহাবাক্যের বিচারই দেখছি নানা প্রকারের ; মতবাদও নানাবিধ—বিশ্ববাদ, প্রতিবিশ্ববাদ, অবচ্ছেদবাদ, দৃষ্টিসৃষ্টিবাদ, সৃষ্টিদৃষ্টিবাদ, বহুজীববাদ, একজীববাদ, অজ্ঞাতিবাদ...সিদ্ধান্ত এক কিন্তু মতবাদ অনেক—এর তাৎপর্য কি ?

ঃ বাদগুলো সবই প্রক্রিয়া—কৃতি ও সংস্কার অনুযায়ী যার যেটা ভালো লাগে। সুরেশ্বরচাচার্যের একটি সমাধান আছে এসম্বন্ধে—যয়া যয়া ভবেৎ পুংসাং ব্যুৎপত্তিঃ প্রত্যগাত্মনি সা সৈব প্রক্রিয়েহ স্ম্যাৎ স্বাধী ; অর্থাৎ যার যে বিচার বসে ভালো। সকলেরই লক্ষ্য তত্ত্বলাভ। আপনার কোন্ বিচার ভালো লাগে ?

ঃ নেতিমুখে স্মৃপ্তিবিচার, ইতিমুখে ‘প্রজ্ঞানং ব্রহ্ম’।

ঃ খুব ভালো প্রক্রিয়া। ‘নেতি’ না থাকলে ‘ইতি’কে ধরা যায় না, ‘ইতি’ না থাকলে ব্রহ্মসিদ্ধি হয় না। ‘নেতি’ এবং ‘ইতি’ পরস্পরের পরিপোষক। গীতার একটি শ্লোকে দুটো দিকই এক সঙ্গে আছে—

প্রজ্ঞাহতি যদা কামান্ সর্বান পার্থ মনোগতান্।

আত্মন্তেবাত্মনা তুষ্টিঃ স্থিতপ্রজ্ঞ স্তদোচ্যতে ॥১

নেতিমুখে সব ত্যাগ করে ইতিমুখে আত্মাতে স্থিতি। এভাবেও অভ্যাস করতে পারেন—বিচার আত্মনিষ্ঠ করে।

ঃ ‘প্রজ্ঞানং ব্রহ্ম’ এই বাক্যের বিচার আত্মনিষ্ঠ কি ভাবে করা যায় ? এই মহাবাক্যটিতে “অহম্” এর উল্লেখ নেই !

ঃ আমি এক মহাত্মাকে এই প্রশ্ন করেছিলুম ; তিনি মাণ্ডুক্যের অলাতশাস্তি-প্রকরণ পড়তে বললেন। ইঙ্গিতটি স্পষ্ট করবার অহরোধ করতে, বললেন—একরস অথগু বিজ্ঞানস্বরূপকে বুঝতে হলে প্রথমে বৌদ্ধদের বিজ্ঞানবাদকে ধরতে হয়—অর্থাৎ বাহ্য বস্তু কিছুই নেই, শুধু চিত্তধর্ম ও চিত্তপরিণাম, স্মৃতরাং অহংনিষ্ঠ। ইটপটাদিকে নিজের চিত্তপরিণামরূপে বিচার করে বুঝতে হয় ; তারপর সন্ধান করতে হয় পরিণামসমূহের উপাদান কারণ বা অহংস্বাত সত্তার। সন্ধানের ফল অহম্—এর জ্ঞানস্বরূপত্ব সিদ্ধি।

‘প্রজ্ঞানং ব্রহ্ম’ এবং ‘সর্বং খন্দিদং ব্রহ্ম’—এ দুটো আলাদা অনুভূতি তো ?

সাধুরা তো তাই বলেন।

: এতটোর পার্থক্য কি ?

: সোহং স্বামীর গ্রন্থে বোধ হয় এই প্রশ্নের একটি সুন্দর আলোচনা আছে। তিনি বলেন, ব্রহ্মজ্ঞ পুরুষ তিন ভাবে থাকেন। প্রথম ব্রহ্মভাব বা transcendent realityর ভূমি মানে প্রপঞ্চোপশম প্রজ্ঞান-স্বরূপ ব্রহ্মে স্থিতি ; দ্বিতীয় ঈশ্বরভাব বা immanent realityর ভূমি, মানে সর্বং থন্নিদং ব্রহ্ম বা সর্বানুস্ম্যত সর্বাশ্রুভাবে স্থিতি।

: ঈশ্বর ভাবে কি সবকিছু, মানে জগৎ-প্রপঞ্চ, থাকে ?

: সব কিছু থাকে না, শুধু 'সব'টুকু থাকে। জগতের যদি 'তন্মাত্র' স্বীকার করা যায় তবে সেই তন্মাত্ররূপ উপাধিটি ভাসে—প্রাতোর Idea গোছের। ব্রহ্মানুভূতিতে উপাধি হচ্ছে 'অহম্,' আর ঈশ্বরানুভূতিতে উপাধি হচ্ছে 'সর্বানুস্ম্যত অহম্'। প্রথমটি স্বরূপানুভূতি, দ্বিতীয়টি উপাদান কারণ ও অধিষ্ঠানের অনুভূতি। কারণ সত্তা যুক্তিকার জ্ঞান না হলে যেমন ঘটের উপাদান কারণ ও অধিষ্ঠান যে যুক্তিকা এই জ্ঞান সম্ভব হয় না, তেমনি ব্রহ্মানুভূতি না হলে 'সর্বং থন্নিদং ব্রহ্ম'-রূপ উপাদান-ও-অধিষ্ঠান জ্ঞান উৎপন্ন হয় না। অর্থাৎ ব্রহ্মানুভূতি পূর্বভাবী ; ঈশ্বরানুভূতি পরভাবী, এবং ব্রহ্মানুভূতির সঙ্গে অবিনাশ্যাবী।

: ব্রহ্মজ্ঞ পুরুষের তৃতীয় ভাবটি কি ?

: জীবভাব ; জীবত্বই এখানে উপাধি।

: অবিজ্ঞা তা হলে থেকে যায় ?

: পুরোপুরি নয়। ব্রহ্মজ্ঞানে অবিজ্ঞার আবরণী শক্তি নষ্ট হয়, কিন্তু প্রারম্ভবশতঃ বিক্ষেপ শক্তি থাকে।

: অর্থাৎ অবিজ্ঞালেশ থাকে ?

: শাস্ত্রকারগণ অবিজ্ঞালেশ স্বীকার করেছেন। মায়া আর অবিজ্ঞার ঐটুকু পার্থক্য। 'সর্বং থন্নিদং ব্রহ্ম'—এই অনুভূতির 'সর্বংটুকু' হচ্ছে মায়ারূপ ঈশ্বরোপাধি। মায়া অবিজ্ঞক নয়। ঐন্দ্রজালিক যেমন নিজের ঐন্দ্রজাল দ্বারা নিজে আবদ্ধ হন না, ঈশ্বরও তেমনি ঐশী মায়াদ্বারা নিজে আবদ্ধ হন না ; অর্থাৎ মুগ্ধা তাঁর লীলা-বিলাস। ব্রহ্মজ্ঞ পুরুষ ঈশ্বরানুভূতির অবস্থায় ঐশী লীলা দর্শন করেন ; কিন্তু জীবভূমিতে যখন ব্যাখিত হন তখন অবিজ্ঞক বিক্ষেপ শক্তির আওতায় এসে পড়েন, নচেৎ আহাঙ্গাদি কোনো কাজই সম্ভব হতো না। মাণ্ডুক্যের ভাষায় ব্রহ্মজ্ঞ হচ্ছেন "চলাচলনিকेतঃ"।<sup>১</sup> ঐশী ও ব্রাহ্মী স্থিতির দৃঢ়তার উপর তত্ত্বজ্ঞদেহ



ভূমিনির্দেশ হয়। চতুর্থ ভূমিতে সত্ত্বাপত্তি বা তত্ত্বজ্ঞান; পঞ্চম ভূমিতে অসংস্কৃতি বা জীবমুক্তি। ষষ্ঠ পদার্থাভাবনী ও সপ্তম তুর্ধ্বগা ভূমিতে জীবমুক্তির গাঢ়তর ও গাঢ়তম অবস্থা।

“ : লোকমুখে যে সর্বত্র নারায়ণ দর্শনের কথা শোনা যায়, মানে যেখানে চোখ যায় সেখানেই শ্রীকৃষ্ণ মুরলী নিয়ে দাঁড়িয়ে আছেন,—গাছে, মাঠে, রাস্তার বঁকে...

: ও কিছু নয়। ভাবের আতিশয্যে অমনি হয়—কাল্পনিক দর্শন, তাত্ত্বিক নয়।

: আপনার তো বৈষ্ণব সাধনা ছিল, আপনার ঐজ্ঞাতীয় দর্শন—

: হতো।...বিকেল বেলা বেড়াবার সময় প্রায়ই ওরূপ দর্শন হতো...ধ্যানেতে মন স্থির হয়ে যেতো, কিন্তু জোর করে শ্রীকৃষ্ণকে এনে সেখানে বসাতুম। গুরুদেব একদিন ভুলটা ধরিয়ে দিলেন; বললেন, ‘শ্রীকৃষ্ণের মূর্তিটিই বিদ্য হচ্ছে; মূর্তি লয় করে মনকে চিন্তাশূন্য করবে—ধ্যানং নির্বিষয়ং মনঃ।’

: ঈশ্বরের রূপ সম্বন্ধে ঋীদের তেমন আকর্ষণ নেই তাঁদের কি ঈশ্বরানুরাগ নেই বুঝতে হবে?

: তা বলা যায় না। রূপ এবং শব্দকে ব্রহ্মের দ্বারপাল বলা হয়েছে। কাক রূপসংস্কার প্রবল থাকে, কাক শব্দ-বা নাদ-সংস্কার প্রবল থাকে। রূপের মাধ্যমে ঋীরা এগোন তাঁদের পথ ভক্তি ও প্রেমের। নাদ বা শ্রবণের মাধ্যমে ঋীরা এগোন তাঁদের পথ যোগের বা জ্ঞানের।

: নাদ-সংস্কারে জ্ঞানের পথ উপযোগী হয় কেন?

: রূপকে ধরে রাখা যায়, স্মৃতিরঃ ভক্তি ও প্রেম দিয়ে তাঁর পূজা সম্ভব। শব্দ বা নাদের স্বভাবই হচ্ছে লয়াত্মক।

: বুঝেছি। যেমন তানপুরার সুরে গান-বাণ ইত্যাদি সব লয় পায়; সানাইর একটানা সুরটিরও বোধ হয় ঐ তাৎপর্য...কিন্তু তার সঙ্গে জ্ঞানের সম্বন্ধ কি?

: জ্ঞানস্বরূপ ব্রহ্মেতে সব কিছু লয় পায়। এইজগৎ নাদসংস্কারের ঝাঁক থাকে লয়-যোগ বা জ্ঞান-যোগের দিকে। রূপতত্ত্ব থেকে নাদতত্ত্ব সূক্ষ্মতরও বটে।

: জ্ঞানের রাস্তায় কি প্রেম হয় না?

: জ্ঞান না হলে প্রেম হয় না; অর্থাৎ ব্রহ্মজ্ঞান পূর্বভাবী, ‘সর্বং খণ্ডিদং ব্রহ্ম’ এই জ্ঞান পরভাবী। তাত্ত্বিক প্রেম মানে ‘সর্বভূতস্বম্ আত্মানম্’ ‘সর্বভূতানি চাত্মনি’—এক পরমাত্মা সর্বভূতে অল্পস্থ্যত, সর্বভূত এক পরমাত্মাতে অবস্থিত, এই জ্ঞানই প্রেম।

: এই জ্ঞানই প্রেম?

: কাশীতে হরিহরবাবাকে দর্শন করতে গিয়েছিলুম। সর্বদা ব্রাহ্মী স্থিতিতে

থাকতেন। তাঁকে জিজ্ঞেস করেছিলুম, ‘জ্ঞানে আর প্রেমে পার্থক্য কি?’ জবাব দিলেন,—

“জ্ঞো জ্ঞান হৈ সো হি প্রেম হৈ।”

## ॥ ৬ ॥

সংসার মরুভূমি পেরিয়ে চিন্তামরুভূমিতে ঢুকেছি...বড় বন্ধুর পথ...নিঃসন্দেহ। চলছি...এগছি কিনা জানিনা...তৃষ্ণায় ভিতর পর্যন্ত শুকিয়ে গেছে...এক ফোঁটা জলও নেই...শুধুই মরুভূমি...বালু ও কঁকর,...কোথাও জল নেই...দিগন্তরাল-বাপী শুষ্কতা...ফিরে যাবো?...রাস্তা কোথায়? চারদিকেই তো বালু আর বালু...কোন আশায় ফিরবো?...অন্ততঃ কঁটাগাছ—এখানে তো কিছুই নেই!...জলাশয়? তেমনিই তো দেখাচ্ছে! মরীচিকা নয় তো?...তার চাইতে কঁটাগাছ ভালো নয়?...মরীচিকা?...মাষ্টার মশায় কি মরীচিকা? অসম্ভব। ...আছে, অজস্র আলোর রাজ্য আছে; যেতেই হবে এগিয়ে।...অনেকবারই তো থেমেছি—সেই কঁটাগাছ...বেদাহম্ এতং পুরুষং মহাস্তম্—এ মিথ্যা হতে পারে না...মাষ্টার মশায় কখনো মিথ্যা হতে পারেন না...এগিয়ে চলি, দেখাই যাক কিছু আছে কি না...চরন্ বৈ মধু বিন্দ্ৰতি...মধু পাবো কিনা জানি না, কিন্তু ছাইপাশ মুখে গুঁজে আর পড়ে থাকা যায় না...স্বর্ঘ্যস্ত পশু শ্রেমাণং যো ন তদ্রূপে চরন্...চলি স্বর্ঘের মতো...অতল্লিত হয়ে.....

হৃদিকন্দরতামসভাস্কর হে, রিপুসুদন মঙ্গলগায়ক হে।

মম মানস চঞ্চল রাত্রি দিনে, গুরুদেব দয়া কর দীন জনে ॥

ওঁ তৎ সৎ...ওঁ তৎ সৎ...ওঁ তৎ সৎ...ওঁ তৎ সৎ...মরুভূমি পেরিয়ে এসেছি... কিন্তু বিরাট এক পাহাড়!...পাহাড় নয়, পাহাড়ের উপর পাহাড়...পিচ্ছিল রাস্তা, ভয়ঙ্কর খাড়াই...যাই কি ভাবে?...বসি।

: হে যাত্রী! এটাকেও ডিঙিয়ে যেতে হবে।

: পরাণবন্ধু হে সখা আমার! আমি কি পারবো?

: ভয় কি? সহ নাববতু। সহ নৌ ভুনক্তু। সহ বীৰ্য্য করবাবহৈ। পরম পুরুষ আমাদের উভয়কে বিতাসামর্থ্য দিয়ে পোষণ করছেন...এপথ ভয়ের নয়, পরম কল্যাণের।

৩ পথ যদি ভুল করি ?

: অক্ষেরবিৎ ক্ষেত্রবিদং হুপ্রাট,  
স প্রৈতি ক্ষেত্রবিদামুশিষ্টঃ ।<sup>১</sup>

পাণিকুং ঋষিগণ রাস্তা করে গেছেন ; এপথ নিতুর্ল ।

\*

\*

\*

তমসো মা জ্যোতির্গময়...এ যে ভয়ানক খাড়াই ! পেরুবো কি করে ?

: এতস্থি তুস্তে পটিপল্লা দুক্খমসত্তং করিস্সথ ।<sup>২</sup>  
এ রাস্তায় না চললে দুঃখের শেষ নেই । ধৈর্য ধরে পর্বত উল্লঙ্ঘন করতে হবে ।

: ধৈর্যে আর কুলচ্ছে না ।

: খন্তী পরমং তপো, তিত্তিক্খা নিব্বাণং পরমং বদন্তি বুদ্ধা ।<sup>৩</sup>  
বুদ্ধগণ বলেন, সহিষ্ণুতাই পরম তপস্শ্রা, তিত্তিক্খাই পরম নির্বাণ ।

\*

\*

\*

রাস্তার দুর্ভোগ বোধ হয় কাটলো এবারে...সমতল ভূমি দেখা যাচ্ছে...এবারে  
প্রসন্নচিত্তে এগনো যাবে...আরামের নিঃশ্বাস ফেলি...‘প্রসাদমধিগচ্ছতি’ ?

: দেবী আছে । তুষ্টিতে মুগ্ধ হতে নেই । তুষ্টি রাস্তার পরম বিঘ্ন ।

: আবার যে পর্বতমালা ! জিরিয়ে নিই একটু ।

: গতান্বনো বিসোকম্স বিপ্পমুত্তম্স সৰ্ব্বধি ।<sup>৪</sup>

রাস্তা শেষ না হলে বিশোক ও বিমুক্ত হওয়া যায় না ।

: একটু জিরিয়ে নিচ্ছি মাত্র ।

: ইন্দ্র ইচ্ছরতঃ সখা । যে থামে তার যে ভাগ্যও থেমে থাকে । ইন্দ্র সখা  
স্থাপন করেন তারই সঙ্গে যিনি চলেন ।

: এই চড়াই-উৎরাইর কি শেষ নেই ?

: শেষ আছে বৈ কি ।

(১) ঋগ্বেদ ১০-৩২-৭ (২) ধম্মপদ—২৭৫ ; (৩) ধম্মপদ—১৮৪ ; (৪) ধম্মপদ—৯০ ;

: কোথায় শেষ ? এষে অফুরন্ত—

: একটু আগে রমণীয় অরণ্য আছে—

রমণীয়ানি অরঞ্জনানি যথ ন রমতী জনো ।

বীতরাগী রমিসৃসন্তি ন তে কামগবেসিনো ॥<sup>১</sup>

বীতরাগ, অকামহত যতিগণ সেই অরণ্যে বিহার করেন ।

\*

\*

\*

বিশ্রামপুরী ! দুঃখের কুয়াশা কাটলো তা হলে ।

: আরও আগে ।

: তাইতো ! আবার কাঁটা গাছ ! কাঁটার বন !

: বনং ছিন্দথ মা রুক্থং বনতো জায়তী ভয়ং ।

ছেদ্বা বনঞ্চ বনথঞ্চ নিব্বনা হোথ ভিক্খবো ॥<sup>২</sup>

বনের প্রত্যেকটি গাছ ও ঝোপঝাড় কেটে ফেলতে হবে । সমগ্র বন পরিষ্কার না হলে এই বন থেকে বেরুনো সম্ভব নয় ।

: থকে যাচ্ছি । শত্রুর কি শেষ নেই ?

: নিশ্চয় শেষ আছে ! এখান দিয়ে রাস্তা, এই গুহার পাশ দিয়ে—

: গুহার ভিতরটা তো বেশ ঠাণ্ডা ; একটু চোখ বুজে নিই ।

: নেতং সরণমাগম্ম সৰ্ব্বদুক্খা পমুচ্চতি ।<sup>৩</sup>

আরামের জায়গা এটাও নয় । এখানে ঘুমলে সকল দুঃখের উপশান্তি হয় না ।

: শরীরে যে আর কূলচ্ছে না !

: শরীর তো যাবেই একদিন ।

\*

\*

\*

খরশ্রোতা কৃষ্ণতোয়া ! এ আবার কোন্ নদী ? ওপারে যাব কি করে ? খেয়ার নৌকোই বা কোথায় !

- : সিঞ্চ ভিক্ষু ! ইমং নাবং সিত্তাতে লহমেস্সতি ।<sup>১</sup>  
 এই দেহনৌকো থেকে সব কিছু ফেলে দিতে হবে ; নৌকো খালি হলে এমনিই  
 চলে যাবে ।
- : সব কিছু মানে ?
- : স্থূল-সূক্ষ্ম-কারণ শরীর—তিনটাই ।
- : আমার হাত ধরে কেউ নিয়ে যাবে না ?
- : তুম্হে হি কিধ্বমাতপ্পং অক্খাতারো তথাগতা ।<sup>২</sup>  
 বুদ্ধগণ শুধু রাস্তা দেখাতে পারেন, চেষ্টা যাত্রীকেই করতে হবে ।
- : আমি বসলুম নদীর পাড়ে ।
- : এখানে বসলে তো চলবে না ।

সম্প্রযাতোসি যমস্স সন্তিকে ।

বাসো পি চ তে নথি অস্তরা ॥<sup>৩</sup>

- এষে যম দুয়ার ! এখানে চট্ট নেই ।
- : তা হোক গে । আমি আর পারি না ।
- : কিচ্ছো বুদ্ধানম্পাদো—বুদ্ধ লাভ সহজে হয় না ।
- : এই অন্ধকারে যাবো কি করে ? আর রাস্তা নেই ?
- : নাহঃ পস্থা বিত্ততে অয়নায<sup>৪</sup>—দ্বিতীয় রাস্তা নেই ।
- : কিচ্ছই যে দেখতে পাচ্ছি না !
- : ধ্রুবং জ্যোতির্নিহিতং দৃশয়ে কম্<sup>৫</sup>—রাস্তা দেখাবার আলো রয়েছে তো ।
- : কোথায় ? এ যে অস্ত্রহীন দুস্তর রাত্রি ! নৌকো আর চলে না ।
- : নৌকোর প্রয়োজন নেই । সেতু আছে—গম্ভীরে চিদ্ ভবতি গাম্ অস্মৈ<sup>৬</sup>,  
 গহন রাত্রির বুক চিরে বানানো এই সেতু । তৎ প্রবিষ্টা দেবা অমৃত অভয়া  
 অভবন্<sup>৭</sup>, দেবগণ এই সেতু পেরিয়ে অমৃত ও অভয়পদ লাভ করেছেন ।
- : সেতু ? কোথায় সেতু ? অতলম্পর্শা শূন্যতা ! বুক হুড়হুড় করে । কিরি আমি ।
- : তার মানে তো মৃত্যু ।
- : তবে মরি ।
- : ন চেদ্ ইহাবেদীন্ মহতী বিনষ্টিঃ ।<sup>৮</sup>

(১) ধম্মপদ ৩৬৯ (২) ধম্মপদ ২৭৬ ; (৩) ধম্মপদ ২৩৭ ; (৪) যেতাষত্তর ৩-৮ ; (৫) ঋগ্বেদ-  
 ৬-২-৫ ; (৬) ঋগ্বেদ ৬-২৪-৮ ; (৭) ছান্দোগ্য ১-৪-৪ ; (৮) কেন ২-৫ ;

ঃ হে পরাণসখা বন্ধু আমার ! তুমি এগিয়ে যাও ; তোমার জ্যোতির্ময় মূর্তির দিকে  
চেয়ে শেষ নিঃশ্বাসটুকু ফেলে ঘুমিয়ে পড়ি'..

ঃ সে তো ঘুম নয়, তামিশ্র । উত্তীর্ণত ! জাগ্রত ! প্রাপ্য বরান্ নিবোধত ।<sup>১</sup>

\*

\*

\*

বান ডেকেছে...বিশ্বগ্রাসী প্লাবন...বিরাট মুখব্যাদান করে ঐ আসে ত্রিভুবনসংপ্লাবী  
প্রলয়পয়োধিজল...

ତୃତୀୟ ଅଧ୍ୟାୟ

ଓଁ ନମ୍ଫୁ ଓଁ ନମ୍ଫୁ ଓଁ ନମ୍ଫୁ

(ଦ୍ଵ)

ମୁରୀନାମ





(খ)

## পুরীধাম

॥ ১ ॥

বিশু মানে বিশ্বনাথ মহাস্তী, আমার প্রতিবেশী। পাশের বাড়ীতে থাকে, অনেক কালের পরিচয়, পরিচয় সূত্রে কাকা-ভাইপো। রসায়ন শাস্ত্রে এম-এস্‌সি পাশ করে স্থানীয় একটি কলেজে অধ্যাপকের কাজে নিযুক্ত আছে। যুদ্ধে গিয়েছিল, যদিও প্রয়োজন ছিল না; ভিতরে একটা অশান্তপনা আছে...বেপরোয়া ভাব, তোয়াক্কা রাখে না কার...ওকে ঘাঁটাতেও কেউ সাহস পায়না...আমার সঙ্গে বনে বেশ...ওরই আগ্রহে পুরী আসা। বিশুর বাবা পেনশন নিয়ে আবার চাকরিতে ঢুকেছেন—আছেন ময়ূভঞ্জে। আজকাল কর্মরত অবস্থায় হৃদশূলে বা রক্তপ্রেসে প্রাণতাগ করাই সকলের কাম্য...পঞ্চাশোর্ধ্ব বনং ব্রজেং হচ্ছে সেকলে আদর্শ; আধুনিকদের মন্ত্র হচ্ছে die in harness...কিমর্থং কশ্চ কাম্য ? বাজে প্রশ্ন। ততঃ কিম্ ? ততঃ কিম্ ? ততঃ কিম্ ? ধ্বনি অতি ক্ষীণ...the still small voice—অতিমৃদু, শোনাই যায় না...যা চক্কানিনাদ চলছে! শোনবার উপায় নেই...তাঁর ইচ্ছা ? যথা নিযুক্তোহস্মি তথা করোমি ?...মনে পড়ে আমার এক অধ্যাপকের কথা...কলকাতা সেন্ট জেভিয়ারস কলেজের ইংরিজির শিক্ষক ছিলেন; পাদ্রীসাহেবের সঙ্গে হাসপাতালে দেখা করতে গিয়েছিলুম...অনেক কালের কথা...গ্যাংগ্রীণের জঘ্ন ফাদার-এর একটি পা কেটে ফেলা হয়েছিল; জর ছিল, যন্ত্রণাও ছিল; তা সত্ত্বেও এম্-এর ছাত্রদের খাতা দেখছিলেন। এ অবস্থায় আর খাতা দেখার হেঙ্কাম পোয়াচ্ছেন কেন, জিজ্ঞেস করলুম; জবাব দিলেন, শেষ মুহূর্ত্ত পর্যন্ত পরম পিতার সেবা করে যেতে চাই;...God's will be done ! মুখখানা লাল টকটকে হয়ে উঠলো...সেদিনই মারা গেলেন...আমাদের কর্মযোগ 'ভোগৈশ্বর্ষপ্রসক্তানাং তয়াপহৃতচেতসাম্'...যাক গে, মরুক গে...বাংলা ভাষার এই ইডিয়মটি কিন্তু চমৎকার। Let be, Hang it জানে দো, মারিয়ে গুলি, ইত্যাদি আছে, কিন্তু 'যাক গে মরুক গে'র ব্যঙ্গনাসমৃদ্ধি নেই...এক তুড়িতে সব লেঠা চুকিয়ে দেওয়ার অমোঘ অস্ত্র...কোনো অস্ত্রই দেখছি অমোঘ নয়...শত্রু আবার মাথা তুলে দাঁড়ায়...আবার অস্ত্রপ্রয়োগ...শত্রুবলির আর শেষ নেই?...যাক গে, মরুক গে! বিশু স্টেশনে ছিল। বিশুদের বাড়ীটি দোতালা, মন্দিরের

কাছে। একজন ঠাকুর ও চাকর তত্ত্বাবধায়ক আছে ; নীচেটা ভাড়ায় খাটে, উপরটা নিজেদের জুতা রাখা। বেশ নিরিবিলা। আরামে থাকা যাবে।

\*

\*

\*

\*

বঙ্গভূমি নদীমাতৃক দেশ ; নদীর সঙ্গে আমাদের আজন্ম পরিচয়। ওপারের গ্রামখানি ঘনমেঘে ঢাকা, এপারে আমি একেলা, গান গেয়ে পাল তুলে তরী বেয়ে মাঝি চলে—চেতনার অনাচে কানাচে এই জল-ছবির রেখাঙ্কন চোখে পড়ে। তবুও মেঘনা দেখে ভয় হতো—মৃত্যুর কালো চোখের অন্তহীন গহন। ভয় হয়, বিস্ময় জাগে না। সমুদ্র ভয়মিশ্র বিস্ময়, *mysterium tremendum* ; মৃত্যু নয় মৃত্যুর পরপার ; ব্যক্তরূপে ভয়ঙ্কর, অব্যক্তরূপে বিস্ময়মণ্ডিত। বাস্তব ও কল্পনার মধ্যে একটা পার্থক্য দেখেছি—শুধু পুরীর সাগরকূলে নয়, অগ্ন্যত্রয়। কল্পনার সমুদ্র অসীম, অক্ষুর, শান্তির পারাবার ; বাস্তব সমুদ্র অপার হলেও ক্ষুর, বিদ্রোহী, অশান্ত...স্বর্গধারে বসে ঢেউ গুনছি...প্রলয়ের সমুদ্র ! ওতশ্চ প্রোতশ্চ ! এই সমুদ্র তার কাছে প্রতীকমাত্র...প্রলয়পয়োধিজলের ভয়টা কিছু কেটেছে...দুর্বাসাজী বলেছিলেন ঠিক...বৃদ্ধদের মতো কতো বিশ্ব উঠছে, লয় পাচ্ছে...তাতে আপনার কী ?...প্রলয় সমুদ্রে বৃদ্ধ ! কে তার খবর রাখে !...মহাশূন্যে ফুলিঙ্গ...ভূত্বা ভূত্বা প্রলীয়তে...তবুও বেলাভূমির দৃশ্যে চিত্ত ব্যথিত হয়। কেউদাকে দেখতে গিয়েছিলুম ; ট্রাম থেকে পড়ে একটা পা কাটা যায় ; হাসপাতালে ছিল রাতটা ; ঔষধাদির ব্যবস্থা তেমন কিছুই হয় নি...দিল্লী থেকে এক বড় কর্তার নাকি সেদিন আবির্ভাব হয়েছিল...মিটিং, কনফারেন্স, বক্তৃতা, টি-পার্টি, ডিনার, হজ্জুত...মুম্বু পথচারীকে দেখবার লোক কোথায় ?...সকাল বেলা গিয়ে দেখি, ফেকাশে, বিবর্ণ চেহারা...সব রক্তই বোধ হয় বেরিয়ে গেছে...ছিলই বা কতটুকু ?...ফ্যাল ফ্যাল করে তাকালো...চিনতে পেরে থাকবে, চোখ দিয়ে জল গড়াচ্ছিল...তারপর চোখ স্থির...সব শেষ...শেকভের গল্প যেন...ছেলের অসুখ করেছে...ডাক্তারবাবু এলেন ; ইহুদী। রোগীর গায়ে জেঁক লাগানো হলো ..“ডাক্তারবাবু ! ছেলে যে আর কথা বলছে না ?”...আরও জেঁক লাগানো হলো...“ছেলের যে সাড়া শব্দ নেই, ডাক্তারবাবু ?” “ঘুমছে”...জেঁকগুলো রক্ত খেয়ে ঠোঁস হয়ে একটার পর একটা গা থেকে পড়ে গেল। ফী ও জেঁক নিয়ে ডাক্তারবাবু বিদায় নেন...ছেলের আর ঘুম ভাঙলো না...বাপ ভিক্ষাপাত্র নিয়ে রাস্তায় কাঁদেন—Give us this day our daily bread. And forgive us our debts, as we forgive our debtors...for thine.

is the kingdom, and the power, and the glory, for ever. Amen...

আকাশে একখণ্ড সাদা মেঘ...ধীর, মধুরগতি...রূপ বদলাচ্ছে মেঘটির...উত্তর-  
ভাদ্রপদ নক্ষত্রের মতো সুন্দর পালঙ্ক; সাদা ধবধবে চাদর বিছানো...  
কেষ্টদা শুয়ে আছে। স্বপ্ন দেখছে? কিসের স্বপ্ন?...পুকুর পাড়, খেলার  
মাঠ, ধানের ক্ষেত, কদম গাছে শ্রীকৃষ্ণের লাল টুকটুকে পা দু-খানি?...আমাদের  
কথা হয়তো মনেই নেই...পালঙ্কটা আর দেখা যাচ্ছে না...সমুদ্র পাড়ি দিয়ে  
হয়তো চলে গেলো অল্প কোথা আর...সর্বং শূন্য শূন্য...তবুও দুঃখ আসে;  
বুদ্ধদেবেরও এসেছিল। দুঃখের তাড়নায় ঘর ছাড়লেন, বুদ্ধ হলেন; কিন্তু বাকী  
জীবনটা আর পাঁচজনকে দুঃখের হাত থেকে বাঁচাবার কী চেষ্টাই না  
করলেন!...কার কি হলো জানি না, কিন্তু জীবের দুঃখ সম্বন্ধে দুঃখ-বোধ  
অমিতাভের ছিলই...সৈকতশয্যার বালি গায়ে না লেগে যায় না...কেষ্টদা আর  
নেই, কিন্তু 'নেই'র দুঃখটুকু রেখে গিয়েছে আমাদের জন্ত...দেখলেই দুঃখ জানলেই  
দুঃখ ভাবলেই দুঃখ; ঘুমিয়ে পড়লে কোথায় দুঃখ?...সমুদ্রের ঢেউগুলো হয়তো  
কতো বেদনা নিয়ে আছাড় খেয়ে পড়ে, কিন্তু আমাকে তো স্পর্শ করে না!...  
কেষ্টদার পাশেই আর একজন রোগী মারা গেল; তার কথা তো ভাবছি না...দুঃখের  
সঙ্গে নিজেকে জড়িয়ে ফেলছি বলেই দুঃখ...যদি আলাদা থাকি?...যেমন  
বেলাভূমি থেকে, ঢেউগুলো থেকে, পথচারীদের থেকে আলাদা হয়ে  
আছি?...এই শরীরটাই বা কি?...বাল্যের স্নকুমার দেহ এখন কোথায়?  
যেটিকে নিয়ে কাজ চালাচ্ছি এখন, সেটিই বা আর ক'দিন?...কেষ্টদার মতোই  
তো ছেড়ে যেতে হবে! মন? প্রতিমুহূর্তেই বদলাচ্ছে...ভাতের হাঁড়ির তুড়তুড়ির  
মতো, যতক্ষণ আগুন ততক্ষণ আছে...আগুন নিবলেই চূপ!...ঘুমিয়ে যখন  
পড়ি তখন কে কোথায় থাকে? সব সম্পর্কই ডুবে যায়!...কিছুই থাকে না...  
কিন্তু আমি থাকি...দৃশ্যকে ডুবিয়ে দিয়ে আমি একেলা...দ্রষ্টা...দৃশ্যমাত্র: শুদ্ধ:...

\*

\*

\*

\*

মৃত এ জগৎ!...জড় এ দৃশ্যপ্রপঞ্চ...সব থেকে পুরুষ অল্প...দ্রষ্টা...দৃশ্যমাত্র:  
শুদ্ধ:...সাক্ষী চেতা কেবলো নিশ্চরণশ্চ...

॥ ২ ॥

Infinity in the palm of your hand...ব্লেক (Blake) মিস্টিক ছিলেন...  
বিবেকখ্যাতি হয়েছিল ঠরং?...সব বুদ্ধি, পুরুষ: আত্মা, অজ্ঞতা ভেদ:

খ্যাতিজ্ঞানম্...প্রকৃতি থেকে পুরুষ আলাদা এই জানে প্রকৃতির উপর পুরুষের স্বামিত্ব সিদ্ধ হয়...প্রকৃতি প্রকাশ্য, আত্মা প্রকাশক; প্রকৃতি জড়, দৃশ্য... পুরুষ চেতন, দ্রষ্টা...পুরুষ প্রভু, বিভূ...প্রকৃতি পরার্থী, পরবশা...Infinity in the palm of your hand...বিশ্বজগৎ হাতের মুঠায়...প্রপঞ্চ করামলকবৎ আত্মাধীন...সাক্ষী চেতা কেবলো নিষ্ঠূর্ণশ্চ...Infinity in the palm of your hand...স্বামিত্ব সিদ্ধ হয়...দ্বৈত থেকে যায়...কিন্তু বহুপুরুষবাদ তো প্রমাণিত হয় না...যাবতীয় জগৎপ্রপঞ্চ যখন দৃশ্য কোটিতে চলে যায় তখন বহুপুরুষও দৃশ্যে অন্তর্ভুক্ত...সাক্ষী চেতা কেবলো—এক দ্রষ্টা...দ্রষ্টার নিকট তো সবটাই দৃশ্য... ব্যবহারে বহু পুরুষ আছেন, কিন্তু সমগ্র ব্যবহারই তো প্রকৃতিনিষ্ঠ...ব্যবহারিক বহু পুরুষ তো অবিবেকজগৎ, সূতরাং তাঁদের “পুরুষ” বলা চলে না—প্রকৃতির লীলা-চাতুর্থ্য মাত্র...সাংখ্যের বিবেক দ্বারা একজীবত্ব সিদ্ধ হয়, কেবলত্ব সিদ্ধ হয়; বহুপুরুষত্ব দাঁড়ায় কি করে?...দেখি, মাষ্টারমশায় চিঠির উত্তরে কি লেখেন। ...বিবেকখ্যাতি হচ্ছে নির্বিকল্পক<sup>১</sup> জ্ঞান—প্রকৃতি পৃথক্‌বৎ দৃষ্ট হয়, পৃথক্‌ হয় না। ঘট যেমন পট হতে ভিন্ন, প্রকৃতি তেমনি দ্রষ্টা থেকে ভিন্ন হয় কৈ? ভিন্ন হলে প্রকৃতির প্রকাশই হতো না। ভিন্নবৎ আর ভিন্ন এক জিনিস নয়। ‘বৎ’-টুকু থাকে বলেই কি অসম্প্রজ্ঞাত সমাধির প্রয়োজন?

...মাষ্টার মশায় বড় ঢাপা লোকে...প্রশ্ন না করলে—

: কাকা বাবু! কাল ভুবনেশ্বর যাওয়ার ব্যবস্থা করে এলুম। মিশনে থাকবো; চেনা আছে; অসুবিধা হবে না।

: হলোই বা একটু অসুবিধা...এক-আধ রাত্তিরের ব্যাপার তো!...কী আর এমন অসুবিধা হবে!

: পুরী কেমন লাগছে?

: ভালোই তো।

: ক’দিন আপনাকে একটু আনমনা দেখছি!

: তীর্থে এসে ভগবানের নাম নিয়ে থাকতে হয়।

: ভগবান সত্যিই আছেন?

: কি জানি!

: তবে কীর নাম নিয়ে আছেন?

: আরও শক্ত প্রশ্ন।

: জবাব দিচ্ছেন না; পাশ কাটিয়ে যাচ্ছেন।

: ঈশ্বর থাকলেই বা তোমার লাভ কি, আর না থাকলেই বা ক্ষতি কি?

: প্রশ্নের উত্তর প্রশ্ন নয়।

: সোক্রেটিস ও ভাবেই উত্তর দিতেন—প্রশ্ন করে।

: আচ্ছা, উত্তর দিচ্ছি আপনার প্রশ্নের। বর্তমান শিক্ষায় অনেক তথ্য সংগ্রহ করতে হয় শুধু গুদামজাত করবার জ্ঞান—যেমন কোন্ নদী সব চাইতে বড়, কোন্ পর্বত সব চাইতে উঁচু, কোন খেলোয়াড় সব চাইতে বেশী ‘রান’ করেছে, বিশ্ববক্তাদের ভিতর কে শ্রেষ্ঠ চ্যাটারবক্স (chatter-box), কালো ব্যাপারীদের ভিতর কোন্ শ্রেণীর বেশী টাকা...এসব জেনে লাভও নেই ক্ষতিও নেই; লাভ-ক্ষতি নিরপেক্ষ হয়ে জ্ঞানার্জনের নামই তো liberal education (লিবারেল এডুকেশন)?

: একটু পার্থক্য আছে। যে সব তথ্যের উল্লেখ করলে সেগুলো সাধারণ প্রমাণের আওতায় আসে। ঈশ্বরীয় তথ্য আসে না, অর্থাৎ সাধারণ categories of knowledge এর বাইরে। কাজেই ঈশ্বরের খবরাখবর ও ভাবে সংগ্রহ করা যায় না।

: কি ভাবে যায় সংগ্রহ করা?

: মহাজনো যেন গতঃ স পস্থাঃ—মহাজনরা বলতে পারেন।

: এখানেও মহাজন?

: ঋদের কাছে যে বেসাত আছে তাঁদের কাছে সেই বেসাতের জ্ঞান যেতে হবে বৈ কি? বিজ্ঞানের মহাজন যেমন নিউটন, আইনস্টাইন্ প্রাক্ক, ইত্যাদি, তেমনি এ জিনিসের মহাজন বুদ্ধ, শঙ্কর, নানক, চৈতন্য—

: উড়িষ্য়ার ক্ষাত্রধর্মের অবনতির জ্ঞান অনেকে মহাপ্রভুর বৈষ্ণবধর্মকে দায়ী করেন।

: আপাতদৃষ্টিতে তাই মনে হয়। যেমন ভারতীয় ক্ষাত্রশক্তির পতনের জ্ঞান বুদ্ধদেবকে দায়ী করা হয়; ইউরোপে তামসিক যুগ (Dark Age) এসেছিল খ্রীষ্টীয় ধর্মমতের জ্ঞান। বর্তমান কালে গান্ধিবাদের যে বিপর্যয় ঘটেছে তার জ্ঞান দায়ী আমরা, কিন্তু উত্তরকালে দোষী করা হবে হয়তো মহাত্মাজীকেই।

ইতিহাসের গতিচ্ছন্দ অত্যন্ত রহস্যময়<sup>১</sup>...জুলিয়াস সীজারকে হত্যা করা হলো। সাধারণতন্ত্রের প্রতিষ্ঠার জন্ম, ফল হলো সাধারণতন্ত্রের অস্ত্যোপ্তিক্রিয়া... ইওরোপবাসীদের গৃহযুদ্ধ ছিল এশিয়া-আফ্রিকা-রূপ আপেলের ভাগবাটোয়ারা। নিয়ে, কিন্তু পরিণাম হলো এশিয়ার স্বাধীনতা। আফ্রিকার ভাগ্যোদয় হয়তো হবে তৃতীয় বিশ্বযুদ্ধের পর, যদিও কার্যকারণ নির্দেশের দিক থেকে কোনোই অবশুজ্ঞাবিতা খুঁজে পাওয়া যায় না। ঐতিহাসিকদের হেতুস্থাপনে থাকে হেতুভাঙ্গ। কার্যকারণের সিঁড়ি ভেঙ্গে একটু এগলেই দেখা দেয় অনবস্থা দোষ, অর্থাৎ ১২৪৭এর কারণ ১২৪৬, ১২৪৬এর কারণ ১২৪৫, ১২৪৫এর কারণ ১২৪৪...; অথবা আসে অশ্রোতাত্মক দোষ, মানে এশিয়ার স্বাধীনতার কারণ হিটলার-তজ্ঞা; হিটলার-তজ্ঞার আবির্ভাবের কারণ এশিয়ার পরাধীনতা<sup>২</sup>। আসলে ইতিহাস হচ্ছে পুরাণস্থানীয়—বিজ্ঞাতের জ্ঞাপন আছে; তত্ত্বনিশ্চয় নেই। ইতিহাস শাস্ত্র নয়।

: শাস্ত্র মানে ?

: যে তত্ত্বনির্দেশ করে এবং তত্ত্বলাভের উপায় বলে দেয়—যেমন বিজ্ঞানের তত্ত্ব বা truth এবং সেই তত্ত্বে পৌঁছবার প্রক্রিয়া বা technique ; অধ্যাত্ম বিজ্ঞানে যেমন মায়াবাদ একটি তত্ত্ব—

: অনেকে তো বলেন মায়াবাদই ভারতের সর্বনাশ করেছে।

: তা বলেন ঠিকই। বৈষ্ণবরা আবার বলেন, বৈকুণ্ঠে মুক্তদের জন্মায়ত<sup>৩</sup> দেখে শ্রীহরি আচার্য শঙ্করকে পাঠিয়েছিলেন দুই মায়াবাদের প্রচারের জন্ম, যার ফলে লোক নিরয়গামী হচ্ছে এবং বৈকুণ্ঠের খাণ্ডসমস্তা তিরোহিত হয়েছে। এসব শুধু লৌকিক কল্পনা, বুদ্ধকথিত সম্মাদিট্টি বা সম্যক দৃষ্টি নয়।

: বুঝি না। বুঝি এই যে আমরা দুঃখ পাচ্ছি। আর ঈশ্বর যদি আছেন তবে তিনি দেখেও দেখেন না; অর্থাৎ নির্দয়।

: তোমার আবার দুঃখটা কিসের ? বুদ্ধের মতো—

(১) 'ইওরোপের ইতিহাস' এর ভূমিকায় ফিশার লিখেছেন—"I can see only one emergency following upon another as wave follows wave, only one great fact with respect to which, since it is unique, there can be no generalisations, only one safe rule for the historian: that he should recognize in the development of human destinies the play of the contingent and the unforeseen."

(২) ঐতিহাসিক টগনবি বলেন—স্বপাত সলিল; "We are betrayed by what is false within" (A Study of History)। কিন্তু প্রায় থেকেই যায়।

: আছে দুঃখ, কাকাবাবু। বলবো একদিন। সেজন্তই ভাবি—জীবন, মৃত্যু, ঈশ্বর, আত্মা, এসব কথার সত্যিই কোনো মানে আছে, না গোটাটাই ধাঙ্গাবাজি ?

: মহাজনদের কথায় শ্রদ্ধা বিশ্বাস আসে না ?

: কী যে বলেন তাঁরা—বোঝাই মুশ্কিল।

: মৌলিক একটি তত্ত্ব আছে। শাস্ত্রাদিতে এই তত্ত্বটি বোঝাবার জন্ত নানা ভাবে চেষ্টা হয়েছে—যুক্তি, রূপক, গল্প, ইত্যাদির মাধ্যমে বাক্য ও মনের যিনি অতীত তাঁকে উপলব্ধির গোচরে আনবার কতো যে প্রয়াস হয়েছে। ধর জগন্নাথদেবের মন্দির। মন্দির গাত্রটি জগতের রূপক ; বিভিন্ন স্তরে জগতের বিভিন্ন রূপায়ণ ; শীর্ষদেশে অমৃতকলস ; গুহার অভ্যন্তরে অন্তর্ধামী জগন্নাথ।

: কামচিত্র কেন ?

: জগন্নাথের গাত্রে আছে বলে। অলঙ্কারশাস্ত্রের আদি রস, যে রস থেকে জগতের উৎপত্তি...প্রবৃত্তি রেখা ভূতানাম্।

: ওটাকে বাদ দেওয়া যেত না ?

: মন্দিরগাত্রের অঙ্গহানি হতো। ঐতিহাসিক অঙ্গ কারণ থাকতে পারে, কিন্তু আর্ট-এরও একটা দিক আছে।

: বুঝি না। হেঁয়ালি মনে হয়।...বিশেষতঃ ধর্মকথা...সেদিন সহকর্মীদের ভিতর তর্ক হচ্ছিল সারেগার (Surrender) নিয়ে। আজকাল নাকি একথাটি খুব চালু। দর্শনের অধ্যাপক বলছিলেন, অনেককাল দাসত্ব করেছি আমরা—দাস মনোভাবের উদগার। সংস্কৃতির অধ্যাপক বলছিলেন, ‘সর্বধর্মান্ পরিত্যজ্য’; দুর্বোধ্য। একজন রোগা মতো ক্ষ্যাপাটে গোছের নূতন সহকর্মী এসেছেন আমাদেরই বিভাগে; তিনি বলছিলেন, ‘Supermind ; descent of God ; subliminal’ কী-যেন; অত্যন্ত দুর্বোধ্য। আমি জিজ্ঞেস করেছিলুম, কে সারেগার করবে, কি জিনিস সারেগার করবে, কার নিকট সারেগার করবে, ঐ প্রশ্ন কটির উত্তর দিন তো। তুমুল তর্ক; ভাষা দুর্বোধ্য; অর্থ ততোধিক; তারপর ঘণ্টা পড়লো; যে যার ক্লাসে চলে গেলেন...আমরা যে তিমিরে সে তিমিরে। আমার কেবলই মনে হচ্ছিল কথার আড়ালে বিরাট এক প্রবঞ্চনা চলছে।

: তোমার প্রশ্ন কিন্তু চমৎকার হয়েছিল—সারেগারের সমস্ত স্তম্ভরভাবে উপস্থিত করা হয়েছে।

: তা না হয় হলো ; কিন্তু উত্তর কোথায় ?

: এসব প্রশ্নের ঠিক রেডি-মেড্ উত্তর নেই। নিজে ভেবে নিজের উত্তর বাক্য করতে হয়।

: আপনি ভেবে কী উত্তর পেয়েছেন ?

: সে-তো আমার উত্তর—তোমার পক্ষে সেটি উত্তর না-ও হতে পারে।

: তবুও শোনা যাক না ! বুঝিয়ে বলুন।

: সরকারী টাকা সারেঙার করতে হয় জানতো ?

: খুব জানি। মার্চ মাস এলেই বাবা সারেঙার নিয়ে ব্যস্ত হয়ে পড়েন।

: সারেঙার মানে স্বত্বত্যাগ। রাজপুরুষ টাকার উপর স্বত্ব ত্যাগ করে সরকারকে টাকা ফিরিয়ে দেন। তেমনি ধর, তোমার মন, বুদ্ধি, অহংকার, চিত্ত, কর্মেন্দ্রিয়, জ্ঞানেন্দ্রিয়, পঞ্চভৌতিক দেহ, সবকিছুই ঈশ্বরের ; তুমি শুধু এদের ক্রিয়াকৌশলের দ্রষ্টা, যদিও ভাবছ দেহেন্দ্রিয়াদি সব কিছু তোমারই। মহাজনরা বলেন, দেহেন্দ্রিয়াদি আমার—এই অভিমান থেকেই আমাদের সব কিছু দুঃখ। সুতরাং সর্বস্বত্ব ত্যাগ করে ঈশ্বরের জিনিস ঈশ্বরকে ফিরিয়ে দাও ; তুমি থাকবে এই দানক্রিয়ার দ্রষ্টা বা সাক্ষী হয়ে ; এর নামই সারেঙার, যার ফলে আসে পরম শান্তি। অর্থাৎ জগন্নাথ দেবই মালিক ; দেহমন্দিরটি তাঁরই ; সম্প্রদান পূর্ণ হলে জগৎ সংসার জগন্নাথ দেবের মন্দিররূপে প্রতিভাত হবে, আর যিনি সম্প্রদান করেন তিনি দ্রষ্টা হয়ে শ্রীভগবানের লীলা দর্শনে সমর্থ হন। আমরা স্বত্বত্যাগ করতে পারি না বলেই দুঃখ পাই। অথচ মৃত্যুতে সব কিছু ত্যাগ করতেই হয়।

: ঠিক ব বলুম বলতে পারি না। কোথায় ঈশ্বর, তাঁকে দেবোই বা কি করে, দেহ-মন-বুদ্ধি এসব আলাদাই বা কি ভাবে করি—

: কী দরকার এ নিয়ে মাথা ঘামিয়ে ?

: আপনি মাথা ঘামাচ্ছেন কেন ?

: শেলী (Shelley)র নিকট জগৎটা ছিল নানা রংএর ফানুস। জীবনের তাগিদ অমুখ্যায়ী এর রং বদলায়—এক রং ডুবে যায়, আর এক রং ভেসে ওঠে। Sufficient for the day is the “colour” thereof—রামধনুরকোন্ রংটা সমূহ দরকার এটাই হচ্ছে জীবনের ও জীবনশিল্পীর আসল প্রশ্ন। যখন কোনো রং-এরই আর প্রয়োজন থাকবে না তখন হয় তো বা দেখা দেয় নির্মল নিরঞ্জন আকাশ বা শ্রামসুন্দর। তোমার যেটা সমস্তা তার সমাধানেই জীবনের সার্থকতা।



: তাই বা জানি কোথায় ? কজনাই বা জানে তার জীবনের সত্যিকার প্রশ্ন কী ?  
 : অন্ধভাবে জানে, এবং সেভাবেই হাতড়ে হাতড়ে চলে। শিক্ষার উদ্দেশ্য হচ্ছে প্রত্যেকের ব্যক্তিগত সমস্যাটিকে পরিস্ফুট করে তোলা। স্পীয়ারম্যান সাহেব (Faculty Psychologyর ব্যাখ্যাতা Spearman) বলেন প্রত্যেক জীবনেরই একটি স্বধর্ম আছে, যেখানে সে অদ্ভুতকর্ম্য হতে পারে ; কিন্তু পরধর্ম গ্রহণ করলে সে হয় গোবরগণেশ।

: বর্তমান শিক্ষায় কি স্বধর্ম ধরিয়ে দেওয়া হয় ?

: অন্ততঃ আমাদের দেশে নয়।

: তা হলে উপায় ?

: বলা শব্দ...হয় তো এই অন্ধকারেও বিদ্যুৎপ্রভার মতো কতকগুলি সংস্কার দেখা দেয়, যদিও সংসারের ঝড়বাদলে শেষ পর্যন্ত সেগুলো অদৃশ্য হয়ে পড়ে। কিন্তু স্থিরচিত্তে এই ক্ষণপ্রভাকে ধরে এগলে দৃষ্টি হয় তো খুলে যেতে পারে।  
 : আমার দুঃখ কিসের—বলছিলেন না? সেকথাটাই বলবো। ছোটবেলা মাকে হারিয়েছি...একান্তে আকাশের দিকে অনেক সময় তাকিয়ে থাকি...মনে হয় তারার দেশে তারার মত পলকহীন চোখে আমার দিকে মা চেয়ে আছেন, তাঁর স্নেহ দিয়ে আমাকে বাঁচিয়ে চলেছেন, আশীর্বাদ দিয়ে বিপদ থেকে উদ্ধার করছেন।

: খুব শুদ্ধ ভাবনা ; এ ভাবনাই তোমাকে কল্যাণের পথে নিয়ে যাবে।

: মাকে হারানো জীবনের একটা বড় অভিশাপ নয় ?

: মাকে হারিয়ে যে ভাবনাটি পেয়েছ সেটিই তো পরম আশীর্বাদ। ওটি তোমার জীবনের ক্ষণপ্রভা, কোনো অবস্থাতেই এর নির্দেশ অমান্য করবে না।

: কী আর এমন সার্থকতা এর ?

: আছে সার্থকতা। জীবনের সব ঝড় ঝাপটা থেকে এই ভাবনাই তোমাকে রক্ষা করবে...এবং ভাবনা পরিশুদ্ধ হলে তোমার মা-ই বিশ্বজননীর কল্যাণ মূর্তিতে দেখা দেবেন।...ভাবনার এই নক্ষত্রপথে চল ; দেখবে মনের অশান্তপনা কেটে গেছে, জীবনে নেবে আসছে জননীর শান্তিময় আশীর্বাদ...

॥ ৩ ॥

বিশ্ব একটি মোটর গাড়ী যোগাড় করেছে—আমারই মতো ; কবে যে যাত্রা শুরু করেছে বলা কঠিন, তবে হঠাৎ যে ঝুংলু যাত্রা সাক্ষ হতে পারে

তা সহজেই অনুমান করা যায়।...সকালের স্নিগ্ধ হাওয়া, আকাশে মেঘ, কায়ক্লেশে গাড়ীর এগিয়ে চলা...বেশ লাগছে...মনে হচ্ছে আবার যেন হরিদ্বার যাচ্ছি...বিশু ড্রাইভ করছে, যুদ্ধের সময় এ বিদ্যায় হাত পাকিয়েছিল...

: কাকাবাবু আজকাল খুব তীর্থ করে বেড়াচ্ছেন, না ?

: খুব আর কোথায় ?...তবে হ্যাঁ, কৌঁক আছে।

: কী আর আছে তীর্থে ? কতকগুলো ভাঙ্গা, জীর্ণ মন্দির। ভিথিরী আর পাণ্ডা বাদ দিলে বাস্তব জীবনের সঙ্গে কোন সম্পর্কই নেই।

: সে জন্মই তো ভালো লাগে।

: বাস্তব জীবনকে এড়িয়ে চলতে ?

: চিত্তরাগ আসে বয়োধর্মের খাতিরে। আজকে যাকে ধরে চলি কালকে তাকে ছাড়তে হয়—জীবনেরই তাগিদে। এই গাড়ীটাই ধর—

গাড়ীটাকে না ধরাই উচিত ছিল...বেথাপ্পা একটা আওয়াজ করে গাড়ীটা ধেমে গেলো।

: ঐ চায়ের দোকানটায় বসুন কাকাবাবু। গাড়ীটা ঠিক করে নিই...বিশেষ কিছু হয়নি...

: কালকের ডাকে কোনো চিঠি এসেছিল ?

: তাইতো! ভুলেই গিয়েছিলুম। আছে আপনার একখানা চিঠি।

: রাস্তার ধারের চা সব সময়ই ভালো লাগে। চা খেতে খেতে মাষ্টার মশায়ের চিঠি খানা পড়ি

“...চিত্তনদী অবিবেকবিষয়নিম্না হলে সংসারের দিকে প্রবাহিত হয়, বিবেকনিম্না হলে কৈবল্যের দিকে প্রবাহিত হয়...‘চিত্তনদী নাম উভয়তোবাহিনী... যা তু কৈবল্যপ্রাগ্ভারা বিবেকবিষয়নিম্না সা কল্যাণবহা...সংসার প্রাগ্ভারা অবিবেক বিষয়নিম্না পাপবহা’।<sup>১</sup> বিবেকনিষ্ঠ চিত্তের প্রাস্তভূমি কৈবল্য— ‘তদা বিবেকনিম্নং কৈবল্যপ্রাগ্ভারং চিত্তম্’।<sup>২</sup> কৈবল্যের পথে বিবেক পরিপাক হেতু ধর্মমেঘ নামক সমাধি দেখা দেয়; সামর্থ্য বিশেষ অর্থে ‘ধর্ম’, কৈবল্যকলবর্ষী অর্থে ‘মেঘ’, একত্রে ধর্মমেঘ। ধর্মমেঘের স্নগীতল ছায়া সেবন করলে পরবৈরাগ্য সিদ্ধ হয়। পরবৈরাগ্য এবং কৈবল্য অবিনাভাবী। সাংখ্য-পাতঞ্জল মতে ইহাই পরম অবস্থা...বৈদান্তিক

আচার্গণ বলেন, পূর্বোক্ত রাস্তায় প্রকৃতি স্মৃষ্ট হয়, নষ্ট হয় না। কিন্তু মুক্তির জন্ত প্রয়োজন প্রকৃতির প্রধ্বংস। প্রকৃতি যদি নিত্যবস্তু হয় (সাংখ্য মতে নিত্যবস্তু) তবে তার প্রধ্বংসসাধন কোনো কালেই সম্ভব নয়; প্রকৃতি যদি অবিঘ্নক হয় তবে জ্ঞান দ্বারা অবিঘ্নার নাশে প্রকৃতিরও নাশ হয়। জ্ঞান মানে ‘অহং ব্রহ্মাস্মি’ এই স্বরূপানুভূতি... স্মৃতির মাহাবাক্য বিচারের উপরই জোর দেওয়া উচিত...তত্বনিশ্চয়ের ফল দেহান্তে মুক্তি, তত্বনিষ্ঠা বা স্থিতপ্রজ্ঞত্বের ফল জীবমুক্তির প্রশান্তবাহিতা বা ধর্মমেঘ। ইহাই বেদান্তাচার্গণের সিদ্ধান্ত। স্মৃতির প্রথমে তত্বনিশ্চয়, পরে তত্বাবগাহিতা—এই হলো পুরুষার্থ।...তবে স্থিতিলাভ বা দৃঢ়ভূমিত্ব দীর্ঘকাল এবং নিরন্তর অভ্যাস দ্বারা সম্পন্ন হয়।’...

আপনার যুক্তি ঠিকই; সাধুরাও বলেন, বিবেকখ্যাতি দ্বারা একজীববাদই দাঁড়ায়...আর একটা দিক আছে; ভগবৎলীলাদর্শনের ক্ষেত্রে বহুজীববাদের সার্থকতা আছে...

কিছুদিন আগে একজন মহাত্মা আমাকে একটি বেদমন্ত্রদ্বারা আশীর্বাদ জানিয়েছিলেন। সেই আশীর্বাদ আপনাকে পাঠাচ্ছি—

তুভ্যম্ উষাসঃ শুচয়ঃ পরাবতি—আপনার অর্চিপথে উদ্ভাসিত হক শুভ্র হতে শুভ্রতর নব নব উষা।”

ইতি—

\*

\*

\*

মিশনে জিনিসপত্র রেখে, মোহন্তজীর সঙ্গে সৌজন্ত সম্ভাষণ সেরে প্রণাম করে ও আশীর্বাদ নিয়ে গাড়ীতে এসে বসেছি। মন্দির দর্শনে যাবো, কিন্তু গাড়ী স্টার্ট কিছুতেই নেয় না। হৃদয়ঙ্গ আর সক্রিয় হবে কিনা ভুবনেশ্বর জানেন। উদয়গিরি-খণ্ডগিরি দেখবার সুবিধা হবে বলেই গাড়ীটাকে যোগাড় করা হয়েছিল...কিন্তু যা অবস্থা দেখছি তাতে কাল পর্যন্ত গাড়ীটি চালু হবে কিনা সন্দেহ...ভালোই হলো। পায়ে হেঁটে না বেড়ালে তীর্থযাত্রা নিফল হয়। মোটর গাড়ী, রেলগাড়ী, এরোপ্লেন ইত্যাদিতে যাতায়াতের কাজটা সম্পন্ন হয় তীব্র বেগে, অস্থির গতিতে;

(১) পাতঙ্গল ১১২৪; সেতু দীর্ঘকাল নিরন্তরধৎকারসেবিতো দৃঢ়ভূমিঃ।

কাজের তাগিদ ও সময়ের অভাব থাকলে এর প্রয়োজনও আছে। কিন্তু তীর্থে এসে আর পাগলামি কেন? আগেকার দিনে বাধ্য হয়েই তীর্থ করতে হতো পদব্রজে। ধীরে আস্তে পথ চললে মনের নিত্যনৈমিত্তিক কুয়াশাটা ধীরে-আস্তে কাটে, এবং চিত্ত অনিমিত্ত রসে নিষিক্ত হওয়ার খানিকটা সময় পায়। বর্তমানকালে দেখি শুধুই বেগের তাড়না, ক্ষ্যাপামিকে এড়াবার জ্ঞান আরও ক্ষ্যাপামি...ঝড়ো হাওয়ার মতো যাতায়াত শেষ করে, মনের যে খোলসটি নিষ্কে বেরুই সেটিকে নিয়েই তীর্থ করে বাড়ী ফিরি। গোগ্রাসে ভক্ষণ ও “ধনক্ষয়ঃ”—পিছনকে আর পিছনে ফেলা সম্ভব হয় না...বিশু গাড়ী নিয়ে লেগে গেছে... একাই চলছি মন্দিরের দিকে। রাস্তা নির্জন...চারদিকে বনানীর শ্রামল স্নিগ্ধতা...হাওয়াতে মাঝে মাঝে ধুলো ওড়ে...হু-চারটে পাখীর ডাক শোনা যায়...স্বস্তির নিঃশ্বাস ফেলি...পুরীর আবহাওয়ায় ব্যস্ততা লেগেই আছে—সমুদ্রের গর্জন, যাত্রীর আনাগোনা, মন্দিরের কোলাহল, হাটবাজার, বেচা-কেনা হই-চই...তবুও নিত্যিকার জগৎ নয়; রেলস্টেশনের মতো—লোক আসে, লোক যায়...সাগর কুলের ঢেউ, অনবরত আসে আবার কোথায় তলিয়ে যায়...যং কিশ জগত্যাং জগৎ...গতির ছন্দ—অনিত্য, শূন্যাদিষ্টিত। পুর্বীর ছবিতে কালের গভীরতা নেই, আছে দেশের পটভূমিকায় গতগতির স্বাপ্নিক মন্দাক্রান্তা—আকাশের গায়ে যেমন মেঘ জমে, মিলিয়ে যায়, আবার ঘনঘটা আবার নীলিমা। ভুবনেশ্বর নিমজ্জিত হয়ে আছে কালের অর্থে জলে... ঝাঁপাশ দিয়ে একটা রাস্তা বাড়ল স্রবের তান ধরে এঁকে বঁেকে কোথায় চলে গেছে... পুরনো একটা মেটে বাড়ী, নূতন চুনকাম হয়েছে—জন্মজন্মান্তরের তীর্থবাস!... সেকলে ঐ আশ্চর্য গাছটির নীচে বিশ্রান্তি ঘুরিয়ে পড়েছে টোড়িরাগের আবেগে... দূরের ভাঙ্গা মন্দিরটি হারানো মেঘমল্লারের স্বপ্নে বিব্রহবিধুর...পাশে একটি পান্থশালা—‘পার উত্তর গয়ে সন্ত জনা’র চিরন্তন সাক্ষী...পথের এই ধুলোতে আছে কতো পূর্বী...ইমন...ছায়ানট...আড়ানা...জয়জয়ন্তী...শঙ্করা...বেহাগ...একটা মঠ; এ-পাশে ও-পাশে এককালে দালান ছিল, এখন ভাঙ্গা ইটের স্তুপ। মেঘের ছায়া পড়েছে মাঠটার উপর—নিত্যকালের ছায়া...ঘুমপাড়ানি গান গেয়ে যায় অচেনা একটা পাখী...আধঘুম আধজাগরণের চেনা অচেনা স্রব হাওয়ার মতো পরশ দিয়ে মিশিয়ে যায়...ভাঙ্গামন্দির...মেটে বাড়ী...অশথ গাছ...ঘুমন্ত মাঠ...পথের ধুলো...পান্থশালা...পাখীর অলস রব...ডুবে আছে সব কালের নিস্তর স্রবসাগার...

ভুবনেশ্বরের মন্দির! অতীতের গ্রায় ধূসর, নির্জন, সমাহিত। মন্দিরগাত্রে  
অতীতের পাষণবদ্ধ কাহিনী...মাহুঘের সুখহুঃখ ও যুদ্ধবিগ্রহ জ্ঞানমৃত্যুর নানা  
ছন্দে গাঁথা... এখানে ওখানে প্ররুঢ় বটশিশুর দৌরাড্যা... কাকের নিঃসঙ্গ রব।  
মহাকালের স্বপ্নমণ্ডিত সুপ্তপুরী...বোঁ বোঁ বোঁ...একটা ভোমরা সানাইর একটানা  
সুর বাজিয়ে চলছে...বোঁ বোঁ বোঁ...সিঁড়ি ভেঙ্গে চলছি...বোঁ বোঁ বোঁ।  
...অথৈ সমুদ্র...

\*

\*

\*

: কি বলছেন?

: বোঁ...বোঁ...বোঁ

: এঁয়া?

: বোঁ...বোঁ...বোঁ

: হুঁ—

: কানে কম শোনে নাকি মশায়? দেয়াশলাই আছে তো দিন; হুঁ করে—

: নেই তো দেয়াশলাই!

: রসিকতা হচ্ছিল? লোকটা...তাইতো! ঐয়ে এক ভদ্রলোক সিগারেট  
খাচ্ছেন; দেখি—

\*

\*

\*

...বাজার থেকে তেল কিনে, ভালো করে গা-হাত-পায় তেল মেখে স্নান করলুম।  
কানে তালা লেগে গেছে...ভোমরাটা হঠাৎ থেমে গেলো আর রূপ করে পড়ে  
গেলুম...ছোটনাগপুরের আদিবাসীদের গানে এজাতীয় অবরোহণ আছে...সুরটা  
খুব উচুতে চড়িয়ে আদিম যুগে নিয়ে যায়, তারপর আচমকা ছেড়ে দেয় খাদে...  
কানে তেল দিয়ে খুব নাইলুম। প্রাণটা বেঁচে গেলো। পুরীতে তো স্নান নয়,  
লড়াই; আর নাকে, কানে, মুখে নুন ও বালি। এখানে আরাম করে, সাঁতার  
কেটে, নিশ্চিন্তে ডুব দিয়ে, স্নান সেরে স্বস্তির নিঃশ্বাস ফেলে মিশনে যখন ফিরলুম  
তখন বেলা প্রায় ছোটো। মিহি চালের ভাত, ঘি, ভাজা, সোনা মূগের ডাল,  
চিংড়িমাছ, আলুপটলের ডালনা, দই, আম, পায়স...সাধুরা খান ভালো।  
বিবেকানন্দ স্বামী এক গুরুভাইকে উপদেশ দিয়েছিলেন, “তুই সাধন ভজন কী

করবি ? না খেয়ে না খেয়ে তো মগজটা শুকিয়ে গেছে ! রোজ ছু বেলা মাংস খাবি, আর পারিস তো রুই মাছের মাথা । মগজটার আগে পোষ্টাই হক, তারপর ধ্যান ধারণা করবি ।”

## ॥ ৪ ॥

আহারের পর একটু গড়াগড়ি না দিয়ে আর পারি না আজ কাল ; বিশেষতঃ গুরুভোজনের পর । বারান্দায় শুয়ে শুয়ে মেঘ দেখছি । মন্দ মধুর হাওয়া-টুকুও নেই, শুধু মলিন ধূসর মেঘ আর গুমট ভাব ; গাড়ীটা না আনলেই হতো...সর্বক্ষণ ওটার পিছনেই লেগে আছে বিগু...কিছু সুরাহা হবে বলে মনে হচ্ছে না...দেয়াশলাই দিতে পারলুম না, ভদ্রলোক বেশ চটেছেন...কী আর করা...মেঘের ফাঁকে ফাঁকে অসীম নীল, অপার সমুদ্র...ঐ মেঘটুকুতো বেশ দেখাচ্ছে । যেন একটি দ্রাক্ষা স্তবক...পেশোয়ারীদের দোকানে আগে আঙ্গুর পাওয়া যেতো ছোট্ট কাঠের বাস্কে—ভিতরে তুলো, তার ভিতরে নরম, মিষ্টি, গরম আঙ্গুর...মাষ্টার মশায়ের মতো...বড্ড নরম...আঙ্গুর নয় অমৃত ফল...জগন্নাথ দেবের মন্দিরের মতো মাঝখানের ঐ মেঘটি...দার্জিলিং-এর মেঘ-বৃষ্টি, আলো-ছায়া, পর্বতের অস্তহীন বিস্তার প্রাণে জাগায় পথ চলার আদিম সুর...পুরীর আকাশ, মেঘ, যাত্রী, সমুদ্র, মন্দিরের বিপুল কম্পান্ব—সব কিছুতে বাজে দরবারী কানাড়ার আবেদন : ‘অন্ত দেত সুখধামকে’।...পুরী ও ভুবনেশ্বর ! পার্থক্য আছে—বিষ্ণু ও শিবের পরিকল্পনায় যে পার্থক্য । পুরীতে জগন্নাথদেবের রাজ-ঐশ্বর্য, রাজকীয় সাজসজ্জা, যাত্রীদের অবিশ্রান্ত গতি, কীর্তনের উদ্বেলতা, সমুদ্রের তাল দিয়ে চলা । শিব যোগীশ্বর, সর্বভাগী, ধ্যানমগ্ন, প্রশান্ত । পুরীতে আকাশের অসীমতা, ভুবনেশ্বরে কালের অতলতা । আকাশের অসীমতা বুঝি এই জগ্ন যে আকাশে, সমুদ্রে তার ব্যক্ত রূপায়ণ দেখি । কালের আনন্ত্য স্মৃতিস্মৃতি—ব্যক্ত রূপায়ণ নেই, পারিপার্শ্বিক অবস্থার অল্পকূল রেশ ধরে এগলে চেতনায় একটা অব্যক্ত সাড়া জাগে...অশব্দম্ অম্পর্শম্...উপশাস্তি...

মেঘ ? না, জগন্নাথদেবের মন্দির ! আলোতে ঝক ঝক করছে ! বিরাট জগৎ-জোড়া মন্দির ! কী ভিড় ! রথযাত্রা ! রাজ্যের লোক এসে জড় হয়েছ ;...গাড়ী, ঘোড়া, সিপাই, লস্কর, হাতী, চামর,...ঢাক ঢোল...ভেঁপু...জগন্নাথ...খোল করতাল...কেটলা খোল বাজিয়ে কীর্তন করছে ‘বাদের হরি বলতে নয়ন

ঝরে তারা ছুভাই এসেছে রে'...ভিড়ের মাঝখানটায় ভজন চলেছে 'রঘুপতি-  
রাঘব রাজা রাম'...মহাত্মাজী !...নিত্যকালীও এসেছে—রাক্ষেইয়লের মাতৃমূর্তি  
...চোখে অসীম করুণা ; কোলে পরমতৃপ্তিতে ঘুমিয়ে আছে ছেলেটি...জগাদা.  
হুইসল্ দিচ্ছে...ফাউল শট...এই ভিড়ে কি খেলা যাবে ?

: এই যে মণিদা !

: বসো। Prometheus Unbound-এর একটু বাকী আছে—

To suffer woes which Hope thinks infinite ;  
To forgive wrongs darker than death or night ;  
To love, and bear : to hope till Hope creates  
From its own wreck the thing it contemplates.

: দয়ালদা নৌকো নিয়ে এসে গেছেন। চলুন...আজকে মল্লার, মণিদা...

: যে গরজে গগন মে' ঘোর বাদল ঘিরি আয়ে। মেহা কী ঝরিয়া' লাগী রিমঝিম  
ধন মঁহি, চপলা চমকায় ॥

...এবারকার বর্ষায় কী জলই না হয়েছে...বাড়ীগুলো সব জলে ভাসছে...  
ভোলাদা ডালে বসে পা ঝুলিয়ে গাইছে 'পাখী ঐ যে গাহিল গাছে'...গাছগুলোর  
আজ কী তৃপ্তি...জলে ডুব দিয়ে আরামে ঘুমচ্ছে...সেরেছে!...ভোলাদা জলে  
ডাইড্ করলো...গেল কাপড়-চোপড় ভিজে...শীত শীত করছে...জেগে  
গেলুম। বৃষ্টির ছাট আসছে। পায়ের দিকটা ভিজেছে। বিছানা গুটিয়ে  
উঠে পড়ি।

## ॥ ৫ ॥

মেঘ অনেকটা কেটেছে। আকাশে এক ফালি চাঁদ; তারাও উঠেছে...অন্ধকার  
নেই; আছে আলোর আভাস...একাকার হয়ে আছে সব কিছু...নেশার  
আমেজে কায়াহীন জগৎকে দেখার মতো...স্বপ্নালোকের ছোপ লাগিয়ে নিজেকে  
ভুলে গেছে জগৎ, গালে হাত দিয়ে ভাবছে—কী ভাবছে, কবে থেকে ভাবছে,  
তা মনে নেই...

: ঘুমলেন নাকি কাকাবাবু ?

: না তো। ঘুম আসছে কৈ ? তোমার বোধ হয় গাড়ীর চিন্তায়—

: হ্যাঁ, তাই বটে। কাল সকালে আর একবার চেষ্টা করে দেখবো।

: হেঁটেই যাবো। কতটুকু আর রাস্তা ?

: গাড়ীটা—

: না আনলেই পারতে।

: আপনার একটা দিন দেরি হয়ে গেলো, না ?

: কিসের দেরি ? আমার তো এখন অফুরন্ত সময়।

: পেনশনের পর একটা চাকরি নাকি পেয়েছিলেন ?

: হুঁ।

: গেলেন না কেন ?

: আর ভালো লাগে না।

: অনেকেই তো আবার চাকরি নিচ্ছে ?

: তাদের ভালো লাগে।

: আপনার লাগে না কেন ? শরীর তো ঠিকই আছে।

: শুধু জল।

: জল মানে ?

: রাজহাঁস যেমন ছুধের সারটুকু খেয়ে জলটুকু রেখে দেয়, রাজকলও তেমনি চাকরেদের সারটুকু শুষে নিয়ে জলটুকু পেনশন দিয়ে ফেলে দেয়।

: আজকাল তো রাজসরকারের চাকরেরাই শাসটুকু খেয়ে, খোসাটুকু ফেলে দেয় পাবলিকের মুখ বন্ধ করবার উদ্দেশে।

: শুনি। তবে আবহাওয়া বদলে গেছে ঠিকই। এককালে ভাবতুম কর্মই ঈশ্বরসেবা। যথাশক্তি নিষ্ঠার সঙ্গে কাজ করেছি; আনন্দও পেয়েছি। এখন নিষ্ঠাই অপরাধ। যা কিছু গুণ বলে জানতুম তা এখন দোষ; এবং যেগুলোকে দোষ ভেবে চিরদিন বর্জন করে এসেছি সেগুলোই গুণ। নিজেকে আর খাপ খাওয়াতে পারছিলুম না, কেবলই মনে হতো মলম ভূতের বেগার খেটে। আনন্দ না থাকলে কি কাজ করা যায় ?

: সময় কাটান কি ভাবে ?

: একভাবে কেটেই যায়।

: তবুও।

: হৈমন্তিক মেঘাবরণে

.....when his wings

He furlleth close contented so to look

On mists in idleness.



: কীটস্ ( Keats )-এর না? পড়েছিলুম ইন্টারমিডিয়েট এ।

: হুঁ। কীটস্-এরই।

: কিন্তু বুঝলুম না ঠিক।

: হেমন্ত আনুক। সংসারী হও, জীবনকে দেখো, সুখদুঃখের সঙ্গে পরিচয় হক...তারপর Grow old along with me...এখনো অনেক দেরি।

: Looking before and after—কল্পনায় আসে তো! একটু বুঝিয়ে বলুন।

: বুঝানো শক্ত...একটি দৃষ্টান্ত দিচ্ছি। জর্জ সান্তায়ন (George Santayana)-এর নাম শুনেছ তো?

: শুধু নামই শুনেছি। দার্শনিক ছিলেন না?

: হুঁ। হার্ভার্ড বিশ্ববিদ্যালয়ে দর্শন পড়াতেন। অবসর গ্রহণের পর আমেরিকা ছেড়ে ইউরোপে আসেন—মনের দিক থেকেও এক রাজার রাজ্য ছেড়ে আর এক রাজার রাজ্যে। মননের বিহারভূমিতে সঙ্গী ছিলেন সোক্রেতেস, প্লাতো, আরিস্তোফল্, দীমক্লিডস্, লুক্রেসিয়স্.. অথেন্স্ গিয়ে হতাশ হয়ে ফিরে এলেন...পুরনো স্মরণগুলো সব স্তব্ধ হয়ে গেছে সেখানে, অতীতের মুর্ছনা আর জাগে না—যেমন ভুবনেশ্বরের দশা হবে অদূর ভবিষ্যতে। রোম দেখে ইঁপ ছেড়ে বাঁচলেন, রোমের ধ্বংসাবশেষে নিজের স্বপ্নকে খুঁজে পেলেন। বাকী জীবনটা রোমের একটি হোটেলে কাটিয়ে দিলেন। বন্ধুরা বলতেন, বাড়ী করে ফেলো; উত্তর দিতেন, “সম্পদ মাত্রই বন্ধন।”...সোক্রেতেসের প্রিয় দেবতা ছিলেন এস্কলাপিয়স ( Esculapius ); এই আরোগ্য দেবতার ভাস্ক্য মন্দিরের নিকট একটি বেঞ্চি আছে। সান্তায়ন অনেক সময় এই বেঞ্চিতে বসে অতীতের মানস রাজ্যে বিচরণ করতেন, ঘণ্টার পর ঘণ্টা কাটিয়ে দিতেন “to dream with one eye open, to be detached from the world without being hostile to it ; to welcome fugitive beauties and pity fugitive sufferings, without forgetting for a moment how fugitive they are”...অসঙ্গ হয়ে দ্রষ্টাভাবে জীবনের বোধধন পটভূমিকায় অনিত্য সুখদুঃখের রোমন্থন...অনুভূতির গুঢ় সংবেদনটুকু জানিয়েছেন একটি কবিতায়—

Heaven it is to be at peace with things...

নির্ঘর্ষতাই পরম শান্তি...

## ॥ ৬ ॥

সকাল বেলা চেষ্টা চরিত্র অনেক করা হল, কিন্তু গাড়ী অচল, অটল। বিষ্ণু অক্লান্তকর্মী, ধৈর্যও অসীম—গাড়ীর হাল সম্বন্ধে আমাকে ওয়াকিবহাল করবার অশেষ চেষ্টা করে যাচ্ছে। এক আধবার হুঁ হাঁ হয়তো করে থাকবো, কিন্তু কিছুই বুঝিনি। মোটর গাড়ী সম্বন্ধে আমি নেহাৎ-ই আনাড়ী... মনটাও গরুর গাড়ীর মোহ কাটিয়ে উঠতে পারে নি; কাজেই বিষ্ণু যখন বললো ‘সাইকেলে যেতে হবে’ তখন একটু হতাশ হয়েছিলুম; আবার সাইকেল! একটাতে দু-জনা চেপে! চালাবে অবশ্য বিষ্ণু, কিন্তু কেয়িয়ারটায় বসে যাওয়া কি তেমন সুখের হবে! যাক গে। বেলা তিনটে নাগাদ বেরিয়ে পড়লুম...চমৎকার রাস্তা...কখনো সোজা, কখনো এঁকে বেঁকে... মাঝে মাঝে ঈষৎ চড়াই-উৎরাই...দুপাশে বন...কেয়িয়ারটায় বসে একটু জ্বুথবু, নইলে আরামেই যাচ্ছিলুম; উদয়গিরি-খণ্ডগিরির মাথা যখন দেখা যাচ্ছিল তখন ভাবছিলুম নেবে পড়ি...নেবেওছি—বিষ্ণু গলদঘর্ম; তাগিদ দিয়ে জিরিয়ে নিতে বলি...এই ভাবে অনেকটা এসেছি, তারপর একটা চড়াই উঠতে গিয়ে টিউবটা গেল ফেটে। আপদ: শাস্তি:। বিষ্ণু চললো সাইকেল ঠেলে...আমি হাঁফ ছেড়ে বাঁচলুম...হাত পা টান করে স্বাধীন স্বচ্ছন্দ গতিতে নিজের খুশিমতো চলি...আকাশ আজ গভীর নীল...দুদিকে বন নিঝুম, নিস্তব্ধ...গাছগুলো ভূতের মতো দাঁড়িয়ে, যেন জলে ডুব দিয়ে আনন্দে আত্মহারা...আলোতে পাতাগুলোর কী অস্বাভাবিক উজ্জ্বলতা...গাছের ফাঁকে ফাঁকে আঁধারের গভীর স্তম্ভি—স্তম্ভির স্তম্ভঘন কালিন্দী...গাছ, পাতা, আঁধার, আলো, সব যেন পাথরে খোদানো...প্রতি শিরা উপশিরা তৃপ্তিরসে পরিপূর্ণ... ময়ূরের কেকা রবে বনানী পাশ ফিরে ঘুমিয়ে পড়ে...গভীর একটানা ঝিল্লিরব হঠাৎ স্তব্ধ হয়ে ডুব দেয় গভীরতর বিজ্ঞনতায়...দূরে একটা কুকুর ডেকে ওঠে—অদ্ভুত শূন্যগর্ভ কায়াহীন রব...চিপ্ করে কি একটা পড়লো বনের ভিতর...স্তব্ধ সমুদ্রের বুকে একটি বৃত্ত—দেশ ও কালে নিজেকে ছড়িয়ে দিচ্ছে...মিলিয়ে গেলো স্তব্ধতার অসীমতায়...এক ঝাঁক সাদা ফুল—কতো যুগ ধরে তাকিয়ে আছে অস্ত্রহীন আকাশের দিকে...ভাঙ্ক! কী গভীর নির্ধোষ!...নিঝুমতার প্রাণের গভীর স্পন্দন...

\*

\*

\*

উদয়গিরির পাদদেশে প্রণাম করি। সাইকেলটা মন্দিররক্ষকের জিম্মায় রেখে একটি বাচ্চা গাইড নিয়ে পাহাড়ে উঠি.. ছেলেটি রাস্তা দেখিয়ে গুন্ডাগুলোর

নাম বলে যাচ্ছে...নামরূপের প্রাস্তভূমি এই রাজ্য ; এখানে নাম ছায়া মাত্র, রূপ অরূপে লীন...ইতিহাস জন্মায় নি বা মরে গেছে...Reality has no historyর গোচরভূমি...প্রতিগ্ধায় তপস্তার শ্রী, ধ্যানের গান্ধীধ, অতীতের মৌনব্যাখ্যা...পর্বতগুহা পর্বতেরই মতো চিরন্তন প্রশান্তিতে বিরাজমান...সূর্যগুম্ফার কী অপূর্ব পরিকল্পনা! পূব গগনের দিগন্ত প্রসার, মাঠের শেষে দিক্চক্রবালের শাস্বত আহ্বান; পাহাড়ের উপর ছোট ছোট ঝোপ; ঝোপে ঝোপে যোগাসনের কালো পাথর...গুহাবাসীদের যোগনিদ্রা এখনো সবাইকে ঘুম পাড়িয়ে রেখেছে...উদয়গিরির পাহাড়ই একটি মন্দির...পাহাড়ের শান্ত গান্ধীধে ও পরিবেশের বিজন নিবিড়তায় শিল্পী পেয়েছিলেন মহাশূত্রের সংবেদন; কাজেই স্মৃটুকু ধরিয়ে দেওয়ার জন্ত কতকগুলো গুহা কেটেই তিনি নিরস্ত হয়েছেন...শূণ্যতার অপূর্ব দ্যোতনা...প্রজ্ঞাপারমিতের গুঢ় ভাব-সংক্রমণ...

: উঠুন কাকা বাবু! বেলা আর বেশী নেই; খণ্ডগিরি এখনো বাকী রয়েছে—ঘুরে ঘুরে যেতে হবে।

: ধীরে আস্তে—

: উহঁ। সন্ধ্যার পর এদিকে ভয় আছে।

: কিসের ভয়?

: বন্য জন্তুর। অন্ধকার হলেই জানোয়ার বেরোয়।

: তবে চল...

...ঘুরে ঘুরে মন্দিরের দিকে উঠছি। উদয়গিরি বৌদ্ধদের আস্তানা ছিল। খণ্ডগিরি জৈনদের—নানারূপ কুচ্ছসাদন নাকি এখানে হতো...পরমার্থ লাভের জন্ত ভারতে কী অক্লান্ত চেষ্টাই না হয়েছে...কতো প্রক্রিয়া, কুচ্ছসাদন, তপস্তা, ধ্যান-ধারণা, সমাধি, ব্রহ্ম-চর্চা...দিনের আলো নিবে আসছে...জ্ঞানপ্রাণী কোথাও নেই...ঝিল্লির বিজনরাগিনী সুরু হয়েছে...পিছনের বনভূমিতে কি-একটা আওয়াজ হলো...অনুত্তর ভূমির স্পন্দন জাগে সর্বত্র...বনানীর নিবিড় আবেষ্টনে, বিজনতার ঘন আবরণ গায়ে টেনে, পাহাড়ের শীর্ষদেশে, আকাশের দিকে মাথা উঁচু করে, খণ্ডগিরির মন্দির গভীর ধ্যানে মগ্ন...মন্দিরের পাদদেশে উপবেশন করে মনে হয় জগতের শেষ প্রান্তে এসে পৌঁছেছি...লোকালয়ের ক্ষীণতম ডেউটিও এখানে শোনা যায় না...উপরে অনন্ত আকাশ...আকাশে দিনান্তের ঘুমিয়ে পড়া আলো...পিছনে গভীর বন...চতুর্দিক প্রশান্তবাহিতায় আচ্ছন্ন...আকাশ থেকে কুয়াশা নেবে আসে, কুয়াশার প্রতি অনু-পরমাণু হতে ক্ষরিত হয় গভীর শান্তি...

## Aeons of sleep

## The unfathomable deep.

...শান্তির অপার সমুদ্র...কোটর পেঁচা ডেকে ওঠে...জাগরণের কী এক জ্যোতির্ময়  
দ্যোতনা...শান্তির নিখুঁততাও ডুবে যায় কোন অতলে...সাক্ষাদ্ অপরোক্ষাদ্ ব্রহ্ম...

\* \* \*

...একাত্মপ্রত্যয়সারং প্রপঞ্চোপশমং শান্তং শিবম্ অদ্বৈতম্...

\* \* \*

...তৎপদং দর্শিতং যেন তস্মৈ শ্রীগুরবে নমঃ...

॥ ৭ ॥

একটা ট্রাকের পিছনে বিকল গাড়ীটাকে বেঁধে বিত্ত পুরী চলে গেছে। আমি এসেছি চিন্তা। ক'দিন ঘোরাঘুরিতে ক্লান্ত হয়েছি। চিন্তা দেখলুম ঘুমঘোরে... শূণ্ণগর্ভ হাওয়ায় তৈরী ভাসা-ভাসা একটা জগৎ হাওয়ার মতো স্পর্শ করে... হাওয়ার মতো উড়ে যায়...ছেড়ে-আসা, ভুলে-যাওয়া সেই কবেকার পাঙ্খশালা... সেই কবে একদিন পরিচয় হয়েছিল। এখনো আছে নাকি! শুকনো পাতার ঘর, হাওয়া এলেই উড়ে যাবে হাওয়ার সঙ্গে...কালীঘাটে একজন সাধুর কাছে মাঝে মাঝে যেতুম; তিনি প্রায়ই বলতেন, “কিসেরই বা এতো, এতোই বা কিসের!...সব তো ফক্কিকার...ফুঁ...ঐতো উড়ে গেলো”...ট্রেনের অপেক্ষায় স্টেশনের এক কোণে একটা বেঞ্চিতে বসে সাধুজীর কথা ভাবছি—কিসেরই বা এতো, এতোই বা কিসের...বেলা তিনটে হবে, গাড়ী সেই সন্ধ্যায়...শ্রান্ত দেহ, ঝিমিয়ে পড়া মন...এবারে ঘুমিয়ে পড়লেই হয়...তীর্থ তো হলো অনেক... বৃন্দাবন? আর একবার যাওয়ার ইচ্ছা ছিল। অনেকদিন আগে গিয়েছিলুম মাকে নিয়ে...শ্রামকুণ্ড, রাধাকুণ্ড, গিরি গোবর্ধন...কিন্তু বাঁশরি বাজে নি যমুনায়...সেবা কুঞ্জ, নিধুবন, কেশীঘাট, গোবিন্দজীর মন্দির, যমুনা তট—সর্বত্র বিরহের স্মরণ...কাঁই মেয়া বৃন্দাবন, কাঁই যশোদা মার্জ...কাঁই যমুনা তট, কাঁই বংশীবট, কাঁই মোহন মুরলী, কাঁই বলাই...পটদীপ রাগিণীর চাপা কান্না— ‘পিয়া পরদেশ’...প্রিয়ের জগৎ ‘নিসিদিন বরসত নৈন হমারে’...আকাশে বাতাসে মীরাবাদীর আকুল প্রার্থনা—

বারবার মৈ অরজ করুঁ ছুঁ রৈগ গদৈ দিন জায়।

মীরা কহৈ হরি তুম মিলিয়ঁ। বিন তরস তরস তন জায় ॥

যমুনার তীরে বুকফাটা কান্না এসেছিল... গুন্‌গুন্‌ স্তরে ব্যথা জানিয়েছিলুম—

যমুনে, এই কি তুমি সেই যমুনা প্রবাহিণী ।

ও যার বিমলতটে রূপের হাটে বিকাত নীলকান্তমণি ॥

অঙ্কের মতো খুঁজেছি, সুরদাসজীর মতো ‘নিসিদিন বরসত নৈন হমারে’...মণিদার মার ছবিটি মনে হতো...কৈঁদে কৈঁদে অঙ্ক হয়ে গিয়েছিলেন...মণিদার গানের জীবন্ত রূপ...

গোষ্ঠে হতে আওয়ল নন্দহুলাল ;

যশোমতী ধাওয়ল ;

( তাঁর ) ঝরঝর দুটি আঁখি ;

বিরাম নাই, বিরাম নাই ।

দেখা করতে গেলে কাকীমা হু-হাতে আমাদের গায়ে মাথায় হাত বুলিয়ে আশীর্বাদ করতেন, “তোমরা ছিলে মণির আপন জন ; তোমরা কাছে এলে মনে হয় আমার মণি এসেছে...” পাকিস্তান হওয়ার পর কিছুতেই ঘর ছেড়ে আসবেন না—“কি নিয়ে থাকবো আমি ? মণি নেই, তবুও মনে হয় ও এখানে আছে ; এজায়গা ছাড়লে আর আমি বাঁচবো না ।”...কলকাতা এসেই মারা গেলেন...বৃন্দাবনে এই সুরই মনকে আচ্ছন্ন করে ছিল—“পিব চুঁচুণ বন বন গঙ্গ, কহঁ মুরলী ধুনি পাই’...মুরলী বাজে নি...গোষ্ঠ হতে কান্না ফেরে নি...ঝরঝর দুটি আঁখি... বিরাম নাই বিরাম নাই...বৃন্দাবন ছেড়ে গাড়ীতে মুহম্মান হয়ে বসেছিলুম— সাশ্র, বিরহবিধুর...বরসৈ বদরিয়া সাবনকী, সাবনকী মনভাবনকী...বৃন্দাবনে কি যেন খুঁজেছি, পাই নি...কিন্তু ছেড়ে আসতেও পরান পোড়নি ছিল...কি খুঁজছিলুম ?...স্মৃতিবিজড়িত এক অতীত যুগ, বিশ্বরণের আঁধারে ঢাকা...কি যেন মনে পড়ে, আবার ভুলে যাই...আবার খুঁজি—বরসৈ বদরিয়া সাবনকী... কিন্তু কল্লনার বৃন্দাবন ছিল অনুরূপ—যেখানে সব কান্না থেমে গেছে, সব চাওয়া শেষ হয়ে গেছে, পরম প্রিয়ের নন্দনকানন, অমৃতের অমর পুরী...সুন্দর... নিরঞ্জন.....প্রেমঘন...যাত্রার শেষ এই বৃন্দাবনের খোঁজে আর একবার বৃন্দাবন যাওয়ার সংকল্প ছিল—অনেক দিন থেকেই...স্টেশনে বসে আজকে মনে হচ্ছে—

: Hallo ! Just fancy meeting you here !

আচমকা সাহেব দেখলে এখনো আঁৎকে উঠি...অনেক দিনের সংস্কার ! কোট, প্যান্ট, নেকটাই, স্কেট শাট, সান্-গ্লাস, স্টীক, ও বর্মা চুরুট ; লাল টকটকে রং ;

ইংরেজী ভাষায় সম্ভাবণ। কিন্তু—চেনাচেনা, দিশি সাহেব! কে! ই! করে তাকিয়ে আছি।

: কিরে? চিনতে পারলি না?

: মাণিক?

: তবু যা হক। আমি ভাবলুম তোরও টাকা হলো নাকি!

: চেনা শব্দ। যা মোটা হয়েছিল। আর ভোলটার তো আমূল পরিবর্তন, মানে sea-change। চেনবার যে নিশানাটুকু ছিল সেই দাড়িকেও বেমালুম সাফ করে দিয়েছিল।

: হঁ। তা বটে। এখানে বসে কি করছিস?

: অবসরের পর তীর্থভ্রমণ ও পুণ্যসঞ্চয়।

: আছিস ভালো। রুক্ষ কেশ, মলিন বেশ, গোবেচারা—যেমনটি ছিলি...সেই কবে তোর সঙ্গে দেখা!...দক্ষিণেশ্বরে—না?

: হঁ। সেখান থেকে অনেকদূর এগিয়েছিল। তখন ছিল খন্দর ও ‘টাকা হি পরমং তপঃ’। এখন মনে হচ্ছে তপস্শ্রা সার্থক হয়েছে...খন্দর গেছে, টাকা এসেছে।

: খন্দর যায় নি—ওর দৌলতেই তো টাকা; অটেল টাকা; টাকা, বাড়ী, গাড়ী...

: সাধনার প্রক্রিয়াটি কি?

: Here's my card—পড়ে দেখ।

: Manik Varma...Govt. Builder & Contractor ..

: বিল্ডার এ্যাণ্ড কনট্রাক্টর—বুঝলি তো? Covereth a multitude of sins—বাইবেলের কথা।

: তা তো বুঝলুম, কিন্তু নামটা—

: আমরা আসলে দাসবর্মী; বাংলা দেশে আসবার পর ‘বর্মী’ টুকু ছেঁটে দেওয়া হয়েছে, আজাদির পর ‘দাস’টুকু ছেঁটে বর্মীয় ফিরে এসেছি; বড় ভালো উপাধি—হিন্দুর কাছে লাউ, মুসলমানের কাছে কহু; ধরা ছোঁয়াটি নেই।

: মদ ধরেছিল?

: মদ তো অতি তুচ্ছ জিনিস রে। আজাদির পর কতো কিছু ধরতে হয়েছে... তবে তপস্শ্রার অঙ্গ হিসাবে; নইলে কি টাকা হয়? হরিবাসরের দিন আর নেই রে দেবু...আচ্ছা, ক্ষেপু কেমন আছে রে? অনেকদিন দেখা সাক্ষাৎ নেই।

: ক্ষেপু...সুবিধেয় নয়। ওর শালকচন্দ্র পাকিস্তান থেকে একবস্ত্রে পালিয়ে আসেন, সঙ্গে কাচ্চাবাচ্চা ; কাকারা বেশ বড় লোক, কেউ জায়গা দেন নি ; একদিন সন্ধ্যার সময় বাচ্চাগুলোকে বিড়ালছানার মতো ক্ষেপুব বাসায় পার করে পিটান। কর্তাদের কাছে ধরা দিয়ে ক্ষেপু বাচ্চাগুলোব জন্তু একটা সরকারী ব্যবস্থা করে দিয়েছে।

: তবে তো লেঠা চুকেই গেছে।

: অদৃষ্টচক্র এক চাকায় চললে লেঠা চুকে হয়তো বা যেতো—there are wheels within wheels...শালক মশায় ছিলেন এক আত্মীয়ের বাড়ী ; কিছুদিন পর তাঁরা বিদেয় করে দিলেন...হাওড়া স্টেশনে অন্তঃসত্ত্বা স্ত্রীকে ফেলে রেখে তিনি আবার উধাও। পুলিশের হেপাজতে ছিলেন শালক-পত্নী। খবর পেয়ে ক্ষেপু গিয়ে নিয়ে এসেছে।...শালকটিরও একটি চাকরি যোগাড় করে দিয়েছিল—

: তারপর আবার পালালো ? Vanishing trick ?

: তাই বটে ; এবার জন্মের মতো।

: তবু ভালো।

: ভালো মানে ?

: পাচক ঠাকুরের পরচটা বেঁচে গেলো। ক্ষেপু তো কামায় বেশ ; ভালো উপুরি আছে ; দু পয়সা করেছে নাকি গুনি।

: যা কিছু কামিয়েছিল গুরুসেবাতেই খতম করেছে।

: এখন গুছিয়ে নিক।

: সে গুড়ে বালি।

: কেন ? গুরুদেব তো এখন বৈকুণ্ঠে ? বদখেয়াল—

: তা নয়। চাকরিটি খুঁয়েছে।

: খুঁয়েছে মানে ?

: উপুরির খেসারত।

: তুই হাসালি ! ঘুষের দায়ে চাকরি গেলো ! সত্যিই হাসালি তুই। ঘুষের দায়ে আবার চাকরি যায় নাকি ? বোকা ! বোকা !... গুরুর কাছে কিছুই শিখতে পারে নি—

: গুরু আর কি করতেন ?

: কি করতেন ! মুশকিল-আসানের মন্ত্র আছে, জানিস ? মন্ত্রটি শিখিয়ে দেওয়া

উচিত ছিল না ? ফেপুটা এক নম্বরের গাথা...যোগ করা চাই রে দাদা, যোগ করা চাই ।

: তুই যোগ করিস নাকি ?

: নইলে টাকা হয় ?

: যোগ মানে—

: যোগ: কর্মশূকোশলম্—ভগবান্ শ্রীকৃষ্ণের বাক্য। কাজ তো যেদো মেথো সকলেই করে। কোশলটি জানা চাই। কোশল জানা হচ্ছে যোগ ; আর না জানা হচ্ছে বিয়োগ—যেমন ফেপুর হয়েছে ।

: আপিসের কাজে তো ফেপু কুশলই ছিল ।

: দেবলচন্দ্রও দেখছি হাদারাম । ওটা কি কোশল হলো ? দদাতি প্রতিগৃহ্যতি গুহামাখ্যাতি পুচ্ছতি—এই হচ্ছে সিক্রেট অব সাকসেস্ (secret of success) । টাকা ঢালো, টাকা আসবে ; গুহ্য কথা বলো, গুহ্যটিগুহ্য টিপ (tip) পেয়ে যাবে । ঘূষের দায়ে চাকরি যায় !...হাসালি তুই ।

: কি বাজে বকছিস ? ধরা পড়লে চাকরি যাবে না ?

: ধরা পড়বে কেন রে, আহাস্মক ? যার যা প্রাপ্য তা যদি না দিয়েছো, তবেই মরেছো । আমাকে কেউ ধরে না কেন ? সবাইর মুখ বন্ধ করে রেখেছি বলে । আসল কথা কি জানিস ?

: বলুন গুরুদেব ।

: সমে সমে : Similia similibus—মহাত্মা হানেনমান-এর অমোঘ মন্ত্র । যেমনি দেবতা, তেমনি নৈবিত্তি । নৈবিত্তির একটু এদিক-ওদিক করেছো কি ডুবেছো । ফেপুটা ঠিক ও-ভাবে ডুবেছে—হয় নৈবিত্তি দেয় নি, নয় তো সন্দেশের জায়গায় এলাচদানা দিয়ে কাজ গুছতে চেয়েছিল । যথাযোগ্য নৈবিত্তি পেলে তুষ্ট হন না এমনি দেবতাভূ-ভারতে আছে নাকি ? আজ পর্যন্ত চোখে পড়ে নি । বোকা ! বোকা !

: ফেপু নিজেকে চালাক বলেই মনে করে ।

: মারাত্মক ভুল । নিজেকে ঘুঘু মনে করতে দোষ নেই, কিন্তু যাকে বাগে আনতে চাও ধরে নিতে হবে সে ফাঁদ । নইলে তুমিই ফাঁদে পড়বে...ফেপু খুব দমে গেলছে বুঝি ?

: দমবার ছেলে তো ও কোন কালেই নয় । আসলে ওর বিরুদ্ধে একটা ষড়যন্ত্র ছিল । কুচক্রীদের ‘হাইকোর্ট’ দেখিয়ে পুনর্বহালের চিঠি নিয়ে আপিসে গিয়েছিল । কিন্তু চাকরি আর করে নি ।



ঃ কেন ?

ঃ বান্ধালে গৌ। নিয়োগপত্রটি টুকরো-টুকরো করে বড় কত্তার সামনে ছুঁড়ে ফেলে বলে এসেছে—রইল মশায় আপনার চাকরি—চললুম বদারিকাশ্রম।

ঃ সাধুবাবা হলো নাকি ?

ঃ ওর পক্ষে অসম্ভব কিছুই নয় ; তবে সম্প্রতি তীর্থদর্শন।

ঃ পরে ?

ঃ হয়তো সংসারধর্ম ; ভাল একটা ‘অফার’ পেয়েছে উইলিয়ামসন (Williamson) থেকে।

ঃ তবু ভাল। তবে ওকে আর কি দোষ দেব ? আমিই কি কম ‘বান্ধাল’ ছিলাম, মানে কম বোকা ?

ঃ বোকা ?

ঃ মনে নেই তোর ? কমিশনারের মেমসাহেব টমটম হাঁকিয়ে যাচ্ছিল ; ঘোড়াটা ভয় খেয়ে ছুট দেয়, রাস্তার লোক দুদিকে পালায় ; থপ করে ধরে ফেললুম ঘোড়াটাকে...কমিশনার সাহেব চাকরি দেওয়ার জ্ঞাত বুলোবুলি। আমার এক উত্তর—গোলামি করবো না। খদ্দর পরি...দেশের কাজ করি, জেলে যাই...ঘরের খেয়ে বনের মোষ তাড়ানো যাকে বলে...জেল থেকে বেরিয়ে বেকুব বনে গেলুম। প্রথমটা বুঝতে পারি নি। হাসি, গাই, ফুটবল খেলি...আর জেলে যাওয়ার জ্ঞাত সদাই প্রস্তুত...বাবা দুঃখ করতেন, আমি বেপরোয়া...হুঁশ হলো যখন বাবা মারা গেলেন...চালাক খদ্দরিস্ট যারা ইতিমধ্যে তারা বেশ গুছিয়ে নিয়েছে...আমি যে হাঁদা সে হাঁদা...এক গুপ্তি খাইয়ে, সংস্থান কিছুই নেই...কি ভাবে যে দিন গেছে...মহাআজীর পদাঙ্ক অনুসরণ করলুম।

ঃ মানে !

ঃ One step enough for me, যা পাই তাই ধরি...সেই হৃদনের সময় তোর সঙ্গে দেখা দক্ষিণেশ্বরে...দাড়ি কামাবার পরস্যা ছিল না বলে রাখলুম solemn beard...solemn beard-এর বাংলা কি রে ?

ঃ আর্ধ দাড়ি।

ঃ সেই আর্ধ দাড়ির পরিস্থিতি থেকে একটু একটু করে এগিয়ে এখন অনেককেই পিছনে ফেলে এসেছি...সাধনা চাই রে দেব, সাধনা চাই। তবে তত্ত্বলাভ।

ঃ কি তত্ত্ব লাভ করলি ?

ঃ টাকা সত্য, টাকা সত্য, টাকা সত্য।

: হরিনাম ?

: টাকার ফিকিরে মাঝে মাঝে ব্যবহার করতে হয়—means বলা চলে, end নয়। টাকা সাধ্য, হরিনাম আর পাঁচটার মতো সাধন মাত্র।

: মরলে ?

: দুটোই মিথ্যা। তখন আর কে শুনতে আসছে “রাম নাম সত্য হৈ” ?... পিপাসা লেগেছে। গাড়ীতে বোতলটা খুলতে হবে...তুই আছিস ভালো...

: তাই নাকি ?

: যে গো-বেচারীটি ছিলি তেমনটিই আছিস। কোনো ঝামেলা নেই...না ঢালতে হয় টাকা, না ঢালতে হয় মদ...হাত কচলাবার বালাই নেই...আমড়া-গাছির হীনতা নেই...ভালো লাগে না আর...

: ভূতের মুখে রাম নাম ! না খোয়ারি ?

: Hangover হতে পারে, কিন্তু মনে শান্তি নেই...বিষাক্ত জীবন...ভুলে থাকবার চেষ্টা করি...পুরনো দিনগুলো—ইচ্ছে হয় ফিরে যাই...কি আনন্দেই ছিলুম...কিন্তু হেল্পলেস (helpless)...একটা দৈত্য যেন কান ধরে হিড়িহিড় করে টেনে নিয়ে যাচ্ছে...ট্রেনটা আসছে বোধ হয়।

: কোথায় যাচ্ছিস এখন ?

: ভাইজাগ। একটা কনট্রাকটের ব্যাপারে। কাল চিক্কায় নেবেছিলুম... ভাইজাগ থেকে মাদ্রাজ যেতে হবে...এই কুলি !...আচ্ছা ভাই, আসি.. au revoir...

\*

\*

\*

বিশাখাপত্তনম্...মনোরম স্থান। দাক্ষিণাত্য ভ্রমণের সময় মনটা ছিল ভূতগ্রস্ত... ভূতাপসরণ হয়ে ছিল একবার—বিশাখাপত্তনমে। লঞ্চ (Launch) যোগে বঙ্গোপসাগর দর্শন করবার সুযোগ ঘটেছিল...ভারতের মাটিতে তৈরী আমাদের দেহ-মন; মাতৃক্রোড়েই চিরদিন অবস্থিতি...কোল থেকে যখন নাবি তখন চিতাশয্যা...ব্যতিক্রম ঘটেছিল যখন বঙ্গোপসাগরে দাঁড়িয়ে মাতৃভূমিকে প্রণাম করি...কোল ছেড়ে মাকে দর্শন করার এক অপূর্ব অল্পভূতি; মাটির সঙ্গে মিশে আছি বলে আলাদা হয়ে মাটিকে দেখা সম্ভব হয় না; সেদিন মাটির সীমানা পেরিয়ে মাটিকে প্রণাম করে অভিবূত হয়েছিলুম বিশ্বয় ও আনন্দে...এই সেই পুণ্যভূমি ভারতবর্ষ ! রহস্যময় ভারত ! সমুদ্রমেখল ভারত ! মস্তকে গৌরীশঙ্কর...

বুকে অলকানন্দা... দেহে গিরি, বন, নদী, প্রান্তর, জনসমুদ্র...পাদদেশে ভারত  
মহাসাগর...মুনিগণসেবিত ভারত!... বেদাগ্নিমন্ত্রের পুণ্যস্থলী...যেথায় মন্দির  
হয়েছিল

অগ্নিম্ দ্বৈলে পুরোহিতং যজ্ঞস্ত দেবম্ ঋত্বিজম্  
হোতারং রত্নধাতমম্  
...যেথায় ঘোষিত হয়েছিল অমৃতের বাণী

শৃংখল বিধে অমৃতস্ত পুত্রা

আ য়ে ধামানি দিব্যানি তসুঃ

...অমৃতের পুত্র...কবির উশনা...বৃহস্পতি...যাজ্ঞবল্ক্য...শাণ্ডিল্য, পরাশর, ভৃগু...  
বৃদ্ধ...শঙ্কর...রামানুজ...নানক...চৈতন্য...রত্নধাতম...অসংখ্য মণিরত্নখচিত  
ভারতের তপঃগুরু জ্যোতির্ময়, শাস্ত্র রূপ...

\*

\*

\*

\*

পৃথিবীর শেব প্রান্ত অতিক্রম করে, দিক্‌চক্রবালের বিলীমমান সীমা পেরিয়ে এসে,  
আজ তেমনি পৃথিবী থেকে আলাদা হয়ে পৃথিবীর দিকে তাকাই...এই সেই  
বসুন্ধরা! রহস্যময়ী গোচারগভূমি! মন্দ্রতম ক্রীড়ামঞ্চের অপার্থিব হিল্লোল!  
জগন্নাথের দেহকান্তির অপূর্ব দীপ্তি!...অদ্ভুত ভাস্বরতা...যজ্ঞিষ্ঠ মহিমা...দিনান্তের  
আলোতে ভেসে ওঠে মাষ্টার মশায়ের আনন্দোচ্ছল আরক্ত মুখশ্রী, আনন্দরক্তিম  
ছড়িয়ে পড়ে আকাশে...দিগন্তে...সর্বত্র;...সোনার কাঠির পরশে প্লাটফর্মটি  
সোনা হয়ে জেগে উঠেছে...লাঠি ভর করে একজন ভিথিরী দাঁড়িয়ে...অর্ধভুক্ত  
অর্ধনগ্ন ভারতের চিরন্তন ফকীর, মুখে পরম তৃপ্তি, চোখ প্রেমে ছলছল...গাছটা  
ডুবে আছে নিজের প্রশান্ত সত্তায়...লাথোবছরের মাটির নীচে প্রোথিত ছিল  
ঐ চালাঘরটি, আজ মুগ্ধ আবরণ ফেলে দিয়ে চেয়ে আছে উদ্ভিন্ন আলোক  
মহিমায়...একটি কুকুর! আমার প্রিয় বন্ধু ডন...মহাপ্রস্থানের পথে চিরসাথী  
ধর্মরাজ...প্রসন্নগম্ভীর মুখে ডন এগিয়ে আসছে...বিশ্বজনের পায়ের ধুলো নিয়ে,  
ধর্মরাজ ডনের পায়ের মাথা লুটিয়ে অসংখ্য ঋণের দায় থেকে মুক্তি চাই...কোনো  
নালিশই আজ মনে স্থান পায় না—সকল স্বপ্নের অবসান...সকল অভিযোগের  
উপশান্তি...Heaven it is to be at peace with things...মাণিক উদ্ধার  
মতো বৃন্দাবন খুঁজে বেড়াচ্ছে—হাস্তোজ্জল মূর্তি, অকুণ্ঠ গতি, উদ্বেলিত প্রাণ...

দয়ালদা যমুনাতটে প্রেমবিফল...আনন্দে হরিগুণগান গেয়ে চলে ক্ষেপু

বদরিনারায়ণের দীপ্ত পথে...মাষ্টারমশায় ক্ষীরসমুদ্রে নিমজ্জিত...মহাত্মাজী  
 সরযুর জলে শাস্তি তর্পণ করেন...ছিন্নমস্তাকে আহুতি দেয় ক্ষুদ্রিরাম উৎসারিত  
 আলোর ঝলকে...সোক্রাতেস হেম্লকের মধুপানে আত্মহার্য...যিশুর বৃকে  
 প্রেমের বিগলিত ধারা...ফাদার ডেমিয়ন কানামাছি খেলেন তাঁর কুঠেদের নিয়ে...  
 অশ্বরীণী আত্মার ভিড়...Thy Kingdom come...Hallowed be Thy  
 Name...সাগরকূলের ঢেউ, গোষ্ঠবিহারীর সঙ্গে লুকোচুরি খেলে...মুখ তুলে চায়,  
 ডুব দিয়ে তলিয়ে যায়...রাধাচক্র ঘোরাচ্ছেন শ্যামরায়...round and round  
 and round...একস্তথা সর্বভূতান্তরাত্মা...Thy Kingdom come...মধুরং  
 মধুরং মধুরং...বৃন্দাবন...

বৃন্দাবনচন্দ্র নাম রাখে বৃন্দা দৃতী ;  
 বিরজা রাখিল নাম যমুনার পতি ;

\* \* \*

বনমালী নাম রাখে বনের হরিণী ;  
 রাসেশ্বর নাম রাখে যতেক মালিনী ;

\* \* \*

নারদ রাখিল নাম ভক্ত প্রাণধন ;  
 গজহস্তী নাম রাখে শ্রীমধুসূদন ;

\* \* \*

চন্দ্রাবলী নাম রাখে মোহনবংশীধারী ;  
 শ্রীরাধার প্রাণধন মুকুন্দমুরারি ;

\* \* \*

বাসুকি রাখিল নাম দেব সৃষ্টিস্থিতি ;  
 নটনারায়ণ নাম রাখিল সম্প্রতি ;  
 কৃষ্ণনাম রাখেন গর্গ ধ্যানেন্তে জানিয়া ;  
 অনন্ত রাখিল নাম অন্ত না পাইয়া

\* \* \*

ওঁ পূর্বমদঃ পূর্বমিদং পূর্ণাং পূর্বমুদচ্যতে  
 পূর্ণশ্চ পূর্ণমাদায় পূর্ণমেবাবশিষ্যতে ॥

১।

বৃন্দাবন...বৃন্দাবন...বৃন্দাবন...মধুরং...মধুরং...মধুরং...মধুবাতা ঋতায়তে মধু  
ক্ষরন্তি সিদ্ধবঃ...মধুমং পার্থিবং রজঃ...বৃন্দাবন...বৃন্দাবনপথযাত্রী...  
পরাণসথা হে বন্ধু আমার...

নমো নমন্তেহস্ত সহস্রকৃত্বঃ

পুনশ্চ ভূয়োইপি নমো নমন্তে...

ওঁ.....

.....ট্টনটা আসছে.

.....ব্রজের খেলা সাজ হলো.. ..

.....জগৎ ভেলা দিই ভাসিয়ে.....

ওঁ.....

.....প্রণবের একটানা সুরে বিশ্বজগৎ ডুবে যায়...

ওঁ.....:

.....রাধাচক্র স্থির.....

.....নটনারায়ণ...নটনারায়ণ...নটনারায়ণ...

দশদিক থেকে এগিয়ে আসে প্রশান্ত মহাসাগর—

—যথা নগ্নঃ স্তন্যমানাঃ সমুদ্রেহস্তং গচ্ছন্তি নামরূপে বিহায়—

...নারায়ণ...নারায়ণ...নারায়ণ...

•

তোঃ শান্তির অন্তরীক্ষ শান্তিঃ

পৃথিবী শান্তির আপঃ শান্তিঃ.. ..

শান্তিরেব শান্তিঃ.....

..... ওতশ্চ প্রোতশ্চ.....

.....শান্তির পারাবার.....

.. ..নারায়ণ.....























